

বীরবলের হালখাতা ।



শ্রীপ্রমথ চৌধুরী ।

১৩৩৫

উইক্লী নোট্‌স প্রিন্টিং ওয়ার্কস্
৩ নং হেষ্টিংস্ স্ট্রীট,
কলিকাতা ।

কলিকাতা ।

৩ নং হেষ্টিংস্ স্ট্রীট ।

শ্রী প্রমথ চৌধুরী এম, এ, বার-স্যাট-ল কর্তৃক
প্রকাশিত ।

কলিকাতা ।

উইক্লী নোটস প্রিন্টিং ওয়ার্কস্

৩ নং হেষ্টিংস্ স্ট্রীট ।

শ্রীসারদা প্রসাদ দাস দ্বারা মুদ্রিত

পূজ্যপাদ
শ্রীযুক্ত রবীন্দ্রনাথ ঠাকুর
শ্রীচরণকমলেষু ।


হাল খাতা ।

আজ পয়লা বৈশাখ । নূতন বৎসরের প্রথম দিন অপর দেশের অপর জাতের পক্ষে আনন্দ-উৎসবের দিন । কিন্তু আমরা সেদিন চিনি শুধু হাল খাতায় । বছরকার দিনে আমরা গত বৎসরের দেনাপাওনা লাভলোকসানের হিসেব নিকেশ করি, নূতন খাতা খুলি, এবং তার প্রথম পাতায় পুরণো খাতার জের টেনে আনি ।

বৎসরের পর বৎসর যায়, আবার বৎসর আসে, কিন্তু আমাদের নূতন খাতায় কিছু নূতন লাভের কথা থাকে না । আমরা এক হাল খাতা থেকে আর এক হালখাতায় শুধু লোকসানের ঘরটা বাড়িয়ে চলেছি । এ ভাবে আর কিছুদিন চললে যে আমাদের জাতকে দেউলে হতে হবে, সে বিষয়ে সন্দেহ নেই । লাভের দিকে শূন্য ও লোকসানের দিকে অঙ্ক ক্রমে বেড়ে যাচ্ছে, তবে আমরা ব্যবসা গুটিয়ে নিইনে কেন ? কারণ ভবের হাটে দোকানপাট কেউ স্বেচ্ছায় তোলে না, তার উপর আবার আশা আছে । লোকে বলে আশা না মলে যায় না ।

আমরা স্বজাতি সম্বন্ধে যে একেবারেই উদাসীন, তা নয় । গেল বৎসর, জাতি হিসেবে কায়স্থ বড় কি বৈজ্ঞ বড়, এই নিয়ে একটা তর্ক ওঠে । যেহেতু আমরা অপরের তুলনায় সকল হিসেবেই ছোট, সেইজন্য আমাদের নিজেদের মধ্যে কে ছোট কে বড়, এ নিয়ে বিবাদবিসম্বাদ করা ছাড়া আর উপায় নেই ।

মিজেকে বড় বলে পরিচয় দেবার মায়া আমরা ছাড়তে পারিনে । 'কায়স্থ বলেন আমি বড়, বৈজ্ঞ বলেন আমি বড় । শাস্ত্রে যখন নানা মূনির নানা মত, তখন সূক্ষ্ম বিচার করে এ বিষয়ে ঠিকটা সাব্যস্ত করা প্রায় অসম্ভব । বৈজ্ঞের ব্যবসায় চিকিৎসা,—প্রাণ-রক্ষা করা । ক্ষত্রিয়ের ব্যবসায় প্রাণবধ করা,—অতএব ক্ষত্রিয় নিঃসন্দেহ বৈজ্ঞ অপেক্ষা শ্রেষ্ঠ ! সুতরাং বৈজ্ঞ অপেক্ষা বড় হতে গেলে ক্ষত্রিয় হওয়া আবশ্যিক, এই মনে করে জনকতক কায়স্থসমাজের দলপতি ক্ষত্রিয় হবার জন্য বন্ধপরিকর হয়েছিলেন । এ শুভসংবাদ শুনে আমি একটু বিশেষ উৎফুল্ল হয়ে উঠেছিলুম ।

কারণ প্রথমতঃ আমি উন্নতির পক্ষপাতী ;—কোন লোক-বিশেষ কিম্বা জাতিবিশেষ আপন চেষ্টায় আপনার অবস্থার উন্নতি করতে উद्यোগী হয়েছে দেখলে কিম্বা শুনলে খুসী হওয়া আমার পক্ষে স্വാভাবিক । বিশেষতঃ বাঙ্গলার পক্ষে যখন জিনিসটে এতটা নূতন । নূতনের প্রতি মন কার না যায়, অন্ততঃ ছুদণ্ডের জন্যও । অবনতির জন্য কাউকেই আয়াস করতে হয় না । ও একটু চিলে দিলে আপনা হতেই হয় । জড়পদার্থের প্রধান লক্ষণ নিশ্চেষ্টতা, আর জড়পদার্থের প্রধান ধর্ম্ম অধোগতি—gravitation । সম্প্রতি প্রোফেসর জে, সি, বোস্ শুনতে পাই বৈজ্ঞানিক সমাজে প্রমাণ করেছেন যে, জড়ে ও জীবে আমাদের ভেদজ্ঞান শুধু ভ্রান্তিমাত্র । সে ভ্রান্তির মূল, আমাদের চর্ম্মচক্ষুর স্থূলদৃষ্টি । তিনি ইলেকট্রিসিটির আলোকের সাহায্যে দেখিয়ে দিয়েছেন যে, অবস্থা অনুসারে জড়পদার্থের ভাবভঙ্গী ঠিক সজীব পদার্থের অনুরূপ । প্রোফেসর বোস্  বলেন যে, ভারতবাসীর পক্ষে এ কিছু নতুন সত্য বা তথ্য

নয়, এ সত্য আমাদের পূর্বপুরুষদের কাছে বহুপূর্বের ধরা পড়েছিল, তাঁদের দিবা চক্ষু এড়িয়ে যেতে পারেনি ; এক কথায় এটা আমাদের খানদানী সত্য । আমি বলি, তার আর সন্দেহ কি ? এ সত্যের প্রমাণের জন্য বিজ্ঞানের সাহায্যও আবশ্যক নয়, এবং আমাদের পূর্বপুরুষদের কাছেও যাবার দরকার নেই । আমরা প্রতিদিনের ও সমগ্র জীবনের কাজে নিত্য প্রমাণ দিচ্ছি যে, আমাদের দেশে জড়ে ও জীবে কোন প্রভেদ নেই । সুতরাং কেউ যদি কার্যতঃ ওর উল্টটা প্রমাণ করতে উদ্বৃত্ত হয়, তাহলে নূতন জীবনের স্ফূর্তির একটু আভাস পাওয়া যায় ।

আমাদের বাঙ্গালী জাতির চিরলজ্জার কথা, আমাদের দেশে ক্ষত্রিয় নেই ! এর জন্য আমরা অপর বীরজাতির ধিক্কার, লাঞ্ছনা, গঞ্জনা চিরকাল নীরবে সহ্য করে আসছি । ঘোষ, বোস, মিত্র, দে, দত্ত, গুহ প্রভৃতির যে আমাদের এই চিরদিনের লজ্জা দূর, এই চিরদিনের অভাব মোচন করবার জ্ঞান কোমর বেঁধেছিলেন, তার জন্য তাঁরা স্বদেশহিতৈষী ও স্বজাতি-প্রিয় লোকমাত্রেরই রক্তজ্ঞাতার্জন হয়েছেন । দুঃখের বিষয় এই যে, কায়স্থেরা ক্ষত্রিয় হবার জন্য ঠিক পথটা অবলম্বন করেন নি, কাজেই অকৃতকার্য হয়েছেন । তাঁদের প্রথম ভুল, শাস্ত্রের প্রমাণের উপর নির্ভর করতে যাওয়া । কি ছিলুম সেইটে স্থির করতে হলে, পুরনো পাঁজিপুঁথি খুলে বসা আবশ্যক, কিন্তু কি হব তা স্থির করতে হলে ইতিহাসের সাহায্য অনাবশ্যক । ভবিষ্যতের বিষয় অতীত কি সাক্ষী দেবে ? বিশেষতঃ বিষয়টা হচ্ছে যখন ক্ষত্রিয় হওয়া, তখন গায়ের জোরই যথেষ্ট । কিন্তু আমাদের এমনি অভ্যাস খারাপ হয়েছে যে, আমরা শাস্ত্রের দোহাই না দিয়ে একপদও অগ্রসর হতে পারিনে ।

পৃথিবীতে মানুষের উপর মানুষ অত্যাচার করবার জন্য দুটি মারাত্মক জিনিসের সৃষ্টি করেছে, অস্ত্রশস্ত্র ও শাস্ত্র । আমরা অত্যন্ত নিরীহ, কারও সঙ্গে মুখে ছাড়া ঝগড়া বিবাদ করিনে, যেখানে লড়াই হচ্ছে সে পাড়া দিয়ে হাঁটিনে ;—এই উপায়ে যুদ্ধের অস্ত্রশস্ত্রকে বেবাক ফাঁকি দিয়েছি । যা কিছু বাকি আছে ডাক্তারের হাতে । আমরা চিরকুণ, স্ততরাং ডাক্তারকে ছেড়ে আমরা ঘর করতে পারিনে,—এই উভয় সঙ্কটে আমরা হোমিও-প্যাথি ও কবিরাজীর শরণাপন্ন হয়ে সে অস্ত্রশস্ত্রেরও সংস্পর্শ এড়িয়েছি । আমাদের যখন এত বুদ্ধি, তখন শাস্ত্রের হাত থেকে উদ্ধার পাই, এমন কি কিছু উপায় বার করতে পারিনে ?

কিন্তু ক্ষত্রিয় হওয়া কায়স্থের কপালে ঘটল না । রাজা বিনয়কৃষ্ণ দেব একে কায়স্থের দলপতি, তার উপর আবার গোষ্ঠীপতি, স্ততরাং তিনি যখন এ ব্যাপারে বিরোধী হলেন, তখন অপর পক্ষ ভয়ে নিরস্ত হলেন । যাঁরা ক্ষত্রিয় হতে উচ্চত, তাঁদের ভয় জিনিসটে যে আগে হতেই ত্যাগ করা নিতান্ত আবশ্যক, এ কথা বোঝা উচিত ছিল । ভীকতা ও ক্ষাত্রধর্ম যে একসঙ্গে থাকতে পারে না, এ কথা বোধ হয় তাঁরা অবগত ছিলেন না । তবে হয়ত মনে করেছিলেন, যখন মূর্খ ব্রাহ্মণে দেশ ছেয়ে গেছে, তখন ভীক ক্ষত্রিয়ে আপত্তি কি ? জড়পদার্থেরও একটা অন্তর্নিহিত শক্তি আছে, তার কার্য হচ্ছে চলৎশক্তি রহিত করা । আমাদের সমাজকে যে নাড়ানো যায় না, তার কারণ এই জড়শক্তিই আমাদের সমাজে সর্ববজয়ী শক্তি ।

রাজা বিনয়কৃষ্ণ যে কায়স্থসমাজের সংস্কারের উদ্যোগে বাধা দিয়েছেন, শুধু তাই নয়,—তিনি এবার সমগ্র ভারতবর্ষের জাতীয় সমাজসংস্কার-মহাসভার সভাপতির আসন থেকে এই

মত ব্যক্ত করেছেন যে, হিন্দুসমাজে অনেক দোষ থাকতে পারে, এবং সে দোষ না থাকলে সমাজের উপকার হতে পারে, অতএব সমাজসংস্কারের চেষ্টা করা অকর্তব্য। সমাজের স্থিতি ও গঠন হয়েছে অতীতে, স্মৃতির তাৎপর্য তার সংস্কার ও পরিবর্তন হবে ভবিষ্যতে বর্তমানের কোনও কর্তব্য নেই, কোনও দায়িত্ব নেই। সমাজ গড়ে মানুষে, ইচ্ছে করলে ভাঙতে পারে মানুষে,—অতএব মানুষে তার সংস্কার করতে পারে না, সে তার সময়ের হাতে, অন্ধ প্রকৃতির হাতে। এ মত যে অস্বীকার করে, সে Burke পড়েনি।

আজকাল এক শ্রেণীর লোক আছেন যারা সমাজের অবস্থা, দেশের অবস্থা, নিজেদের অবস্থা, এই সব বিষয়েই একটু আধটু চিন্তা করে থাকেন, এবং শেষে এই সিদ্ধান্তে উপস্থিত হন যে, সাবধানের মার নেই। এঁরা সব জিনিসই দীর্ঘে স্বাস্থ্য ঠাণ্ডাভাবে করবার পক্ষপাতী। এঁরা রোখ করে স্তম্ভে এগোতে চান না বলে, কেউ যেন মনে না ভাবেন যে এঁরা পিছনে ফিরতে চান। যেখানে আছি সেখানে থাকাই এঁরা বুদ্ধির কাজ মনে করেন। বরং একটু অগ্রসর হওয়াই এঁরা অনুমোদন করেন,—কিন্তু সে বড় আস্তে, বড় সন্তর্পণে। যে হাড়বান্ধালী ভাব অধিকাংশ লোকের ভিতর অব্যক্তভাবে আছে, এঁরা কেউ কেউ পরিষ্কার স্তম্ভের ইংরাজীতে তা ব্যক্ত করেন। সংক্ষেপে এঁদের বক্তব্য এই যে, জীবনের গাধাবোট উন্নতির ক্ষীণ স্রোতে ভাসাও, সে একটু একটু করে অগ্রসর হবে, যদিচ চোখে দেখতে মনে হবে চলছে না। কিন্তু খবরদার লগি মেরোনা, দাঁড় ফেলোনা, গুণ টেনো না, পাল খাটিয়ো না,—শুধু চুপটি কবে হালটি ধরে বসে থেকো। এই মতের নাম হচ্ছে বিজ্ঞতা। বিজ্ঞতার আমাদের দেশে বড় আদর, বড় মাণ্ড। গাধাবোট চলে না দেখে,

লোকে মনে করে না জানি তাতে কত অগাধ মাল বোঝাই আছে !

বিজ্ঞতা জিনিসটে আমাদের বর্তমান অবস্থার একটা ফল মাত্র। এ অবস্থাকে ইংরেজীতে বলে Transition period, অর্থাৎ এখন আমাদের জাতির বয়ঃসন্ধি উপস্থিত। বিজ্ঞাপতি ঠাকুর বয়ঃসন্ধির এই বলে' বর্ণনা করেছেন যে “লখইতে না পার জেঠ কি কনৈঠ,”—এ জোষ্ঠ কি কনিষ্ঠ চেনা যায় না। কাজেই আমরা কাজে ও কথায় পরিচয় দিই হয় ছেলেমীর, নয় জ্যাঠামীর, নাহয় এক সঙ্গে দুয়ের। এই জ্যাঠাছেলের ভাবটা আমাদের বিশেষ মনঃপূত। ছোট ছেলের ছুরন্ত ভাব আমরা মোটেই ভালবাসিনে। তার মুখে পাকা পাকা কথা শোনাই আমাদের পছন্দসই। এই জ্যাঠামীরই ভদ্র নাম বিজ্ঞতা।

ধরাকে সরাসরি জ্ঞান করা আমরা সকলেই উপহাসের বিষয় মনে করি, কিন্তু সরাকে ধরা জ্ঞান করা আমাদের কাছে একটা মহৎ জিনিস। কারণ ও মনোভাবটি না থাকলে বিজ্ঞ হওয়া যায় না। Burke French Revolution-রূপ বিপুল রাজ্যবিপ্লবের সমালোচনাসূত্রে যে মতামত ব্যক্ত করেছেন, সেই মতামত বালবিধবাকে জোর করে বিধবা রাখবার স্বপক্ষে, ও কোলিগপ্রথা বজায় রাখবার স্বপক্ষে প্রয়োগ করলে যে আর পঁচজনের হাসি পাবে না কেন, তা বুঝতে পারিনে।

আমাদের সমাজ ও সামাজিক নিয়ম বহুকাল হতে চলে আসছে, আচারে ব্যবহারে আমরা অভ্যাসের দাস। আমাদের শিক্ষা নূতন, সে শিক্ষায় আমাদের মনের বদল হয়েছে। আমাদের সামাজিক ব্যবহারে ও আমাদের মনের ভাবে মিল নেই। ঘাঁরা মনকে মানুষের সর্ব্বশ্রেষ্ঠ অংশ বলে বিশ্বাস

করেন, তাঁদের সহজেই ইচ্ছা হয় যে ব্যবহার মনের অনুরূপ করে আনি। অপর পক্ষে যঁারা দুর্বল, ভীৰু ও অক্ষম, অগচ বুদ্ধিমান,—তাঁরা চেষ্টা করেন তর্কযুক্তির সাহায্যে মনকে ব্যবহারের অনুরূপ করে আনি। এই উদ্দেশ্যে যে তর্কযুক্তি খুঁজে পেতে বার করা হয়, তারি নাম বিজ্ঞতাব! আমরা বাঙ্গালীজাতি সহজেই দুর্বল, ভীৰু ও অক্ষম, স্তবরাং স্তবাবের বলে আমরা না ভাব চিন্তে বিজ্ঞের পদানত হই,—এই হচ্ছে সার কথা।

বৈশাখ ১৩০৯।

কথার কথা ।

--:--

(১)

সপ্রতি বাঙ্গলা ব্যাকরণ নিয়ে আমাদের ক্ষুদ্র সাহিত্যসমাজে একটা বড় রকম বিবাদের সূত্রপাত হয়েছে । আমি বৈয়াকরণ নই, হবারও কোন ইচ্ছে নেই । আলেক্জান্দ্রিয়ার বিখ্যাত লাইব্রেরী মুসলমানরা ভগ্নসাৎ করেছে বলে সাধারণতঃ লোকে তুংথ করে থাকে, কিন্তু প্রসিদ্ধ ফরাসী লেখক Montaigne এর মনোভাব এই যে, ও ছাই গেছে বাঁচা গেছে ! কেননা সেখানে অভিধান ও ব্যাকরণের এক লক্ষ গ্রন্থ ছিল । “বাবা ! শুধু কথার উপর এত কথা !” আমিও Montaigne এর মতে সায় দিই । যেহেতু আমি ব্যাকরণের কোন ধার ধারিনে, সুতরাং কোন ঋষিধাণমূলক হবার জ্ঞা এ বিচারে আমার যোগ দেবার কোন আবশ্যক ছিল না । কিন্তু তর্ক জিনিসটে আমাদের দেশে তরল পদার্থ, দেখতে না দেখতে বিষয় হতে বিষয়ান্তরে অবলীলাক্রমে গড়িয়ে যাওয়াটাই তার স্বভাব । তর্কটা সুরু হয়েছিল ব্যাকরণ নিয়ে, এখন মাঝামাঝি অবস্থায় অলঙ্কার শাস্ত্রে এসে পৌঁচেছে, শেষ হবে বোধ হয় বৈরাগ্যে । সে যাই হোক, পণ্ডিত শরচ্চন্দ্র শাস্ত্রী মহাশয় এই মত প্রচার করছেন যে, আমরা লেখায় যত অধিক সংস্কৃত শব্দ আমদানি করব, ততই আমাদের সাহিত্যের মঙ্গল । আমার ইচ্ছে বাঙ্গলা

সাহিত্য বাঙ্গলা ভাষাতেই লেখা হয় । দুর্বলের স্বভাব, নিজের পায়ের উপর ভর দিয়ে দাঁড়াতে পারে না । বাইরের একটা আশ্রয় আঁকড়ে ধরে রাখতে চায় । আমরা নিজের উন্নতির জন্তে পরের উপর নির্ভর করি । স্বদেশের উন্নতির জন্তে আমরা বিদেশীর মুখাপেক্ষী হয়ে রয়েছি, এবং একই কারণে নিজভাষার শ্রীবৃদ্ধির জন্তে অপর ভাষার সাহায্য ভিক্ষা করি । অপর ভাষা যতই শ্রেষ্ঠ হোক না কেন, তার অঞ্চল ধরে বেড়ানোটা কি মনুষ্যত্বের পরিচয় দেয় ? আমি বলি আমরা নিজেকে একবার পরীক্ষা করে দেখি না কেন ? ফল কি হবে কেউ বলতে পারে না, কারণ কোন সন্দেহ নেই যে, সে পরীক্ষা আমরা পূর্বে কখনও করিনি । যাক্ ওসব বাজে কথা । আমি বাঙ্গলাভাষা ভালবাসি, সংস্কৃতকে ভক্তি করি । কিন্তু এ শাস্ত্র মানিনে যে, যাকে শ্রদ্ধা করি তারই শ্রদ্ধা করতে হবে । আমার মত ঠিক, কিন্না শাস্ত্রী মহাশয়ের মত ঠিক, সে বিচার আমি করতে বসিনি । শুধু তিনি যে যুক্তি দ্বারা নিজের মত সমর্থন করতে উদ্বৃত্ত হয়েছেন, তাই আমি যাচিয়ে দেখতে চাই ।

(২)

কেউ হয়ত প্রথমেই জিজ্ঞাসা করতে পারেন, বাঙ্গলাভাষা কাকে বলে ? বাঙ্গালীর মুখে এ প্রশ্ন শোভা পায় না ! এ প্রশ্নের সহজ উত্তর কি এই নয় যে, যে ভাষা আমরা সকলে জানি, শুনি, বুঝি ; যে ভাষায় আমরা ভাবনা, চিন্তা, সুখ, দুঃখ বিনা আয়াসে বিনা ক্লেশে বহুকাল হতে প্রকাশ করে আসছি, এবং সম্ভবতঃ আরও বহুকাল পর্য্যন্ত প্রকাশ করব, সেই ভাষাই

বাঙ্গলাভাষা ? বাঙ্গলাভাষার অস্তিত্ব প্রকৃতিবাদ অভিধানের ভিতর নয়, বাঙ্গালীর মুখে । কিন্তু অনেকে দেখতে পাই এই অতি সহজ কথাটা স্বীকার করতে নিতান্ত কুণ্ঠিত । শুনতে পাই কোন কোন শাস্ত্রজ্ঞ মৌলবী বলে থাকেন যে, দিল্লীর বাদসাহ যখন উর্দুভাষা সৃষ্টি করতে বসলেন, তখন তাঁর অভি-প্রায় ছিল একেবারে খাঁটি ফার্সীভাষা তৈয়ারী করা, কিন্তু বেচারি হিন্দুদের কান্নাকাটিতে রূপাপরবশ হয়ে হিন্দীভাষার কতকগুলি কথা উর্দুতে ঢুকতে দিয়েছিলেন ! আমাদের মধ্যেও হয়ত শাস্ত্রজ্ঞ পণ্ডিতদের বিশ্বাস যে, আদিশূরের আদিপুরুষ যখন গোড়ভাষা সৃষ্টি করতে উদ্যত হলেন, তখন তাঁর সঙ্কল্প ছিল যে ভাষাটাকে বিলকুল সংস্কৃত ভাষা করে তোলেন, শুধু গোড়বাসীদের প্রতি পরম অনুকম্পাবশতঃ তাদের ভাষার গুটিকতক কথা বাঙ্গলাভাষায় ব্যবহার করতে অনুমতি দিয়ে-ছিলেন । এখন যাঁরা সংস্কৃতবলুল ভাষা ব্যবহার করবার পক্ষপাতী, তাঁরা ঐ যে গোড়ায় গলদ হয়েছিল তাই শুধরে নেবার জগ্গে উৎকণ্ঠিত হয়েছেন । আমাদের ভাষায় অনেক অবিকৃত সংস্কৃত শব্দ আছে, সেইগুলিকেই ভাষার গোড়াপত্তন ধরে নিয়ে, তার উপর বত পার আরও সংস্কৃত শব্দ চাপাও—কালক্রমে বাঙ্গলায় ও সংস্কৃতে দ্বৈতভাব থাকবে না । আসলে জ্ঞানীলোকের কাছে এখনো নেই । মাতৃভাষার মায়ায় বদ্ধ বলে, আমরা সংস্কৃত বাঙ্গলায় অদ্বৈতবাদী হয়ে উঠতে পারছি নে । বাঙ্গলায় ফার্সী কথার সংখ্যাও বড় কম নয়, ভাগ্যক্রমে ফার্সী-পড়া বাঙ্গালীর সংখ্যা বড় কম । নৈলে সম্ভবতঃ তাঁরা বলতেন বাঙ্গলাকে ফার্সীবলুল করে তোল । মধ্যে থেকে আমাদের মা সরস্বতী, কাশী যাই কি মক্কা যাই, এই ভেবে আবুল হতেন ।

এক একবার মনে হয় ও উভয় সঙ্কট ছিল ভাল, কারণ একে-
বারে পণ্ডিতমণ্ডলীর হাতে পড়ে মার আশু কাশীপ্রাপ্তি হবারই
অধিক সম্ভাবনা ।

(৩)

এই প্রসঙ্গে পণ্ডিতপ্রবর সতীশচন্দ্র বিজ্ঞাভূষণ মহাশয়ের
প্রথম বক্তব্য এই যে, সাহিত্যের উৎপত্তি মানুষের অমর হবার
ইচ্ছায় । যা কিছু বর্তমান আছে, তার কুলুজি লিখতে গেলেই,
গোড়ার দিক্টে গোঁজামিলন দিয়ে সারতে হয় । বড় বড়
দার্শনিক ও বৈজ্ঞানিক, যথা শঙ্কর Spencer প্রভৃতিও এই
উপায় অবলম্বন করেছেন । সুতরাং কোনও জিনিসের উৎ-
পত্তির মূল নির্ণয় করতে যাওয়াটা বৃথা পরিশ্রম । কিন্তু এ
কথা নির্ভয়ে বলা যেতে পারে যে, আর যা হতেই হোক, অমর
হবার ইচ্ছে থেকে সাহিত্যের উৎপত্তি হয়নি । প্রথমতঃ,
অমরত্বের ঝুঁকি আমরা সকলে সামলাতে পারিনে, কিন্তু কলম
চালাবার জ্ঞান আমাদের অনেকেরই আঙ্গুল নিস্পিস্ করে ।
যদি ভাল মন্দ মাঝারি আমাদের প্রতি কথা, প্রতি কাজ
চিরস্থায়ী হবার তিলমাত্র সম্ভাবনা থাকত, তাহলে মনে করে
দেখুন ত আমরা কজনে মুখ ঝলতে কিম্বা হাত তুলতে সাহসী
হতুম ? অমরত্বের বিভীষিকা চোখের উপর থাকলে, আমরা
যা perfect তা ব্যতীত কিছু বলতে কিম্বা করতে রাজি হতুম
না । আর আমরা সকলেই মনে মনে জানি যে, আমাদের অতি
ভাল কাজ, অতি ভাল কথাও perfection এর অনেক নীচে ।
আসল কথা, মৃত্যু আছে বলেই বেঁচে সুখ । পুণ্যক্ষয় হবার

পর আবার মর্ত্যলোকে ফিরে আসবার সম্ভাবনা আছে বলেই দেবতার অমরপুরীতে স্ফূর্তিতে বাস করেন, তা নাহলে স্বর্গও তাঁদের অসহ্য হত। সে যাই হোক, আমরা মানুষ, দেবতা নই,— সুতরাং আমাদের মুখের কথা দৈববাণী হবে, এ ইচ্ছা আমাদের মনে স্വാভাবিক নয়।

দ্বিতীয়তঃ, যদি কেউ শুধু অমর হবার জগা লিখব, এই কঠিন পণ করে বসেন,—তাহলে সে ইচ্ছা সফল হবার আশা কত কম বুঝতে পারলে, তিনি যদি বুদ্ধিমান হন তাহলে লেখা হতে নিশ্চয়ই নিবৃত্ত হবেন। কারণ সকলেই জানি যে, হাজারে নশ' নিরনবদই জনের সরস্বতী মৃতবৎসা। তা ছাড়া সাহিত্য জগতে মড়ক অর্ধপ্রহর লেগে রয়েছে। লাখে এক বাঁচে, বাদ-বাকির প্রাণ ছ'দণ্ডের জন্তুও নয়। চরক পরামর্শ দিয়েছেন, যে দেশে মহামারীর প্রকোপ, সে দেশ ছেড়ে পলায়ন করাই কর্তব্য। অমর হবার ইচ্ছায় ও আশায়, কে সে রাজ্য প্রবেশ করতে চায় ?

(৪)

বিজ্ঞানভ্রমণ মহাশয়ের আরও বক্তব্য এই যে, জীবন্ত ভাষার ব্যাকরণ করতে নেই, তাহলেই নির্দোষ মরণ। সংস্কৃত মৃতভাষা, কারণ ব্যাকরণের নাগপাশে বদ্ধ হয়ে সংস্কৃত প্রাণভাগ করেছে। আরও বক্তব্য এই যে, মুখের ভাষার ব্যাকরণ নেই, কিন্তু লিখিত ভাষার ব্যাকরণ নইলে চলে না। প্রমাণ—সংস্কৃত শুধু অমরত্ব লাভ করেছে, পালি প্রভৃতি প্রাকৃত ভাষা একেবারে চিরকালের জন্তু মরে গেছে। অর্থাৎ, এক কথায় বলতে গেলে, যে কোন

ভাষারই হোক না কেন, চিরকালের জন্য বাঁচতে ছলে আগে মরা দরকার । তাই যদি হয়, তাহলে বাঙ্গলা যদি ব্যাকরণের দড়ি গলায় দিয়ে আত্মহত্যা করতে চায়, তাতে বিদ্যাভূষণ মহাশয়ের আপত্তি কি ? তাঁর মতানুসারে ত যমের দুয়ের দিয়ে অমরপুরীতে ঢুকতে হয় ! তিনি আরও বলেন যে, পালি প্রভৃতি প্রাকৃত ভাষায় হাজার হাজার গ্রন্থ রচিত হয়েছে, কিন্তু প্রাকৃত সংস্কৃত নয় বলে পালি প্রভৃতি ভাষা লুপ্ত হয়ে গেছে । অতএব, বাঙ্গলা যতটা সংস্কৃতের কাচাকাছি নিয়ে আসতে পার, ততই তার মঙ্গল । যদি বিদ্যাভূষণ মহাশয়ের মত সত্য হয়, তাহলে সংস্কৃতবল্লল বাঙ্গলায় লেখা কেন, একেবারে সংস্কৃত ভাষাতেই ত আমাদের লেখা করবো । কারণ তাহলে অমর হবার বিষয় আর কোনও সন্দেহ থাকে না । কিন্তু একটা কথা আমি ভাল বুঝতে পারছি নে : পালি প্রভৃতি ভাষা মৃত সত্য, কিন্তু সংস্কৃতও কি মৃত নয় ? ও দেবভাষা অমর হতে পারে, কিন্তু ইহলোকে নয় । এ সংসারে মৃত্যুর হাত কেউ এড়াতে পারে না । পালিও পারেনি, সংস্কৃতও পারে নি, আমাদের মাতৃ-ভাষাও পারবে না । তবে যে ক’দিন বেঁচে আছে, সে ক’দিন সংস্কৃতের মৃতদেহ স্কন্ধে নিয়ে বেড়াতে হবে, বাঙ্গলার উপর এ কঠিন পরিশ্রমের বিধান কেন ? বাঙ্গলার প্রাণ একটুখানি, অতুখানি চাপ সইবে না ।

(৫)

এ বিষয়ে শাস্ত্রী মহাশয়ের বল্লবতা যদি ভুল না বুঝে থাকি, তাহলে তাঁর মত সংক্ষেপে এই দাঁড়ায় যে, বাঙ্গলাকে প্রায়

সংস্কৃত করে আনলে, আসামী হিন্দুস্থানী প্রভৃতি বিদেশী লোক-
দের পক্ষে বঙ্গভাষা শিক্ষাটা অতি সহজসাধ্য ব্যাপার হয়ে
উঠবে। দ্বিতীয়তঃ, অণ্ড ভাষার যে সুবিধাটুকু নেই, বাঙ্গলার
তা আছে,—যে-কোন সংস্কৃত কথা যেখানে হোক লেখায় বসিয়ে
দিলে বাঙ্গলা ভাষার বাঙ্গলাই নষ্ট হয় না। অর্থাৎ যারা
আমাদের ভাষা জানেন না, তাঁরা যাতে সহজে বুঝতে পারেন
সেই উদ্দেশ্যে, সাধারণ বাঙ্গালীরপক্ষে আমাদের লিখিত ভাষা
দুর্বোধ্য করে তুলতে হবে! কথাটা এতই অদ্ভুত যে, এর
কি উত্তর দেব ভেবে পাওয়া যায় না। সুতরাং তাঁর অপর
মতটি ঠিক কিনা দেখা যাক। আমাদের দেশে ছোট ছেলেদের
বিশ্বাস যে, বাঙ্গলা কথার পিছনে অনুস্বর জুড়ে দিলে সংস্কৃত
হয়, আর প্রাপ্তবয়স্ক লোকদের মত যে, সংস্কৃত কথার অনুস্বর
বিসর্গ ছোঁটে দিলেই বাঙ্গলা হয়। দুটো বিশ্বাসই সমান সত্য।
বাঁদুরের লাজ কেটে দিলেই কি মানুষ হয় : শাস্ত্রী মহাশয়
উদাহরণ স্বরূপে বলেছেন, হিন্দীতে “ঘরমে যায়গা” চলে, কিন্তু
“গৃহমে যায়গা” চলে না,—ওটা ভুল হিন্দী হয়। কিন্তু বাঙ্গলায়
ঘরের বদলে গৃহ যেখানে সেখানে ব্যবহার করা যায়। অর্থাৎ
সকল ভাষার একটা নিয়ম আছে, শুধু বাঙ্গলা ভাষার নেই।
যার যা পুঁসী লিখতে পারি, ভাষা বাঙ্গলা হতেই বাধ্য। বাঙ্গলা
ভাষার প্রধান গুণ যে, বাঙ্গালী কথায় লেখায় যথেষ্টাচারী
হতে পারে! শাস্ত্রী মহাশয়ের নির্বচিত কথা দিয়েই তাঁর ও
ভুল ভাঙ্গিয়ে দেওয়া যায়। “ঘরের ছেলে ঘরে যাও, ঘরের
ভাত বেশী করে খেয়ো”, এই বাক্যটি হতে কোথাও “ঘর”
তুলে দিয়ে “গৃহ” স্থাপনা করে দেখুন ত কাণেই বা কেমন
শোনায়, আব মানেনই বা কত পরিদ্বার হয় ?

(৬)

আসল কথাটা কি এই নয় ? যে লিখিত ভাষায় আর মুখের ভাষায় মূলে কোন প্রভেদ নেই । ভাষা দুয়েরই এক, শুধু প্রকাশের উপায় ভিন্ন । একদিকে স্বরের সাহায্যে, অপর দিকে অক্ষরের সাহায্যে । বাণীর বসতি রসনায় । শুধু মুখের কথাই জীবন্ত । যতদূর পারা যায়, যে ভাষায় কথা কই সেই ভাষায় লিখতে পারলেই লেখা প্রাণ পায় । আমাদের প্রধান চেষ্টার বিষয় হওয়া উচিত কথায় ও লেখায় ঐক্য রক্ষা করা, ঐক্য নষ্ট করা নয় ! ভাষা মানুষের মুখ হতে কলমের মুখে আসে, কলমের মুখ হতে মানুষের মুখে নয় । উণ্টোটা চেষ্টা করতে গেলে মুখে শুধু কালি পড়ে । কেউ কেউ বলেন যে, আমাদের ভাবের ঐশ্বর্য্য এতটা বেড়ে গেছে যে বাপ ঠাকুর-দাদার ভাষার ভিতর তা আর ধরে রাখা যায় না । কথাটা ঠিক হতে পারে, কিন্তু বাঙ্গলা সাহিত্যে তার বড় একটা প্রমাণ পাওয়া যায় না । কনাদের মতে “অভাব” একটা পদার্থ । আমি হিন্দুসন্তান, কায়েই আমাকে বৈশেষিক দর্শন মানতে হয় ; সেই কারণেই আমি স্বীকার করতে বাধ্য যে, প্রচলিত বাঙ্গলা সাহিত্যেও অনেকটা পদার্থ আছে । ইংরাজী সাহিত্যের ভাব, সংস্কৃত ভাষার শব্দ, ও বাঙ্গলা ভাষার ব্যাকরণ,—এই তিন চিহ্ন মিলিয়ে যে খিচুড়ি তৈরী করি, তাকেই আমরা বাঙ্গলা সাহিত্য বলে থাকি । বলা বাহুল্য ইংরেজী না জানলে তার ভাব বোঝা যায় না । আমার এক এক সময়ে সন্দেহ হয় যে, হয়ত বিদেশের ভাব ও পুরাকালের ভাষা, এই দুয়ের আওতার ভিতর পড়ে বাঙ্গলা সাহিত্য ফুটে উঠতে পারছে না । এ কথা আমি অবশ্য মানি যে, আমাদের ভাষায় কতক পরিমাণে নতুন কথা

আনবার দরকার আছে। যার জীবন আছে, তারই প্রতিদিন খোরাক যোগাতে হবে। আর আমাদের ভাষার দেহপুষ্টি করতে হলে প্রধানতঃ অমরকোষ থেকেই নতুন কথা টেনে আনতে হবে। কিন্তু যিনি নতুন সংস্কৃত কথা ব্যবহার করবেন, তাঁর এইটি মনে রাখা উচিত যে, তাঁর আবার নতুন করে প্রতি কথাটির প্রাণ-প্রতিষ্ঠা করতে হবে; তা যদি না পারেন তাহলে বঙ্গ সরস্বতীর কাণে শুধু পরের সোণা পরান হবে। বিচার না করে একরাশ সংস্কৃত শব্দ জড় করলেই, ভাষারও শ্রীবৃদ্ধি হবে না, সাহিত্যেরও গৌরব বাড়বে না, মনোভাবও পরিস্কার করে ব্যক্ত করা হবে না। ভাষার এখন শানিয়ে ধার বার করা আবশ্যিক, তার বাড়ান নয়। যে কথাটা নিতান্ত নাহলে নয়, সেটি যেখান থেকে পার নিয়ে এসে, যদি নিজের ভাষার ভিতর তাকে খাপ খাওয়াতে পার। কিন্তু তার বেশী ভিক্ষে, ধার, কিস্তি চুরি করে এনে না। ভগবান পবননন্দন বিশাল্যকরগী আনতে গিয়ে আস্ত গন্দমাদন যে সমূলে উৎপাটন করে এনেছিলেন, তাতে তাঁর অসাধারণ ক্ষমতার পরিচয় দিয়েছেন—কিন্তু বুদ্ধির পরিচয় দেন নি।

জ্যৈষ্ঠ ১৩০৯।

আমরা ও তোমরা ।

(১)

তোমরা ও আমরা বিভিন্ন । কারণ তোমরা তোমরা, এবং আমরা আমরা ! তা যদি না হত, তাহলে ইউরোপ ও এশিয়া এ দুই, দুই হত না,—এক হত । আমি ও তুমি প্রভেদ পাক্ত না । আমরা ও তোমরা উভয়ে মিলে, হয় শুধু আমরা, হতুম, নাহয় শুধু তোমরা হতে ।

(২)

আমরা পূর্ব, তোমরা পশ্চিম । আমরা আরম্ভ, তোমরা শেষ । আমাদের দেশ মানব সভ্যতার সূতিকাগৃহ, তোমাদের দেশ মানবসভ্যতার শ্মশান । আমরা উষা, তোমরা গোধূলি । আমাদের অন্ধকার হতে উদয়, তোমাদের অন্ধকারের ভিতর

(৩)

আমাদের বং কালো, তোমাদের বং সাদা । আমাদের বসন সাদা, তোমাদের বসন কালো । তোমরা খেতাজ ঢেকে রাখো, আমরা কৃষ্ণদেহ খলে রাখি । আমরা খাই সাদা জল, তোমরা খাও লাল পানি । আমাদের আকাশ আঁগুন, তোমাদের আকাশ ধোঁয়া । নীল তোমাদের স্ত্রীলোকের চোখে, সোনা আমাদের স্ত্রীলোকের মাথায়; নীল আমাদের গুণ্ঠে, সোনা আমাদের মাটির নীচে । তোমাদের ও আমাদের অনেক

বর্ণভেদ । ভুলে যেন না যাই যে, তোমাদের দেশ ও আমাদের দেশের মধ্যে কালাপানির ব্যবধান । কালাপানি পার হলে আমাদের জাত যায়, না হলে তোমাদের জাত থাকে না ।

(৪)

তোমরা দৈর্ঘ্য, আমরা প্রস্থ । আমরা নিশ্চল, তোমরা চঞ্চল । আমরা ওজনে ভারি, তোমরা দামে চড়া । অপরকে বশীভূত করবার তোমাদের মতে একমাত্র উপায় গায়ের জোর, আমাদের মতে একমাত্র উপায় মনের নরম ভাব । তোমাদের পুরুষের হাতে ইস্পাত, আমাদের মেয়েদের হাতে লোহা । আমরা বাচাল, তোমরা বধির । আমাদের বুদ্ধি সূক্ষ্ম—এত সূক্ষ্ম যে, আছে কি না বোঝা কঠিন । তোমাদের বুদ্ধি স্থূল,—এত স্থূল যে, কতখানি আছে তা বোঝা কঠিন । আমাদের কাছে যা সত্য, তোমাদের কাছে তা কল্পনা,—আর তোমাদের কাছে যা সত্য, আমাদের কাছে তা স্বপ্ন ।

(৫)

তোমরা বিদেশে ছুটে বেড়াও, আমরা ঘরে শুয়ে থাকি । আমাদের সমাজ স্থাবর, তোমাদের সমাজ জঙ্গম । তোমাদের আদর্শ জানোয়ার, আমাদের আদর্শ উদ্ভিদ । তোমাদের নেশা মদ, আমাদের নেশা আফিং । তোমাদের সুখ ছটফটানিতে, আমাদের সুখ বিমূর্নিতে । সুখ তোমাদের ideal, দুঃখ আমাদের real । তোমরা চাও দুনিয়াকে জয় করবার বল, আমরা চাই দুনিয়াকে ফাঁকি দেবার ছল । তোমাদের লক্ষ্য আরাম, আমাদের লক্ষ্য বিরাম । তোমাদের নীতির শেষ কথা শ্রম, আমাদের আশ্রম ।

(৬)

তোমাদের মেয়ে প্রায় পুরুষ, আমাদের পুরুষ প্রায় মেয়ে ।
বুড়ো হলেও তোমাদের ছেলেরি যায় না,—ছেলোবেলাও আমরা
বুড়োনিতে পবিপূর্ণ । আমরা বিয়ে করি যৌবন না আস্তে,
তোমরা বিয়ে কর যৌবন গত হলে । তোমরা যখন সবে
গৃহপ্রবেশ কর, আমরা তখন বনে গাই ।

(৭)

তোমাদের আগে ভালবাসা, পরে বিবাহ,—আমাদের আগে
বিবাহ, পরে ভালবাসা । আমাদের বিবাহ “হয়,” তোমরা
বিবাহ “কর ।” আমাদের ভাষায় মুখা ধাতু “ভু,” তোমাদের
ভাষায় “কু ।” তোমাদের রমণীদের রূপের আদর আছে,
আমাদের রমণীদের গুণের কদর নেই । তোমাদের স্বামীদের
পাণ্ডিত্য চাই অর্থশাস্ত্রে, আমাদের স্বামীদের পাণ্ডিত্য চাই
অলঙ্কারশাস্ত্রে ।

(৮)

অর্থাৎ এক কথায়, তোমরা যা চাও আমরা তা চাইনে,
আমরা যা চাই তোমরা তা চাও না,—তোমরা যা পাও আমরা
তা পাইনে, আমরা যা পাই তোমরা তা পাও না । আমরা চাই
এক, তোমরা চাও অনেক । আমরা একের বদলে পাই শূন্য,
তোমরা অনেকের বদলে পাও একের পিঠে অনেক শূন্য ।
তোমাদের দার্শনিক চায় যুক্তি, আমাদের দার্শনিক চায় মুক্তি ।
তোমরা চাও বাহির, আমরা চাই ভিতর । তোমাদের পুরুষের

জীবন বাড়ীর বাইরে, আমাদের পুরুষের মরণ বাড়ীর ভিতর ।
 আমাদের গান, আমাদের বাজনা তোমাদের মতে শুধু বিলাপ ;
 তোমাদের গান, তোমাদের বাজনা আমাদের মতে শুধু প্রলাপ ।
 তোমাদের বিজ্ঞানের উদ্দেশ্য সব জেনে কিছু না জানা, আমাদের
 জ্ঞানের উদ্দেশ্য কিছু না জেনে সব জানা । তোমাদের পরলোক
 স্বর্গ, আমাদের ইহলোক নরক । কায়েই পরলোক তোমাদের
 গম্য, ইহলোক আমাদের ত্যজ্য । তোমাদের ধর্ম্মমতে আত্মা
 অনাদি নয় কিন্তু অনন্ত, আমাদের ধর্ম্মমতে আত্মা অনাদি কিন্তু
 অনন্ত নয়,—তার শেষ নির্বাণ । পূর্ব্বেই বলেছি প্রাচী ও প্রতীচী
 পৃথক । আমরা ও ভাল, তোমরা ও ভাল,—শুধু তোমাদের ভাল
 আমাদের মন্দ, ও আমাদের ভাল তোমাদের মন্দ । স্মৃতির
 অতীতের আমরা ও বর্ত্তমানের তোমরা, এই দুয়ে মিলে যে
 ভবিষ্যতের তারা হবে—তাও অসম্ভব ।

•

শ্রাবণ ১৩০৯ ।

খেয়াল খাতা।

(১)

শ্রীমতী ভারতীসম্পাদিকা নূতন বৎসরের প্রথম দিন হতে ভারতীর জন্ম একটা খেয়াল খাতা খুলবেন। এই অভিপ্রায়ে গাঁরা লেখেন, কিস্তা লিখতে পারেন, কিস্তা যাদের লেখা উচিত, কিস্তা লিখতে পারা উচিত,—এমন অনেক লোকের কাছে ছ' এক কলম লেখার নিমন্ত্রণ পাঠিয়েছেন। উপরোক্ত চারটি দলের মধ্যে আমি যে ঠিক কোথায় আছি, তা জানিনে। তবুও ভারতীসম্পাদিকার সাদর নিমন্ত্রণ রক্ষা করা কদবা বিবেচনায়, দু'চার ছত্র রচনা করতে উদ্বৃত্ত হয়েছি। ভারতীসম্পাদিকা ভরসা দিয়েছেন যে, যা' খসাঁ লিখলেই হবে,—কোন বিশেষ বিষয়ের অবতারণা কিস্তা আলোচনা করবার দরকার নেই। এ প্রস্তাবে অপরের কি হয় বলতে পারিনে, আমার ত ভরসার চাইতে ভয় বেশী হয়। আমাদের মন সহজে এবং শিক্ষার গুণে এতটা বৈষয়িক যে, বিষয়ের অবলম্বন ছেড়ে দিলে আমাদের মনের ক্রিয়া বন্ধ হয়, বলবার কথা আর কিছু থাকে না। তাওয়ার উপর চলা যত সহজ, ফাঁকার উপর লেখাও তত সহজ। গণিত-শাস্ত্রে যাউ হোক, সাহিত্যে শূন্যের উপর শূন্য চাপিয়ে কোন কথার গুণবৃদ্ধি করা যায় না। বিনিসূতার মালার ফরমাস দেওয়া যত সহজ, গাঁগা তত সহজ নয়। ও বিছের সন্ধান শতেকে জনেক জানে। আসল কথা, আমরা সকলেই গভীর নিদ্রামগ্ন, শুধু কেউ কেউ স্বপ্ন দেখি। ভারতীসম্পাদিকার ইচ্ছা এই শেষোক্ত দলের একটু বন্ধুর স্তবিধে করে দেওয়া।

(২)

এ খেয়াল খাতা ভারতীর চাঁদার খাতা । স্বেচ্ছায় স্বচ্ছন্দ-
 চিন্তে যিনি যা দেবেন, তা' সাদরে গ্রহণ করা হবে । আধুলি সিকি
 দুয়ানি কিছুই ফেরৎ যাবে না, শুধু ঘসা পয়সা ও মের্কি চলবে
 না । কথা যতই ছোট হোক, থাটি হওয়া চাই,—তার উপর
 চক্চকে হ'লেত কথাই নেই । যে ভাব হাজার হাতে ফিরেছে,
 যার চেহারা বলে' জিনিসটে লুপ্তপ্রায় হয়েছে, অতি পরিচিত
 বলে' যা আর কারো নজরে পড়ে না, সে ভাব এ খেয়াল খাতায়
 স্থান পাবে না । নিতান্ত পুরাণো চিন্তা, পুরাণো ভাবের প্রকা-
 শের জ্ঞাত স্তম্ভ বাবস্থা আছে,—আটিকেল লেখা । আমাদের
 কাজের কথায় যখন কোন ফল পরে না, তখন বাজে কথার
 ফুলের চাষ করলে তানি কি ? যখন আমাদের ক্ষুধা নিবৃত্তি
 করবার কোন উপায় করতে পারছি নে, তখন দিন থাকতে সখ
 মিটিয়ে নেবার চেষ্টা করাটা আবশ্যিক । আর এ কথা বলা
 বাজল্য, যেখানে কেনাবেচার কোন সম্ভব নেই,—ব্যাপারটা হচ্ছে
 শুধু দান ও গ্রহণের,—সে স্থানে কোন ভদ্রসন্তান মসিজীবী
 হ'লেও, যে-কথা নিজে সম্পূর্ণ বিশ্বাস করেন না কিম্বা ঝুটো
 বলে' জানেন, তা' চালাতে চেষ্টা করবেন না । আমরা কার্য-
 জগতে যখন সাচ্চা হতে পারিনে, তখন আশা করা যায় কল্পনা-
 জগতে অলীকতার চর্চা করব না । এই কারণেই বলছি ঘসা
 পয়সা ও মের্কি চলবে না ।

(৩)

খেয়ালী লেখা বড় দুপ্রাপ্য জিনিস । কারণ সংসারে বদ-
 খেয়ালী লোকের কিছু কন্মতি নেই, কিন্তু খেয়ালী লোকের বড়ই

অভাব । অধিকাংশ মানুষ যা' করে, তা' আয়াসসাধ্য । সাধারণ লোকের পক্ষে একটুখানি ভাব, অনেকখানি ভাবনার ফল । মানুষের পক্ষে চেফ্টা করাটাই স্বাভাবিক, স্মৃতরাং সহজ । স্বতঃ-উচ্ছসিত চিন্তা কিম্বা ভাব শুধু দু'এক জনের নিজ প্রকৃতিগুণে হয় । যা' আপনি হয়, তা' এতই শ্রেষ্ঠ ও এতই আশ্চর্যাজনক যে, তার মূলে আমরা দৈবশক্তি আরোপ করি । এ জগতসৃষ্টি ভগবানের লীলা বলেই এত প্রশস্ত, এবং আমাদের হাতে-গড়া জিনিস কষ্টসাধ্য বলেই এত সঙ্কীর্ণ । তবে আমাদের সকলেরই মনে বিনা ইচ্ছাতেও যে নানাপ্রকার ভাবনাচিন্তার উদয় হয়, এ কথা অস্বীকার করবার জো নেই । কিন্তু সে ভাবনাচিন্তার কারণ স্পষ্ট এবং রূপ অস্পষ্ট । রোগ শোক দারিদ্র্য প্রভৃতি নানা স্পষ্ট সাংসারিক কারণে আমাদের ভাবনা হয়, কিন্তু সে ভাবনা এতই এলোমেলো যে, অথো পরে কা কথা, আমরা নিজেরাই তার খেঁই খুঁজে পাইনে । যা নিজে ধরতে পারিনে, তা অণের কাছে ধরে দেওয়া অসম্ভব ; যে ভাব আমরা প্রকাশ করতে পারিনে, তাকে খেয়াল বলা যায় না । খেয়াল অনিদিষ্ট কারণে মনের মধ্যে দিবা একটি সুস্পষ্ট সুসম্বদ্ধ চেহারা নিয়ে উপস্থিত হয় । খেয়াল রূপবিশিষ্ট, দৃশ্চিন্তা তা নয় ।

(৪)

খেয়াল অভ্যাস করবার পূর্বের খেয়ালের রূপনির্ণয় করাটা আবশ্যিক, কারণ স্বরূপ জানলে অনধিকারীরা এ বিষয়ের বুখা চর্চা করবেন না । আমাদের লিখিত শাস্ত্রে খেয়ালের বড় উদাহরণ পাওয়া যায় না, স্মৃতরাং সঙ্গীতশাস্ত্র হতে এর আদর্শ

নিতে হবে । এক কথায় বলতে গেলে, রূপদের অধীনতা হতে মুক্ত হবার বাসনাই খেয়ালের উৎপত্তির কারণ । রূপদের ধীর, গম্ভীর, শুদ্ধ, শান্ত রূপ ছাড়াও, পৃথিবীতে ভাবের অগ্নি অনেক রূপ আছে । বিলম্বিত লয়ের সাহায্যে মনের সকল স্ফূর্তি, সকল আক্ষেপ প্রকাশ করা যায় না । সুতরাং রূপদের কড়া শাসনের মধ্যে যার স্থান নেই,—যথা তান গিটকির ইত্যাদি,—তাই নিয়েই খেয়ালের আসল কারবার । কিন্তু খেয়ালের স্বাধীন ভাব উচ্ছৃঙ্খল হলেও, যথেষ্টাচারী নয় । খেয়ালী যতই কাদানী করুন না কেন, ভালচুত কিনা রাগভ্রষ্ট হবার অধিকার তাঁর নেই । জড় যেমন চৈতন্যের আধার, দেহ যেমন রূপের আশ্রয়-ভূমি, রাগও তেমনি খেয়ালের অবলম্বন । বর্ণ ও অলঙ্কার বিজ্ঞানের উদ্দেশ্য রূপ ফুটিয়ে তোলা, লুকিয়ে ফেলা নয় । খেয়ালের চাল রূপদের মত সরল নয় বলে, মাতালের মত আঁকাবাঁকা নয়,—নষ্টকীর মত বিচিত্র । খেয়াল রূপদের বন্ধন যতই ছাড়িয়ে যাক না কেন, স্বরের বন্ধন ছাড়ায় না ; তার গতি সময়ে সময়ে অতিশয় দ্রুতলগ্ন হ'লেও, চন্দ্রপতন হয় না । গানও যে নিয়মাবলী, লেখাও সেই নিয়মাবলী । নীর মন সিনে পথ ভিন্ন চলতে জানে না, নীর কল্পনা আপনা হ'তেই থেলে না, যিনি আপনাকে সম্পূর্ণ ছেড়ে দিতে পারেন না, অথবা ছেড়ে দিলে আর নিজবশে রাখতে পারেন না,—তার খেয়াল লেখার চেমটা না করাই ভাল । তাতে তাঁর শুধু গৌরবের লাঘব হবে । রূশদেহ পুন্ট করবার চেমটা অনেক সময়ে বার্থ হ'লেও, কখনই ক্ষতিকর নয়,—কিন্তু স্তূলদেহকে সূক্ষ্ম করবার চেমটায় প্রাণসংশয় উপস্থিত হয় । ঈঙ্গিতজ্ঞ লোকমাত্রেই উপরোক্ত কথা ক'টির সার্থকতা বুঝতে পারবেন !

(৫)

আমার কথার ভাবেই বুঝতে পারছেন যে, আমি খেয়াল বিষয়ে একটু হাল্কা অঙ্গের জিনিসের পক্ষপাতী । চুটকিও আমার অতি আদরের সামগ্রী, যদি স্বর থাঁটি থাকে ও ঢং ওস্তাদী হয় । আমার বিশ্বাস আমাদের দেশের আজকাল প্রধান অভাব গুণপনায়ুক্ত ছিব্লেমী । এ সম্বন্ধে কৈফিয়ৎ স্বরূপে দু'এক কথা বলা প্রয়োজন । কোন ব্যক্তি কিম্বা জাতিবিশেষ যখন অবস্থা-বিপর্নায় সৰ্বল অধিকার হতে বিচ্যুত হয়, তখন তার দু'টি অধিকার অবশিষ্ট থাকে,—কাঁদবার ও হাসবার । আমরা আমাদের সেই কাঁদবার অধিকার ষোল-আনা বুঝে নিয়েছি, এবং নিত্য কাজে লাগাচ্ছি । আমরা কাঁদতে পেলে যত খুসী থাকি, এমন আর কিছুতেই নয় । আমরা লেখায় কাঁদি, বক্তৃতায় কাঁদি । আমরা দেশে কেঁদেই সম্ভবত থাকিনে, চাঁদা তুলে বিদেশে গিয়ে কাঁদি । আমাদের স্বজাতির মধ্যে যারা স্থানে, অস্থানে, এমন কি অরণ্যে পর্য্যন্ত রোদন করতে শিক্ষা দেন, তাঁরাই দেশের জ্ঞানী গুণী বুদ্ধিমান ও প্রধান লোক বলে' গণ্য এবং মান্য । যেখানে ফোঁস করা উচিত, সেখানে ফোঁস ফোঁস করলেই আমরা বলিহারি বাই । আমাদের এই কান্না দেখে কারও মন ভেজে না, অনেকের মন চটে । আমাদের নূতন সভাযুগের অপূৰ্ব সৃষ্টি ল্যাসনেল কংগ্রেস, অপর সমাজাত-শিশুর মত ভূমিষ্ঠ হয়েই কান্না শুরু করে দিলেন । আর যদিও তার সাবালক হবার বয়স উল্লীর্ণ হয়েছে, তবুও বৎসরের ৩৬২ দিন কুস্তকর্ণের মত নিদ্রা দিয়ে, তারপর জেগে উঠেই তিন দিন ধরে কোকিয়ে কান্না সমান চলছে । যদি কেউ বলে, ছি ! অত কাঁদ কেন, একটু কাজ কর না,—তাহলে তার উপর

আবার চোখ রাড়িয়ে ওঠে । বয়সের গুণে শুধু ঐটুকু উন্নতি হয়েছে । মনের দুঃখের কান্নাও অতিরিক্ত হ'লে কারও মায়া হয় না । কিন্তু কান্না ব্যাপারটাকে একটা কর্তব্যাকৰ্ম্ম করে তোলা শুধু আমাদের দেশেই সম্ভব হয়েছে । আমরা সমস্ত দিন গৃহকৰ্ম্ম করে, বিকেলে গা ধুয়ে, চুল বেঁধে, পা ছড়িয়ে মখন পুরাতন মাতৃবিয়োগের জ্ঞাত্ত নিয়মিত এক ঘণ্টা ধরে' ইনিযে বিনিযে কাঁদতে থাকি, তখন পৃথিবীর পুরুষমানুষদের হাসিও পায়, রাগও ধরে । সকলেই জানেন যে, কান্না ব্যাপারটারও নানা পদ্ধতি আছে,—যথা রোল কান্না, মড়া কান্না, ফুঁপিয়ে কান্না, ফুলে ফুলে কান্না ইত্যাদি,—কিন্তু আমরা শুধু অভ্যাস করেছি নাকে কান্না ! এবং এ কথাও বোধহয় সকলেই জানেন যে, সদারঙ্গ বলে' গেছেন খেয়ালে সব সুর লাগে, শুধু নাকী সুর লাগে না । এই সব কারণেই আমার মতে এখন সাহিত্যের সুর বদলানো প্রয়োজন । করুণরসে ভারতবর্ষ জাঁতসেঁতে' হয়ে উঠেছে; আমাদের সুখের জ্ঞাত্ত না হোক, স্বাস্থ্যের জ্ঞাত্তও হান্সরসের আলোক দেশময় ছড়িয়ে দেওয়া নিতান্ত আবশ্যক হয়ে পাড়েছে । যদি কেউ বলে আমাদের এই দুর্দিনে হাসি কি শোভা পায় ? তার উত্তর—যোর মেঘাচ্ছন্ন অমাবস্ত্যর রাত্রিতেও কি বিজ্যৎ দেখা দেয় না, কিম্বা শোভা পায় না ? আমাদের এই অবিরতধারা অশ্রুবৃষ্টির মধ্যে কেহ কেহ যদি বিজ্যৎ সৃষ্টি করতে পারেন, তাহলে আমাদের ভাগ্যাকাশ পরিষ্কার হবার একটা সম্ভাবনা হয় ।

বৈশাখ ১৩১২ ।

ঘলাট-সমালোচনা

“সাহিত্য” সম্পাদক মহাশয় সমীপেষু :—

“বারো হাত কাঁকুড়ের তেরো হাত বীচি” জিনিসটা এ দেশে একটা মস্ত ঠাট্টার সামগ্রী। কিন্তু বারো পাতা বইয়ের তেরো পাতা সমালোচনা দেখে কারোই হাসি পায় না। অথচ বীজ পরিমাণে এক হাত কমই হোক আর এক হাত বেশীই হোক, তার থেকে নতুন ফল জন্মায়; কিন্তু ঐরূপ সমালোচনায় সাহিত্যের কিংবা সমাজের কি ফললাভ হয়, বলা কঠিন। সেকালে যখন সূত্র আকারে মূল গ্রন্থ রচনা করবার পদ্ধতি প্রচলিত ছিল, তখন ভাষ্যে টীকায় কারিকায় তার বিস্তৃত ব্যাখ্যার আবশ্যকতা ছিল। কিন্তু একালে যখন, যে কথা দু’ কথায় বলা যায়, তাই দু’শো কথায় লেখা হয়, তখন সমালোচকদের ভাষ্যকার না হয়ে সূত্রকার হওয়াই সম্ভব। তাঁরা যদি কোন নবা গ্রন্থের খেঁই ধরিয়ে দেন, তাহলেই আমরা পাঠকবর্গ যথেষ্ট মনে করি। কিন্তু ঐরূপ করতে গেলে তাঁদের ব্যবসার মারা যায়। সুতরাং তাঁরা যে সমালোচনার রীতিপরিবর্তন করবেন, এরূপ আশা করা নিষ্ফল।

শ্রীযুক্ত রবীন্দ্র নাথ ঠাকুর অভ্যুজ্জিত প্রতিবাদ করে’ একটি প্রবন্ধ লেখেন। আমার ঠিক মনে নেই যে, তিনি সাহিত্যেও

অত্যাঙ্কি যে নিন্দনীয়, এ কথাটা বলেছেন কি না । সে যাই হোক, রবীন্দ্রবাবুর সেই তীব্র প্রতিবাদে বিশেষ কোন সফল হয়েছে বলে' মনে হয় না । বরং দেখতে পাই যে, অত্যাঙ্কির মাত্রা ক্রমে সপ্তমে চড়ে' গেছে । সমালোচকদের অত্যাঙ্কিটা প্রায় প্রশংসা করবার সময়েই দেখা যায় । বোধহয় তাঁদের বিশ্বাস যে, নিন্দা জিনিসটা সোজা কথাতেই করা চলে, কিন্তু প্রশংসাকে ডালপালা দিয়ে পত্রে পুষ্পে সাজিয়ে বার করা উচিত । কেননা নিন্দূকের চাইতে সমাজে চাটুকারের মর্যাদা অনেক বেশী । কিন্তু আসলে অতিনিন্দা এবং অতিপ্রশংসা উভয়ই সমান জঘন্য । কারণ, অত্যাঙ্কির “অতি”,—শুধু স্তূরুচি এবং ভদ্ৰতা নয়, সত্যেরও সীমা অতিক্রম করে' যায় । এক কথায়, অত্যাঙ্কি মিথ্যোক্তি । মিছা কথা মানুষে বিনা কারণে বলে না । হয় ভয়ে, না হয় কোন স্বার্থসিদ্ধির জগ্যই লোকে সত্যের অপলাপ করে । সম্ভবতঃ অভ্যাসবশতঃ মিথ্যাকে সত্যের অপেক্ষা অধিকমাত্রায় কেউ কেউ চর্চা করে । কোন বিশেষ উদ্দেশ্যে মিথ্যা কথা বলা চর্চা করলে, ক্রমে তা' উদ্দেশ্যবিহীন অভ্যাসে পরিণত হয় । বাঙ্গলা-সাহিত্যে আজকাল যেরূপ নির্লজ্জ অতিপ্রশংসার বাড়-বাড়ি দেখতে পাওয়া যায়, তা'তে মনে হয় যে, তার মূলে উদ্দেশ্য এবং অভ্যাস দুই জিনিসই আছে । এক একটি ক্ষুদ্র লেখকের ক্ষুদ্র পুস্তকের যেসকল বিশেষণে স্তুতিবাদ করা হয়ে থাকে, সেগুলি বোধহয় শেক্সপীয়র কিংবা কালিদাসের সম্বন্ধে প্রয়োগ করলেও একটু বেশী হয়ে পড়ে । সমালোচনা এখন বিজ্ঞাপনের মূর্তি ধারণ করেছে । তার থেকে নোনা যায় যে, যাতে বাজারে বইয়ের ভালরকম কাটুতি হয়, সেই উদ্দেশ্যে আজকাল সমালোচনা

লেখা হয়ে থাকে । যে উপায়ে পেটেন্ট ঔষধ বিক্রী করা হয়, সেই উপায়েই সাহিত্যও বাজারে বিক্রী করা হয় । লেখক সমালোচক হয় একই ব্যক্তি, নয় পরস্পরে একই কারবারের অংশীদার । আমার মাল তুমি যাচাই করে' পয়লা নম্বরের বলে' দাও, তোমার মাল আমি যাচাই করে' পয়লা নম্বরের বলে' দেব,— এইরকম একটা বন্দোবস্ত পেশাদার লেখকদের মধ্যে যে আছে, এ কথা সহজেই মনে উদয় হয় । এই কারণেই, পেটেন্ট ঔষধের মতই, একালের ছোট গল্প কিংবা ছোট কবিতার বই,—মেধা, হ্রী, ধী, শ্রী প্রভৃতির বদ্বক, এবং নৈতিক-বলকারক বলে'—উল্লিখিত হয়ে থাকে । কিন্তু এরূপ কথায় বিশ্বাস স্থাপন করে' পাঠক নিতাই প্রতারণিত এবং প্রবঞ্চিত হয় । যা' চ্যবন-প্রাশ বলে কিনে আনা যায়, তা দেখা যায়,—প্রায়ই অকাল-কৃষ্ণা গুণগ্রস্ত ।

অতি-বিজ্ঞাপিত জিনিসের প্রতি আমার শ্রদ্ধা অতি কম । কারণ, মানবজন্মের দ্বাভাবিক দুর্বলতার উপর বিজ্ঞাপনের বল, এবং মানব-মনের সরল বিশ্বাসের উপর বিজ্ঞাপনের চল প্রতিষ্ঠিত । যখন আমাদের এক-মাথা চুল থাকে, তখন আমরা কেশ-বদ্বক তৈলের বড় একটা সন্ধান রাখিনে । কিন্তু মাথায় যখন টাক চক্ চক্ করে' ওঠে, তখনই আমরা কুন্তল-বৃষ্টির শরণ গ্রহণ করে' নিজেদের অবিনশ্চকারিতার পরিচয় পাই, এবং দিই । কারণ, তাতে টাকের প্রসার ক্রমশঃই বৃদ্ধি পায়, এবং সেই সঙ্গে টাকাও নষ্ট হয় । বিজ্ঞাপনের উদ্দেশ্য আমাদের মন ও নয়ন আকর্ষণ করা । বিজ্ঞাপন প্রতি ছত্রের শেষে প্রশ্ন করে,—“মনোযোগ করছেন ত ?” আমাদের চিত্ত আকর্ষণ করতে না পারলেও, বিজ্ঞাপন চব্বিশ ঘণ্টা আমাদের নয়ন

আকর্ষণ করে' থাকে । ও জিনিস চোখ এড়িয়ে যাবার জো নেই । কারণ, এ যুগে সংবাদপত্রে বিজ্ঞাপন প্রবন্ধের গা ঘেঁসে থাকে, মাসিক পত্রিকার শিরোভূষণ হয়ে দেখা দেয়, এক কথায় সাহিত্য-জগতে যেখানেই একটু ফাঁক দেখে, সেইখানেই এসে জুড়ে বসে । ইংরাজী ভাষায় একটি প্রবচন আছে যে, প্রাচীরের কাণ আছে । এদেশে সে বধির কি না জানিনে, কিন্তু বিজ্ঞাপনের দৌলতে মূক নয় । রাজপথের উভয় পার্শ্বের প্রাচীর মিথ্যা কথা তারস্বরে চীৎকার করে' বলে । তাই আজকাল পৃথিবীতে চোখকাণ না বুজে চলে, বিজ্ঞাপন কারো ইন্দ্রিয়ের অগোচর থাকে না । যদি চোখকাণ বুজে চল, তাহ'লেও বিজ্ঞাপনের হাত থেকে নিস্তার নেই । কারণ, পদব্রজেই চল, আর গাড়ীতেই যাও, রাস্তার লোকে তোমাকে বিজ্ঞাপন ছুঁড়ে মারে । এতে আশ্চর্য্য হবার কোনও কথা নেই । ছুঁড়ে মারাই বিজ্ঞাপনের ধর্ম্ম । তার রং ছুঁড়ে মারে, তার ভাষা ছুঁড়ে মারে, ভার ভাব ছুঁড়ে মারে । স্ততরাং বিজ্ঞাপিত জিনিসের সঙ্গে আমার আত্মীয়তা না থাকলেও, তার মোড়কের সঙ্গে এবং মলাটের সঙ্গে আমার চাক্ষুষ পরিচয় আছে । আমি বল ওষধের এবং বহু গ্রন্থের কেবলমাত্র মুখ চিনি ও নাম জানি । যা জানি, তারই সমালোচনা করা সম্ভব । স্ততরাং আমি মলাটের সমালোচনা করতে উদ্বৃত্ত হয়েছি । অন্ততঃ মুখপাতটুকু দোরস্ত করে' দিতে পারলে, আপাততঃ বঙ্গ-সাহিত্যের মুখরক্ষা হয় ।

আমি পূর্বেই বলেছি যে, নব্য বঙ্গ-সাহিত্যের কেবলমাত্র নাম-রূপের সঙ্গে আমার পরিচয় আছে । প্রধানতঃ সেই নাম জিনিসটার সমালোচনা করাই আমার উদ্দেশ্য । কিন্তু রূপ জিনিসটাই একেবারে হেঁটে দেওয়া চলে না বলে, সে সম্বন্ধে দুই

একটা কথা বলতে চাই। ডাক্তারখানার আলো যেমন লাল নীল সবুজ বেগুনে প্রভৃতি নানারূপ কাঁচের আবরণের মধ্যে দিয়ে প্রকাশ পায়, তেমনই পুস্তকের দোকানে এ কালের পুস্তক পুস্তিকাগুলি নানারূপ বর্ণচ্ছটায় নিজেদের প্রকাশ করে। সুতরাং নবা সাহিত্যের বর্ণপরিচয় যে আমার হয়নি, এ কথা বলতে পারিনে। কবিতা আজকাল গোষ্ঠীতে গা-ঢাকা দিয়ে, “লজ্জা-নয় নববধু সম” আমাদের কাছে এসে উপস্থিত হয় না। কিন্তু গালে আলতা মেখে রাজপথের স্তম্ভে বাতায়নে এসে দেখা দেয়। বর্ণেরও একটা আভিজাত্য আছে। তার স্তসংযত ভাবের উপরেই তার গাঙ্গীর্ষ্য ও সৌন্দর্য্য নির্ভর করে। বাড়-বাড়ি জিনিসটা সব ক্ষেত্রেই ইতরতার পরিচায়ক। আমার মতে, পূজার বাজারের নানারূপ রঙচঙে পোষাক পরে প্রাপ্তবয়স্ক সাহিত্যের সমাজে বার হওয়া উচিত নয়। তবে পূজার উপহার স্বরূপে যদি তার চলন হয়, তা হ'লে অবশ্য কিছু বল চলে না। সাহিত্য যখন কুন্তলীন, তাম্বুলীন এবং তরল আলতার সঙ্গে একশ্রেণীভুক্ত হয়, তখন পুরুষের পক্ষে পুরুষ বাকা ছাড়া তার সম্বন্ধে অলি কোন ভাষা ব্যবহার করা চলে না। তবে এই কথা জিজ্ঞাসা করি যে, এতে যে আত্মমর্যাদার লাঘব হয়, এ সহজ কথাটা কি গ্রন্থকারেরা বুঝতে পারেন না? কবি কি চান যে, তাঁর হৃদয়রক্ত তরল আলতার সামিল হয়? চিন্তাশীল লেখক কি এই কথা মনে করে স্থখী হন যে, তাঁর মস্তিষ্ক লোকে সুবাসিত নারিকেল তৈল হিসাবে দেখবে? এবং বাণী কি রসনানিঃস্থত পানের পিকের সঙ্গে জড়িত হতে লজ্জা বোধ করেন না? আশা করি যে, বইয়ের মলাটের এই অতিরঞ্জিত রূপ শীঘ্রই সকলের পক্ষেই অরুচিকর হয়ে উঠবে। আর্গটীক

কাগজে ছাপানো, এবং চক্চকে, বাক্বকে তক্তকে করে' বাঁধানো পুস্তকে আমার কোন আপত্তি নেই। দপ্তরীকে আসল গ্রন্থকার বলে' ভুল না করলেই আমি খুসী হই। আমরা যেন ভুলে না যাই যে, লেখকের কৃতিত্ব মলাটে শুধু ঢাকা পড়ে। জীর্ণ কাগজে, শীর্ণ অক্ষরে, ক্ষীণ কালীতে ছাপানো একখানি “পদ-কল্পতরু” যে শত শত তক্তকে বাক্বকে চক্চকে গ্রন্থের চাইতে শতগুণ আদরের সামগ্রী !

এখন সমালোচনা শুরু করে দেবার পূর্ববর্তী কথাটার একটু আলোচনা করা দরকার। কারণ, ঐ শব্দটি আমরা ঠিক অর্থে ব্যবহার করি কি না, সে বিষয়ে আমার একটু সন্দেহ আছে। প্রথমেই, ‘সম্’ উপসর্গটির যে বিশেষ কোন সার্থকতা আছে, এরূপ আমার বিশ্বাস নয়। শব্দ অতিকায় হ’লে যে তার গৌরব-বৃদ্ধি হয়, এ কথা আমি মানি ; কিন্তু, দেহভারের সঙ্গে সঙ্গে যে বাক্যের অর্থভার বেড়ে যায়, তার কোন বিশেষ প্রমাণ পাওয়া যায় না। এ যুগের লেখকেরা মাতৃভাষায় লিখেই সম্ভ্রান্ত থাকেন না, কিন্তু সেই সঙ্গে মায়ের দেহপুষ্টি করাও তাঁদের কদুবা বলে’ মনে করেন। কিন্তু সে পুষ্টি-সাধনের জন্ত বহুসংখ্যক অর্পপূর্ণ ছোট ছোট কথা চাই, যা সহজেই বঙ্গভাষার অঙ্গীভূত হ’তে পারে। স্বল্পসংখ্যক এবং কতকাংশে নিরর্থক বড় বড় কথার সাহায্যে সে উদ্দেশ্যসিদ্ধি হবে না। সংস্কৃত ভাষার সঙ্গে আমার পরিচয় অতি সামান্য ; কিন্তু সেই স্বল্প পরিচয়েই আমার এইটুকু জ্ঞান জন্মেছে যে, সে ভাষার বাক্যাবলী আয়ত্ত্ব করা নিতান্ত কঠিন। সংস্কৃতের উপর হস্তক্ষেপ করবামাত্রই তা আমাদের হস্তগত হয় না। বরং আমাদের অশিক্ষিত হাতে পড়ে প্রায়ই তার অর্থবিকৃতি ঘটে।

সংস্কৃত সাহিত্যে গৌজামিলন দেওয়া জিনিসটা একেবারেই প্রচলিত ছিল না। কবি হোন, দার্শনিক হোন, আমাদের পূর্বপুরুষরা প্রত্যেক কথাটি ওজন করে' ব্যবহার করতেন। শব্দের কোনরূপ অসঙ্গত প্রয়োগ সেকালে অমার্জ্জনীয় দোষ বলে' গণ্য হ'ত। কিন্তু একালে আমরা কথার সংখ্যা নিয়েই ব্যস্ত, তার ওজনের খার বড় একটা খারিনে। নিজের ভাষাই যখন আমরা সূক্ষ্ম অর্থ বিচার করে' ব্যবহার করিনে, তখন স্নল্পপরিচিত এবং অনায়ত্ত সংস্কৃত শব্দের অর্থ বিচার করে' ব্যবহার করতে গেলে, সে ব্যবহার যে বন্ধ হবার উপক্রম হয়, তা আমি জানি। তবুও একেবারে বেপরোয়াভাবে সংস্কৃত শব্দের অতিরিক্ত ব্যবহারের আমি পক্ষপাতী নই। তা'তে মনোভাবও স্পষ্ট করে' ব্যক্ত করা যায় না, এবং ভাষাও ভারাক্রান্ত হয়ে পড়ে। উদাহরণস্বরূপে দেখানো যেতে পারে, এই 'সমালোচনা' কথাটা আমরা যে অর্থে ব্যবহার করি, তার আসল অর্থ ঠিক তা নয়। আমরা কথায় বলি “লেখাপড়া” শিখি; কিন্তু আসলে আমরা অধিকাংশ শিক্ষিত লোক শুধু পড়তেই শিখি, লিখতে শিখিনে। পাঠক-মাত্রেরই পাঠ্য কিম্বা অপাঠ্য পুস্তক সম্বন্ধে মতামত গড়ে' তোলবার ক্ষমতা থাক্ আর না থাক্, মতামত ব্যক্ত করবার অধিকার আছে; বিশেষতঃ সে কার্যের উদ্দেশ্য যখন আর পাঁচ জনকে বই পড়ানো, লেখানো নয়। সুতরাং সমালোচিতব্য বিষয়ের বাঙ্গলা-সাহিত্যে অভাব থাকলেও, সমালোচনার কোন অভাব নেই। এই সমালোচনা-বত্তার ভিতর থেকে একখানিমাত্র বই উপরে ভেসে উঠেছে। সে হচ্ছে শ্রীযুক্ত রবীন্দ্র নাথ ঠাকুরের “আলোচনা”। তিনি যদি উক্ত নামের

পরিবর্তে তার “সমালোচনা” নাম দিতেন, তাহলে’ আমার বিশ্বাস, বুখা বাগাড়ম্বরে “আলোচনার” ক্ষুদ্র দেহ আয়তনে বৃদ্ধি-প্রাপ্ত হয়ে এত গুরুভার হয়ে উঠত যে, উক্ত শ্রেণীর আর পাঁচখানা বইয়ের মত এখানিও বিশ্বৃতির অতল জলে ডুবে যেত। এই দুটি শব্দের মধ্যে যদি একটি রাখতেই হয়, তা হ’লে ‘সম্’ বাদ দিয়ে ‘আলোচনা’ রক্ষা করাই শ্রেয়। যদিচ ও কথাটিকে আমি ইংরাজী criticism শব্দের ঠিক প্রতিবাক্য বলে’ মনে করিনে। আলোচনা মানে ‘আ’ অর্থাৎ বিশেষরূপে, ‘লোচন’, অর্থাৎ দৃষ্টি। যে বিষয়ে সন্দেহ হয়, তার সন্দেহ-ভঞ্জন করবার জন্য বিশেষরূপে সেটিকে লক্ষ্য করে’ দেখবার নামই আলোচনা। তর্কবিতর্ক, বাক্‌বিতণ্ডা, আন্দোলন আলোড়ন প্রভৃতি অর্থেও ঐ কথাটি আজকালকার বাঙ্গলা ভাষায় ব্যবহৃত হয়ে থাকে। কিন্তু ও কথায় তার কোন অর্থই বোঝায় না। ‘আলোচনা’ ইংরাজী scrutinize শব্দের যথার্থ ‘প্রতিবাক্য’। Criticism শব্দের ঠিক প্রতিবাক্য বাঙ্গলা কিংবা সংস্কৃত ভাষায় না থাকলেও, ‘বিচার’ শব্দটি অনেক-পরিমাণে সেই অর্থ প্রকাশ করে। কিন্তু ‘সমালোচনা’র পরিবর্তে ‘বিচার’ যে বাঙ্গালী সমালোচকদের কাছে গ্রাহ্য হবে, এ আশা আমি রাখিনে। কারণ, এঁদের উদ্দেশ্য বিচার করা নয়, প্রচার করা। তা’ ছাড়া যে কথাটা একবার সাহিত্যে চলে’ গেছে, তাকে অচল করবার প্রস্তাব অনেকে হয় ত দুঃসাহসিকতার পরিচয় বলে’ মনে করবেন। তার উত্তরে আমার বক্তব্য এই যে, পূর্বের যখন আমরা নির্বিচারে বহু-সংখ্যক সংস্কৃত শব্দকে বঙ্গসাহিত্যের কারাগারে প্রবেশ করিয়েছি, এখন আবার সুবিচার করে’ তার গুটিকতককে মুক্তি

দেওয়াটা বোধহয় অন্তায় কার্য্য হবে না । আর এক কথা । যদি ‘Criticism’ অর্থেই আমরা আলোচনা শব্দ ব্যবহার করি, তাহ’লে ‘Scrutinize’ অর্থে আমরা কি শব্দ ব্যবহার করব ? সুতরাং, যে উপায়ে আমরা মাতৃভাষার দেহপুষ্টি করতে চাই, তা’তে ফলে শুধু তার অঙ্গহানি হয় । শব্দ সম্বন্ধে যদি আমরা একটু শুচিবাতিকগ্রস্ত হতে পারি, তা হলে আমার বিশ্বাস, বঙ্গভাষার নিম্নলতা অনেকপরিমাণে রক্ষিত হতে পারে । অনাবশ্যকে যদি আমরা সংস্কৃত ভাষার উপর হস্তক্ষেপ করতে সঙ্কুচিত হই, তাতে সংস্কৃত ভাষার উপর অবজ্ঞা দেখানো হবে না, বরং তার প্রতি যথার্থ ভক্তিই দেখানো হবে । শব্দগোরবে সংস্কৃত ভাষা অতুলনীয় । কিন্তু তাই বলে’ তার ধ্বনিতে মুগ্ধ হয়ে আমরা যে শুধু তার সাহায্যে বাঙ্গলা-সাহিত্যে ফাঁকা আওয়াজ করব, তা’ও ঠিক নয় । বাণী কেবলমাত্র ধ্বনি নয় । আমি বলছিলাম থেকে এই মত প্রচার করে’ আসছি, কিন্তু আমার কথায় কেউ কর্ণপাত করেন না । সাহিত্য-জগতে এক শ্রেণীর জীব বিচরণ করে, যাদের প্রাণের চাইতে ‘কাণ বড় । সঙ্গীতচর্চার লোভ তারা কিছুতেই সংবরণ করতে পারে না, এবং সে ব্যাপার থেকে তাদের নিরস্ত করবার ক্ষমতাও কারো নেই । প্রতিবাদ করায় বিশেষ কোন ফল নেই জেনেও, আমি প্রতিবাদ করি ; কারণ, আজকালকার মতে, আপত্তি নিশ্চিত অগ্রাহ্য হবে জেনেও, আপত্তি করে’ আপত্তিকর জিনিসটে সম্পূর্ণ গ্রাহ্য করে’ নেওয়াই বুদ্ধিমানের কার্য্য বলে বিবেচিত হয় ।

এখানে বলে রাখা আবশ্যক যে, কোন বিশেষ লেখকের বা লেখার প্রতি কটাক্ষ করে’ আমি এ সব কথা বলছিলাম । বাঙ্গলা-সাহিত্যের একটা প্রচলিত ধরণ, ফাসান, এবং ঢংএর

সম্বন্ধেই আমার আপত্তি, এবং তার বিরুদ্ধে প্রতিবাদ করাই আমার উদ্দেশ্য । সমাজের কোন চলতি স্রোতে গা ঢেলে দিয়ে যে আমরা কোন নির্দিষ্ট গন্তব্য স্থানে পৌঁছতে পারি, এমন অগ্নায় ভরসা আমি রাখিনে । সকল উন্নতির মূলে থামা জিনিসটে বিদ্যমান । এ পৃথিবীতে এমন কোন সিঁড়ি নেই, যার ধাপে ধাপে পা ফেলে আমরা অবলীলাক্রমে স্বর্গে গিয়া উপস্থিত হতে পারি । মনোজগতে প্রচলিত পথ ক্রমে সঙ্কীর্ণ হতে সঙ্কীর্ণতর হয়ে শেষে চোরা গলিতে পরিণত হয়, এবং মানুষের গতি আটকে দেয় । বিজ্ঞানে যাকে Evolution বলে, এক কথায় তার পদ্ধতি এই যে, জীব একটা প্রচলিত পথে চলতে চলতে হঠাৎ এক জায়গায় থমকে দাঁড়িয়ে, ডাইনে কি বাঁয়ে একটা নতুন পথ আবিষ্কার করে, এবং সাহস করে' সেই পথে চলতে আরম্ভ করে । এই নতুন পথ বার করা, এবং সেই পথ ধরে' চলার উপরেই জীবের জীবন এবং মানুষের মনুষ্যত্ব নির্ভর করে । মুক্তির জন্মে, হয় দক্ষিণ নয় বাম মার্গ যে অবলম্বন করতেই হবে, এ কথা এ দেশে ঋষিমুনিরা বহুকাল পূর্বে বলে গেছেন; অতএব একেলে বিজ্ঞান এবং সেকেলে দর্শন উভয়ই এই শিক্ষা দেয় যে, সিধে পথটাই মৃত্যুর পথ । সুতরাং বাঙ্গলা লেখার প্রচলিত পথটা ছাড়তে পরামর্শ দিয়ে আমি কাউকে বিপথে নিয়ে যাবার চেষ্টা করিনে । আমার বিশ্বাস যে, সংস্কৃত ছেড়ে যদি আমরা দেশী পথে চলতে শিখি, তা'তে বাঙ্গলা-সাহিত্যের লাভ বই লোকসান নেই । ঐ পথটাই ত স্বাধীনতার পথ, এবং সেই কারণেই উন্নতির পথ,—এই ধারণাটি মনে এসে যাওয়াতেও আমাদের অনেক উপকার আছে । আমি জানি যে, সাহিত্যে কিংবা ধর্ম্মে একটা নতুন পথ আবিষ্কার করবার

ক্ষমতা কেবলমাত্র দু'চারজন মহাজনেরই থাকে, বাদবাকী আমরা পাঁচজনে সেই মহাজন-প্রদর্শিত পন্থা অনুসরণ করে চলতে পারলেই আমাদের জীবন সার্থক হয়। গড্ডলিকা-প্রবাহ ন্যায়ের অবলম্বন করা জনসাধারণের পক্ষে স্বাভাবিকও বটে, কড়বাও বটে ; কেন না, পৃথিবীর সকল ভেড়াই যদি মেড়া হয়ে ওঠে ত দু'-মারামারি করেই মেঘ-বংশ নির্বংশ হবে ! উক্ত কারণেই আমি লেখবার একটা প্রচলিত ধরনের বিরোধী হলেও, প্রচলিত ভাষা ব্যবহারের বিরোধী নই। আমরা কেউ ভাষা জিনিসটে তৈরি কবিনে, সকলেই তৈরি ভাষা ব্যবহার করি। ভাষা জিনিসটে কোন একটি বিশেষ ব্যক্তির মনগড়া নয়, যুগযুগান্তর ধরে একটি জাতির হাতে গড়া। কেবলমাত্র মনোমত কথা বেছে নেবার, এবং ব্যাকরণের নিয়মরক্ষা করে' সেই বাড়াই কথাগুলিকে নিজের পছন্দমত পাশাপাশি সাজিয়ে রাখবার স্বাধীনতাই আমাদের আছে। আমাদের মধ্যে যারা জল্পরী, তাঁরা এই চলতি কথার মধ্যেই রত আবিষ্কার করেন, এবং শিল্পরূপে গ্রথিত করে' দিবা হার রচনা করেন। নিজের রচনাশক্তির দারিদ্র্যের চেহারাও আমরা মাতৃভাষার মুখে দেখতে পাই, এবং রাগ করে' সেই আয়নাখানিকে নষ্ট করতে উদ্বৃত হই, ও পূর্ব-পুরুষদের সংস্কৃত দর্পণের সাহায্যে মুখরক্ষা করবার জন্য বাস্তব হয়ে উঠি। একরকম কাঁচ আছে, যাতে মুখ মস্ত দেখায়—কিন্তু সেই সঙ্গে চেহারা অপরিচিত বিকটাকার ধারণ করে। আমাদের নিজেকে বড় দেখাতে গিয়ে যে আমরা কিন্তু তুর্কিমাকার রূপ ধারণ করি, তাতে আমাদের কোন লজ্জাবোধ হয় না। এখানে কেউ প্রশ্ন করতে পারেন যে, প্রচলিত ভাষা কাকে বলে ? তার উত্তরে আমি বলি, যে

ভাষা আমাদের সুপরিচিত, সম্পূর্ণ আয়ত্ত, এবং যা আমরা নিতা ব্যবহার করে থাকি । তা খাঁটি বাঙ্গলাও নয়, খাঁটি সংস্কৃতও নয়, কিংবা উভয়ে মিলিত কোনরূপ খিচুড়িও নয় । যে সংস্কৃত-শব্দ প্রকৃত কিংবা বিকৃতরূপে বাঙ্গলা কথার সঙ্গে মিলে মিশে রয়েছে, সে শব্দকে আমি বাঙ্গলা বলেই জানি এবং মানি । কিন্তু কেবলমাত্র নূতনত্বের লোভে নতুন করে যে-সকল সংস্কৃত শব্দকে কোন লেখক জোর করে বাঙ্গলা ভাষার ভিতর প্রবেশ করিয়েছেন, অগচ খাপ্ খাওয়াতে পারেন নি, সেই সকল শব্দকে ছুঁতে আমি ভয় পাই । এবং যে-সকল সংস্কৃত শব্দ স্পষ্টতঃ ভুল অর্থে ব্যবহৃত হচ্ছে, সেই সকল শব্দ যাতে ঠিক অর্থে ব্যবহৃত হয়, সে বিষয়ে আমি লেখকদের সতর্ক হতে বলি । নইলে বঙ্গভাষার বনলতা যে সংস্কৃত ভাষার উজ্জ্বলতাকে তিরস্কৃত করবে, এমন দুঃশা আমার মনে স্থান পায় না । শব্দকল্পদ্রুম থেকে আপনা হতে খসে যা আমাদের কোলে এসে পড়েছে, তা মুখে তুলে নেবার পক্ষে আমার কোনও আপত্তি নেই । তলার কুড়োও, কিন্তু সেই সঙ্গে গাছেরও পেড়ো না । তাতে যে পরিমাণ পরিশ্রম হবে, তার অনুরূপ ফললাভ হবে না ।

শুধু গাছ থেকে পাড়া নয়, একেবারে তার আগুড়াল থেকে পাড়া গুটিকতক শব্দের পরিচয় আমি সম্প্রতি বইয়ের মলাটে পেয়েছি । এবং সে সম্বন্ধে আমার দু'একটি কথা বক্তব্য আছে । মীরা “শব্দাধিক্যাং অর্থাধিক্যাং”—মীমাংসার এই নিয়ম মানেন না, বরং তার পরিবর্তে সংস্কৃত শব্দ সম্বন্ধে “অধিকন্তু ন দোষায়” এই উদ্ভট বচন অনুসারে কার্ধ্যানুবর্তী হয়ে থাকেন, তাঁরাও একটা গণ্ডীর ভিতর থেকে বেরিয়ে যেতে সাহসী হন

না । এমন সাহিত্য-বীর বোধ হয় বাঙ্গলা দেশে খুব কম আছে, যারা বঙ্গরমণীর মাথায় “বন্ধিমল্ল” চাপিয়ে দিতে সঙ্কুচিত না হয়, যদিচ সে বেচারারা নীরবে পুরুষের সব অত্যাচারই সহ্য করে থাকে ! বন্ধিমল্ল যুগে সংস্কৃত শব্দের ব্যবহার কিছু কম ছিল না । অথচ স্বয়ং বন্ধিমল্লচন্দ্রও ‘প্রাড়াবিবাক’ বাক্যটি ‘মল্লিযুচের’ ন্যায় কটু ভাষার হিসাবে গণ্য করে, চোর এবং বিচারপতিকে একই আসনে বসিয়ে দিয়েছিলেন । “প্রাড়াবিবাক” বেচারী বাঙ্গালী জাতির নিকট এতই অপরিচিত ছিল যে, বন্ধিমল্লচন্দ্রের হাতে তার ঐরূপ লাঞ্ছনাতে কেউ আপত্তি করেনি । কিন্তু আজকাল ওর চাইতেও অপরিচিত শব্দও, নতুন গ্রন্থের বক্ষে কৌস্তভ মণির মত বিরাজ করতে দেখা যায় । দৃষ্টান্তস্বরূপ আমি দু একটির উল্লেখ করব ।

শ্রীযুক্ত অক্ষয়কুমার বড়াল জাতকবি ।—তঁার ভাল মন্দ মাঝারি সকল কবিতাতেই তঁার কবির জাতির পরিচয় পাওয়া যায় । বোধহয় তঁার রচিত এমন একটি কবিতাও নেই, যার অন্ততঃ একটি চরণেও ধ্বজবজ্রাঙ্কুশের চিহ্ন না লক্ষিত নয় । সত্যের অনুরোধে এ কথা আমি স্বীকার করতে বাধ্য যে, তঁার নতুন পুস্তকের নামটিতে আমার একটু খটকা লেগেছিল । “এষা” শব্দের সঙ্গে আমার ইতিপূর্বের কখনও দেখাসাক্ষাৎ হয় নি, এবং তার নামও আমি পূর্বের কখন শুনি নি । কাষেই আমার প্রথমেই মনে হয়েছিল যে, হয় ত “আয়েষা”, নয় ত “এসিয়া”, কোনরূপ ছাপার ভুলে “এষা” রূপ ধারণ করেছে । আমার এরূপ সন্দেহ হবার কারণও সম্পূর্ণ স্বাভাবিক । বন্ধিমল্লচন্দ্র যখন “আয়েষা”কে নিয়ে নভেল লিখেছেন, তখন তাকে নিয়ে অক্ষয়কুমার যে কবিতা রচনা করবেন, এতে আর আশ্চর্য্য

হবার কারণ কি থাকতে পারে? “আবার বলি ওসমান! এই বন্দী আমার প্রাণেশ্বর”—এই পদটির উপর রমণী-হৃদয়ের সপ্তকাণ্ড রামায়ণ খাড়া করা কিছু কঠিন নয়। তারপর “এসিয়া”;—প্রাচীর এই নবজাগরণের দিনে তার প্রাচীন নিদ্রাভঙ্গ করবার জন্য যে কবি উৎসুক হয়ে উঠবেন, এও ত স্বাভাবিক। যার ঘুম সহজে ভাঙ্গে না, তার ঘুম ভাঙ্গবার দুটিমাত্র উপায় আছে,—হয় টেনে হিঁচড়ে, নয় ডেকে। এসিয়ার ভাগ্যে টানা হেঁচড়ানো ব্যাপারটা ত পুরো দমে চলছে, কিন্তু তাতেও যখন তার চৈতন্য হল না, তখন ডাকা ছাড়া আর কি উপায় আছে? আমাদের পূর্বপুরুষেরা এসিয়াকে কাব্যে দর্শনে নানারূপ ঘুমপাড়ানী মাসাঁপিসীর গান গেয়ে ঘুম পাড়িয়ে রেখে গেছেন। এখন আবার জাগাতে হলে এ যুগের কবিরা “জাগর” গান গেয়েই তাকে জাগাতে পারবেন। সে গান অনেক কবি সুরে বেসুরে গাইতেও শুরু করে দিয়েছেন। স্তবরাং আমার সহজেই মনে হয়েছিল যে, অক্ষয়কুমার বড়ালও সেই কার্যে ব্রতী হয়েছেন। কিন্তু এখন শুন্দি যে, ও ছাপার ভুল নয়,—আমারই ভুল। প্রাচীন গাথার ভাষায় নাকি “এষা”র অর্থ অন্বেষণ। একালের লেখকেরা যদি শব্দের অন্বেষণে সংস্কৃত যুগ ডিঙ্গিয়ে একেবারে প্রাচীন গাথা-যুগে গিয়ে উপস্থিত হন, তাহলে একেলে বঙ্গ-পাঠকদের উপর একটু অত্যাচার করা হয়; কারণ, সেই শব্দের অর্থ-অন্বেষণে পাঠক যে কোনদিকে যাবে, তা স্থির করতে পারে না। আজকালকার বাঙ্গলা বুঝতে অমরের সাহায্য আবশ্যিক, তারপর যদি আবার যাস্ক চর্চা করতে হয়, তাহলে বাঙ্গলা-সাহিত্য পড়বার অবসর আমরা কখন পাব? যাস্কের সাহায্যেও যদি তার অর্থবোধ না হয়,

তাহলে বাঙ্গলা-সাহিত্যের চর্চা যে আমরা তাগ করব, তাতে আর সন্দেহ কি ? অর্থবোধ হয় না বলে যখন আমরা আমাদের পরকালের সদগতির একমাত্র সহায় যে সন্ধ্যা, তারি পাঠ বন্ধ করেছি,—তখন ইহকালের ক্ষণিক সুখের লোভে যে আমরা গাথার শব্দে রচিত বাঙ্গলা-সাহিত্য পড়ব, এ আশা করা যেতে পারে না । তা ছাড়া বৈদিক এবং অতিবৈদিক ভাষা থেকে যদি আমরা বাক্যসংগ্রহ করতে আরম্ভ করি, তাহলে তান্ত্রিক ভাষাকেই বা ছাড়ব কেন ? আমার লিখিত নতুন বইখানির নাম যদি আমি “ফেৎকারিণী”, “ডামর” কিংবা “উড্ডীশ” দিই, তা হলে কি পাঠকসম্প্রদায় খুব খুসী হবেন ?

শ্রীযুক্ত সুধীন্দ্রনাথ ঠাকুর তাঁর পুস্তিকাগুলির নামকরণ বিষয়ে যে অপূর্বতা দেখিয়ে থাকেন, তা’ আমাকে ভীত না করুক, বিস্মিত করে । আমি সাহিত্যের বাজারে মাল যাচাই করার জন্য কপ্তিপাথর হাতে নিয়ে বাবসা খুলে বসিনি । সুতরাং সুধীন্দ্র বাবুর রচনার দোষগুণ দেখানো আমার কর্তব্যের মধ্যে নয় । একমাত্র মলাটে তাঁর লেখা ‘যেটুকু আত্মপরিচয় দেয়, সেইটুকু আমার বিচারাধীন । ‘মঞ্জুশা’ ‘করঙ্ক’ প্রভৃতি শব্দের সঙ্গে যে আমাদের একেবারে মুখ-দেখাদেখি নেই, এ কথা বলতে পারিনে । তা হ’লেও স্বীকার করতে হবে যে, অন্ততঃ পাঠিকা-দের নিকট ও পদার্থগুলি যত সুপরিচিত, ও নামগুলি তাদৃশ নয় । তা’ ছাড়া ঐরূপ নামের যে বিশেষ কোন সার্থকতা আছে, তাও আমার মনে হয় না । আমাদের কল্পনাজাত বস্তু আমরা প্যাটরায় পূরে সাধারণের কাছে দিইনে, বরং সত্য কথা বলতে গেলে মনের প্যাটরা থেকে সেগুলি বা’র করে জনসাধারণের চোখের সমুখে সাজিয়ে রাখি । করঙ্কের কথা শুনলেই

তাম্বুলের কথা মনে হয়। পানের খিলির সঙ্গে সুধীন্দ্র বাবুর ছোট গল্পগুলির কি সাদৃশ্য আছে, জানিনে। করুণরস এবং পানের রস এক জিনিস নয়। আর একটি কথা। তাম্বুলের সঙ্গে সঙ্গে চর্বিবতচর্বিবণের ভাবটা মানুষের মনে সহজেই আসে। সে যাই হোক, আমি লজ্জার সঙ্গে স্বীকার করছি যে, সুধীন্দ্র বাবুর আবিষ্কৃত “বৈতানিক” শব্দ, আমি বৈতালিক শব্দের ছাপাস্তুর-মনে করেছিলুম। হাজারে ন’ শো নিরনব্বই জন বাঙ্গালী পাঠক যে ও শব্দের অর্থ জানেন না, এ কথা বোধহয় সুধীন্দ্র বাবু অস্বীকার করবেন না। আমার যতদূর মনে পড়ে, তা’তে কেবলমাত্র ভৃগুপ্রোক্ত মানব-ধর্ম্যশাস্ত্রে এক স্থলে ঐ শব্দটির ব্যবহার দেখেছি। কিন্তু তার অর্থ জানা আবশ্যক মনে করিনি। এইরূপ নামে বইয়ের পরিচয় দেওয়া হয় না, বরং তার পরিচয় গোপন করাই হয়। বাঙ্গলা সরস্বতীকে ছদ্মবেশ না পরালে যে তাঁকে সমাজে বার করা চলে না, এ কথা আমি মানিনে।

এই নামের উদাহরণক’টি টেনে আনবার উদ্দেশ্য, আমার সেই প্রথম কথার প্রমাণ দেওয়া। সে কথা এই যে, বঙ্গ-সাহিত্যের ভিতর সমালোচনার মত নামকরণেও বিজ্ঞাপনের ছাপ দেখতে পাওয়া যায়। বিজ্ঞাপনের আর পাঁচটা দোষের ভিতর একটা হচ্ছে তার শ্যাকামী। শ্যাকামীর উদ্দেশ্য হচ্ছে সহজে লোকপ্রিয় হওয়া, এবং তার লক্ষণ হচ্ছে ভাবে এবং ভাষায় মাধুর্যের ভাণ এবং ভঙ্গী। বঙ্গ-সাহিত্যে ক্রমে যে তাই প্রভাব পাচ্ছে, সেইটে দেখিয়ে দেবার জন্যে আমার এত কথা বলা। আমরা এতটাই কোমলের ভক্ত হয়ে পড়েছি যে, শুদ্ধ স্বরকেও কোমল করতে গিয়ে বিকৃত করতে আমরা তিলমাত্র দ্বিধা করিনে।

কথায় বলে, “যত চিনি দেবে ততই মিষ্টি হবে” । কিন্তু শর্করার ভাগ অতিরিক্ত হলে মিষ্টান্নও যখন অখাদ্য হয়ে ওঠে, তখন ঐ পদ্ধতিতে রচিত সাহিত্যও যে অরুচিকর হয়ে উঠবে, তাতে আর সন্দেহ কি ? লেখকেরা যদি ভাষাকে সুকুমার করবার চেষ্টা ছেড়ে দিয়ে, তাকে স্তম্ভ এবং সবল করবার চেষ্টা করেন, তা হলে বঙ্গ-সাহিত্যে আবার প্রাণ দেখা দেবে । ভাষা যদি প্রসন্ন হয়, তাহলে তার কর্কশতাও স্তম্ভ হয় । এ এতই সোজা কথা যে, এও যে আবার লোককে বোঝাতে হয়, এই মহা আপশোষের বিষয় । যখন বঙ্গ-সাহিত্যে অন্ধকার আর “বিরাজ” করবে না, তখন এ বিষয়ে আর কারও “মনোযোগ আকর্ষণ” করবার দরকারও হবে না ।

অগ্রহায়ণ, ১৩১৯ ।

সাহিত্যে চাবুক।

(১)

সেদিন ফাঁর থিয়েটারে “আনন্দ-বিদায়ের” অভিনয় শেষে দক্ষযজ্ঞের অভিনয়ে পরিণত হয়েছিল শুনে দুঃখিত এবং লজ্জিত হলুম। তার প্রথম কারণ এই যে, শ্রীযুক্ত দ্বিজেন্দ্রলাল রায়ের মত লোককে দর্শকমণ্ডলী লাঞ্ছিত করেছেন; এবং তার দ্বিতীয় কারণ এই যে, শ্রীযুক্ত দ্বিজেন্দ্রলাল রায়, শ্রীযুক্ত রবীন্দ্র নাথ ঠাকুরকে প্রকাশ্যে লাঞ্ছনা দেবার উদ্দেশ্যেই রঙ্গমঞ্চে আনন্দ-বিদায়ের অবতারণা করেছিলেন।

দ্বিজেন্দ্র বাবু লিখেছেন যে, তিনি সকল রকম “মি”র বিপক্ষে। ত্যাকামি, জ্যাঠামি, ভণ্ডামি, বোকামি প্রভৃতি যে-সকল “মি”-ভাগ্যান্ত পদার্থের তিনি উল্লেখ করেছেন, সেগুলির যে কোন ভদ্রলোকেই পক্ষপাতী, একরূপ আমার বিশ্বাস নয়; অন্ততঃ পক্ষপাতী হলেও, সে কথা কেউ মুখে স্বীকার করবেন না। কিন্তু সমাজে থাকতে হলেই পাঁচটি “মি” নিয়েই আমাদের ঘর করতে হয়, এবং সেই কারণেই সুপরিচিত “মি”গুলি সাহিত্যে না হোক, জীবনে আমাদের সকলেরই অনেকটা সওয়া আছে। কিন্তু যা আছে, তার উপর যদি একটা নতুন “মি” এসে আমাদের ঘাড়ে চাপে, তাহলে সেটা নিতান্ত ভয়ের বিষয় হয়ে ওঠে। আমরা এতদিন নিরীহ প্রকৃতির লোক বলেই পরিচিত ছিলাম। কিছুদিন থেকে ষণ্ডামি নামে একটা

নতুন “মি” আমাদের সমাজে প্রবেশ লাভ করেছে । এতদিন রাজনীতির রঙ্গভূমিতেই আমরা তার পরিচয় পেয়েছি । সুরাট কংগ্রেসে সেই “মি”র তাণ্ডব নৃত্যের অভিনয় হয়েছিল । আমার বিশ্বাস ছিল যে, সুরাটে যে যবনিকা-পতন হয়েছে, তা আর সহসা উঠবে না । কিন্তু এখন দেখতে পাচ্ছি যে, রাজনীতিতে প্রশ্রয় পেয়ে ষণ্ডামি ক্রমশঃ সমাজের অপর সকল দেশও অধিকার করে নিয়েছে । ষণ্ডামি জিনিসটের আর যে ক্ষেত্রেই সার্থকতা থাকে, সাহিত্যে নেই,—কেন না সাহিত্যে বাস্তবের কোন স্থান নেই ।—
 ন্টার গিয়েটারের Box হতে শ্রীযুক্ত দ্বিজেন্দ্রলাল রায়কে গায়ের জোরে নামান সহজ, কিন্তু তিনি বঙ্গ-সাহিত্যে যে উচ্চ আসন লাভ করেছেন, বাস্তবলে তাঁকে সেখান থেকে নামান অসম্ভব । লেখকমাত্রেরই নিন্দা-প্রশংসা সম্বন্ধে পরাধীন । সমালোচকদের চোখরাঙ্গানি সহ্য করতে লেখকমাত্রেরই প্রস্তুত হওয়া আবশ্যিক । কিন্তু সাহিত্য-জগতের ঢিলটে মারলে যে, জড়জগতের পাটকেলটা আমাদের খেতে হবে, এমন কোন কথা নেই । ওরকম একটা নিয়ম প্রচলিত হলে, সাহিত্যরাজ্যে আমাদের বাস করা চলবে না । কারণ এ কথা সর্ববাদীসম্মত যে, বুদ্ধির জোর গায়ের জোরের কাছে বরাবরই হার মানে । এই কারণেই শ্রীযুক্ত দ্বিজেন্দ্রলাল রায় যে-ভাবে লাঞ্চিত হইয়াছিলেন, তার জন্ত আমি বিশেষ দুঃখিত এবং লজ্জিত ।

(২)

কিন্তু শ্রীযুক্ত দ্বিজেন্দ্রলাল রায় যে, এ যুগের সাহিত্যে আবার “কবির লড়াই” ফিরে আনবার প্রয়াস পেয়েছেন, তার জন্ত আমি আরও বেশী দুঃখিত । ও কাজ একবার আরম্ভ করলে,

শেষটা খেউড় ধরতেই হবে। দ্বিজেন্দ্র বাবু বোধহয় এ কথা অস্বীকার করবেন না যে, সেটি নিতান্ত অবাঞ্ছনীয়।

এ পৃথিবীতে মানুষে আসলে খালি দুটি কার্যাই করতে জানে; সে হচ্ছে হাসতে এবং কাঁদতে। আমরা সকলেই নিজে হাসতেও জানি, কাঁদতেও জানি; কিন্তু সকলেরই কিছু আর অপরকে হাসাবার কিংবা কাঁদাবার শক্তি নেই। অবশ্য অপরকে চপেটাঘাত করে কাঁদানো কিংবা কাতুকুতু দিয়ে হাসানো, আমাদের সবারই আয়ত্ত,—কিন্তু সরস্বতীর বীণার সাহায্যে কেবল দুটি চারটি লোকই ঐ কার্য করতে পারেন। যাঁদের সে ভগবৎদত্ত ক্ষমতা আছে, তাঁদেরি আমরা কবি বলে মেনে নিই। বাদবাকী সব বাজে লেখক। কাব্যে, আমার মতে, শুধু তিনটিমাত্র রস আছে : করুণ রস, হাস্য রস, আর হাসিকান্না-মিশ্রিত মধুর রস। যে লেখায় এর একটি না একটি রস আছে, তাই কাব্য; বাদবাকী সব নীরস লেখা,—দর্শন, বিজ্ঞান ইত্যাদি যা খুসী তা হতে পারে,—কিন্তু কাব্য নয়। বাঙ্গলা-সাহিত্যে হাস্যরসে শ্রীযুক্ত দ্বিজেন্দ্রলাল রায় অদ্বিতীয়। তাঁর গানে হাস্যরস, ভাবে কথায় সুরে তালে লয়ে পঞ্চীকৃত হয়ে, মূর্ত্তিমান হয়ে উঠেছে। হাসির গান তাঁর সঙ্গে জুড়ীতে গাইতে পারে, বঙ্গ-সাহিত্যের আসরে এমন গুণী আর একটিও নেই। কান্নার মত হাসিরও নানাপ্রকার বিভিন্ন রূপ আছে, এবং দ্বিজেন্দ্র বাবুর মুখে হাসি নানা আকারেই প্রকাশ পেয়েছে। সাহিত্যে যে কেবল আমাদের মিস্ত্রি হাসিই হাসতে হবে, এ কথা আমি মানি নে। সুতরাং দ্বিজেন্দ্র বাবু যে বলেছেন যে, কাব্যে বিজ্ঞাপের হাসিরও স্থান আছে, সে কথা সম্পূর্ণ সত্য। কিন্তু উপহাস জিনিসটের প্রাণই হচ্ছে

হাসি । হাসি বাদ্ দিলে শুধু তার উপটুকু থাকে, কিন্তু তার রূপটুকু থাকে না । হাস্তে হলেই আমরা অল্পবিস্তর দন্তবিকাশ করতে বাধ্য হই । কিন্তু দন্তবিকাশ করলেই যে সে ব্যাপারটা হাসি হয়ে ওঠে, তা নয়,—দাঁতখিঁচুনী বলেও পৃথিবীতে একটা জিনিস আছে । সে ক্রিয়াটি যে ঠিক হাসি নয়, বরং তার উল্টো, জীবজগতে তার প্রকৃষ্ট প্রমাণ আছে । স্মতরাং উপহাস জিনিসটে সাহিত্যে চল্লেও, কেবলমাত্র তার মুখভঙ্গীটি সাহিত্যে চলে না । কোন জিনিস দেখে যদি আমাদের হাসি পায়, তাহলেই আমরা অপরকে হাসাতে পারি । কিন্তু কেবলমাত্র যদি রাগই হয়, তাহলে সে মনোভাবকে হাসির চন্দ্রবেশ পরিয়ে প্রকাশ করলে, দর্শকমণ্ডলীকে শুধু রাগাতেই পারি । দ্বিজেন্দ্র বাবু এই কথাটি মনে রাখলে লোককে হাসাতে গিয়ে রাগাতেন না ।

(৩)

দ্বিজেন্দ্র বাবু বলেছেন যে, নাট্যকাারে parody কোন ভাষাতেই নেই । যা কোন দেশে কোন ভাষাতেই ইতিপূর্বে রচিত হয় নি, তাই সৃষ্টি করতে গিয়ে তিনি একটি অদ্ভুত পদার্থের সৃষ্টি করেছেন । বিশ্বামিত্রের তপোবল আমাদের কারও নেই ; স্মতরাং বিশ্বামিত্রও যখন নূতন সৃষ্টি করতে গিয়ে অকৃতকার্য হয়েছিলেন, তখন আমরা যে হব, এ ত নিশ্চিত ।

মানুষে মুখ ভেংচালে দর্শকমাত্রই হেসে থাকে । কেন যে সে কাজ করে, তার বিচার অনাবশ্যক ; কিন্তু ঘটনা হচ্ছে এই যে, ওরূপ মুখভঙ্গী দেখলে মানুষের হাসি পায় । Parody হচ্ছে সাহিত্যে মুখ ভেংচান । Parody নিয়ে যে নাটক হয় না,

তার কারণ দু'ঘণ্টা ধরে লোকে একটানা মুখ ভেংচে যেতে পারে না ; আর যদিও কেউ পারে ত, দর্শকের পক্ষে তা অসহ্য হয়ে ওঠে। ইঠাৎ এক মুহূর্তের জল্য দেখা দেয় বলেই, এবং তার কোন মানেমোদ্দা নেই বলেই, মানুষের মুখ-ভেংচানি দেখে হাসি পায়। সুতরাং ভেংচানির মধ্যে দর্শন, বিজ্ঞান, স্থনীতি, স্মৃতি প্রভৃতি ভীষণ জিনিস সব পুরে দিতে গেলে, বাপারটা মানুষের পক্ষে রুচিকর হয় না। ঐরূপ করাতে ভেংচানির শুধু ধর্ম্মনষ্টই হয়। শিক্ষাপ্রদ ভেংচানির সৃষ্টি করতে গিয়ে দ্বিজেন্দ্র বাবু রসজ্ঞানের পরিচয় দেন নি।—যদি parodyর মধ্যে কোনরূপ দর্শন থাকে ত সে দন্তের দর্শন।

(৪)

দ্বিজেন্দ্র বাবু তাঁর “আনন্দ-বিদ্যায়”র ভূমিকায় প্রকারান্তরে স্বীকারই করেছেন যে, লোক হাসানো নয়, লোকশিক্ষা দেওয়াই তাঁর মনোগত অভিপ্রায়। প্রহসন শুধু অছিল। মাত্র। বেত হাতে গুরুমশাইগিরি করা, এ যুগের সাহিত্যে কোন লোকের পক্ষেই শোভা পায় না। “পরিব্রাণায় সাধুনাং বিনাশায় চ দুষ্কৃতাম্। ধর্ম্মসংস্থাপনার্থায় সম্ভবামি যুগে যুগে”—এ কথা শুধু অবতীর্ণ ভগবানের মুখেই সাজে, সামান্য মানবের মুখে সাজে না। লেখকেরা যদি নিজেদের এক একটি ক্ষুদ্র অবতারস্বরূপ মনে করেন, কিংবা যদি তাঁরা সকলে কেউ বিমুখ হয়ে ওঠেন, তাহলে পৃথিবীর সাধুদেরও পরিব্রাণ হবে না, এবং দুষ্কৃতদেরও শাসন হবে না ; লাভের মধ্যে লেখকেরা পরস্পর শুধু কলমের গোঁচা-খুঁচি করবেন। দ্বিজেন্দ্র বাবুর ইচ্ছাও যে তাই হয়। এবং তিনি ঐরূপ গোঁচা-খুঁচি হওয়াটা যে উচিত, তাই প্রমাণ

কব্‌বার জন্তে বিলাতী নজির দেখিয়েছেন। তিনি বলেন যে, Wordsworthকে Browning চাবুকেছিলেন, এবং Wordsworth, Byron এবং Shelleyকে চাবুকেছিলেন। বিলাতের কথিরা যে অহরহ পরস্পরকে চাবুকা-চাবুকি করে থাকেন, এ জ্ঞান আমার ছিল না।

Browning, Wordsworth সম্বন্ধে Lost Leader নামে যে একটি ক্ষুদ্র কবিতা রচনা করেন, সেটিকে কোন হিসাবেই চাবুক বলা যায় না। কবিসমাজের সর্ববিশিষ্ট এবং পূজ্য দলপতি, দলভাগ করে' অপর-দলভুক্ত হওয়াতে কবিসমাজ যে গভীর বেদনা অনুভব করেছিলেন, ঐ কবিতাতে Browning সেই দুঃখই প্রকাশ করেছেন। Wordsworth যে Byron এবং Shelleyকে চাবুকেছিলেন, এ কথা আমি জানতুম না। Byron অবশ্য তাঁর সমসাময়িক কবি এবং সমালোচকদের প্রতি দু হাতে ঘুষো চালিয়েছিলেন, কিন্তু সে আত্মরক্ষার্থ। অহিংসা পরমধর্ম হলেও, আততায়ীবধে পাপ নেই। দ্বিজেন্দ্র বাবু যে নজির দেখিয়েছেন, সেই নজিরের বলেই প্রমাণ করা যায় যে, চাবুক পদার্থটার বিলাতী কবিসমাজে চলন থাকলেও, তার ব্যবহারে যে সাহিত্যের কোন ক্ষতিবৃদ্ধি হয়েছে, তা নয়। Wordsworth, Shelley, Byron প্রভৃতি কোন কবিই কোন প্রতিদ্বন্দ্বীর তাড়নার ভয়ে নিজের পথ ছাড়ে ননি, কিংবা সাহিত্য-রাজ্যে পাশ কাটিয়ে যাবারও চেষ্টা করেন নি। কবিমাত্রেয়ই মত যে “স্বধর্মো নিধনং শ্রেয়ঃ পরঃধর্মো ভয়াবহঃ।” চাবুকের ভয় কেবলমাত্র তারাই করে, যাদের “স্বধর্ম” বলে জিনিসটা আদপেই নেই, এবং সাহিত্যে পরমুখাপেক্ষী হওয়া ছাড়া যাদের গতাস্তর নেই।

এ শ্রেণীর লেখকেরা কি লেখেন, আর না লেখেন, তাতে সমাজের কিংবা সাহিত্যের বড় কিছু আসে যায় না ।

এ কথা আমি অস্বীকার করিনে যে, সাহিত্যে চাবুকের সার্থকতা আছে । হাসিতে রস এবং কষ দুইই আছে । এবং ঠিক মাত্রা অনুসারে কষের খাদ দিতে পারলে হাস্যরসে জমাট বাঁধে । কিন্তু তাই বলে “কষে”র মাত্রা এত অধিক বাড়ানো উচিত নয় যে, তাতে হাসি জিনিসটে ক্রমে অন্তর্হিত হয়ে, যা খাঁটি মাল বাকী থাকে, তাতে শুধু “কশাঘাত” করা চলে । সাহিত্যেও অপরের গায়ে Nitric acid ঢেলে দেওয়াটা বীরদের পরিচয় নয় । দ্বিজেন্দ্র বাবু “কশাঘাত”কে “কশাঘাত” বলে ভুল করে, ষড়্‌গুহ জ্ঞানের পরিচয় দেন নি । সাহিত্যে কোন ব্যক্তি-বিশেষের উপর চাবুক প্রয়োগ করাটা অনাচার । সমগ্র সমাজের পৃষ্ঠেই ওর প্রয়োগটা সনাতন প্রথা । মিথ্যা যখন সমাজে আশ্কারা পেয়ে সত্যের সিংহাসন অধিকার করে বসে, এবং রীতি যখন নীতি বলে সম্মান লাভ করে ও সমগ্র সমাজের উপর নিজের শাসন বিস্তার করে, তখনই বিদ্রূপের দিন আসে । পৃথিবীতে সব চাপা যায়, কিন্তু হাসি চাপা যায় না । ব্যক্তি-বিশেষের প্রতি চাবুকের প্রয়োগ চলে না । কোন লেখক যদি নিতান্ত অপদার্থ হয়, তাহলে তার উপর কশাঘাত করাটা কেবল নির্ভরতা ; কেন না, গাধা পিঠে ঘোড়া হয় না । অপর পক্ষে যদি কোন লেখক সত্য সত্যই সরস্বতীর বরপুত্র হন, তা হলে তাঁর লেখার কোন বিশেষ অংশ কিংবা ধরণ মনোমত না হলেও, সেই বিশেষ ধরণের প্রতি যেকোন বিদ্রূপ সঙ্গত, সেকোন বিদ্রূপকে আর যে নামেই অভিহিত কর, “চাবুক” বলা চলে না । কারণ, ওরূপ ক্ষেত্রে কবির মর্যাদা রক্ষা না করে বিদ্রূপ

করলে সমালোচকেরও আত্মমর্যাদা রক্ষিত হয় না । কোন ফাঁক পেলেই, কলি যে-ভাবে নলের দেহে প্রবেশ করেছিলেন, সমালোচকের পক্ষে সেই ভাবে কবির দেহে প্রবেশ করা শোভনও নয়, সঙ্গতও নয় ।

(৫)

চাবুক ব্যবহার করবার আর একটি বিশেষ দোষ আছে । ও কাজ করতে করতে মানুষের খুন চড়ে যায় । দ্বিজেন্দ্র বাবুরও তাই হয়েছে । তিনি একমাত্র “চাবুকে” সন্তুষ্ট না থেকে, ক্রমে “ঝাঁটিকা”, “চাঁটিকা” প্রভৃতি পদার্থেরও প্রয়োগ করবার চেষ্টা করেছেন । আমি বাঙ্গলায় অনাবশ্যকে “ইকা” প্রত্যয়ের বিরোধী । সুতরাং আমি নির্ভয়ে দ্বিজেন্দ্র বাবুকে এই প্রশ্ন করতে পারি যে, “চাঁটিকা”র “ইকা” বাদ দিয়ে যা অবশিষ্ট থাকে, সে জিনিসটে মারাতে কি কোন লেখকের পদমর্যাদা বৃদ্ধি পায় ? “ঝাঁটা” সম্বন্ধে আমার বক্তব্য এই যে, সম্মার্জ্জনীর উদ্দেশ্য ধুলো ঝাড়া, গায়ের ঝালঝাড়া নয় । বিলাতী সরস্বতী মাঝে মাঝে রণচণ্ডী মূর্তি ধারণ করলেও, বঙ্গ সরস্বতীর পক্ষে ঝাঁটা উঁচিয়ে রঙ্গভূমিতে অবতীর্ণ হওয়াটা যে নিতান্ত অবাঞ্ছনীয়, এ কথা বোধহয় কেউ অস্বীকার করবেন না ।

(৬)

শ্রীযুক্ত দ্বিজেন্দ্রলাল রায় নিজে মার-মূর্তি ধারণ করবার যে কারণ দেখিয়েছেন, আমার কাছে সেটি সব চেয়ে অদ্ভুত লাগল । দ্বিজেন্দ্র বাবুর মতে, “যদি কোন কবি কোন কাব্যকে সাহিত্যের পক্ষে অমঙ্গলকর বিবেচনা করেন, তাহা হইলে

সে রূপ কাব্যকে সাহিত্যক্ষেত্র হইতে চাবকাইয়া দেওয়া তাঁহার কর্তব্য ।”

এক কথায়, সাহিত্যের মঙ্গলের জন্ত নৈতিক চাবুক মারাই দ্বিজেন্দ্র বাবুর অভিপ্রায় । পৃথিবীতে অনেক লোকের ধারণা যে, কাউকে ধর্ম্মাচরণ শেখাতে হলে মৃত্যুর মত তার চুল চেপে ধরাটাই তার সর্বশ্রেষ্ঠ উপায়, এবং সেই জন্ত কর্তব্য । স্বলে, জেলখানায়, ঐ সমাজের মঙ্গলের জন্তই বেত মারবার নিয়ম প্রচলিত ছিল । কিন্তু আজকাল অনেকেরই এ জ্ঞান জন্মেছে যে, ও পদ্ধতিতে সমাজের কোন মঙ্গলই সাধিত হয় না, লাভের মধ্যে শুধু, যে বেত মারে এবং যাকে মারা হয়, উভয়েই তার ফলে মনুষ্যই হারিয়ে পশুই লাভ করে । অপরের উপর অত্যাচার করবার জন্ত শারীরিক বলের প্রয়োগটা যে বর্বরতা, এ কথা সকলেই মানেন,—কিন্তু একই উদ্দেশ্যে নৈতিক বলের প্রয়োগটাও যে বর্বরতামাত্র, এ সত্য আজও সকলের মনে বসে যায় নি । কঠিন শাস্তি দেবার প্রবৃত্তিটি আসলে রূপান্তরে প্রতিহিংসা-প্রবৃত্তি । ও জিনিসটিকে সমাজের মঙ্গলজনক মনে করা শুধু নিজের মন-ভোলানো মাত্র । নীতিরও একটা বোকামি, গোঁড়ামি এবং গুণ্ডামি আছে । নিত্যই দেখতে পাওয়া যায়, একরকম প্রকৃতির লোকের হাতে নীতি পদার্থটা পরের উপর অত্যাচার করবার একটা অস্ত্রমাত্র । ধর্ম্ম এবং নীতির নামে মানুষকে মানুষ যত কষ্ট দিয়েছে, যত গর্হিত কার্য করেছে, এমন বোধ হয় আর কিছুই সাহায্য করেনি ।—আশা করি, দ্বিজেন্দ্রবাবু সে শ্রেণীর লোক নন, যাঁহাদের মতে, সুনীতির নামে সাত খুন মাপ হয় ।—ইতিহাসে এর ধারাবাহিক প্রমাণ আছে যে, নীতির বোকামি, গোঁড়ামি এবং গুণ্ডামির অত্যাচার

সাহিত্যকে পুরোমাত্রায় সহ্য করতে হয়েছে। কারণ, সাহিত্য সকল দেশে সকল যুগেই বোকামি, গোঁড়ামি এবং গুণ্ডামির বিপক্ষ, এবং প্রবল শত্রু।

নীতি, অর্থাৎ যুগবিশেষে প্রচলিত রীতির ধর্ম্যই হচ্ছে মানুষকে বাঁধা; কিন্তু সাহিত্যের ধর্ম্য হচ্ছে মানুষকে মুক্তি দেওয়া। কায়েই পরস্পরের সঙ্গে দা-কুমড়োর সম্পর্ক। ধর্ম্য এবং নীতির দোহাই দিয়েই মুসলমানেরা আলেক্জণ্ড্রিয়ার লাইব্রেরী ভগ্নসাৎ করেছিল।

এ যুগে অবশ্য নীতি-বীরদের বাহুবলের এক্তিয়ার হতে আমরা বেরিয়ে গেছি, কিন্তু স্ননীতির গোয়েন্দারা আজও সাহিত্যকে চোখে চোখে রাখেন, এবং কারও লেখায় কোন ছিদ্র পেলেই সমাজের কাছে লেখককে ধরিয়ে দিতে উৎসুক হন। কাব্যামৃত-রসাস্বাদ করা এক, কাব্যের ছিদ্রান্বেষণ করা আর। শ্রীকৃষ্ণের বাঁশী কবিতার রূপকমাত্র। কারণ, সে বাঁশীর ধর্ম্যই এই যে, তা “মনের আকৃতি বেকত করিতে কত না সন্ধান জানে।” ছিদ্রান্বেষী নীতিধর্ম্মীদের হাত পড়লে সে বাঁশীর ফুটোগুলো যে তাঁরা বুজিয়ে দিতে চেষ্টা করবেন, তাতে আর সন্দেহ কি? এক শ্রেণীর লোক চিরকালই এই চেষ্টা করে অকৃতকার্য হয়েছেন; কারণ, সে ছিদ্র স্বয়ং ভগবানের হাতে-করা বিঁধ, তাকে নিরেট করে দেবার ক্ষমতা মানুষের হাতে নেই। “মি” জিনিসটিই খারাপ, কিন্তু আমাদের শাস্ত্রমতে, মানুষের পক্ষে সব চাইতে সর্ববনেশে “মি” হচ্ছে “আমি”। কারণ, ও পদার্থটির আধিক্য থাকলে আমাদের বিছাবুদ্ধি কাণ্ডজ্ঞান সবই লুপ্ত হয়ে আসে। অগ্ন্যাণ্ড সকল “মি” ঐ “আমি”কে আশ্রয় করেই থাকে। কিন্তু “আমি” এত অব্যক্তভাবে আমাদের সমস্ত মনটায়

ব্যাপ্ত হয়ে পড়ে যে, আমরা নিজেও বুঝতে পারিনে যে, তারই তাড়নায় আমরা পরের উপর কুব্যবহার করতে উত্তত হই,—সমাজ কিংবা সাহিত্য কারও মঙ্গলের জন্য নয়। এই কথাটা স্পষ্ট বুঝতে পারলে আমরা পরের উপর নৈতিক চাবুক প্রয়োগ করতে কুণ্ঠিত হই। এই কারণেই, যদি একজন কবি অপর একজন সমসাময়িক কবির সমালোচক হয়ে দাঁড়ান, তাহলে তাঁর নিকট কবি এবং কাব্যের ভেদবুদ্ধিটি নষ্ট হওয়া অতি সহজ।

(৭)

দ্বিজেন্দ্র বাবু শ্রীযুক্ত রবীন্দ্রনাথ ঠাকুরের লেখা হতে দুর্নীতির যে প্রমাণ সংগ্রহ করেছেন, তা হস্তরসাত্মক না হোক, হস্তকর বটে। “কেন যামিনী না যেতে জাগালে না”—এ কথাটা ভারতবাসীর পক্ষে যে অপ্রীতিকর, তা আমি স্বীকার করতে বাধ্য—কেন না, যামিনী গেলেও আমরা জাগবার বিপক্ষে।—আমরা শুধু রাতে নয়, অন্ধপ্রহর ঘুমতে চাই। সুতরাং যদি কেউ অন্ধকারের মধ্যেই চোখ খোলবার পক্ষপাতী হন, তাহলে তাঁর উপর বিরক্ত হওয়া আমাদের পক্ষে স্বাভাবিক!—সে যাই হোক, ও গানটিতে বঙ্গ-সাহিত্যের যে কি অমঙ্গল ঘটেছে, তা আমি বুঝতে পারলুম না। এ দেশের কাব্যরাজ্যে অভিসার বহুকাল হতে প্রচলিত আছে। রাধিকার নামে বেনামী করলে, ও কবিতাটি সম্বন্ধে দ্বিজেন্দ্র বাবুর বোধ হয় আর কোনও আপত্তি থাকত না। আমরা যে নাম-জিনিসটির এতটা, অধীন হয়ে পড়েছি, সেটা আমাদের পক্ষে মোটেই শ্লাঘার বিষয় নয়।

আর যদি দ্বিজেন্দ্র বাবুর মতে ও গানটি ভদ্রসমাজে অশ্রাব্য হয়, তাহলে সেটির parody করে' তিনি কি তাকে এতই সুশ্রাব্য করে তুলেছেন যে, সেটি রঙ্গালয়ে চীৎকার করে না গাইলে আর সমাজ উদ্ধার হয় না? দ্বিজেন্দ্র বাবু যেমন বিলাতী নজিরের বলে, চাব্কা-চাব্কি বঙ্গ-সাহিত্যে প্রচলিত কর্তে চেয়েছেন, তেমনি তিনি আমাদের সাহিত্যে বিলাতী puritanism-র ভূত নামাতে চান। ভারতবর্ষীয় সাহিত্যের অনেক ক্রটি আছে—কিন্তু puritanism নামক শ্যাকামি এবং গৌড়ামি হতে এ দেশীয় সাহিত্য চিরকালই মুক্ত ছিল। দ্বিজেন্দ্র বাবুর মত যদি আমাদের গ্রাহ্য কর্তে হয়, তাহলে অশ্বঘোষের “বুদ্ধচরিত” থেকে শুরু করে জয়দেবের “গীতগোবিন্দ” পর্য্যন্ত, অন্ততঃ হাজার বৎসরের সংস্কৃত কাব্য সকল আমাদের অগ্রাহ্য কর্তে হবে।—একখানিও টিঁকবে না। তারপর বিজ্ঞাপতি চণ্ডীদাস থেকে আরম্ভ করে ভারতচন্দ্র পর্য্যন্ত, সকল কবির সকল গ্রন্থই আমাদের অস্পৃশ্য হয়ে উঠবে। একখানিও বাদ যাবে না। যাঁরা রবীন্দ্র বাবুর সরস্বতীর গাত্রে কোথায় কি তিল আছে, তাই খুঁজে বেড়ান,—তাঁরা যে ভারতবর্ষের পূর্ব-কবিদের সরস্বতীকে কি করে তুষারগৌরী-রূপে দেখেন, তা আমার পক্ষে একেবারেই দুর্বোধ্য।—শেষ কথা, puritanism-এর হিসেব থেকে স্বয়ং দ্বিজেন্দ্র বাবুও কিছু কম অপরাধী নন। তার প্রমাণ ত হাতে হাতেই রয়েছে।—“আনন্দ-বিদায়” moral text-book বলে গ্রাহ্য হবে, এ আশা যদি তিনি করে থাকেন, তাহলে সে আশা সফল হবে না।

মাঘ, ১৩১৯।

তর্জমা ।

আমরা ইংরাজ জাতিকে কতকটা জানি, এবং আমাদের বিশ্বাস যে, প্রাচীন হিন্দু জাতিকে তার চাইতেও বেশী জানি ; আমরা চিনি যে শুধু নিজেদের ।

আমরা নিজেদের চেনবার কোন চেষ্টাও করিনে, কারণ আমাদের বিশ্বাস যে, সে জানার কোন ফল নেই ; তা ছাড়া নিজেদের ভিতর জানবার মত কোন পদার্থ আছে কিনা, সে বিষয়েও অনেকের সন্দেহ আছে ।

বঙ্গালীর নিজস্ব বলে' মনে কিম্বা চরিত্রে যদি কোন পদার্থ থাকে, তাকে আমরা ডরাই,—তাই চোখের আড়াল করে' রাখতে চাই । আমাদের ধারণা যে, বঙ্গালী তার বঙ্গালিত্ব না হারালে আর মানুষ হয় না । অবশ্য অপরের কাছে তিরস্কৃত হ'লে আমরা রাগ করে' ঘরের ভাত, (যদি থাকে ত) বেশী করে' খাই ; কিন্তু উপেক্ষিত হ'লেই আমরা বিশেষ ক্ষুব্ধ হই । মান এবং অভিমান এক জিনিস নয় । প্রথমটির অভাব হতেই দ্বিতীয়টি জন্মলাভ করে ।

আমরা যে নিজেদের মাণ্য করিনে, তার স্পষ্ট প্রমাণ এই যে, আমরা উন্নতি অর্থে বুঝি,—হয় বর্তমান ইউরোপের দিকে এগোনো, নয় অতীত ভারতবর্ষের দিকে পিছোনো । আমরা নিজের পথ জানিনে বলে', আজও মনঃস্থির করে' উঠতে পারিনি যে, পূর্ব এবং পশ্চিম এই দুটির মধ্যে কোন দিক অবলম্বন

করলে আমরা ঠিক গন্তব্য স্থানে গিয়ে পৌঁছব। কাজেই আমরা ইউরোপীয় সভ্যতার দিকে তিন পা এগিয়ে, আবার ভারতবর্ষের দিকে দু'পা পিছিয়ে আসি—আবার অগ্রসর হই, আবার পিছু হটি। এই কুর্গিস করাটাই আমাদের নব-সভ্যতার ধর্ম ও কর্ম।

উক্ত ক্রিয়াটি আমাদের পক্ষে বিশেষ গৌরব-সূচক না হলেও, মেনে নিতে হবে। যা মনে সত্য বলে' জানি, সে সম্বন্ধে মনকে চোখ ঠেরে কোন লাভ নেই! আমরা দোটানার ভিতর পড়েছি—এই সত্যটি সহজে স্বীকার ক'রে নিলে, আমাদের উন্নতির পথ পরিষ্কার হয়ে আসবে। যা আজ উভয়-সঙ্কট বলে' মনে হচ্ছে, তাই আমাদের উন্নতির স্রোতকে একটি নির্দিষ্ট পথে বদ্ধ রাখবার উভয়কূল বলে বুঝতে পারব। আমরা যদি চলতে চাই ত, আমাদের একূল ওকূল দুকূল রক্ষা করেই চলতে হবে।

আমরা স্পষ্ট জানি আর না জানি, আমরা এই উভয়কূল অবলম্বন করেই চলবার চেষ্টা করছি। সকল দেশেরই সকল যুগের একটি বিশেষ ধর্ম আছে। সেই যুগধর্ম অনুসারে চলতে পারলেই মানুষ সার্থকতা লাভ করে। আমাদের এ যুগ সত্যযুগও নয়, কলিযুগ নয়,—শুধু তর্জ্জমার যুগ। আমরা শুধু কথায় নয়, কাজেও, একেলে বিদেশী এবং সেকেলে স্বদেশী সভ্যতার অনুবাদ করেই দিন কাটাই। আমাদের মুখের প্রতিবাদও ঐ একই লক্ষণাক্রান্ত। আমরা সংস্কৃতির অনুবাদ করে নূতনের প্রতিবাদ করি, এবং ইংরেজীর অনুবাদ করে' পুরাতনের প্রতিবাদ করি। আসলে রাজনীতি, সমাজনীতি, ধর্ম, শিক্ষা, সাহিত্য,—সকল ক্ষেত্রেই তর্জ্জমা করা ছাড়া

আমাদের উপায়ান্তর নেই । সুতরাং আমাদের বর্তমান যুগটি তর্জমার যুগ বলে' গ্রাহ্য করে' নিয়ে, ঐ অনুবাদ কার্যটি যোলআনা ভালরকম করার উপর আমাদের পুরুষার্থ এবং কৃতীত্ব নির্ভর করছে ।

পরের জিনিসকে আপনার করে' নেবার নামই তর্জমা । সুতরাং ও কার্য্য করাতে আমাদের কোন ক্ষতি নেই, এবং নিজেদের দৈন্তের পরিচয় দেওয়া হয় মনে করেও লজ্জিত হবার কারণ নেই । কেননা নিজের ঐশ্বর্য্য না থাকলে লোকে যেমন দান করতে পারে না, তেমনি, নেবার যথেষ্ট ক্ষমতা না থাকলে লোকে গ্রহণও করতে পারে না । স্মৃতির মতে, দাতা এবং গ্রহীতার পরস্পর যোগ না হলে দানক্রিয়া সম্পন্ন হয় না । এ কথা সম্পূর্ণ সত্য । মৃত ব্যক্তি দাতাও হতে পারে না, গ্রহীতাও হতে পারে না ; কারণ দান এবং গ্রহণ উভয়ই জীবনের ধর্ম্ম । বুদ্ধদেব, যিশুখ্রিস্ট, মহম্মদ প্রভৃতি মহাপুরুষদের নিকট কোটি কোটি মানব ধর্ম্মের জন্য পণী । কিন্তু তাঁদের দত্ত অনূল্য রত্ন তাঁদের হাত থেকে গ্রহণ করবার ক্ষমতা কেবলমাত্র তাঁদের সমকালবর্ত্তী জনকতক মহাপুরুষেরই ছিল । এবং শিষ্য-পরম্পরায় তাঁদের মত আজ লক্ষ লক্ষ লোকের ঘরের সামগ্রী হয়ে উঠেছে । পৃথিবীতে গুরু হওয়া বেশী শক্ত, কিন্তু শিষ্য হওয়া বেশী শক্ত, বলা কঠিন । বাঁদের বেদান্ত শাস্ত্রের সঙ্গে স্বল্পমাত্রাও পরিচয় আছে, তাঁরাই জানেন যে, পুরাকালে গুরুরা কাউকে ব্রহ্মবিদ্যা দান করবার পূর্বে, শিষ্যের সে বিদ্যা গ্রহণ করবার উপযোগিতা সম্বন্ধে কিরূপ কঠিন পরীক্ষা করতেন । উপনিষদকে 'গুহ্যশাস্ত্র করে' রাখার উদ্দেশ্যই এই যে, যাদের শিষ্য হবার সামর্থ্য্য নেই, এমন লোকেরা ব্রহ্মবিদ্যা নিয়ে বিচ্ছে

ফলাতে না পারে। এ কথা সম্পূর্ণ সত্য যে, শক্তিমান গুরু হবার একমাত্র উপায়—পূর্বের ভক্তিমান শিষ্য হওয়া। বর্তমান যুগে আমরা ভক্তি পদার্থটি ভুলে গেছি, আমাদের মনে আছে শুধু অভক্তি ও অতিভক্তি। এ দুয়ের একটিও সাধুতার লক্ষণ নয়, তাই ইংরাজী-শিক্ষিত লোকের পক্ষে অপর কাউকে শিক্ষা দেওয়া অসম্ভব।

আমরা কথায় বলি, জ্ঞানলাভ করি; কিন্তু আসলে জ্ঞান উত্তরাধিকারীসঙ্গে কিম্বা প্রসাদস্বরূপে লাভ করবার পদার্থ নয়। আমরা সজ্ঞানে জন্মলাভ করিনে, কেবল জ্ঞান অর্জন করবার ক্ষমতামাত্র নিয়ে ভূমিষ্ঠ হই। জ্ঞান বাপারটি মানসিক চেষ্টার অধীন, জ্ঞান একটি মানসিক ক্রিয়া মাত্র, এবং সে ক্রিয়া ইচ্ছাশক্তির একটি বিশেষ বিকাশ। মন পদার্থটি একটি বেওয়ারিশ প্লেট নয়, যার উপর বাহ্যজগৎরূপ পেন্সিল শুধু হিজিবিজি কেটে যায়; অথবা ফোটোগ্রাফিক প্লেটও নয়, যা কোনরূপ অন্তর্গত রাসায়নিক প্রক্রিয়ার দ্বারা বাহ্যজগতের ছায়া ধরে রাখে। যে প্রক্রিয়ার বলে আমরা, জ্ঞাতব্য বিষয়কে নিজের ইচ্ছা এবং ক্ষমতা অনুসারে নিজের অন্তর্ভুক্ত করে নিতে পারি,—তারি নাম জ্ঞান। আমরা মনে মনে যা তর্জমা করে নিতে পারি, তাই আমরা যথার্থ জানি; যা পারিনে, তার শুধু নাম-মাত্রের সঙ্গে আমাদের পরিচয়। ঐ তর্জমা করার শক্তির উপরই মানুষের মনুষ্যত্ব নির্ভর করে। সুতরাং একাগ্রভাবে তর্জমা কার্যে ব্রতী হওয়াতে আমাদের পুরুষকার বৃদ্ধি পাবে বই ক্ষীণ হবে না।

আমি পূর্বের বলেছি যে, আমরা সকলে মিলে জীবনের সকল ক্ষেত্রেই, হয় ইউরোপীয় নয় অথবা সভ্যতার তর্জমা করবার

চেষ্টা করছি, কিন্তু ফলে আমরা তর্জমা না করে' শুধু নকলই করছি। নকল করার মধ্যে কোনরূপ গৌরব বা মনুষ্যত্ব নেই। মানসিক শক্তির অভাববশতঃই মানুষে যখন কোনও জিনিস রূপান্তরিত করে' নিজের জীবনের উপযোগী করে' নিতে পারে না, অথচ লোভবশতঃ লাভ করতে চায়, তখন তার নকল করে। নকলে বাইরের পদার্থ বাইরেই থাকে, আমাদের অন্তর্ভূত হয় না, তার দ্বারা আমাদের মনের এবং চরিত্রের কান্তি পুষ্ট হয় না, ফলে মানসিক শক্তির যথেষ্ট চর্চার অভাববশতঃ দিন দিন সে শক্তি হ্রাস হতে থাকে। ইউরোপীয় সভ্যতা আমরা নিজেদের চারিপাশে জড় করে'ও সেটিকে অন্তরঙ্গ করতে পারিনি, তার স্পর্শ প্রমাণ এই যে, আমরা মাঝে মাঝে সেটিকে কেড়ে ফেলবার জন্য ছটফট করি। মানুষে যা আত্মসাৎ করতে পারে না তাই ভক্ষণ করতে চায়। আমরা মুখে যাই বলি কেন, কাজে, পূর্ব সভ্যতা নয়, পশ্চিম সভ্যতারই নকল করি; তার কারণ ইউরোপীয় সভ্যতা আমাদের চোখের স্তমুখে সশরীরে বর্তমান, অপর পক্ষে আর্য্য-সভ্যতার প্রেতাঙ্গামাত্র অবশিষ্ট। প্রেতাঙ্গাকে আয়ত্ত করতে হ'লে বল সাধনার আবশ্যিক। তা ছাড়া প্রেতাঙ্গা নিয়ে যাঁরা কারবার করেন তাঁরা সকলেই জানেন যে, দেহমুক্ত আত্মার সম্পর্কে আসতে হ'লে অপর একটি দেহতে তাকে আশ্রয় দেওয়া চাই; একটি প্রাণীর মধ্যস্থতা ব্যতীত, প্রেতাঙ্গা আমাদের সঙ্গে সাক্ষাৎ করেন না। আমাদের সমাজের প্রাচীন দেহ আছে বটে, কিন্তু প্রাণ নেই। শব প্রেতাঙ্গা কর্তৃক আবিষ্কৃত হ'লে মানুষ হয় না, বেতাল হয়। বেতাল-সিদ্ধ হবার দুরাশা খুব কম লোকেই রাখে, কাজেই শুধু মন নয়, পঞ্চেন্দ্রিয় দ্বারা গ্রাহ্য যে ইউরোপীয় সভ্যতা আমাদের প্রত্যক্ষ রয়েছে, সাধারণতঃ লোকে

তারই অনুকরণ করে। 'অনুকরণ ভাগ করে' যদি আমরা এই নব-সভ্যতার অনুবাদ করতে পারি, তাহলেই সে সভ্যতা নিজস্ব হ'য়ে উঠবে, এবং ঐ ক্রিয়ার সাহায্যেই আমরা নিজেদের প্রাণের পরিচয় পাব, এবং বাঙ্গালীর বাঙ্গালিত্ব ফুটিয়ে তুলব।

তর্জমার আবশ্যকীয় স্থাপনা করে', এখন কি উপায়ে আমরা সে বিষয়ে কৃতকার্য হব সে সম্বন্ধে আমার দু'চারটি কথা বলবার আছে।

সাধারণতঃ লোকের বিশ্বাস যে, কথার চাইতে কাজ শ্রেষ্ঠ। এ বিশ্বাস বৈষয়িক হিসাবে সত্য, এবং আধ্যাত্মিক হিসাবে মিথ্যা। মানুষমাত্রেরই নৈসর্গিক প্রবৃত্তির বলে সংসার যাত্রার উপযোগী সকল কাব্য করতে পারে; কিন্তু তার অতিরিক্ত কর্ম, যার ফল একে নয়, দশে লাভ করে, তা' করবার জ্ঞান মনোবল আবশ্যিক। সমাজে, সাহিত্যে যা কিছু মহৎকাব্য অনুষ্ঠিত হয়েছে, তার মূলে মন পদার্থটি বিद्यমান। যা মনে ধরা পড়ে তাই প্রথমে কথায় প্রকাশ পায়, সেই কথা অবশেষে কার্যরূপে পরিণত হয়; কথার সূক্ষ্মশরীর কার্যরূপ স্থূলদেহ ধারণ করে। আগে দেহটি গড়ে' নিয়ে, পরে তার প্রাণ প্রতিষ্ঠা করবার চেষ্টাটি একেবারেই বৃথা। কিন্তু আমরা রাজনীতি, সমাজনীতি, ধর্ম, সাহিত্য, সকল ক্ষেত্রেই ইউরোপীয় সভ্যতার প্রাণের সন্ধান না করে' শুধু তার দেহটি আয়ত্ত করবার চেষ্টা করায় নিত্যই ইতোনষ্টান্ততোভ্রষ্ট হচ্ছি। প্রাণ নিজের দেহ নিজের রূপ নিজেই গড়ে' নেয়। নিজের অন্তর্নিহিত প্রাণশক্তির বলেই বীজ ক্রমে বৃক্ষরূপ ধারণ করে। সুতরাং আমরা যদি ইউরোপীয় সভ্যতার প্রাণে প্রাণবন্ত হয়ে উঠতে পারি, তাহলেই আমাদের সমাজ নব কলেবর ধারণ করবে। এই নবসভ্যতাকে

মনে সম্পূর্ণরূপ পরিপাক কর্তে পারলেই আমাদের কাস্তি পুষ্ট হবে । কিন্তু যতদিন সে সভ্যতা আমাদের মুখস্থ থাকবে কিন্তু উদরস্থ হবে না, ততদিন তার কোন অংশই আমরা জীর্ণ কর্তে পারব না । আমরা যে, ইউরোপীয় সভ্যতা কথাতেও তর্জমা কর্তে পারিনি, তার প্রত্যক্ষ প্রমাণ এই যে, আমাদের নূতন শিক্ষালব্ধ মনোভাবসকল, শিক্ষিত লোকদেরই রসনা আশ্রয় করে' রয়েছে, সমগ্রজাতির মনে স্থান পায়নি । আমরা ইংরেজীভাব ভাষায় তর্জমা কর্তে পারিনে বলেই, আমাদের কথা দেশের লোকে বোঝে না,—বোঝে শুধু ইংরেজী-শিক্ষিত লোকে । এ দেশের জনসাধারণের নৈবার ক্ষমতা কিছু কম নয়, কিন্তু আমাদের কাছ থেকে তারা যে কিছু পায় না, তার একমাত্র কারণ আমাদের অণ্ডকে দেবার মত কিছু নেই—আমাদের নিজস্ব বলে' কোন পদার্থ নেই—আমরা পরের সোণা কাঁখে দিয়ে অহঙ্কারে মাটিতে পা দিইনে । অপরপক্ষে আমাদের পূর্বপুরুষদের দেবার মত ধন ছিল, তাই তাঁদের মনোভাব নিয়ে আজও সমগ্র জাতি ধনী হয়ে আছে । পাষিবাক্যসকল লোকমুখে এমনি সুন্দর ভাবে তর্জমা হয়ে গেছে, যে তা আর তর্জমা বলে' কেউ বুঝতে পারেন না । এদেশের অশিক্ষিত লোকের রচিত বাউলের গান কাউকে আর উপনিষদের ভাষায় অনুবাদ করে' বোঝাতে হয় না, অথচ একই মনোভাব ভাষান্তরে বাউলের গানে এবং উপনিষদে দেখা দেয় ! আত্মা যেমন এক দেহ ত্যাগ করে' অপর দেহ গ্রহণ করলে, পূর্বদেহের স্মৃতি-মাত্রও রক্ষা করে না, মনোভাবও যদি তেমনি এক ভাবার দেহত্যাগ করে' অপর একটি ভাবার দেহ অবলম্বন করে, তাহলেই সেটি যথার্থ অনৃদিত হয় ।

উপযুক্ত তর্জমার গুণেই বৈদান্তিক মনোভাবসকল হিন্দু-সন্তানমাত্রেরই মনে অল্পবিস্তর জড়িয়ে আছে । এদেশে এমন লোক বোধ হয় নেই, যার মনটিকে নিংড়ে নিলে অন্ততঃ এক ফোঁটাও গৈরিক রঙ না পাওয়া যায় । আর্থ্য সভ্যতার প্রেতাত্মা উদ্ধার করবার চেষ্টাটা একেবারেই অনর্থক, কারণ তার আত্মাটি আমাদের দেহাভ্যন্তরে সুষ্পৃষ্ট অবস্থায় রয়েছে—যদি আবশ্যক হয় ত সেটিকে সহজেই জাগিয়ে নেওয়া যেতে পারে । ঠিক কথাটি বলতে পারলে অপরের মনের দ্বার, আরব্য-উপন্যাসের দস্যুদের ধনভাণ্ডারের দ্বারের মত, আপনি খুলে যায় । আমরা ইংরেজীশিক্ষিত লোকেরা জনসাধারণের মনের দ্বার খোলবার সঙ্কেত জানিনে, কারণ আমরা তা জানবার চেষ্টাও করিনে । যে সকল কথা আমাদের মুখের উপর আলগা হয়ে রয়েছে, কিন্তু মনে প্রবেশ করেনি, সেগুলি আমাদের মুখ থেকে খসে পড়লেই যে অপরের অন্তরে প্রবেশ লাভ করবে—এ আশা বৃথা ।

আমরা যে আমাদের শিক্ষালব্ধ ভাবগুলি তর্জমা করতে অকৃতকার্য হয়েছি, তার প্রমাণ ত সাহিত্যে এবং রাজনীতিতে ছুবেলাই পাওয়া যায় । যেমন সংস্কৃত নাটকের প্রাকৃত, সংস্কৃত “ছায়ার” সাহায্য ব্যতীত বুঝতে পারা যায় না, তেমনি আমাদের নব-সাহিত্যের কৃত্রিম প্রাকৃত, ইংরাজী ছায়ার সাহায্য ব্যতীত বোঝা যায় না । সমাজে না হোক, সাহিত্যে “চুরি বিছে বড় বিছে যদি না পড়ে ধরা ।” কিন্তু আমাদের নব-সাহিত্যের বস্তু যে চোরাই মাল, তা ইংরাজী-সাহিত্যের পাঠক-মাত্রেরই কাছে ধরা পড়ে । আমরা ইংরাজী-সাহিত্যের সোণা রূপো যা চুরি করি, তা গলিয়ে নিতেও শিখিনি । এইত গেল সাহিত্যের কথা । রাজনীতি বিষয়ে আমাদের সকল ব্যাপার

যে আগাগোড়াই নকল, এ বিষয়ে বোধ হয় আর দু'মত নেই, সুতরাং সে সম্বন্ধে বেশী কিছু বলা নিতান্তই নিস্প্রয়োজন ।

আমাদের মনে মনে বিশ্বাস যে, ধর্ম এবং দর্শন এই দুটি জিনিস আমাদের একচেটে, এবং অন্য কোন বিষয়ে না হোক, এই দুই বিষয়ে আমাদের সহজ কৃতিত্ব কেউ অস্বীকার করতে পারবে না । ইংরেজী-শিক্ষিত ভারতবাসীদের এ বিশ্বাস যে সম্পূর্ণ অমূলক, তার প্রমাণস্বরূপ দেখানো যেতে পারে যে, ঐ শ্রেণীর লোকের হাতে মনুর ধর্ম religion হয়ে উঠেছে । অর্থাৎ ভুল তর্জমার বলে ব্যবহার-শাস্ত্র আধ্যাত্মিক ব্যাপার হয়ে উঠেছে । ধর্মশাস্ত্র এবং মোক্ষশাস্ত্রের ভেদজ্ঞান আমাদের লুপ্ত হয়েছে । ধর্মের অর্থ ধরে' রাখা, এবং মোক্ষের অর্থ ছেড়ে দেওয়া, সুতরাং এ দুয়ের কাজ যে এক নয়, তা শুধু ইংরেজী-নবিস আর্ঘ্য-সন্তানরাই বুঝতে পারেন না ।

গীতা আমাদের হাতে পড়বামাত্র তার হরিভক্তি উড়ে যায় । সেই কারণে শ্রীযুক্ত হীরেন্দ্রনাথ দত্ত “গীতায় ঈশ্বরবাদের” প্রতিষ্ঠা করতে গিয়ে নব্য পণ্ডিতসমাজে শুধু বিবাদ-বিসম্বাদের সৃষ্টি করেছিলেন । তারপর গীতার কর্ম ইংরাজী work রূপ ধারণ করে' আমাদের কাছে গ্রাহ্য হয়েছে ; অর্থাৎ কর্মকাণ্ডের কর্ম কাণ্ডহীন হয়েই আমাদের কাছে উচ্চ বলে গণ্য হয়েছে । এই ভুল তর্জমার প্রসাদেই, যে কর্মের উদ্দেশ্য পরের হিত এবং নিজের আত্মার উন্নতি সাধন— পরলোকের অভ্যুদয়ও নয়—সেই কর্ম আজকাল ইহলোকের অভ্যুদয়ের জন্য ধর্ম বলে' গ্রাহ্য হয়েছে । যে কাজ মানুষ পেটের দায়ে নিত্য করে' থাকে, তা করা কদ্ব্য এইটুকু শেখাবার জন্য, ভগবানের যে ভোগায়তন দেহ ধারণ করে'

পৃথিবীতে অবতীর্ণ হবার আবশ্যকতা ছিল না,—এ সোজা কথাটাও আমরা বুঝতে পারিনে। ফলে আমাদের কৃত গীতার অনুবাদ বক্তৃতাতেই চলে, জীবনে কোন কাজে লাগে না।

একদিকে আমরা এ দেশের প্রাচীন মতগুলিকে যেমন ইংরেজী পোষাক পরিয়ে তার চেহারা বিল্কুল বদলে দিই, তেমনি অপর দিকে, ইউরোপীয় দর্শন বিজ্ঞানকেও আমরা সংস্কৃত ভাষার ছদ্মবেশ পরিয়ে লোক সমাজে বার করি।

নিত্যই দেখতে পাই যে, খাটি জার্মান মাল স্বদেশী বলে' পাঁচজনে সাহিত্যের বাজারে কাটাতে চেকা করছে। হেগেলের দর্শন শঙ্করের নামে বেনামি করে' অনেকে কতক পরিমাণে অজ্ঞ লোকদের কাছে চালিয়েও দিয়েছেন। আমাদের মুক্তির জন্ত হেগেলেরও আবশ্যক আছে, শঙ্করেরও আবশ্যক আছে ; কিন্তু তাই বলে' হেগেলের মন্তক মুণ্ডন করে' তাঁকে আমাদের সহস্ররচিত শতগ্রন্থিময় কন্ডা পরিয়ে শঙ্কর বলে' সাহিত্য-সমাজে পরিচিত করে' দেওয়াতে কোন লাভ নেই। হেগেলকে ফকির না করে' যদি শঙ্করকে গৃহস্থ করতে পারি, তা'তে আমাদের উপকার বেশী।

বিজ্ঞান সম্বন্ধেও ঐরূপ ভুল তর্জমা অনেক অনর্থ ঘটিয়েছে ! উদাহরণ স্বরূপ Evolutionএর কথাটা ধরা যাক। ইভলিউসানের দোহাই না দিয়ে আমরা আজকাল কথাই কইতে পারিনে। আমরা উন্নতিশীল হই, আর স্থিতিশীলই হই, আমাদের সকলপ্রকার শীলই ঐ ইভলিউসান আশ্রয় করে' রয়েছে। সুতরাং ইভলিউসানের যদি আমরা ভুল অর্থ বুঝি তাহলে, আমাদের সকল কার্যই যে আরম্ভে পর্যাবসিত হবে সেত ধরা কথা। বাঙ্গলায় আমরা ইভলিউসান “ক্রম-বিকাশবাদ”

“ক্রমোন্নতিবাদ” ইত্যাদি শব্দে তর্জমা করে’ থাকি। ঐরূপ তর্জমার ফলে, আমাদের মনে এই ধার। জন্মে গেছে যে, মাসিক পত্রের গল্পের মত, জগৎ পদার্থটি ক্রমশঃ প্রকাশ্য। সৃষ্টির বইখানি আছোপান্তু লেখা হয়ে গেছে, শুধু প্রকৃতির ছাপাখানা থেকে অল্প অল্প করে’ বেরচ্ছে, এবং যে অংশটুকু বেরিয়েছে তার থেকেই তার রচনাপ্রণালীর ধরণ আমরা জানতে পেরেছি। সে প্রণালী হচ্ছে ক্রমোন্নতি ; অর্থাৎ যত দিন যাবে, তত সমস্ত জগতের, এবং তার অন্তর্ভূত জীবজগতের এবং তার অন্তর্ভূত মানবসমাজের, এবং তার অন্তর্ভূত প্রতি মানবের, উন্নতি অনিবার্য। প্রকৃতির ধর্মই হচ্ছে আমাদের উন্নতি সাধন করা। সুতরাং আমাদের তার জ্ঞান নিজের কোনও চেষ্টার আবশ্যক নেই। আমরা শুয়েই থাকি আর ঘুমিয়ে থাকি, জাগতিক নিয়মের বলে আমাদের উন্নতি হবেই। এই কারণেই এই ক্রমোন্নতিবাদ-আকারে ইভলিউশান আমাদের স্বাভাবিক জড়তা এবং নিশ্চেষ্টতার অনুকূল মত হয়ে দাঁড়িয়েছে। তা ছাড়া এই “ক্রম” শব্দটি আমাদের মনের উপর এমনি আধিপত্য স্থাপন করেছে যে, সেটিকে অতিক্রম করা পাপের মধ্যে গণ্য হয়ে পড়েছে। তাই আমরা নানা কাজের উপক্রমিকা করেই সন্তুষ্ট থাকি, কোন বিষয়েরই উপসংহার করাটা কর্তব্যের মধ্যে গণ্য করিনে ; প্রস্তাবণাতেই আমাদের জীবন-নাটকের অভিনয় শেষ হয়ে যায়। কিন্তু আসলে ইভলিউশান, ক্রম-বিকাশও নয়, ক্রমোন্নতিও নয়। কোনও পদার্থকে প্রকাশ করবার শক্তি জড়প্রকৃতির নেই, এবং তার প্রধান কাজই হচ্ছে সকল উন্নতির পথে বাধা দেওয়া। ইভলিউশান জড়জগতের নিয়ম নয়, জীবজগতের

ধর্ম । ইভলিউশানের মধ্যে শুধু ইচ্ছাশক্তিরই বিকাশ পরিস্ফুট । ইভলিউশান অর্থে দৈব নয়,—পুরুষকার । তাই ইভলিউশানের জ্ঞান মানুষকে অলস হতে শিক্ষা দেয় না, সচেতন হতে শিক্ষা দেয় । আমরা ভুল তর্জমা করে' ইভলিউশানকে আমাদের চরিত্র-হীনতার সহায় করে' এনেছি ।

ইউরোপীয় সভ্যতার হয় আমরা তর্জমা করতে কৃতকার্য হচ্ছি নে, নয় ভুল তর্জমা করছি, তাই আমাদের সামাজিক জীবনে শিক্ষিত সম্প্রদায়ের শক্তির পরিচয় পাওয়া যায় না, বরং অপচয়ের প্রমাণ পাওয়া যায় । অগত আমাদের বিশ্বাস যে আমরা দু'পাতা ইংরাজী পড়ে' নবাব্রাহ্মণ সম্প্রদায় হয়ে উঠেছি । তাই আমরা নিজেদের শিক্ষার দোড় কত সে বিষয়ে লক্ষ্য না করে', জনসাধারণকে শিক্ষা দিবার জন্ত ব্যস্ত হয়ে উঠেছি । এ সভ্য আমরা ভুলে যাই যে, ইউরোপীয় সাহিত্য দর্শন বিজ্ঞান থেকে যদি আমরা নতুন প্রাণ লাভ করে' থাকতুম, তাহলে জনসাধারণের মধ্যে আমরা নব প্রাণের সঞ্চারও করতে পারতুম । আমরা অধ্যয়ন করে' যা লাভ করেছি তা অধ্যাপনার দ্বারা দেশশুদ্ধ লোককে দিতে পারতুম । আমরা আমাদের Cultureকে nationalise করতে পারিনি বলেই, গবর্ণমেন্টকে পরামর্শ দিচ্ছি যে আইনের দ্বারা বাধা করে' জনসাধারণকে শিক্ষা দেওয়া হোক । মাগুবর শ্রীযুক্ত গোপালকৃষ্ণ গোখলে যে হুজুগটির মুখপাত্র হয়েছেন, তার মূলে ইউরোপের নকল ছাড়া আর কোনও মনোভাব নেই । তাই গবর্ণমেন্টকে ভজাবার জন্ত, দিবাবাত্রি খালি বিলেতি নজিরই দেখান হচ্ছে । শিক্ষা শব্দের অর্থ শুধু লিখতে ও পড়তে শেখা হ'য়ে দাঁড়িয়েছে । গবর্ণমেন্টই স্কুল কলেজ প্রতিষ্ঠা করে' আমাদের লিখতে

পড়তে শিখিয়েছেন। সুতরাং গবর্ণমেন্টকেই গ্রামে গ্রামে
 স্কুল স্থাপন করে' রাজ্জিশুদ্ধ ছেলেমেয়েদের লেখাপড়া শেখাতেই
 হবে, এই হচ্ছে আমাদের হাল রাজনৈতিক আবদার। যতদিন
 পর্যন্ত আমরা আমাদের নব-শিক্ষা মজ্জাগত করতে না পারব,
 ততদিন জনসাধারণকে পড়তে শিখিয়ে তাদের যে কি বিশেষ
 উপকার করা হবে তা ঠিক বোঝা যায় না। আমরা আজ
 পর্যন্ত ছোট ছেলেদের উপযুক্ত একখানিও পাঠ্য পুস্তক রচনা
 করতে পারিনি। পড়তে শিখলে, এবং পড়বার অবসর থাকলে
 এবং বই কেনবার সম্ভাবিত থাকলে, প্রাইমারি স্কুলে শিক্ষাপ্রাপ্ত
 চাষার ছেলেরা সেই রামায়ণ মহাভারতই পড়বে,— আমাদের
 নব-শিক্ষার ভাগ তারা কিছু পাবে না। রামায়ণ মহাভারতের
 কথা যে বইয়ে পড়ার চাইতে মুখে শোনা অনেক বেশী শিক্ষা-
 প্রদ, তা নবা-শিক্ষিত ভারতবাসী ছাড়া আর কেউ অস্বীকার
 করবেন না। মুখের বাক্যে প্রাণ আছে, লেখার ধনিষ্ঠান
 বাক্য আধমরা। সে যাই হোক, আমাদের দেশের লৌকিক
 শিক্ষার জ্ঞান যদি আমাদের থাকত, এবং সেই শিক্ষার প্রতি
 অযথা অবজ্ঞা যদি আমাদের মনে না স্থান পেত, তাহলে না
 ভেবে চিন্তে, লোকশিক্ষার দোতাই দিয়ে, সেই চিরাগত লৌকিক
 শিক্ষা নষ্ট করতে আমরা উচ্চত ততুম না। সংস্কৃত-সাহিত্যের
 সঙ্গে বীর পরিচয় আছে তিনিই জানেন যে, আমাদের পূর্ব-
 পুরুষেরা লোকাচার, লৌকিক ধর্ম, লৌকিক ন্যায়, এবং
 লৌকিক বিচারকে কিরূপ মাথ্য করতেন। কেবলমাত্র বর্ণ-
 পরিচয় হলেই লোকে শিক্ষিত হয় না; কিন্তু ঐ পরিচয় লাভ
 করতে গিয়ে যে বর্ণধর্ম হারানো অসম্ভব নয়, তা সকলেই
 জানেন। মাসিক পাঁচটাকা বেতনের গুরু নামক গরুর দ্বারা

ভাঙিত হওয়া অপেক্ষা চাষার ছেলের পক্ষে গরু তাড়ানো শ্রেয় । “ক” অক্ষর যে কোন লোকের পক্ষেই গোমাংস হওয়া উচিত নয়, এ কথা আমরা সকলেই মানি, কিন্তু “ক” অক্ষর যে আমাদের রক্তমাংস হওয়া উচিত, এ ধারণা সকলের নেই । কেবল স্বাক্ষর করতে শেগার চাইতে নিরক্ষর থাকার ভাল, কারণ পৃথিবীতে আগুলের ছাপ রেখে যাওয়াতেই মানবজীবনের স্বার্থকতা । আমাদের আহার, পরিচ্ছদ, গৃহ, মন্দির, সব জিনিসেই আমাদের নিরক্ষর লোকদের আগুলের ছাপ রয়েছে । শুধু আমরা শিক্ষিত সম্প্রদায়ই ভারত মাতাকে পরিষ্কার বুদ্ধাঙ্গুষ্ঠ দেখিয়ে যাচ্ছি । পতিতের উদ্ধার কার্যটি খুব ভাল ; ওর একমাত্র দোষ এই যে, যাঁরা পরকে উদ্ধার করবার জন্য ব্যস্ত, তাঁরা নিজেদের উদ্ধার সম্বন্ধে সম্পূর্ণ উদাসীন । আমরা যতদিন শুধু ইংরাজীর নীচে স্বাক্ষর দিয়েই ক্ষান্ত থাকব, কিন্তু সাহিত্যে আমাদের আগুলের ছাপ ফুটবে না, ততদিন আমরা নিজেরাই যথার্থ শিক্ষিত হব না, পরকে শিক্ষা দেওয়া ত দূরের কথা । আমরা জানি যে আমাদের জাতিকে খাড়া করবার জন্য অসংখ্য সংস্কারের দরকার আছে । কিন্তু আর যে কোন সংস্কারের আবশ্যক থাকে না কেন, শিক্ষিত সম্প্রদায়ের হাজার হাজার বটতলার সংস্কারের আবশ্যক নেই ।

মাঘ, ১৩১৯

বইয়ের ব্যবসা ।

সাধারণতঃ লোকের একটা বিশ্বাস আছে যে, বই জিনিসটে পড়া সহজ, কিন্তু লেখা কঠিন । অপর দেশে যাই হোক, এ দেশে কিন্তু নিজে বই লেখার চাইতে অপরকে পড়ানো ঢের বেশী শক্ত । শুন্তে পাই যে কোন বইয়ের এক হাজার কপি ছাপালে, এক বৎসরে তার একশ'ও বিক্রী হয় না । সাধারণ লেখকের কথা ছেড়ে দিলেও, নামজাদা লেখকদেরও বই বাজারে কাটে কম, কাটে বেশী পোকায় । বাংলাদেশে লেখকের সংখ্যা বেশী কিংবা পাঠকের সংখ্যা বেশী, বলা কঠিন । এ বিষয়ে যখন কোন Statistics পাওয়া যায় না, তখন ধরে নেওয়া যেতে পারে যে মোটামুটি দুই সমান । কেউ কেউ এমন কথাও বলে থাকেন, যে লেখা ও পড়া এ দুটি কাজ অনেক স্থলে একই লোকে করে' থাকেন । এ কথা যদি সত্য হয়, তাহলে অধিকাংশ লেখকের পক্ষে নিজের লেখা নিজে পড়া ছাড়া উপায়ান্তর নেই । কেননা পরের বই কিনতে পয়সা লাগে, কিন্তু নিজের বই বিনে পয়সায় পাওয়া যায় । অবশ্য কখন কখন কোনও কোনও বই উপহারস্বরূপে পাওয়া যায়, কিন্তু সে সব বই প্রায়ই অপাঠ্য । এরূপ অবস্থায় বঙ্গ-সাহিত্যের ক্ষুধা হওয়া প্রায় একরূপ অসম্ভব । কারণ সাহিত্য পদার্থটি যাই হোক না কেন, বই হচ্ছে শুধু বেচাকেনার জিনিস, একেবারে কাঁচামাল । ও মাল ধরে' রাখা চলে না । গাছের পাতার

মত বইয়ের পাতাও বেশী দিন টেঁকে না, এবং একবার ঝরে' গেলে উন্মুন-ধরানো ছাড়া অণু কোনও কাজে লাগে না ।

এ অবস্থা যে সাহিত্যের পক্ষে শোচনীয় সে বিষয়ে কোন সন্দেহ নেই, কিন্তু কার দোষে যে এরূপ অবস্থা ঘটেছে, লেখকের কি পাঠকের, সে কথা বলা কঠিন । অবশ্য লেখকের পক্ষে এই বলবার আছে যে, এক টাকা দিয়ে একখানি বই কেনার চাইতে, একশ' টাকা দিয়ে একখানি বই ছাপানো ঢের বেশী কষ্টসাধ্য । অপর পক্ষে পাঠক বলতে পারেন যে, একশটি টাকা অন্ততঃ ধার করেও যে-সে বাঙ্গলা বই ছাপানো যেতে পারে, কিন্তু নিজের বুদ্ধি অপরকে ধার না দিয়ে যে-সে বাঙ্গলা বই পড়া যেতে পারে না । অর্থকষ্টের চাইতে মনকষ্ট অধিক অসহ্য । আমার মতে দু'পক্ষের মত এক হিসেবে সত্য হলেও আর এক হিসেবে মিথ্যা । বই লিখলেই যে ছাপাতে হবে, এইটি হচ্ছে লেখকদের ভুল ; আর বই কিনলেই যে পড়তে হবে, এইটি হচ্ছে পাঠকদের ভুল । বই লেখা জিনিসটে একটা সখ্যমাত্র হওয়া উচিত নয়,—কিন্তু বই কেনাটা সখ্য ছাড়া আর কিছু হওয়া উচিত নয় ।

বাঙ্গলা দেশে বাঙ্গলা-সাহিত্যের শ্রীবৃদ্ধি হওয়া উচিত কি না, সে বিষয়ে আমি কোন আলোচনা করতে চাইনে । কারণ, সাহিত্য শব্দ উচ্চারণ কর্ণবামাত্র নানা তর্কবিতর্ক উপস্থিত হয় । অমনি চারধার থেকে এই সব দার্শনিক প্রশ্ন ওঠে, সাহিত্য কাকে বলে ? সাহিত্যে কার কি ক্ষতি হয় এবং কার কি উপকার হয় ? তারপর সাহিত্যকে সমাজের শাসনাধীন করে', তার শাস্তির জন্য সমালোচনার দণ্ডবিধি আইন গড়বার কথা হয় । সমালোচকেরা একাধারে ফরিয়াদি, উকিল, বিচারক এবং

জন্মদ হয় ওঠেন। সুতরাং কথাটা দাঁড়াচ্ছে এই যে, সাহিত্য যে কি, সে সম্বন্ধে যখন এখনও একটা জাতীয় ধারণা জন্মে যায়নি, তখন এ বিষয়ে এক কথা বললে হাজার কথা শুনতে হয়। কিন্তু বই জিনিসটে কি, তা সকলেই জানেন। এবং বাঙ্গলা বই যে বাজারে চলা উচিত সে বিষয়ে বোধহয়—দু'মত নেই, কারণ ও জিনিসটে স্বদেশী শিল্প। যদি কারও এ বিষয়ে সন্দেহ থাকে, তাহলে তা ভাঙ্গাবার জন্মে দেখিয়ে দেওয়া যেতে পারে যে, নব্য স্বদেশী শিল্পের যে দুটি প্রধান লক্ষণ, সে দুটিই এতে বর্তমান। প্রথমতঃ নব্য-সাহিত্য পদার্থটা স্বদেশী নয়, দ্বিতীয়তঃ তাতে শিল্পের কোন পরিচয় নেই।

লেখা বাপারটা যতদিন আমরা মানুষের একটা প্রধান কাজ হিসেবে না দেখে, বাজে সখ হিসেবে দেখব, ততদিন বইয়ের ব্যবসা ভাল করে চলবে না। সুতরাং বঙ্গ-সাহিত্যের উন্নতি অর্থাৎ বিস্তার করতে হলে, আমাদের স্বীকার করতে হবে যে এ যুগে সাহিত্য প্রধানতঃ লেখা পড়ার জিনিস নয়, কেনা বেচার জিনিস। কোন রচনাকে যদি অপরে অমূল্য বলে, তাহলে রচয়িতার রাগ করা উচিত, কারণ সে পদার্থের মূল্য নেই, তা যত্ন করে গড়া সকলের পক্ষে সম্ভব নয়।

ব্যবসার দুটি দিক আছে,—প্রথম production (তৈরি করা), দ্বিতীয়তঃ distribution (কাটানো)। মানব জীবনের এবং মালের জীবনের একই ইতিহাস, তার একটা আরম্ভ আছে, একটা শেষ আছে। যে তৈরি করে তার হাতে মালের জন্ম এবং যে কেনে তার হাতে তার মৃত্যু। জন্ম মৃত্যু পর্যন্ত কোন একটি মালকে দশ হাত ফিরিয়ে নিয়ে বেড়ানর নাম হচ্ছে distribution। সুতরাং বইয়ের জন্ম-মৃত্যু

এবং ভ্রমণ-স্বত্বান্ত, দুটির প্রতিই আমাদের সমান লক্ষ্য রাখতে হবে ।

এ স্থলে বলে' রাখা আবশ্যক যে, আমি সাহিত্য-ব্যবসায়ী নই । অর্থাৎ অদ্যাবধি বই আমিই কিনেই আসছি, কখনও বেচিনি । সুতরাং কি কি উপায় অবলম্বন করলে বই বাজারে কাটানো যেতে পারে, সে বিষয়ে আমি ক্রেতার দিক থেকে যা বলবার আছে তাই বলতে পারি, বিক্রেতা হিসেবে কোন কথাই বলতে পারি নে ।

সচরাচর দেখতে পাই যে, বই বিক্রী করবার জ্ঞান, বিজ্ঞাপন দেওয়া, অর্দ্ধমূল্যে কিনা সিকিমূল্যে বিক্রী করা, ফাউ দেওয়া এবং উপহার দেওয়া প্রভৃতি উপায় অবলম্বন করা হয়ে থাকে । এ সকল উপায়ে যে বইয়ের কাটুতির কতকটা সাহায্য করে সে বিষয়ে কোন সন্দেহ নেই, কিন্তু সেই সঙ্গে বাধাও যে দেয়, সে ধারণাটি বোধহয় বিক্রেতাদের মনে তত স্পষ্ট নয় ।

প্রথমতঃ, বিশখানি বইয়ের যদি একসঙ্গে বিজ্ঞাপন দেওয়া হয়, এবং তার প্রতিখানিকেই যদি সর্বশ্রেষ্ঠ বলা হয়, তাহলে তার মধ্যে কোনখানি যে কেনা উচিত, সে বিষয়ে অধিকাংশ পাঠক মন স্থির করে উঠতে পারে না । অপরাপর মালের একটি সুনির্দিষ্ট শ্রেণীবিভাগ আছে । বিজ্ঞাপনেই আমাদের জানিয়ে দেয় যে, তার মধ্যে কোনটি পয়লা নম্বরের, কোনটি দোসরা নম্বরের, কোনটি তেসরা নম্বরের ইত্যাদি ; এবং সেই ইতরবিশেষ অনুসারে দামেরও তারতম্য হয়ে থাকে । সুতরাং সে সব মাল কিন্তে ক্রেতাকে বাঁশবনে ডোমকানা হতে হয় না, প্রত্যেকে নিজের অবস্থা এবং রুচি অনুসারে নিজের আবশ্যকীয় জিনিস কিন্তে পারে । কিন্তু বই সম্বন্ধে এরূপ

শ্রেণীবিভাগ করে বিজ্ঞাপন দেওয়া সম্ভব নয় ; কেননা, যদিচ সাহিত্যে ভালমন্দের তারতম্য অগাধ, তবুও কোনও লেখক, তাঁর লেখা যে প্রথম শ্রেণীর নয়, এ কথা নিজ মুখে সমাজের কাছে জাহির করবেন না । সুতরাং বিজ্ঞাপনের উপর আস্থা স্থাপন করে, হয় আমাদের বিশখানি বই একসঙ্গে কিন্তে হয়, নয় কেনা থেকে নিরস্ত থাকতে হয় । ফলে দাঁড়ায় এই যে, বই বিক্রী হয় না,—কেননা যাঁর বিশখানি বই কেনবার সঙ্গতি আছে, তাঁর বিশ্বাস যে সাহিত্য নিয়ে কারবার করে শুধু লক্ষ্মী-ছাড়ার দল ।

অর্দ্ধমূল্যে এবং সিকিমূল্যে বিক্রী করবার দোষ যে, লোকের সহজেই সন্দেহ হয় যে বস্তাপচা সাহিত্যই শুধু ঐ উপায়ে ঝেড়ে ফেলা হয় । পয়সা খরচ করে' গোলামচোর হতে লোকের বড় একটা উৎসাহ হয় না ।

কোন বই ফাউ হিসেবে দেবার আমি সম্পূর্ণ বিপক্ষে । আর পাঁচজনের বই লোকে পয়সা দিয়ে কিনবে, এবং আমার বইখানি সেইসঙ্গে বিনে পয়সায় পাবে, এ কথা ভাবতে গেলেও লেখকের দোষাতের কালি জল হয়ে আসে । লেখকদের এইরূপ প্রকাশে অপমান করে', সাহিত্যের মান কিম্বা পরিমাণ দুয়ের কোনটিই বাড়ানো যায় না । যদি কোন বই বিনামূল্যে বিতরণ করতেই হয়, ত প্রথম থেকে প্রথম সংস্করণ এইরূপ বিতরণ করা উচিত, যাতে করে' পাঠকদের সঙ্গে সহজে সে বইটির পরিচয় করিয়ে দেওয়া যায় । উক্ত উপায়ে Tab সিগারেট এদেশে চালানো হয়েছে । প্রথমে কিছুদিন বিলিয়ে দিয়ে, তারপর দ্বিগুণ দাম চড়িয়ে সে সিগারেট আজকাল বাজারে বিক্রী করা হচ্ছে, এবং এত বিক্রী বোধহয় অন্ত

কোনও সিগারেটের নেই। বই জিনিসটিকে ধূমপত্রের সঙ্গে তুলনা করাটাও অসঙ্গত নয়। কারণ অধিকাংশ বই, কাগজে-মোড়া ধোঁয়া ছাড়া আর কিছুই নয়। সে যাই হোক, আসল কথা হচ্ছে এই যে, বিজ্ঞাপনাদির দ্বারা লোকের মনে শুধু কেনবার লোভ জন্মে দেওয়া যায়, কিন্তু কেনানো যায় না। কোন জিনিস কাউকে কেনাতে হলে, সেটি প্রথমতঃ তার হাতের গোড়ায় এগিয়ে দেওয়া চাই, তারপর সেটি তাকে গতিয়ে দেওয়া চাই। এ দুই বিষয়ে যে পুস্তক-বিক্রেতারা বিশেষ কোন যত্ন করেছেন, তার প্রমাণ পাওয়া যায় না। আমার বিশ্বাস যে, নতুন বাঙ্গলা বই যদি ঘরে ঘরে ফেরি করে বিক্রী করা হয়, তাহলে বঙ্গ-সাহিত্যের প্রতি লক্ষ্মীর দৃষ্টি পড়বে।

সাহিত্যে production সম্বন্ধে আমার বক্তব্য এই যে, demand-এর প্রতি লক্ষ্য রেখে সাহিত্য supply করতে হবে। যে বই লোকে পড়তে চায় না, সে বই অপর যে-কোন উদ্দেশ্যেই লেখা হোক না কেন, বেচবার উদ্দেশ্যে লেখা চলে না। এবং কি ধরনের বই লোকে পড়তে চায়, সে বিষয়ে একটা সাধারণ কথা বলা যেতে পারে। এটি একটি প্রত্যক্ষ সত্য যে, সাধারণ পাঠক-সমাজ দুই শ্রেণীর বই পছন্দ করে না;— এক হচ্ছে ভাল, আর এক হচ্ছে মন্দ। যে বই ভালও নয় মন্দও নয়, অমনি একরকম মাঝামাঝি গোছের,—সেই বই মানুষে পড়তে ভালবাসে, এবং সেইজন্য কেনে। প্রতি দেশে প্রতি যুগে প্রতি জাতির একটি বিশেষ সামাজিক বুদ্ধি থাকে। সে বুদ্ধির প্রধান উদ্দেশ্য হচ্ছে সংসারযাত্রা নির্বাহ করা, এবং সামাজিক জীবনের কাজেতেই সে বুদ্ধির সার্থকতা। কিন্তু সচরাচর লোকে সেই বুদ্ধির মাপকাটিতেই দর্শন, বিজ্ঞান,

সাহিত্য, আর্ট প্রভৃতি মনোজগতের পদার্থগুলোও মেপে নেয় । সে মাপে যে পদার্থটি ছোট সাব্যস্ত হয়, সেটিও যেমন গ্রাহ্য হয় না, তেমনি যেটি বড় সাব্যস্ত হয়, সেটিও গ্রাহ্য হয় না । সামাজিক বুদ্ধির সঙ্গে যদি কোন বিশেষ ব্যক্তির বুদ্ধি খাপে খাপে না মিলে যায়, তাহলে হয় তা অতিবুদ্ধি নয় নিবুদ্ধি ; এবং এই উভয় শ্রেণীর বুদ্ধির সহিত সামাজিক মানব পারংপক্ষে কোনরূপ সম্পর্ক রাখতে চায় না । এই কারণেই সাধারণতঃ লোকে নিবুদ্ধিতার প্রতি অবজ্ঞা এবং অতিবুদ্ধির প্রতি বিদ্বেষ-ভাব ধারণ করে । উঁচুদের লেখক এবং নীচুদের লেখক সমসাময়িক পাঠক-সমাজের কাছে সমান অনাদর পায় । কারণ, বুদ্ধি চরিত্র প্রভৃতি সম্বন্ধে লোক-সমাজ উঁচুতেও উঠতে চায় না, নীচুতেও নামতে চায় না,—যেখানে আছে সেইখানেই থাকতে চায় । কেননা ওঠা এবং নামা দুটি ফ্রিয়াই বিপজ্জনক । সমাজ “বিষয়-বালিশে আলিস্” রেখে, নাটক নভেলের দর্পণে নিজের পোষাকী চেহারা দেখতে চায়, কবির মুখে নিজের স্তুতি শুন্তে ভালবাসে, এবং যে গুরুর কাছ থেকে নিজ মতের ভাণ্ড লাভ করে, তাঁকেই দার্শনিক বলে মান্য করে । প্রমাণ স্বরূপ দেখানো যেতে পারে, George Meredithএর অপেক্ষা Marie Corellির নভেলের হাজার গুণ কাট্টি বেশী । এবং যে কবি সমাজের স্তম্ভনোভাব ব্যক্ত করেন, তাঁর চাইতে,—বিনি সমাজের কুমনোভাব ব্যক্ত করেন, তাঁর আদর কিছু কম নয় । Kiplingএর বই Tennysonএর বইয়ের চাইতে কম পয়সায় বিক্রী হয় না । সুতরাং সাহিত্য-ব্যবসায়ীদের পক্ষে ভাল বই লেখবার চেষ্টা করবার কোন দরকার নেই,—বই যাতে খারাপ না হয়, এই চেষ্টাটুকু করলেই কার্যোদ্ধার হবে । এবং কি ভাল আর

কি মন্দ, তা নির্ণয় করতে সমাজের প্রচলিত মতামতগুলি আয়ত্ত করতে হবে। এক কথায়, ব্যবসা চালাতে হলে, যে রকমের সাহিত্য সমাজ চায়, তাই আমাদের যোগাতে হবে।

“নিত্য তুমি খেল যাহা, নিত্য ভাল নহে তাহা,
ভারত যেমত চাহে, সেই খেলা খেল হে”

এরূপ অনুরোধ করে’ যে কোন ফল নেই, তা স্বয়ং ভারত-চন্দ্র টের পেয়েছিলেন,—আমরা ত কোন্ হার। বাঙ্গলাদেশে কিরকমের বইয়ের সব চাইতে বেশী কাট্টি, সেইটি জান্তে পারলে, বাঙ্গালীজাতির মানসিক খোরাক যোগানো আমাদের পক্ষে কঠিন হবে না। শুনতে পাই, বাজারে শুধু রূপকথা, রামায়ণ মহাভারতের আখ্যান, এবং গল্পের বই কাটে। এ কথা যদি সত্য হয় ত, আমাদের স্বীকার করতেই হবে যে বালবৃদ্ধবনিতাতেই বাঙ্গলা বইয়ের ব্যবসা টিকিয়ে রেখেছে। আর এ কথা যে সত্য, সে বিষয়ে সন্দেহ করবার কোন কারণ নেই, কেননা মানুষ সব চাইতে ভালবাসে—গল্প। আমাদের অধিকাংশ লোকের জীবনের ইতিহাস সম্পূর্ণ ঘটনামূলক, অর্থাৎ আমাদের বার্ষিক কিস্তি মানসিক জীবনে কিছু ঘটনা। দিনের পর দিন আসে, দিন যায়। আর সে সব দিনও একটি অপরটির যমজ ভ্রাতার ন্যায়। বিশেষতঃ এ দেশে যেমন রাম না জন্মাতে রামায়ণ লেখা হয়েছিল, তেমনি আমরা না জন্মাতেই আমাদের জীবনের ইতিহাস সমাজ কর্তৃক লিখিত হয়ে থাকে। আমরা শুধু চিরজীবন তার আবৃত্তি করে যাই। সেই আবৃত্তির এখানে ওখানে ভুলভ্রান্তিকূতেই পরস্পরের ভিতর যা বৈচিত্র্য। কিন্তু যন্ত্রবৎ চালিত হলেও, মানুষ এ কথা একেবারে ভুলে যায় না যে, তারা কলের পুতুল নয়,—ইচ্ছাশক্তিবিশিষ্ট স্বাধীন জীব।

তাই নিজের জীবন ঘটনাশূন্য হলেও, অপর লোকের ঘটনাপূর্ণ জীবনের ইতিহাস চর্চা করে' মানুষে সুখ পায়। অন্তরূপ অবস্থায় পড়লে নিজের জীবনও নিতান্ত একঘেয়ে না হয়ে অপূর্ণ বৈচিত্র্যপূর্ণ হতে পারত—এই মনে করে' আনন্দ অনুভব করে। মানুষের উপবাসী হৃদয়ের ক্ষুধা মেটাবার প্রধান সামগ্রী হচ্ছে গল্প,—তা সত্যই হোক আর মিথ্যাই হোক। স্ত্রী সংগ্রহ করবার জন্য আমাদের ধনুর্ভঙ্গও করতে হয় না, লক্ষ্যভেদও করতে হয় না,—সেই জন্যই আমরা দ্রোপদীস্বয়ংবর এবং রামচন্দ্রের বিবাহের কথা শুন্তে ভালবাসি। আমাদের বাড়ীর ভিতর “কুন্দ”ও ফোটে না, এবং বাড়ীর বাহিরে “রোহিনী” ও জোটে না,—তাই আমরা “বিষবৃক্ষ” ও “ভ্রমর” একবার পড়ি, দু'বার পড়ি, তিনবার পড়ি। আমরা দশটায় আপিস যাই, এবং পাঁচটায় ঠিক সেই একই পথ দিয়ে হয় গাড়িতে, নয় ট্রামে, নয় পদব্রজে বাড়ী ফিরে আসি ; তাই আমরা কল্পনায় সিন্ধবাদের সঙ্গে দেশবিদেশে ঘুরে বেড়াতে ভালবাসি।

তাহলে স্থির হল এই যে, আমাদের প্রধান কান্না হবে গল্প বলা,—শুধু নভেলনাটকে নয়, সকল বিষয়ে। ধর্মনীতি, দর্শন, বিজ্ঞান, ইতিহাস,—যত উপন্যাসের মত হবে, ততই লোকের মনঃপূত হবে। দ্বিতীয় কথা হচ্ছে এই যে, গল্প যত পুরোনো হয় ততই সমাজের প্রিয় হয়ে ওঠে। প্রমাণ, রূপকথা এবং রামায়ণ মহাভারতের কথা। এর কারণও স্পষ্ট। পুরোনোর প্রধান গুণ যে তা নতুন নয়, অর্থাৎ অপরিচিত নয়। নতুনের প্রধান দোষ যে তা পরীক্ষিত নয় ; সুতরাং তা সত্য কি মিথ্যা, উদ্ভাবনা কি আবিষ্কার, মানুষের পক্ষে শ্রেয় কি হেয়, তা একনজর দেখে কেউ বলতে পারেন না। তা

ছাড়া নতুন কথা যদি সত্যও হয়, তাহলেও বিনা ওজরে গ্রাহ করা চলে না । মানুষের মন একটি হলেও, মনোভাব অসংখ্য । এবং সে মন যতই ছোট হোক না কেন, একাধিক মনোভাব তাতে বাস করে । একত্রে বাস কর্তে হলে পরস্পর দিবারাত্র কলহ করা চলে না । তাই যে-সকল মনোভাব বহুকাল থেকে আমাদের মন অধিকার করে বসে আছে, তারা ঐ সহবাসের গুণেই পরস্পর একটা সম্পর্ক পাতিয়ে নেয়,— এবং সুখে না হোক শান্তিতে ঘর করে । কিন্তু নতুন সত্যের ধর্মই হচ্ছে, মানুষের মনের শান্তিভঙ্গ করা । নতুন সত্য প্রবেশ করেই আমাদের মনের পাতা-ঘরকন্না কতকটা এলো-মেলো করে দেয় । স্বতরাং ও-পদার্থ মনের ভিতর ঢুকলেই আমাদের মনের ঘর নতুন করে গোছাতে হয়, যে-সব মনোভাব তার সঙ্গে একত্র থাকতে পারে না তাদের বহিস্কৃত করে দিতে হয়, এবং বাদবাকীগুলিকে একটু বদলে সদলে নিয়ে তার সঙ্গে খাপ খাইয়ে দিতে হয় । তা ছাড়া, নতুন সত্য মনে উদয় হয়ে অনেক নতুন কর্তব্যবুদ্ধির উদ্রেক করে । আমরা চির-পরিচিত কর্তব্যগুলির দাবীই রক্ষে কর্তে হিম্‌সিম্‌ খেয়ে যাই, তারপর আবার যদি নিত্যনতুন কর্তব্য এসে নতুন নতুন দাবী কর্তে আরম্ভ করে, তাহলে জীবন যে অতিষ্ঠ হয়ে ওঠে, তার আর সন্দেহ কি ? মানুষে সুখ পায় না, তাই সোয়াস্তি চায় । যে লেখক পাঠকের মনের সেই সোয়াস্তিটুকু নষ্ট কর্তে ত্রুতী হবেন, তাঁর প্রতি অধিকাংশ লোক বিমুখ ও বিরক্ত হবেন । স্বতরাং “সাবধানের মার নেই,” এই সূত্রের বলে যে লেখক, যে কথা সকলে জানে, সেই কথা গদ্যোপদ্যে অনর্গল বলে যাবেন, বাজারে তাঁর কথার মূল্য হবে । উপরে যা বলা গেল, তার

নির্গলিতার্থ দাঁড়ায় এই যে, ব্যবসার হিসেবে সাহিত্যে গল্প বলা এবং পুরোনো গল্প বলাই শ্রেয় ।

সাহিত্যের অবশ্য demand না বাড়লে supply বাড়বে না । সুতরাং সাহিত্যের ব্যবসার শ্রীবৃদ্ধি অনেকপরিমাণে পাঠকের মজ্জির উপর নির্ভর করে, লেখকের কৃতিত্বের উপর নয় । এ দেশের শিক্ষিত লোকদের বই পড়া জিনিসটে বড় একটা অভ্যাস নেই । সাহিত্য-চর্চা করাটা,—নিত্য নৈমিত্তিক কিস্তি কাম্য কোনরূপ কর্মের মধ্যেই গণ্য নয় । এর বহুতর কারণ আছে,—যথা অবসরের অভাব, অর্থের অভাব, এবং ফায়দার অভাব ; কারণ সাহিত্য-চর্চা করবার লাভটি কেউ টাকায় কষে বার করে দিতে পারেন না । যে বিত্তে বাজারে ভাঙ্গানো যায় না, তার যে মূল্য থাকতে পারে,—এ বিশ্বাস সকলের নেই । কিন্তু স্কুলকলেজের বাইরে যে আমরা কোন বই পড়ি না, তার প্রধান কারণ,—স্কুলপাঠ্যপুস্তক পাঠ্য-পুস্তকের প্রধান শত্রু । বছর বছর ধরে স্কুল-পাঠ্য গ্রন্থাবলী গলাধঃকরণ করে' যার মানসিক মন্দাগ্নি না জন্মায়, এমন লোক নিতান্ত বিরল । সুতরাং শিক্ষিত সম্প্রদায়কে সাহিত্যচর্চা করবার উপদেশ দিয়ে কোনও লাভ নেই । কিন্তু বই কেনাটা যে একটি সখ্যমাত্র হতে পারে, এবং হওয়া উচিত,—এই ধারণাটি আমি স্বদেশী সমাজের মনে জন্মিয়ে দিতে চাই ।

বই গৃহসজ্জার একটি প্রধান উপকরণ, এবং সেই কারণে শুধু ঘর সাজাবার জন্যে আমাদের বই কেনা উচিত । আমরা যে হিসেবে ছবি কিনি এবং ঘরে টাঙ্গিয়ে রাখি, সেই একই হিসেবে বই কেনা এবং ঘরে সাজিয়ে রাখা আমাদের কর্তব্য । আমরা ছবি পড়িনে বলে' ছবি কেনাটা যে অন্যায্য, এ কথা কেউ

বলেন না,—সুতরাং বই পড়িনে বলে যে কিনব না, একরূপ মনোভাব অসঙ্গত । এ স্থলে বলে' রাখা আবশ্যক যে, বইয়ের মত ছবিও একটা পড়বার জিনিস । ছবিরও একটা অর্থ আছে, একটা বক্তব্য কথা আছে । বইয়ের সঙ্গে ছবির একমাত্র তফাৎ হচ্ছে যে, উভয়ের ভাষা স্বতন্ত্র । যা একজন কালি ও কলমের সাহায্যে ব্যক্ত করেন, তাই অপর একজন রং ও তুলির সাহায্যে প্রকাশ করেন । তা ছাড়া, বাঙ্গলা বইয়ের সপক্ষে বিশেষ করে এই বলবার আছে যে, বাঙ্গালী ক্রেতা ইচ্ছে করলে তা পড়তে পারেন,—কিন্তু ছবি জিনিসটে ইচ্ছে করলেও পড়তে পারেন না ।

সচরাচর লোকে ঘর সাজায়, গৃহের শোভা বৃদ্ধি করবার জ্ঞান নয়,—কিন্তু নিজের ধন এবং সুরুচির পরিচয় দেবার জ্ঞান । শোষোক্ত হিসেব থেকে দেখলেও দেখা যায় যে, বৈঠকখানার দেয়ালে হাজার টাকার একখানি নোট না ঝুলিয়ে, হাজার টাকা দামের একখানি ছবি ঝোলানতে যেমন অধিক সুরুচির পরিচয় দেয়, তেমনি নানা আকারের নানা বর্ণের রাশি রাশি বই সারি সারি সাজিয়ে রাখাতে প্রমাণ হয় যে, গৃহকর্ত্তা একাধারে ধনী এবং গুণী ।

পূর্বোক্ত কারণে আমি এদেশের ধনী লোকদের বই কিনতে অনুরোধ করি,—গিলতে নয় । তাঁরা যদি এবিষয়ে একবার পথ দেখান, তাহলে তাঁদের দৃষ্টান্ত সদ্দৃষ্টান্ত হিসেবে বক্তলোকে অনুসরণ করবে । যতদিন না বাঙ্গালী সমাজ নিজেদের পাঠক হিসেবে না দেখে, পুস্তকক্রেতা হিসেবে দেখতে শিখবেন, ততদিন বঙ্গ-সাহিত্যের ভাগা সুপ্রসন্ন হবে না ।

আমার শেষ কথা এই যে, গ্রন্থক্রেতা যে শুধু নিঃস্বার্থ পরোপকার করেন, তা নয় । চারিদিকে বইয়ের দ্বারা পরিবৃত্ত হয়ে থাকাতে একটা উপকার আছে । বই চব্বিশ ঘণ্টা চোখের সম্মুখে থেকে এই সত্যটি আমাদের স্মরণ করিয়ে দেয় যে, এ পৃথিবীতে চামড়ায়-ঢাকা মন নামক একটি পদার্থ আছে ।

বৈশাখ, ১৩২০ ।

বঙ্গসাহিত্যের নবযুগ ।

নানারূপ গল্পপদ্য লেখবার এবং ছাপবার যতটা প্রবল
ঝোঁক যত বেশী লোকের মধ্যে আজকাল এদেশে দেখা যায়,
তা পূর্বের কখনো দেখা যায় নি। এমন মাস যায় না, যাতে
অন্ততঃ একখানি মাসিক পত্রের না আবির্ভাব হয়। এবং সে
সকল মাসিক পত্রে সাহিত্যের সকলরকম মালমসলার কিছু না
কিছু নমুনা থাকেই থাকে। সুতরাং এ কথা অস্বীকার করবার
যো নেই যে, বঙ্গ-সাহিত্যের একটি নতুন যুগের সূত্রপাত হয়েছে।
এই নবযুগের শিশু-সাহিত্য অঁতুড়েই মরবে, কিম্বা তার একশ’
বৎসর পরমায়ু হবে,—সে কথা বলতে আমি অপারগ। আমার
এমন কোনও বিত্তে নেই, যার জোরে আমি পরের কুষ্ঠি কাটতে
পারি। আমরা সমুদ্রপার হতে যে-সকল বিজ্ঞান আমদানি
করেছি, সামুদ্রিক বিজ্ঞান তার ভিতর পড়ে না। কিন্তু এই নব-
সাহিত্যের বিশেষ লক্ষণগুলির বিষয় যদি আমাদের স্পষ্ট ধারণা
জন্মায়, তাহলে যুগধর্ম্মানুযায়ী সাহিত্য রচনা আমাদের পক্ষে
অনেকটা সহজ হয়ে আসবে। পূর্বোক্ত কারণে, নব্য লেখকরা
তাদের লেখায় যে হাত দেখাচ্ছেন, সেই হাত দেখবার চেষ্টা
করাটা একেবারে নিষ্ফল নাও হতে পারে।

প্রথমেই চোখে পড়ে যে, এই নব-সাহিত্য রাজধর্ম্ম তাগ করে
গণধর্ম্ম অবলম্বন করছে। অতীতে অন্য দেশের ন্যায় এদেশের
সাহিত্য-জগৎ যখন দুচার জন লোকের দখলে ছিল, যখন লেখা

দূরে থাক্, পড়বার অধিকারও সকলের ছিল না,—তখন সাহিত্য-রাজ্যে রাজা সামন্ত প্রভৃতি বিরাজ করতেন। এবং তাঁরা কাব্য দর্শন ও ইতিহাসের ক্ষেত্রে, মন্দির, অট্টালিকা, স্তূপ, স্তম্ভ, গুহা প্রভৃতি আকারে বল চিরস্থায়ী কীর্তি রেখে গেছেন। কিন্তু বর্তমান যুগে আমাদের দ্বারা কোনরূপ প্রকাণ্ড কাণ্ড করে তোলা অসম্ভব, এই জ্ঞানটুকু জন্মালে, আমাদের কারও আর সাহিত্যে রাজা হবার লোভ থাক্বে না, এবং শব্দের কীর্তিস্তম্ভ গড়বার বৃথা চেষ্টায় আমরা দিন ও শরীর পাত করব না। এর জন্ত আমাদের কোনরূপ দুঃখ করবার আবশ্যক নেই। বস্তুজগতের ন্যায়, সাহিত্য-জগতেরও প্রাচীন কীর্তিগুলি দূর থেকে দেখতে ভাল—কিন্তু নিতাবাবছার্যা নয়।

দর্শনের কুতবমিনারে চড়লে আমাদের মাথা ঘোরে, কাবোর তাজমহলে রাত্রিবাস করে চলে না,—কেননা অত সৌন্দর্যের বুকে ঘুমিয়ে পড়া কঠিন। ধর্ম্মের পর্বতগুহার অভ্যন্তরে খাড়া হয়ে দাঁড়ান যায় না, আর হামাগুড়ি দিয়ে অন্ধকারে হাতড়ে বেড়ালেই যে কোন অনুল্য চিন্তামণি আমাদের হাতে ঠেকতে বাধ্য,—এ বিশ্বাসও আমাদের চলে গেছে। পুরাকালে মানুষে যা-কিছু গড়ে' গেছে, তার উদ্দেশ্য হচ্ছে মানুষকে সমাজ হতে আলাগা করা, দুচারজনকে বল্ললোক হতে বিচ্ছিন্ন করা। অপরপক্ষে নবযুগের ধর্ম্ম হচ্ছে, মানুষের সঙ্গে মানুষের মিলন করা, সমগ্র সমাজকে ভ্রাতৃত্ববন্ধনে আবদ্ধ করা,—কাউকেও ছাড়া নয়, কাউকেও ছাড়তে দেওয়া নয়। এ পৃথিবীতে বৃহৎ না হলে যে কোনও জিনিস মহৎ হয় না, এরূপ ধারণা আমাদের নেই; স্বতরাং প্রাচীন সাহিত্যের কীর্তির তুলনায় নবীন সাহিত্যের কীর্তিগুলি আকারে ছোট হয়ে আসবে, কিন্তু প্রকারে

বেড়ে যাবে ; আকাশ আক্রমণ না করে, মাটির উপর অধিকার বিস্তার করবে । অর্থাৎ ভবিষ্যতে কাব্যদর্শনাদি আর গাছের মত উঁচুর দিকে ঠেলে উঠবে না, ঘাসের মত চারিদিকে চারিয়ে যাবে । এক কণায় বলশক্তিশালী স্বল্পসংখ্যক লেখকের দিন চলে গিয়ে, স্বল্পশক্তিশালী বহুসংখ্যক লেখকের দিন আসছে । আমাদের মনোজগতে যে নবসূর্য্য উদয়োন্মুখ, তার সহস্র রশ্মি অবলম্বন করে অন্ততঃ ষষ্টি সহস্র বালখিলা লেখক এই ভূভারতে অবতীর্ণ হবেন । এরূপ হবার কারণও স্পষ্ট । আজকাল আমাদের ভাববার সময় নেই, ভাববার অবসর থাকলেও লেখবার যথেষ্ট সময় নেই, লেখবার অবসর থাকলেও লিখতে শেখবার অবসর নেই; অগচ আমাদের লিখতেই হবে,— নচেৎ মাসিক পত্র চলে না । এ যুগের লেখকেরা যেহেতু গ্রন্থকার নন, শুধু মাসিক পত্রের পৃষ্ঠাপোষক, তখন তাঁদের ঘোড়ায় চড়ে লিখতে না হলেও ঘড়ির উপর লিখতে হয় ; কেননা মাসিক পত্রের প্রধান কর্তব্য হচ্ছে, পয়লা বেরনো,—কি যে বেরলো, তাতে বেশী কিছু আসে যায় না । তা ছাড়া, আমাদের সকলকেই সকল বিষয়ে লিখতে হয় । নীতির জুতো-শেলাই থেকে ধর্ম্মের চণ্ডিপাঠ পর্য্যন্ত,—সকল ব্যাপারই আমাদের সমান অধিকারভুক্ত । আমাদের নব-সাহিত্যে কোনরূপ “শ্রমবিভাগ” নেই—তার কারণ যে-ক্ষেত্রে “শ্রম” নামক মূল পদার্থেরই অভাব, সেস্থলে তার বিভাগ আর কি করে হ’তে পারে ?

তাই আমাদের হাতে জন্মলাভ করে শুধু ছোট গল্প, খণ্ডকাব্য, সরল বিজ্ঞান ও তরল দর্শন ।

দেশকালপাত্রের সমবায়ে সাহিত্য যে ক্ষুদ্রধর্ম্মাবলম্বী হয়ে উঠেছে, তার জন্ত আমার কোনও খেদ নেই । এ কালের

রচনা ক্ষুদ্র বলে আমি দুঃখ করিনে, আমার দুঃখ যে তা যথেষ্ট ক্ষুদ্র নয়। একে স্বল্পায়তন, তার উপর লেখাটি যদি ফাঁপা হয়,— তাহলে সে জিনিসের আদর করা শক্ত। বালা গালাভরা হলেও চলে,—কিন্তু আংটি নিরেট হওয়া চাই। লেখকরা এই সত্যটি মনে রাখলে, গল্প স্বল্প হয়ে আসবে, শোক শ্লোকরূপ ধারণ করবে, বিজ্ঞান বামনরূপ ধারণ করেও ত্রিলোক অধিকার করে থাকবে, এবং দর্শন নথদর্পণে পরিণত হবে। যাঁরা মানসিক আরামের চর্চা না করে ব্যায়ামের চর্চা করেছেন, তাঁরা সকলেই জানেন যে, যে সাহিত্যে দম নেই, তাতে অন্ততঃ কস (Grip) থাকা আবশ্যক।

২

বর্তমান ইউরোপের সমাক পরিচয়ে এই জ্ঞান লাভ করা যায় যে, গণধর্মের প্রধান ঝোঁক হচ্ছে বৈশ্যধর্মের দিকে; এবং সেই ঝোঁকটি না সামলাতে পারলে সাহিত্যের পরিণাম অতি ভয়াবহ হয়ে ওঠে। আমাদের এই আত্মা-সর্বস্ব দেশে লেখকেরা যে বৈশ্যবৃত্তি অবলম্বন করবেন না, একথাও জোর করে বলা চলে না। লক্ষ্মীলাভের আশায় সরস্বতীর কপট সেবা করতে অনেকে প্রস্তুত, তার প্রমাণ “ভ্যালুপেয়বল্ পোষ্ট” নিত্য ঘরে ঘরে দিচ্ছে। আমাদের নব-সাহিত্যের যেন তেন প্রকারেণ বিকিয়ে যাবার প্রবৃত্তিটি যদি দমন করতে না পারা যায়, তাহলে বঙ্গসরস্বতীকে যে পথে দাঁড়াতে হবে, সে বিষয়ে তিলমাত্রও সন্দেহ নেই। কোনশাস্ত্রেই এ কথা বলে না যে, “বানিজ্যে বসতি সরস্বতী”। সাহিত্যসমাজে ব্রাহ্মণ্য লাভ



করবার ইচ্ছে থাক্লে—দারিদ্র্যকে ভয় পেলে সে আশা সফল হবে না । সাহিত্যের বাজার-দর সম্বন্ধে আমাদের জ্ঞান যত বাড়বে, সেই সঙ্গে তার মূল্য সম্বন্ধে জ্ঞান আমাদের লোপ পেয়ে আস্বে । সুতরাং আমাদের নব-সাহিত্যে লোভ নামক রিপূর অস্তিত্বের লক্ষণ আছে কি না, সে বিষয়ে আমাদের দৃষ্টি থাকা আবশ্যক,—কেননা শাস্ত্রে বলে লোভে পাপ, পাপে মৃত্যু ।

৩

এ যুগের মাসিক পত্রসকল যে সচিত্র হয়ে উঠেছে, সেটি যেমন আনন্দের কথা, তেমনি আশঙ্কারও কথা । ছবির প্রতি গণসমাজের যে একটি নাড়ীর টান আছে, তার প্রচলিত প্রমাণ হচ্ছে, মার্কিং সিগারেট । ঐ চিত্রের সাহচর্য্যেই যত অচল সিগারেট বাজারে চলে যাচ্ছে । এবং আমরা চিত্রমুগ্ধ হয়ে মহানন্দে তাত্রকুট জ্ঞানে খড়ের ধূম পান করছি । ছবি ফাউ দিয়ে মেকি মাল বাজারে কাটিয়ে দেওয়াটা আধুনিক ব্যবসার একটা প্রধান অঙ্গ হয়ে দাঁড়িয়েছে । এদেশে শিশুপাঠ্য গ্রন্থাবলীতেই চিত্রের প্রথম আবির্ভাব । পুস্তিকায় এবং পত্রিকায় ছেলে-ভুলোনো ছবির বহুল প্রচারে চিত্রকলার যে কোন উন্নতি হবে, সে বিষয়ে বিশেষ সন্দেহ আছে,—কেননা সমাজে গোলাম পাশ করে দেওয়াতেই বণিকবুদ্ধির সার্থকতা ; কিন্তু সাহিত্যের যে অবনতি হবে, সে বিষয়ে আর কোনও সন্দেহ নেই । নর্ত্তকীর পশ্চাৎ পশ্চাৎ সারঙ্গীর মত, চিত্রকলার পশ্চাৎ পশ্চাৎ কাব্যকলার অনুধাবন করাতে তার পদমর্যাদা বাড়ে

না । একজন যা করে, অপরে তার দোষগুণ বিচার করে,—এই হচ্ছে সংসারের নিয়ম । সুতরাং ছবির পাশাপাশি তার সমালোচনাও সাহিত্যে দেখা দিতে বাধ্য । এই কারণেই, যেদিন থেকে বাঙ্গলাদেশে চিত্রকলা আবার নব কলেবর ধারণ করেছে, তার পরদিন থেকেই তার অনুকূল এবং প্রতিকূল সমালোচনা শুরু হয়েছে । এবং এই মতদ্বৈধ থেকে, সাহিত্যসমাজে একটি দলাদলির সৃষ্টি হবার উপক্রম হয়েছে । এই তর্কযুদ্ধে আমার কোন পক্ষ অবলম্বন করবার সাহস নেই । আমার বিশ্বাস, এদেশে একালের শিক্ষিত লোকদের মধ্যে চিত্রবিজ্ঞায় বৈদগ্ধ্য এবং আলেখ্যব্যাখ্যানে নিপুণতা অতিশয় বিরল,—কারণ এ যুগের বিজ্ঞার মন্দিরে স্তম্ভের প্রবেশ নিষেধ । তবে বঙ্গদেশের নব্যচিত্র সম্বন্ধে সচরাচর যে-সকল আপত্তি উত্থাপন করা হয়ে থাকে, সেগুলি সঙ্গত কি অসঙ্গত তা বিচার করবার অধিকার সকলেরই আছে ; কেননা সে সকল আপত্তি কলাজ্ঞান নয়, সাধারণ জ্ঞানের উপর প্রতিষ্ঠিত । যতদূর আমি জানি, নব্য-চিত্রকরদের বিরুদ্ধে প্রধান অভিযোগ এই যে, তাঁদের রচনায় বর্ণে বর্ণে বানান-ভুল এবং রেখায় রেখায় ব্যাকরণ-ভুল দৃষ্ট হয় । এ কথা সত্য কি মিথ্যা শুধু তাঁরাই বলতে পারেন, যাঁদের চিত্রকর্মের ভাষার উপর সম্পূর্ণ অধিকার জন্মেছে ; কিন্তু সে ভাষায় সুপণ্ডিত ব্যক্তি বাঙ্গলাদেশের রাস্তাঘাটে দেখতে পাওয়া যায় না, যদিচ ওসকল স্থানে সমালোচকের দর্শন পাওয়া তুলনায় নয় । আসল কথা হচ্ছে, এ শ্রেণীর চিত্রসমালোচকেরা অনুকরণ অর্থে ব্যাকরণ শব্দ ব্যবহার করেন । এঁদের মতে ইউরোপীয় চিত্রকরেরা প্রকৃতির অনুকরণ করেন, সুতরাং সেই অনুকরণের অনুকরণ করাটাই এদেশের চিত্র-

শিল্পীদের কর্তব্য। প্রকৃতি নামক বিরাট পদার্থ এবং তার অংশভূত ইউরোপ নামক ভূভাগ, এ উভয়ের প্রতি আমার যথোচিত ভক্তি-শ্রদ্ধা আছে, কিন্তু তাই বলে তার অনুকরণ করাটাই যে পরম-পুরুষার্থ, এ কথা আমি কিছুতেই স্বীকার করতে পারি নে। প্রকৃতির বিকৃতি ঘটানো কিম্বা তার প্রতিকৃতি গড়া কলাবিদ্যার কার্য নয়—কিন্তু তাকে আকৃতি দেওয়াটাই হচ্ছে আর্টের ধর্ম। পুরুষের মন প্রকৃতি-নর্ভকীর মুখ দেখবার আয়না নয়। আর্টের ক্রিয়া অনুকরণ নয়,—সৃষ্টি। স্তূতরাং বাহুবস্তুর মাপজোকের সঙ্গে, আমাদের মানসজাত বস্তুর মাপজোক যে জ্বালজ্ব মিলে যেতেই হবে, এমন কোন নিয়মে আর্টকে আবদ্ধ করার অর্থ হচ্ছে প্রতিভার চরণে শিকলি পরানো। আর্টে অবশ্য যথেষ্টাচারিতার কোনও অবসর নেই। শিল্পীরা কলাবিদ্যার অনন্ত-সামান্য কঠিন বিধিনিষেধ মানতে বাধ্য,—কিন্তু জ্যামিতি কিম্বা গণিতশাস্ত্রের শাসন নয়। একটি উদাহরণের সাহায্যে আমার পূর্বোক্ত মতের যথার্থ্যের প্রমাণ অতি সহজেই দেওয়া যেতে পারে। একে একে যে দুই হয়, এবং একের পিঠে এক দিলে যে এগারো হয়,—বৈজ্ঞানিক হিসেবে এর চাইতে খাঁটি সত্য পৃথিবীতে আর কিছুই নেই। অথচ একে একে দুই না হয়েও, এবং একের পিঠে একে এগারো না হয়েও, ঐরূপ যোগাযোগে যে বিচিত্র মজা হতে পারে, তার প্রত্যক্ষ প্রমাণ নীচে দেওয়া যাচ্ছে।



সম্ভবতঃ আমার প্রদর্শিত যুক্তির বিরুদ্ধে কেউ এ কথা বলতে পারেন যে, “চিত্রে আমরা গণিতশাস্ত্রের সত্য চাইনে, কিন্তু প্রত্যক্ষ জ্ঞানের সত্য দেখতে চাই।” প্রত্যক্ষ সত্য নিয়ে মানুষে মানুষে মতভেদ এবং কলহ যে আবহমান কাল চলে আসছে, তার কারণ অন্ধের হস্তীদর্শন ঘায়ে নির্ণীত হয়েছে। প্রকৃতির যে অংশ এবং যে ভাবটির সঙ্গে যার চোখের এবং মনের যতটুকু সম্পর্ক আছে, তিনি সেইটুকুকেই সমগ্র সত্য বলে ভুল করেন। সত্যভ্রষ্ট হলে বিজ্ঞানও হয় না, আর্টও হয় না,—কিন্তু বিজ্ঞানের সত্য এক, আর্টের সত্য অপর। কোন সুন্দরীর দৈর্ঘ্য, প্রস্থ এবং ওজনও যেমন এক হিসাবে সত্য, তার সৌন্দর্য্যও তেমনি আর এক হিসাবে সত্য। কিন্তু সৌন্দর্য্য নামক সত্যটি তেমন ধরাছোঁওয়ার মত পদার্থ নয় বলে, সে সম্বন্ধে কোনরূপ অকাটা বৈজ্ঞানিক প্রমাণ দেওয়া যায় না। এই সত্যটি আমরা মনে রাখলে, নব্যশিল্পীর কৃশাঙ্গী মানসী-কন্যাদের ডাক্তার দিয়ে পরীক্ষা করিয়ে নেবার জন্ত অত ব্যগ্র হতুম না; এবং চিত্রের ঘোড়া ঠিক ঘোড়ার মত নয়, এ আপত্তিও উত্থাপন করতুম না। এ কথা বলার অর্থ,—তার অস্থিসংস্থান, পেশীর বন্ধন প্রভৃতি প্রকৃত ঘোড়ার অনুরূপ নয়। Anatomy অর্থাৎ অস্থিবিদ্যার সাহায্যে দেখান যেতে পারে যে, চিত্রের ঘোটক, গঠনে ঠিক আমাদের শকটবাহী ঘোটকের সহোদর নয়; এবং উভয়কে একত্রে জুড়িতে যোতা যায় না। এ সম্বন্ধে আমার প্রথম বক্তব্য এই যে, অস্থিবিদ্যা কঙ্কালের জ্ঞানের উপর নির্ভর করে, প্রত্যক্ষ জ্ঞানের উপর নয়। কঙ্কালের সঙ্গে সাধারণ লোকের চাক্ষুষ পরিচয় নেই; কারণ দেহ-তাত্ত্বিকের জ্ঞানমাত্রেরে বাই হোক, আমাদের চোখে প্রাণীজগৎ কঙ্কালসার

নয়। সুতরাং দৃষ্টিজগৎকে অদৃষ্টের কণ্ঠিপাথরে কষে নেওয়াতে পাণ্ডিত্যের পরিচয় দেওয়া যেতে পারে—কিন্তু রূপজ্ঞানের পরিচয় দেওয়া হয় না।—দ্বিতীয় কথা এই যে, কি মানুষ কি পশু, জীবমাত্রেরই দেহযন্ত্রগঠনের একমাত্র কারণ হচ্ছে উক্ত যন্ত্রের সাহায্যে কতকগুলি ক্রিয়া সম্পাদন করা। গঠন যে ক্রিয়াসাপেক্ষ, এই হচ্ছে দেহ-বিজ্ঞানের মূল তত্ত্ব। ঘোড়ার দেহের বিশেষ গঠনের কারণ হচ্ছে, ঘোড়া ত্বরঙ্গম। যে ঘোড়া দৌড়বে না, তার anatomy ঠিক জীবন্ত ঘোড়ার মত হবার কোন বৈধ কারণ নেই। পটস্থ ঘোড়া যে তটস্থ, এ বিষয়ে বোধহয় কোন মতভেদ নেই। চিত্রার্পিত অশ্বের anatomy ঠিক চড়বার কিম্বা হাঁকাবার ঘোড়ার অনুরূপ করাতেই বস্তুজ্ঞানের অভাবের পরিচয় দেওয়া হয়। চলৎ-শক্তিরহিত অশ্ব, —অর্থাৎ যাকে চাবুক মারলে ছিঁড়বে কিন্তু নড়বে না, এহেন ঘোটক,—অর্থহীন অনুকরণের প্রসাদেই জীবন্ত ঘোটকের অবিকল আকার ধারণ করে' চিত্রকর্মে জন্মলাভ করে। এই পঞ্চভূতাত্মক পরিদৃশ্যমান জগতের অন্তরে একটি মানস-প্রসূত দৃশ্যজগৎ সৃষ্টি করাই চিত্রকলার উদ্দেশ্য, সুতরাং এ উভয়ের রচনার নিয়মের বৈচিত্র্য থাকা অবশ্যসম্ভাবী। তথাকথিত নবাচিত্র যে নির্দোষ কিম্বা নিভুল, এমন কথা আমি বলি না। যে বিদ্যা কাল জন্মগ্রহণ করেছে, আজ যে তার অঙ্গপ্রত্যঙ্গ-সকল সম্পূর্ণ আত্মবশে আসবে, এরূপ আশা করাও বৃথা।

শিল্প হিসাবে তার নানা দ্রুতি থাকা কিছুই আশ্চর্য্যের বিষয় নয়। কোথায় কলার নিয়মের বাস্তবতার ঘটেছে, সমালোচকদের তাই দেখিয়ে দেওয়া কর্তব্য। অস্থি নয়, বর্ণের সংস্থানে,—পেশী নয়, রেখার বন্ধনে,—যেখানে অসঙ্গতি এবং শিথিলতা দেখা যায়, সেই

স্থলেই সমালোচনার সার্থকতা আছে । অব্যবসায়ীর অথবা নিন্দায় চিত্রশিল্পীদের মনে শুধু বিদ্রোহীভাবের উদ্রেক করে, এবং ফলে তাঁরা নিজেদের দোষগুলিকেই গুণ ভ্রমে বুকে আঁকড়ে ধরে রাখতে চান ।

আমার আলোচ্য বিষয় হচ্ছে সাহিত্য, চিত্র নয় । যেহেতু এ যুগের সাহিত্য চিত্রসনাথ হয়ে উঠেছে, সেই কারণেই চিত্রকলার বিষয় উল্লেখ করতে বাধ্য হয়েছি । আমার ও-প্রসঙ্গ উত্থাপন করবার অপর একটি কারণ হচ্ছে এইটি দেখিয়ে দেওয়া যে, যা চিত্রকলায় দোষ বলে গণ্য, তাই আবার আজকাল এ দেশে কাব্যকলায় গুণ বলে মাণ্য ।

প্রকৃতির সহিত লেখকদের যদি কোনরূপ পরিচয় থাকত, তাহলে শুধু বর্ণের সঙ্গে বর্ণের যোজনা করলেই যে বর্ণনা হয়, এ বিশ্বাস তাঁদের মনে জন্মাত না,—এবং যে বস্তু কখনও তাঁদের চক্ষুচক্ষুর পথে উদয় হয়নি, তা অপরের মনশ্চক্ষুর স্রুক্ষে খাড়া করে দেবার চেষ্টারূপ পণ্ডিত্রাম তাঁরা করতেন না । সম্ভবতঃ এ যুগের লেখকদের বিশ্বাস যে, ছবির বিষয় হচ্ছে দৃশ্যবস্তু, আর লেখার বিষয় হচ্ছে অদৃশ্য মন—সুতরাং বাস্তবিকতা চিত্রকলায় অর্জনীয় এবং কাব্যকলায় বর্জনীয় । সাহিত্যে সেহাই-কলমের কাজ করতে গিয়ে যাঁরা শুধু কলমের কালি ঝাড়েন—তাঁরাই কেবল নিজের মনকে প্রবোধ দেবার জন্য পূর্বোক্ত মিথ্যাটিকে সত্য বলে গ্রাহ্য করেন । ইন্দ্রিয়জ প্রত্যক্ষ জ্ঞানই হচ্ছে সকল জ্ঞানের মূল । বাহ্যজ্ঞানশূন্যতা অন্তর্দৃষ্টির পরিচায়ক নয় । দূরদৃষ্টি লাভ করার অর্থ চোখে চাংশে-ধরা নয় । দেহের নবদ্বার বন্ধ করে দিলে, মনের ঘর অলৌকিক আলোকে কিম্বা পারলৌকিক অন্ধকারে পূর্ণ হয়ে উঠবে—বলা কঠিন । কিন্তু

সর্বলোকবিদিত সহজ সত্য এই যে, যাঁর ইন্দ্রিয় সচেতন এবং সজাগ নয়—কাব্যে কৃতিত্ব লাভ করা তাঁর পক্ষে অসম্ভব। জ্ঞানাঞ্জন-শলাকার অপপ্রয়োগে ঘাঁদের চক্ষু উন্মীলিত না হয়ে কানা হয়েছে, তাঁরাই কেবল এ সত্য মানতে নারাজ হবেন। প্রকৃতিদত্ত উপাদান নিয়েই মন বাক্যচিত্র রচনা করে। সেই উপাদান সংগ্রহ করবার, বাছাই করবার, এবং ভাষায় সাকার করে তোলবার ক্ষমতার নামই কবিত্বশক্তি। বস্তুজ্ঞানের অটল ভিত্তির উপরেই কবিকল্পনা প্রতিষ্ঠিত। মহাকবি ভাস বলেছেন যে, “সুনিবিষ্ট লোকের রূপ বিপর্যায়” করা অন্ধকারের ধর্ম। সাহিত্যে ওরূপ করাতে প্রতিভার পরিচয় দেওয়া হয় না, কারণ প্রতিভার ধর্ম হচ্ছে প্রকাশ করা, অপ্রত্যক্ষকে প্রত্যক্ষ করা,— প্রত্যক্ষকে অপ্রত্যক্ষ করা নয়। অলঙ্কার-শাস্ত্রে বলে অপ্রকৃত, অতিপ্রকৃত এবং লৌকিক জ্ঞানবিরুদ্ধ বর্ণনা, কাব্যে দোষ হিসেবে গণ্য। অবশ্য পৃথিবীতে যা সত্যই ঘটে থাকে, তার যথাযথ বর্ণনাও সব সময়ে কাব্য নয়। আলঙ্কারিকেরা উদাহরণ স্বরূপ দেখান যে, “গৌ তৃণং আন্তি” কথাটা সত্য হলেও, ও কথা বলায় কবিত্ব-শক্তির বিশেষ পরিচয় দেওয়া হয় না। তাই বলে ‘গরুরা ফুলে ফুলে মধুপান করছে’ এরূপ কথা বলাতে, কি বস্তুজ্ঞান কি রসজ্ঞান, কোনরূপ জ্ঞানের পরিচয় দেওয়া হয় না। এস্থলে বলে রাখা আবশ্যিক যে, নিজেদের সকলপ্রকার ত্রুটির জ্ঞান আমাদের পূর্বপুরুষদের দায়ী করা, বর্তমান ভারতবাসীদের একটা রোগের মধ্যে হয়ে পড়েছে। আমাদের বিশ্বাস, এ বিশ্ব নশ্বর এবং মায়াময় বলে, আমাদের পূর্বপুরুষেরা বাহ্য-জগতের কোনরূপ খোঁজখবর রাখতেন না। কিন্তু এ কথা জোর করে বলা যেতে পারে যে, তাঁরা কস্মিনকালেও অবিদ্যাকে পরাবিদ্যা

বলে ভুল করেন নি, কিন্ম একলক্ষে যে মনের পূর্বোক্ত প্রথম অবস্থা হতে দ্বিতীয় অবস্থায় উত্তীর্ণ হওয়া যায়—এরূপ মতও প্রকাশ করেন নি । বরং শাস্ত্র এই সত্যেরই পরিচয় দেয় যে, অপরাবিদ্যা সম্পূর্ণ আয়ত্ত না হলে, কারও পক্ষে পরাবিদ্যা লাভের অধিকার জন্মায় না, কেননা বিরাটের জ্ঞানের ক্ষেত্রেই স্বরাটের জ্ঞান অঙ্কুরিত হয় । আসল কথা হচ্ছে, মানসিক আলস্তবশতঃই আমরা সাহিত্যে সত্যের ছাপ দিতে অসমর্থ । আমরা যে কথায় ছবি আঁকতে পারিনে, তার একমাত্র কারণ—আমাদের চোখ ফোটবার আগে মুখ ফোটে ।

একদিকে আমরা বাহ্য বস্তুর প্রতি যেমন বিরক্ত, অপর দিকে অহংয়ের প্রতি ঠিক তেমনি অনুরক্ত ; আমাদের বিশ্বাস যে, আমাদের মনে যে সকল চিন্তা ও ভাবের উদয় হয়, তা এতই অপূর্ণ এবং মহার্ঘ্য যে, স্বজাতিকে তার ভাগ না দিলে ভারত-বর্ষের আর দৈশ ঘুচেবে না । তাই আমরা অহর্নিশি কাব্যে ভাবপ্রকাশ করতে প্রস্তুত । ঐ ভাবপ্রকাশের অদম্য প্রবৃত্তিটিই আমাদের সাহিত্যে সকল অনর্থের মূল হয়ে দাঁড়িয়েছে । আমার মনোভাবের মূল্য আমার কাছে যতই বেশী হোক না, অপরের কাছে তার যা কিছু মূল্য, সে তার প্রকাশের ক্ষমতার উপর নির্ভর করে । অনেকখানি ভাব মরে একটুখানি ভাষায় পরিণত না হলে, রসগ্রাহী লোকের নিকট তা মুখরোচক হয় না । এই ধারণাটি যদি আমাদের মনে স্থান পেত, তাহলে আমরা সিকি পয়সার ভাবে আত্মহারা হয়ে কলার অমূল্য আত্মসংযম হতে ভ্রষ্ট হতুম না । মানুষ মাত্রেই মনে দিবারাত্র নানারূপ ভাবের উদয় এবং বিলয় হয়—এই অস্থির ভাবকে ভাষায় স্থির করবার নামই হচ্ছে রচনাশক্তি । কাব্যের উদ্দেশ্য ভাবপ্রকাশ করা

নয়, ভাব উদ্বেক করা । কবি যদি নিজেকে বীণা হিসেবে না দেখে, বাদক হিসেবে দেখেন,—তাহলে পরের মনের উপর আধিপত্য লাভ করবার সম্ভাবনা তাঁর অনেক বেড়ে যায় । এবং যে মুহূর্ত থেকে কবির নিজেকে পরের মনোবীণার বাদক হিসেবে দেখতে শিখবেন, সেই মুহূর্ত থেকে তাঁরা বস্তুজ্ঞানের এবং কলার নিয়মের একান্ত শাসনাধীন হবার সার্থকতা বুঝতে পারবেন । তখন আর নিজের ভাববস্তুকে এমন দিব্যরত্ন মনে করবেন না যে, সেটিকে আকার দেবার পরিশ্রম থেকে বিমুক্ত হবেন । অবলীলাক্রমে রচনা করা আর অবহেলাক্রমে রচনা করা যে এক জিনিস নয়, একথা গণধর্ম্মাবলম্বীরা সহজে মানতে চান না,—এই কারণেই এত কথা বলা । আমার শেষ বক্তব্য এই যে, ক্ষুদ্রত্বের মধ্যেও যে মহত্ত্ব আছে, আমাদের নিত্যপরিচিত লৌকিক পদার্থের ভিতরেও যে অলৌকিকতা প্রচ্ছন্ন হয়ে রয়েছে, তার উদ্ধার সাধন করতে হলে, অব্যক্তকে ব্যক্ত করতে হলে, সাধনার আবশ্যক ; এবং সে সাধনার প্রক্রিয়া হচ্ছে, দেহমনকে বাহ্য-জগৎ এবং অন্তর্জগতের নিয়মাধীন করা । ষাঁর চোখ নেই, তিনিই কেবল সৌন্দর্য্যের দর্শন লাভের জগ্গ শিবনেত্র হন ; এবং ষাঁর মন নেই, তিনিই মনস্বিতা লাভের জগ্গ অগ্নি-মনস্কতার আশ্রয় গ্রহণ করেন । নব্য লেখকদের নিকট আমার বিনীত প্রার্থনা এই যে, তাঁরা যেন দেশী বিলাতি কোনরূপ বুলির বশবর্তী না হয়ে, নিজের অন্তর্নিহিত শক্তির পরিচয় লাভ করবার জগ্গ ব্রতী হন । তাতে পরের না হোক, অন্ততঃ নিজের উপকার করা হবে ।

নোবেল প্রাইজ ।

সব জিনিসেরই দুটি দিক আছে—একটি সদর, আর একটি মফঃস্বল । শ্রীযুক্ত রবীন্দ্রনাথ ঠাকুর Nobel Prize পেয়েছেন বলে বল্ললোক যে খুসি হয়েছেন, তার প্রমাণ ত হাতে হাতেই পাওয়া যাচ্ছে ;—কিন্তু সকলে যে সমান খুসি হননি, এ সত্যটি তেমন প্রকাশ হয়ে পড়েনি । এই বাঙ্গলাদেশের একদল লোকের, অর্থাৎ লেখকসম্প্রদায়ের, এ ঘটনায় হরিষে বিষাদ ঘটেছে । আমি একজন লেখক, সুতরাং কি কারণে ব্যাপারটি আমাদের কাছে গুরুতর বলে মনে হচ্ছে, সেই কথা আপনাদের কাছে নিবেদন করতে ইচ্ছা করি ।

প্রথমতঃ, যখন একজন বাঙ্গালী লেখক এই পুরস্কার লাভ করেছেন, তখন আর একজনও যে পেতে পারে,—এই ধারণা আমাদের মনে এমনি বদ্ধমূল হয়েছে যে, তা উপড়ে ফেলতে গেলে আমাদের বুক ফেটে যাবে । অবশ্য আমরা কেউ রবীন্দ্রনাথের সমকক্ষ নই, বড় জোর তাঁর স্বপক্ষ কিন্বা বিপক্ষ,—তাই বলে’ পড়ুতাটা যখন এদিকে পড়েছে, তখন আমরা যে Nobel Prize পাব না—এ হতে পারে না । সাহিত্যের রাজটীকা লাভ করা যায়—কপালে । তাই বলছি, আশার আকাশে দোহুল্যমান এই টাকার থলিটি চোখের স্রুমুখে থাকাতে, লেখা জিনিসটে আমাদের কাছে অতি স্নকঠিন হয়ে উঠেছে ।

স্বর্গ যদি অকস্মাৎ প্রত্যক্ষ হয়, আর তার লাভের সম্ভাবনা নিকট হয়ে আসে, তাহলে মানুষের পক্ষে সহজ মানুষের মত চলাফেরা করা অসম্ভব হয়ে পড়ে । চলাফেরা দূরে যাক, তার পক্ষে পা ফেলাই অসম্ভব হয়,—এই ভয়ে, পাছে হাতের স্বর্গ পায়ে ঠেলি । তেমনি Nobel Prize এর সাক্ষাৎ পাওয়া অবধি, লেখা সম্বন্ধে দায়িত্বজ্ঞান আমাদের এত বেড়ে গেছে যে, আমরা আর হাল্কাভাবে কলম ধরতে পারি নে ।

এখন থেকে আমরা প্রতি ছত্র Swedish Academyর মুখ চেয়ে লিখতে বাধ্য । অথচ যে দেশে ছমাস দিন আর ছমাস রাত, সে দেশের লোকের মন যে কি করে' পাব, তাও বুঝতে পারি নে । এইটুকু মাত্র জানি যে, আমাদের রচনায় অর্দেক আলো আর অর্দেক ছায়া দিতে হবে, কিন্তু কোথায় এবং কি ভাবে, তার হিসেব কে বলে দেয় ? Sweden যদি বারোমাস রাতের দেশ হত, তাহলে আমরা নির্ভয়ে কাগজের উপর কালির পৌঁছড়া দিয়ে যেতে পারতুম ; আর যদি বারোমাস দিনের দেশ হত, তাহলেও নয় ভরসা করে সাদা কাগজ পাঠাতে পারতুম । কিন্তু অবস্থা অগুরূপ হওয়াতেই আমরা উভয় সঙ্কটে পড়েছি ।

দ্বিতীয় মুন্সিলের কথা এই যে, অত্যাধি বাঙ্গলা আর বাঙ্গালী ভাবে লেখা চলবে না । ভবিষ্যতে ইংরেজি তরজমার দিকে এক নজর রেখে,—এক নজর কেন, পুরো নজর রেখেই—আমাদের বাঙ্গলা-সাহিত্য গড়তে হবে । অবশ্য আমরা সকলেই দোভাষী, আর আমাদের নিত্য কাজই হচ্ছে তরজমা করা । কিন্তু সব্যসাচী হলেও, এক তীরে দুই পাখী মেরে উঠতে পারি নে । আমরা যখন বাঙ্গলা লিখি, তখন ইংরেজির তরজমা করি,—কিন্তু সে না জেনে; আর যখন ইংরেজি লিখি, তখন বাঙ্গলার

তরজমা করি,—সেও না জেনে । কিন্তু এখন থেকে ঐ কাজই আমাদের সম্ভানে কর্তে হবে—মুষ্কিল ত ঐখানেই । মনোভাবকে প্রথমে বাঙ্গলা ভাষার কাপড় পরাতে হবে, এই মনে রেখে যে আবার তাকে সে কাপড় ছাড়িয়ে ইংরেজি পোষাক পরিয়ে Swedish Academyর স্তমুখে উপস্থিত কর্তে হবে । এবং এর দরুণ মনোভাবটীর চেহারাও এমনি ত'য়ের কর্তে হবে যে, শাড়ীতেও মানায়, Gownএও মানায় ।

এক ভাষাতে চিন্তা করাই কঠিন, কিন্তু একসঙ্গে, যুগপৎ, দুটি ভাষাতে চিন্তা করাটা অসম্ভব বল্লেও অতুক্তি হয় না । কিন্তু কায়ক্লেশে আমাদের সেই অসাধ্য সাধন কর্তেই হবে । একটি বাঙ্গালী আর একটি বিলাতি—এই দুটি স্ত্রী নিয়ে সংসার পাতা যে আরামের নয়, তা যাঁরা ভুক্তভোগী নন তাঁরাও জানেন । তা ছাড়া, এ উভয়ের প্রতি সমান আসক্তি না থাকলে, এ দুই সংসার করাও মিছে । সর্ববভূতে সমদৃষ্টি চাইকি মানুষের হতেও পারে, কিন্তু দুটি পত্নীতে সমান অনুরাগ হওয়া অসম্ভব,—কেননা মানুষের চোখ দুটি হলেও, হৃদয় শুধু একটি । স্নেহ হতে হলে একটিমাত্র স্ত্রী চাই । এমন কি, দুই দেবীকে পূজা কর্তে হলেও, পালা করে ছাড়া উপায়ান্তর নেই । অতএব দাঁড়াল এই যে, বছরের অর্ধেক সময় আমাদের বাঙ্গলা লিখতে হবে, আর অর্ধেক সময় ইংরেজিতে তার তরজমা কর্তে হবে । ফিরে-ফিরতি সেই Swedenএর কথাই এল । অর্থাৎ আমাদের চিদাকাশে ছমাস রাত আর ছমাস দিনের সৃষ্টি কর্তে হবে, অথচ দৈবশক্তি আমাদের কারও নেই ।

তৃতীয় মুষ্কিল এই যে, সে তরজমার ভাষা চলুতি হলে চলবে না । সে ভাষা ইংরেজি হওয়া চাই, অথচ ইংরেজের ইংরেজি

হলেও হবে না । দেশী আত্মা এমনভাবে বিলেতি দেহে প্রবেশ করিয়ে দেওয়া চাই, যাতে তার পূর্বজন্মের সংস্কারটুকু বজায় থাকে । ফুল ফোটাতে হবে বিলেতি, কিন্তু তার গায়ে গন্ধ থাকা চাই দেশী কুঁড়ির । প্রজাপতি ওড়াতে হবে বিলেতি, কিন্তু তার গায়ে রং থাকা চাই দেশী পোকার । এক কথায়, আমাদের পূর্বের সূর্য পশ্চিমে ওঠাতে হবে । এহেন অঘটন-ঘটন-পটিয়সী বিদ্যা অবশ্য আমাদের নেই ।

কাজেই যে কার্য আমরা একদিন বাঙ্গলায় করতে চেষ্টা করে অকৃতকার্য হয়েছি—রবীন্দ্রনাথের লেখার অনুকরণ—তাই আবার দোকর করে ইংরেজিতে করতে হবে । ইউরোপে আসল জিনিসটি গ্রাহ হচ্ছে বলে নকল জিনিসটিও যে গ্রাহ হবে, সে আশা দুরাশা মাত্র । ইউরোপ এদেশে মেকি চালায় বলে, আমরাও যে সে দেশে মেকি চালাতে পারব—এমন ভরসা আমার নেই ।

ফলে আমরা সাদাকে কালো, আর কালোকে সাদা যতই কেন করি নে,—আমাদের পক্ষে Nobel Prize ছিকেয় তোলা রইল । কিন্তু যদি পাই? বিড়ালের ভাগ্যে সে ছিকে যদি ছেঁড়ে ! সেও আবার বিপদের কথা হবে । Nobel Prize পাওয়ার অর্থ শুধু অনেকটা টাকা পাওয়া নয়, সেই সঙ্গে অনেক খানি সম্মান পাওয়া । অনর্থ এ ক্ষেত্রে অর্থ নয়, কিন্তু তৎ-সংস্কৃতি গৌরবটুকু । বাঙ্গলা লিখে আমরা কি অর্থ কি গৌরব, কিছুই পাই নে । বাঙ্গলা-সাহিত্যে আমরা ঘরের খেয়ে বনের মো'ষ তাড়াই, এবং পুরস্কারের মধ্যে লাভ করি তার চাটুটুকু । স্বদেশীর শুভইচ্ছার ফুলচন্দন কালেভদ্রেও আমাদের কপালে জোটে না বলে, ইউরোপ যদি উপযাচী হয়ে আমাদের মাথায়

সাহিত্যের ভাইফোঁটা দেয়, তাহলে তার ফলে আমাদের আয়ুর্দ্ধি না হয়ে হাস হবারই সম্ভাবনা বেড়ে যায় ।

প্রথমেই দেখুন যে, Nobel Prize এর তারের সঙ্গে সঙ্গেই আমরা শত শত চিঠি পাব । এবং এই অসংখ্য চিঠি পড়তে এবং তার উত্তর দিতেই আমাদের দিন কেটে যাবে,—সাহিত্য পড়বার কিম্বা গড়বার অবসর আর আমাদের থাকবে না । এক কথায় সমাজের খাতিরে, ভদ্রতার খাতিরে, আমাদের সাহিত্যের ফুলফল ছেড়ে শুধু শুষ্কপত্র রচনা করতে হবে । এই কারণেই বোধহয় লোকে বলে যে, Nobel Prize লাভ করার অর্থ হচ্ছে সাহিত্যজীবনের মোক্ষলাভ করা ।

আর এক কথা, টাকাটা অবশ্য ঘরে তোলা যায় এবং দিব্য আরামে উপভোগ করা যায়, কিন্তু গৌরব জিনিসটে ওভাবে আত্মসাৎ করা চলে না । দেশশুদ্ধ লোক সে গৌরবে গৌরবান্বিত হতে অধিকারী । শাস্ত্রে বলে “গৌরবে বহুবচন ।” কিন্তু তার কত অংশ নিজের প্রাপ্য, আর কত অংশ অপরের প্রাপ্য,—সে সম্বন্ধে কোন একটা নজির নেই বলে, এই গৌরব-দায়ের ভাগ নিয়ে স্বজাতির সঙ্গে একটা জ্ঞাতিবিরোধের সৃষ্টি হওয়া আশ্চর্য্য নয় । অপরপক্ষে যদি একের সম্মানে সকলে সমান সম্মানিত জ্ঞান করেন, এবং সকলের মনে কবির প্রতি অকৃত্রিম ভ্রাতৃত্ব জেগে ওঠে—তাতেও কবির বিপদ আছে । ত্রিশ দিন যদি বিজয়াদশমী হয়, এবং ত্রিশকোটি লোক যদি আত্মীয় হয়ে ওঠেন, তাহলে নররূপধারী একাধারে তেত্রিশকোটি দেবতা ছাড়া আর কারও পক্ষে অজস্র কোলাকুলির বেগ ধারণ করা অসম্ভব । ও অবস্থায় রক্তমাংসের দেহের মুখ থেকে সহজেই এই কথা বেরিয়ে যায় যে “ছেড়ে দে মা কেঁদে বাঁচি ।” এবং

ও কথা একবার মুখ ফস্কে বেরিয়ে গেলে, তার ফলে কবিকে কেঁদে মরতে হবে ।

তাই বলি, আমাদের বাঙ্গালী লেখকদের পক্ষে Nobel Prize হচ্ছে দিল্লির লাড্ডু,—যো খায়া 'ওভি পস্তায়া, যো না খায়া 'ওভি পস্তায়া !

মাঘ, ১৩২০ ।

সবুজ পত্র ।

বাঙ্গলা দেশ যে সবুজ, এ কথা বোধহয় বাহ্যজ্ঞানশূন্য লোকেও অস্বীকার করবেন না । মা'র শতশ্রামলরূপ বাঙ্গলার এত গদ্যোপদ্যে এতটা পল্লবিত হয়ে উঠেছে যে, সে বর্ণনার যাথার্থ্য বিশ্বাস করবার জ্ঞাত চোখে দেখবারও আবশ্যক নেই । পুনরুক্তির গুণে এটি সেই শ্রেণীর সত্য হয়ে দাঁড়িয়েছে, যার সম্বন্ধে চক্ষুকর্ণের যে বিবাদ হতে পারে, এরূপ সন্দেহ আমাদের মনে মুহূর্তের জ্ঞাত ও স্থান পায় না । এ ক্ষেত্রে সৌভাগ্যবশতঃ নাম ও রূপের বাস্তবিকই কোন বিরোধ নেই । একবার চোখ তাকিয়ে দেখলেই দেখা যায় যে, তরাই হতে সুন্দরবন পর্য্যন্ত, এক টালা সবুজবর্ণ দেশটিকে আছোপান্ত ছেয়ে রেখেছে । কোথাও তার বিচ্ছেদ নেই, কোথাও তার বিরাম নেই ;—শুধু তাই নয়, সেই রং বাঙ্গলার সীমানা অতিক্রম করে', উত্তরে হিমালয়ের উপরে ছাপিয়ে উঠেছে, ও দক্ষিণে বঙ্গোপসাগরের ভিতর চারিয়ে গেছে ।

সবুজ, বাঙ্গলার শুধু দেশঘোড়া রং নয়,—বারোমেসে রং । আমাদের দেশে প্রকৃতি বহুরূপী নয়, এবং ঋতুর সঙ্গে সঙ্গে বেশ পরিবর্তন করে না । বসন্তে বিয়ের কনের মত ফুলের জহরতে আপাদমস্তক সালঙ্কারা হয়ে দেখা দেয় না ; বর্ষার জলে শুচিন্মাতা হয়ে শরতের পূজার তসর ধারণ করে আসে না, শীতে বিধবার মত শাদা সাদীও পরে না । মাধব হতে মধু

পর্যাস্ত ঐ সবুজের টানা সুর চলে ; ঋতুর প্রভাবে সে সুরের যে রূপান্তর হয়, সে শুধু কড়ি কোমলে । আমাদের দেশে অবশ্য বর্ণের বৈচিত্র্যের অভাব নেই । আকাশে ও জলে, ফুলে ও ফলে, আমরা বর্ণগ্রামের সকল সুরেরই খেলা দেখতে পাই । কিন্তু মেঘের রং ও ফুলের রং ক্ষণস্থায়ী ; প্রকৃতির ও-সকল রাগরঙ্গ তার বিভাব ও অনুভাব মাত্র । তার স্থায়ী ভাবের, তার মূল রসের পরিচয় শুধু সবুজে । পাঁচরঙা ব্যভিচারী-ভাবসকলের সার্থকতা হচ্ছে বঙ্গদেশের এই অখণ্ড-হরিৎ স্থায়ী-ভাবটিকে ফুটিয়ে তোলা ।

এরূপ হবার অবশ্য একটা অর্থ আছে । বর্ণমাত্রের ব্যঞ্জন বর্ণ,—অর্থাৎ বর্ণের উদ্দেশ্য শুধু বাহ্য-বস্তুকে লক্ষণায়িত করা নয়, কিন্তু সেই স্রোযোগে নিজেকেও ব্যক্ত করা । যা স্বপ্রকাশ নয়, তা অপর কিছুই প্রকাশ করতে পারে না । তাই রং রূপও বটে, রূপকও বটে । যতক্ষণ আমাদের বিভিন্ন বর্ণের বিশেষ ব্যক্তিত্বের জ্ঞান না জন্মায়, ততক্ষণ আমাদের প্রকৃতির বর্ণপরিচয় হয় না, এবং আমরা তার বক্তব্য কথা বুঝতে পারিনে । বাঙ্গলার সবুজ পত্রে যে সুসমাচার লেখা আছে, তা পড়বার জন্য প্রত্নতাত্ত্বিক হবার আবশ্যক নেই—কারণ সে লেখার ভাষা বাঙ্গলার প্রাকৃত । তবে আমরা সকলে যে তার অর্থ বুঝতে পারিনে, তার কারণ হচ্ছে যিনি গুপ্ত জিনিস আবিষ্কার করতে ব্যস্ত, ব্যক্ত জিনিস তাঁর চোখে পড়ে না ।

ঘাঁর ইন্দ্রধনুর সঙ্গে চাক্ষুষ পরিচয় আছে আর তার জন্ম-কথা জানা আছে, তিনিই জানেন যে, সূর্য্যকিরণ নানা বর্ণের একটি সমষ্টি মাত্র, এবং শুধু সিধে পথেই সে শাদা ভাবে চলতে পারে । কিন্তু তার সরল গতিতে বাধা পড়লেই, সে সমষ্টি ব্যস্ত

হয়ে পড়ে, বক্র হয়ে বিচিত্র ভঙ্গী ধারণ করে, এবং তার বর্ণ-সকল পাঁচ বর্ণে বিভক্ত হয়ে যায়। সবুজ হচ্ছে এই বর্ণমালার মধ্যমণি। এবং নিজগুণেই সে বর্ণরাজ্যের কেন্দ্রস্থল অধিকার করে' থাকে। বেগুনী কিশলয়ের রং,—জীবনের পূর্বরাগের রং। লাল রক্তের রং,—জীবনের পূর্ণরাগের রং। নীল আকাশের রং,—অনন্তের রং। পীত শুকপত্রের রং,—মৃত্যুর রং। কিন্তু সবুজ হচ্ছে নবীন পত্রের রং,—রসের ও প্রাণের যুগপৎ লক্ষণ ও ব্যক্তি। তার দক্ষিণে নীল আর বামে পীত, তার পূর্ব সীমায় বেগুনী আর পশ্চিম সীমায় লাল। অস্ত ও অনন্তের মধ্যে, পূর্ব ও পশ্চিমের মধ্যে, স্মৃতি ও আশার মধ্যে মধ্যস্থতা করাই হচ্ছে সবুজের, অর্থাৎ সরস প্রাণের স্বধর্ম।

যে বর্ণ বাঙ্গলার ওষধিতে ও বনস্পতিতে নিত্য বিকশিত হয়ে উঠছে, নিশ্চয় সেই একই বর্ণ আমাদের হৃদয় মনকেও রঞ্জিয়ে রেখেছে। আমাদের বাহিরের প্রকৃতির যে রং, আমাদের অন্তরের পুরুষেরও সেই রং। এ কথা যদি সত্য হয় তাহলে, সজীবতা ও সরসতাই হচ্ছে বাঙ্গালীর মনের নৈসর্গিক ধর্ম। প্রমাণ স্বরূপে দেখানো যেতে পারে যে, আমাদের দেবতা হয় শ্যাম নয় শ্যামা। আমাদের হৃদয়মন্দিরে রজত-গিরিসন্নিভ কিশা জবাকুসুমসঙ্কাশ দেবতার স্থান নেই; আমরা শৈবও নই, সৌরও নই।

আমরা হয় বৈষ্ণব, নয় শাক্ত। এ উভয়ের মধ্যে বাঁশি ও অসির যা প্রভেদ, সেই পার্থক্য বিद्यমান,—তবুও বর্ণসামান্যতার গুণে শ্যাম ও শ্যামা আমাদের মনের ঘরে নির্বিবাদে পাশা-পাশি অবস্থিতি করে। তবে বঙ্গ-সরস্বতীর দুর্বাদলশ্যামরূপ আমাদের চোখে যে পড়ে না, তার জগৎদোষী আমরা নই, দোষী

আমাদের শিক্ষা। একালের বাণীর মন্দির হচ্ছে বিদ্যালয়। সেখানে আমাদের গুরুরা এবং গুরুজনেরা যে জড় ও কঠিন শ্বেতাদ্রী ও শ্বেতবসনা পাষণ্মূর্ত্তির প্রতিষ্ঠা করেছেন, আমাদের মন তার কায়িক এবং বাচিক সেবায়, দিন দিন নীরস ও নিজ্জীব হয়ে পড়ছে। আমরা যে নিজের আত্মার সাক্ষাৎকার লাভ করিনে, তার কারণ আমাদের নিজের সঙ্গে আমাদের কেউ পরিচয় করিয়ে দেয় না। আমাদের সমাজ ও শিক্ষা দুই আমাদের ব্যক্তিত্বের বিরোধী। সমাজ শুধু একজনকে আর-পাঁচজনের মত হতে বলে, ভুলেও কখনও আর-পাঁচজনকে একজনের মত হতে বলে না। সমাজের ধর্ম্য হচ্ছে প্রত্যেকের স্বধর্ম্য নষ্ট করা। সমাজের যা মন্ত্র, তারি সাধন-পদ্ধতির নাম শিক্ষা। তাই শিক্ষার বিধি হচ্ছে “অপরের মত হও”, আর তার নিষেধ হচ্ছে “নিজের মত হয়ো না”। এই শিক্ষার কৃপায় আমাদের মনে এই অদ্ভুত সংস্কার বদ্ধমূল হয়ে গেছে যে, আমাদের স্বধর্ম্য এতই ভয়াবহ যে তার চাইতে পরধর্ম্যে নিধনও শ্রেয়। সুতরাং কাজে ও কথায়, লেখায় ও পড়ায়, আমরা আমাদের মনের সরস সতেজ ভাবটি নষ্ট করতে সদাই উৎসুক। এর কারণও স্পষ্ট,—সবুজ রং, ভালমন্দ দুই অর্থেই কাঁচা। তাই আমাদের কস্ম্যযোগীরা আর জ্ঞানযোগীরা,—অর্থাৎ শাস্ত্রীর দল,—আমাদের মনটিকে রাতারাতি পাকা করে’ তুলতে চান। তাঁদের বিশ্বাস যে, কোনরূপ কস্ম্য কিন্মা জ্ঞানের চাপে আমাদের হৃদয়ের রসটুকু নিংড়ে ফেলতে পারলেই—আমাদের মনের রং পেকে উঠবে। তাঁদের রাগ এই যে, সবুজ বর্ণমালার অন্তস্থ বর্ণ নয়, এবং ও রং কিছুরই অন্তে আসে না,—জীবনেরও নয়, বেদেরও নয়, কস্মেরও নয়, জ্ঞানেরও নয়। এঁদের চোখে সবুজ-

মনের প্রধান দোষ যে, সে মন পূর্বমীমাংসার অধিকার ছাড়িয়ে এসেছে, এবং উত্তর মীমাংসার দেশে গিয়ে পৌঁছয় নি। এঁরা ভুলে যান যে, জোর করে পাকাতে গিয়ে আমরা শুধু হরিৎকে পীতের ঘরে টেনে আনি,—প্রাণকে মৃত্যুর দ্বারস্থ করি। অপর দিকে এদেশের ভক্তিবোগীরা,—অর্থাৎ কবির দল,—কাঁচাকে কচি করতে চান। এঁরা চান যে আমরা শুধু গদগদ ভাবে আধ-আধ কথা কই। এঁদের রাগ সবুজের সজীবতার উপর। এঁদের ইচ্ছা সবুজের তেজটুকু বহিষ্কৃত করে' দিয়ে, ছাঁকা রসটুকু রাখেন। এঁরা ভুলে যান যে, পাতা কখনও আর কিশলয়ে ফিরে যেতে পারে না। প্রাণ পশ্চাৎপদ হতে জানে না,—তার ধর্ম্য হচ্ছে এগোনো, তার লক্ষ্য হচ্ছে হয় অমৃতত্ব নয় মৃত্যু। যে মন একবার কর্মের তেজ ও জ্ঞানের ব্যোমের পরিচয় লাভ করেছে, সে এ উভয়কে অন্তরঙ্গ করবেই,—কেবলমাত্র ভক্তির শান্তিজলে সে তার সমস্ত হৃদয় পূর্ণ করে' রাখতে পারে না। আসল কথা হচ্ছে, তারিখ এগিয়ে কিন্না পিছিয়ে দিয়ে যৌবনকে ফাঁকি দেওয়া যায় না। এ উভয়ের সমবেত চেষ্টার ফল দাঁড়িয়েছে এই যে, বাঙ্গালীর মন এখন অর্ধেক অকাল-পক্ক, এবং অর্ধেক অযথা-কচি। আমাদের আশা আছে যে, সবুজ ক্রমে পেকে লাল হয়ে উঠবে। কিন্তু আমাদের অন্তরের আজকের সবুজরস কালকের লালরক্তে তবেই পরিণত হবে, যদি আমরা স্বধর্মের পরিচয় পাই, এবং প্রাণপণে তার চর্চা করি। আমরা তাই দেশী কি বিলাতী পাথরেগড়া সরস্বতীর মূর্তির পরিবর্তে, বাঙ্গলার কাব্যমন্দিরে দেশের মাটির ঘটস্থাপনা করে', তার মধ্যে সবুজ পত্রের প্রতিষ্ঠা করতে চাই। কিন্তু এ মন্দিরের কোনও গর্ভ-মন্দির থাকবে

না, কারণ সবুজের পূর্ণ অভিব্যক্তির জন্য আলো চাই, আর বাতাস চাই। অন্ধকারে সবুজ ভয়ে নীল হয়ে যায়। বন্ধ ঘরে সবুজ ছুঃখে পাণ্ডু হয়ে যায়। আমাদের নব-মন্দিরের চারিদিকের অব্যবহিত দ্বার দিয়ে প্রাণবায়ুর সঙ্গে সঙ্গে বিশ্বের যত আলো অবাধে প্রবেশ করতে পারবে। শুধু তাই নয়, এ মন্দিরে সকল বর্ণের প্রবেশের সমান অধিকার থাকবে। উষার গোলাপী, আকাশের নীল, সন্ধ্যার লাল, মেঘের নীল-লোহিত, বিরোধালঙ্কারস্বরূপে সবুজ পত্রের গাত্রে সংলগ্ন হয়ে তার মরকতদ্যুতি কখনও উজ্জ্বল, কখনও কোমল করে' তুলবে। সে মন্দিরে স্থান হবে না কেবল শুষ্ক পত্রের।

বৈশাখ, ১৩২১ ।

বীরবলের চিঠি

মহারাজা শ্রীযুক্ত জগদিন্দ্রনাথ রায়,

“মানসী” সম্পাদক মহাশয় করকমলেষু—

“মানসী” যে সম্পাদক-সঙ্ঘের হাত থেকে উদ্ধার লাভ করে’ অতঃপর রাজ-আশ্রয় গ্রহণ করেছে, এতে আমি খুসি ; কেননা, এ দেশে পুরাকালে কি হ’ত তা পুরাতত্ত্ববিদেরা বলতে পারেন, কিন্তু একালে যে সব জিনিষই পঞ্চায়তের হাতে পঞ্চহ লাভ করে, সে বিষয়ে আর কোনও সন্দেহ নেই।

আমার খুসি হবার একটি বিশেষ কারণ এই যে—আমার জন্ম “মানসী” যা করেছেন, অথ কোনও পত্রিকা তা করেন নি। অপরে আমার লেখা ছাপান, “মানসী” আমার ছবিও ছাপিয়েছেন। লেখা নিজে লিখতে হয়, ছবি অন্তে তুলে নেয়। প্রথমটির জন্ম নিজের পরিশ্রম চাই, ছবি সম্বন্ধে কষ্ট অপরের,—যিনি আঁকেন ও যিনি দেখেন।

এই আপনি “মানসী”র সম্পাদকীয় ভার নেওয়াতে আমি ষোল-আনা খুসি হতুম, যদি আপনি ছাপাবার জন্ম আমার কাছে লেখা না চেয়ে আলেখ্য চাইতেন। এর কারণ পূর্বেরই উল্লেখ করেছি। রাজাজ্ঞা সর্বথা শিরোধার্য হ’লেও, সর্বদা পালন করা সম্ভব নয়। রাজার আদেশে মুখ বন্ধ করা সহজ, খোলা কঠিন।—পৃথিবীতে সাহিত্য কেন, সকল ক্ষেত্রেই নিষেধ মাণ্ড

করা বিধি অনুসরণ করার চাইতে অনেক সহজসাধ্য। “এর ওর হাতে জল থেয়ে না”,—এই নিষেধ প্রতিপালন ক’রেই ব্রাহ্মণজাতি আজও টিঁকে আছেন,—বেদ-অধ্যয়নের বিধি পালন করতে বাধ্য হলে কবে মারা যেতেন।

সে যাই হোক, একথা সত্য যে, আমার মত লেখকের সাহায্যে সাহিত্যজগতের কোন কাজ কিম্বা কাগজ সম্পাদন করা যায় না, কেননা আমি সরস্বতীর মন্দিরের পূজারি নই,—স্নেচ্ছা-সেবক। স্নেচ্ছা-সেবার যতই কেন গুণ থাকুক না, তার মহাদোষ এই যে, সে সেবার উপর বারো মাস নির্ভর করা চলে না। আর মাসিক পত্রিকা নামে মাসিক হলেও, আসলে বারোমাসে। তা ছাড়া পত্রের প্রত্যাশায় কেউ শিমুলগাছের কাছে ঘেঁসে না, এবং আমি যে সাহিত্য-উদ্ভানের একটি শাল্মলী-তরু, তার প্রমাণ আমার গল্পপড়েই পাওয়া যায়। লোকে বলে আমার লেখার গায়ে কাঁটা, আর মাথায় মধুহীন গন্ধহীন ফুল।

আর একটি কথা। সম্প্রতি কোনও বিশেষ কারণে প্রতি-দিন আমার কাছে শ্রীপঞ্চমী হয়ে উঠেছে; মনে হয় কলম না ছোঁয়াটাই সরস্বতীপূজার প্রকৃষ্ট উপায়। এর কারণ নিম্নে বিশদভাবে ব্যাখ্যা করছি।

আপনি জানেন যে, লেখকমাত্রেরই একটি বিশেষ ধরণ আছে, সেই নিজস্ব ধরণে রচনা করাই তার পক্ষে স্বাভাবিক এবং কর্তব্য। পরের চঙের নকল করে শুধু সঙ। যা লিখতে আমি আনন্দ লাভ করিনে, তা পড়তে যে পাঠকে আনন্দ লাভ করবেন,—যে লেখায় আমার শিক্ষা নেই, সে লেখায় যে পাঠকের শিক্ষা হবে, এত বড় মিথ্যা কথাতে আমি বিশ্বাস করি নে। আমার দেহ মনের ভঙ্গীটি

আমার চিরসঙ্গী—সেটিকে ত্যাগ করা অসম্ভব বল্লেও অত্যাশ্চর্য্য হবে না । সমালোচকদের তাড়নায় লেখার ভঙ্গীটি ছাড়ার চাইতে লেখা ছাড়া ঢের সহজ,—অথচ সমালোচকদের মনোরঞ্জন করতে হলে, হয়ত আমার লেখার ঢঙ বদলাতে হবে ।

আমার কলমের মুখে অক্ষরগুলো সহজেই একটু বাঁকা হ'য়ে বেরোয় । আমি সেগুলি সিধে করতে চেষ্টা না করে, যদিকে তাদের সহজ গতি, সেই দিকেই ঝোঁক দিই । কিন্তু এর দরুণ আমার লেখা যে এত বন্ধিম হয়ে উঠেছে যে, তা ফারসি বলে কারও ভ্রম হতে পারে,—এ সন্দেহ আমার মনে কখনও উদয় হয় নি । অথচ আমার বাঙ্গলা যে কারও কারও কাছে ফার্সি কিন্ধা আরবি হয়ে উঠেছে, তার প্রমাণ “মানসী”তেই পাওয়া যায় । আমি “নোবেল প্রাইজ” নিয়ে যে একটু রসিকতা করবার প্রয়াস পেয়েছিলুম, “মানসীর” সমালোচক তা তত্ত্বকথা হিসাবে অগ্রাহ্য করেছেন । যদি কেউ রসিকতাকে রসিকতা বলে না বোঝেন, তাহলে আমি নিরুপায় ; কারণ তর্ক করে তা বুঝান যায় না । যে কথা একবার জমিয়ে বলা গেছে, তার আর ফেনিয়ে ব্যাখ্যা করা চলে না ।

এ অবস্থায় যদি ভগবানের কাছে প্রার্থনা করি যে, আমার কপালে অরসিকে রস-নিবেদন “মা লিখ, মা লিখ, মা লিখ,” তা হলে সমালোচকেরাও আমাকে বলবেন, “মা লিখ, মা লিখ, মা লিখ ।” এঁদের উপদেশ অনুসারে রসিকতা করার অভ্যাসটা ত্যাগ কর্ত্তে রাজি আছি, যদি কেউ আমাকে এ ভরসা দিতে পারেন যে, সত্য কথা বল্লে এঁরা তা রসিকতা মনে করবেন না । সে ভরসা কি আপনি দিতে পারেন ?

লোকে বলে সাহিত্যের উদ্দেশ্য, হয় লোকের মনোরঞ্জন করা, নয় শিক্ষা দেওয়া। আমার বিশ্বাস সাহিত্যের উদ্দেশ্য দুই নয়,—এক। এক্ষেত্রে উপায়ে ও উদ্দেশ্যে কোনও প্রভেদ নেই। এই শিক্ষার কথাটাই ধরা যাক। সাহিত্যের শিক্ষা ও স্কুলের শিক্ষা এক নয়। সাহিত্যে লেখক ও পাঠকের সম্বন্ধ গুরুশিষ্যের সম্বন্ধ নয়,—বয়স্কের সম্বন্ধ। সুতরাং সাহিত্যে নিরানন্দ শিক্ষার স্থান নেই। অপর দিকে, যে কথার ভিতর সত্য নেই, তা ছেলের মন ভোলাতে পারে, কিন্তু মানুষের মনোরঞ্জন করতে পারে না।

রহস্য ক’রে যাদের মনোরঞ্জন করতে পারলুম না, স্পষ্ট কথা বলে’ যে তাঁদের মনোরঞ্জন করতে পারব,—এ হচ্ছে আশা ছেড়ে আশা রাখা। আর, কথায় যদি মানুষের মনই না পাওয়া যায়, তা হলে সে কথা বলা বিড়ম্বনা মাত্র। ভয় ত ঐ খানেই।

সত্য কথা সুস্থ মনের পক্ষে আহাৰ,—রুচিকরও বটে, পুষ্তিকরও বটে; কিন্তু রুগ্ন মনের পক্ষে তা ঔষধ। তা’তে উপকার যা’ তা’ পরে হবে, পেটে গেলে,—তাও আবার যদি লাগে;—কিন্তু গলাধঃকরণ করবার সময় তা কটুকষায়। বাঙ্গলার মনোরাজ্যেও ম্যালেরিয়া যে মোটেই নেই, এরূপ আমার ধারণা নয়। সুতরাং সাদা ভাবে সিধে কথা বলতে আমি ভয় পাই।

রসিকতা ছাড়লে আমাকে “চিন্তাশীল” লেখক হতে হ’বে—অর্থাৎ অতি গম্ভীরভাবে অতি সাধুভাষায় বারবার হয়কে নয় এবং নয়কে হয় বলতে হবে। কারণ, যা প্রত্যক্ষ তাকেই যদি সত্য বলি,—তাহলে আর গবেষণার কি পরিচয় দিলুম? কিন্তু

আমার পক্ষে ওরূপ করা সহজ নয় । ভগবান, আমার বিশ্বাস, মানুষকে চোখ দিয়েছেন চেয়ে দেখবার জন্য,—তাতে ঠুলি পরবার জন্য নয় । সে ঠুলির নাম দর্শন দিলেও তা অগ্রাহ্য । শুন্তে পাই, চোখে ঠুলি না দিলে গুরুতে ঘানি ঘোরায় না । এ কথা যদি সত্য হয়, তাহলে যাঁরা সংসারের ঘানি ঘোরাবার জন্য ব্যস্ত, লেখকেরা তাঁদের জন্য সাহিত্যের ঠুলি প্রস্তুত করতে পারেন—কিন্তু আমি তা পারব না । কেননা, আমি ও ঘানিতে নিজেকেও যুতে দিতে চাই নে,—অপর কাউকেও নয় । আমি চাই অপরের চোখের সে ঠুলি খুলে দিতে ; শুধু শিং বাঁকানোর ভয়ে নিরস্ত হই । ফলে দাঁড়াল এই যে, রসিকতা করা নিরাপদ নয়, আর সত্য কথা বলাতে বিপদ আছে ।

ছুটি একটি উদাহরণ দিলেই বুঝতে পারবেন যে, আমি ঠিক কথা বলছি । বাঙ্গালী যুবকের পক্ষে সমুদ্রযাত্রার পথে প্রতি-বন্ধক যে ধর্ম নয় কিন্তু অর্থ, এ প্রত্যক্ষ সত্য ; কারণ তাঁদের কাছে ধর্মের তত্ত্ব গুহায় নিহিত, এবং অর্ণবযানেরা যে পথে যাতায়াত করে—স এত পন্থা । অথচ এই কথা বলতে গেলে, সমগ্র ব্রাহ্মণ-মহাসভা এসে আমার স্কন্ধে ভর করবেন ।

স্নেহলতা যে-চিতায় নিজের দেহ ভস্মসাৎ করেছেন, সে চিতার আগুনের আঁচ যে সমগ্র সমাজের গায়ে অল্লবিস্তর লেগেছে, সে বিষয়ে আর সন্দেহ নেই । কারণ কুমারীদাহ ব্যাপারটি এ দেশে নতুন, ও উপলক্ষ্যে এখনও আমরা ঢাকঢোল বাজাতে শিখি নি । কিন্তু তাই বলে' যাঁদের দেখা যাচ্ছে অত্যন্ত গাত্রজ্বালা হয়েছে, তাঁরাও যে সেই চিতাভস্ম গায়ে মেখে 'বিবাগী হয়ে' যাবেন, এরূপ বিশ্বাস আমার নয় । যে আগুন আজ সমাজের মনে জ্বলে উঠেছে, সে হচ্ছে খড়ের আগুন, দপ্

করে জ্বলে উঠে, আবার অমনি নিভে যাবে। আজ ঝাঁকের মাথায় মনে মনে যিনি যতই কঠিন পণ করুন না কেন, তার একটিও টিক্বে না,—থাক্বে শুধু বরপণ। যতদিন সমাজ বাল্য-বিবাহকে বৈধ এবং অসবর্ণ-বিবাহকে নিষিদ্ধ বলে মেনে নেবেন, ততদিন মানুষকে বাধ্য হয়ে বরপণ দিতেও হবে এবং নিতেও হবে। বিবাহাদি সম্বন্ধে অত সঙ্কীর্ণ জাতিধর্ম রাখতে হলে ব্যক্তিগত অর্থ থাকা চাই। এ সত্য অঙ্ক কসে প্রমাণ করা যায়। মূল কথা এই যে, সনাতন প্রথা বর্তমানে সংসার-যাত্রার পক্ষে অচল। এবং অচলের চলন করতে গিয়েই আমাদের দুর্গতি। কিন্তু এই কথা বললে সমাজ হয়ত আমার জগ্ন তুযানলের ব্যবস্থা করবেন।

মোদ্দা কথা এই যে, বাজে কথা শুনলে লোকে মুখ অন্ধকার করে; এবং কাজের কথা শুনলে চোখ লাল করে। এ অবস্থায় “বোবার শত্রু নেই” এই শাস্ত্রবচন অনুসারে চুপ করে থাকাই শ্রেয়ঃ। সম্ভবতঃ ভারতবর্ষে পুরাকালের অবস্থা এই একই রকমেরই ছিল, এবং সেই জগ্নই সেকালে জ্ঞানীরা মুনি হতেন।

বৈশাখ, ১৩২১।

“যৌবনে দাও রাজটীকা” ।

গত মাসের সবুজ পাত্রে শ্রীযুক্ত সত্যেন্দ্রনাথ দত্ত যৌবনকে রাজটীকা দেবার প্রস্তাব করেছেন । আমার কোনও টীকার বন্ধু এই প্রস্তাবের বক্ষ্যমাণরূপ ব্যাখ্যা করেছেন :—

“যৌবনকে টীকা দেওয়া অবশ্যকর্তব্য,—তাহাকে বসন্তের হস্ত হইতে রক্ষা করিবার জন্ম । এস্থলে রাজটীকা অর্থ—রাজা অর্থাৎ যৌবনের শাসনকর্ত্তাকর্ত্তক তাহার উপকারার্থে দত্ত যে টীকা—সেই টীকা । উল্লুপদ তৃতীয়াতৎপুরুষ সমাসে সিদ্ধ হইয়াছে ।”

উল্লিখিত ভাষ্য আমি রহস্য বলে মনে করতুম, যদি না আমার জানা থাকত যে, এদেশে জ্ঞানীবান্দিদিগের মতে মনের বসন্ত-ঋতু ও প্রকৃতির যৌবনকাল—দুই অসাম্যেস্তা, অতএব শাসনযোগ্য । এ উভয়কে জুড়ীতে যুতলে আর বাগ মানান যায় না ;—অতএব এদের প্রথমে পৃথক করে, পরে পরাজিত করতে হয় ।

বসন্তের স্পর্শে ধরণীর সর্বদ্রাব্য শিউরে ওঠে ;—অবশ্য তাই বলে পৃথিবী তার আলিঙ্গন হতে মুক্তিলাভ করবার চেষ্টা করে না, এবং পোষ্যমাসকেও বারোমাস পুষে রাখে না ! শীতকে অতিক্রম করে বসন্তের কাছে আত্মসমর্পণ করায় প্রকৃতি যে অর্নবাচীনতার পরিচয় দেয় না, তার পরিচয় ফলে ।

প্রকৃতির যৌবন শাসনযোগ্য হলেও, তাকে শাসন করবার ক্ষমতা মানুষের হাতে নেই ; কেননা প্রকৃতির ধর্ম্য মানবধর্ম্য-শাস্ত্রবহির্ভূত । সেই কারণে জ্ঞানীব্যক্তির আামাদের প্রকৃতির দৃষ্টান্ত অনুসরণ করতে বারণ করেন, এবং নিত্যই আামাদের প্রকৃতির উন্টো টান টানতে পরামর্শ দেন ; এই কারণেই মানুষের যৌবনকে বসন্তের প্রভাব হতে দূরে রাখা আবশ্যিক । অত্থা, যৌবন ও বসন্ত এ দুয়ের আবির্ভাব যে একই দৈবী-শক্তির লীলা—এইরূপ একটি বিশ্বাস আামাদের মনে স্থানলাভ করতে পারে ।

এদেশে লোকে যে, যৌবনের কপালে রাজটীকার পরিবর্তে তার পৃষ্ঠে রাজদণ্ড প্রয়োগ করতে সদাই প্রস্তুত, সে বিষয়ে আর কোন সন্দেহ নেই । এর কারণ হচ্ছে যে, আামাদের বিশ্বাস মানবজীবনে যৌবন একটা মস্ত ফাঁড়া—কোনরকমে সেটি কাটিয়ে উঠতে পারলেই বাঁচা যায় । এ অবস্থায় কি জ্ঞানী, কি অজ্ঞানী সকলেই চান যে, একলক্ষ্যে বাল্য হতে বাদ্ধক্যে উত্তীর্ণ হন । যৌবনের নামে আামরা ভয় পাই, কেননা তার অন্তরে শক্তি আছে । অপরপক্ষে বালকের মনে শক্তি নেই ; বালকের জ্ঞান নেই, বুদ্ধের প্রাণ নেই । তাই আামাদের নিয়ত চেষ্টা হচ্ছে, দেহের জড়তার সঙ্গে মনের জড়তার মিলন করা, অজ্ঞতার সঙ্গে বিজ্ঞতার সন্ধিস্থাপন করা । তাই আামাদের শিক্ষানীতির উদ্দেশ্য হচ্ছে ইঁচড়ে পাকানো, আর আামাদের সমাজনীতির উদ্দেশ্য হচ্ছে জাগ দিয়ে পাকানো ।

আামাদের উপরোক্ত চেষ্টা যে ব্যর্থ হয় নি, তার প্রমাণ আামাদের সামাজিক জীবন । আজকের দিনে এদেশে রাজনীতির ক্ষেত্রে এক দিকে বালক-অপর দিকে বৃদ্ধ ; সাহিত্য-

ক্ষেত্রে একদিকে স্কুলবয়, অপর দিকে স্কুলমাস্টার ; সমাজে এক দিকে বাল্যবিবাহ, অপর দিকে অকালমৃত্যু ; ধর্মক্ষেত্রে এক দিকে শুধু “ইতি” “ইতি”, অপর দিকে শুধু “নেতি” “নেতি” ;—অর্থাৎ একদিকে লৌপ্তকাষ্ঠও দেবতা, অপর দিকে ঈশ্বরও ব্রহ্ম নন । অর্থাৎ আমাদের জীবন গ্রন্থে প্রথমে ভূমিকা আছে, শেষে উপসংহার আছে ;—ভিতরে কিছু নেই । এ বিশ্বের জীবনের আদি নেই, অন্ত নেই, শুধু মধ্য আছে ; কিন্তু তারি অংশীভূত আমাদের জীবনের আদি আছে, অন্ত আছে ;—শুধু মধ্য নেই ।

বার্দ্ধক্যকে বাল্যের পাশে এনে ফেললেও, আমরা তার মিলন সাধন করতে পারি নি ; কারণ ক্রিয়া বাদ দিয়ে দুটি পদকে জুড়ে এক করা যায় না । তা ছাড়া যা আছে,—তা নেই বললেও, তার অস্তিত্ব লোপ হয়ে যায় না । এ বিশ্বকে মায়া বললেও তা অস্পৃশ্য হয়ে যায় না, এবং আত্মাকে ছায়া বললেও তা অদৃশ্য হয়ে যায় না । বরং কোনও কোনও সত্যের দিকে পিঠ ফেরালে, তা অনেক সময়ে আমাদের ঘাড়ে চড়ে বসে । যে যৌবনকে আমরা সমাজে স্থান দিই নি, তা এখন নানা বিকৃতরূপে নানা ব্যক্তির দেহ অবলম্বন করে রয়েছে । যাঁরা সমাজের স্রুক্ষে জীবনের শুধু নান্দী ও ভরতবচন পাঠ করেন, তাঁদের জীবনের অভিনয়টা যবনিকার অন্তরালেই হয়ে থাকে । রুদ্ধ ও বদ্ধ করে রাখলে পদার্থমাত্রই আলোর ও বায়ুর সম্পর্ক হারায়, এবং সেই জন্য তার গায়ে কলঙ্ক ধরাও অনিবার্য । গুপ্ত জিনিসের পক্ষে দুর্ঘট হওয়া স্বাভাবিক ।

আমরা যে, যৌবনকে গোপন করে রাখতে চাই,—তার জন্য আমাদের প্রাচীন সাহিত্য অনেক পরিমাণে দায়ী । কোনও

বিখ্যাত ইংরাজ লেখক বলেন যে, literature হচ্ছে criticism of life ;—ইংরাজি সাহিত্য জীবনের সমালোচনা হতে পারে, কিন্তু সংস্কৃত সাহিত্য হচ্ছে যৌবনের আলোচনা ।

সংস্কৃত সাহিত্যে যুবকযুবতী ব্যতীত আর কারও স্থান নেই । আমাদের কাব্যরাজ্য হচ্ছে সূর্য্যবংশের শেষ নৃপতি অগ্নিবর্ণের রাজ্য, এবং সে দেশ হচ্ছে অষ্টাদশবর্ষদেশীয়াদের স্বদেশ । যৌবনের যে ছবি সংস্কৃত দৃষ্টকাব্যে ফুটে উঠেছে, সে হচ্ছে ভোগবিলাসের চিত্র । সংস্কৃত কাব্যজগৎ, মাল্যচন্দনবনিতা দিয়ে গঠিত—এবং সে জগতের বনিতাই হচ্ছে স্বর্গ, ও মাল্য-চন্দন তার উপসর্গ । এ কাব্যজগতের স্রষ্টা কিম্বা দ্রষ্টা কবিদের মতে, প্রকৃতির কাজ হচ্ছে শুধু রমণীদেহের উপমা যোগানো, এবং পুরুষের কাজ শুধু রমণীর মন যোগানো । হিন্দু-যুগের শেষ কবি জয়দেব নিজের কাব্যসম্বন্ধে স্পষ্টাক্ষরে যে কথা বলেছেন, তাঁর পূর্ববর্তী কবিরাও ইঙ্গিতে সেই একই কথা বলেছেন । সে কথা এই যে—“যদি বিলাস-কলায় কুতূহলী হও ত আমার কোমলকান্ত পদাবলী শ্রবণ করো ।” এক কথায়, যে-যৌবন যযাতি নিজের পুত্রদের কাছে শিক্ষা করে-ছিলেন, সংস্কৃত কবিরা সেই যৌবনেরই রূপগুণ বর্ণনা করেছেন ।

এ কথা যে কত সত্য, তা একটি উদাহরণের সাহায্যে প্রমাণ করা যেতে পারে । কৌশাম্বির যুবরাজ উদয়ন এবং কপিলবাস্তুর যুবরাজ সিদ্ধার্থ উভয়ে সমসাময়িক ছিলেন । উভয়েই পরম রূপবান্ এবং দিব্য শক্তিশালী যুবাপুরুষ ; কিন্তু উভয়ের মধ্যে প্রভেদ এইটুকু যে, একজন হচ্ছেন ভোগের, আর একজন হচ্ছেন ত্যাগের পূর্ণ অবতার । ভগবান গৌতম-বুদ্ধের জীবনের ব্রত ছিল মানবের মোহনাশ করে তাকে সংসারের

সকল শৃঙ্খল হতে মুক্ত করা ; আর বৎসরাজ উদয়নের জীবনের ব্রত ছিল যৌবনবতী বীণার সাহায্যে অরণ্যের গজকামিনী এবং অন্তঃপুরের গজগামিনীদের প্রথমে মুগ্ধ করে, পরে নিজের ভোগের জ্ঞাতাদের অবরুদ্ধ করা । অথচ সংস্কৃত কাব্যে বুদ্ধচরিতের স্থান নেই, কিন্তু উদয়ন-কথায় তা পরিপূর্ণ ।

সংস্কৃত ভাষায় যে বুদ্ধের জীবনচরিত লেখা হয়নি, তা নয় ;—তবে ললিতবিস্তরকে আর কেউ কাব্য বলে স্বীকার করবেন না ; এবং অশ্বঘোষের নাম পর্য্যন্তও লুপ্ত হয়ে গেছে । অপর দিকে উদয়ন বাসবদত্তার কথা অবলম্বন করে যাঁরা কাব্য রচনা করেছেন,—যথা, ভাস. গুণাঢ্য, স্তবক্ষু ও শ্রীহর্ষ ইত্যাদি,— তাঁদের বাদ দিলে সংস্কৃত সাহিত্যের অর্দ্ধেক বাদ পড়ে যায় । কালিদাস বলেছেন যে, কৌশাম্বির গ্রামবৃদ্ধেরা উদয়ন-কথা শুনতে ও বলতে ভালবাসতেন ; কিন্তু আমরা দেখতে পাচ্ছি যে, কেবল কৌশাম্বির গ্রামবৃদ্ধ কেন, সমগ্র ভারতবর্ষের আবালবৃদ্ধ-বনিতা সকলেই ঐ কথা-রসের রসিক । সংস্কৃত সাহিত্য এ সত্যের পরিচয় দেয় না যে, বুদ্ধের উপদেশের বলে জাতীয় জীবনে যৌবন এনে দিয়েছিল, এবং উদয়নের দৃষ্টান্তের ফলে অনেকের যৌবনে অকালবার্দ্ধক্য এনে দিয়েছিল । বৌদ্ধধর্মের অনুশীলনের ফলে—রাজা অশোক লাভ করেছিলেন সাম্রাজ্য ; আর উদয়ন-ধর্মের অনুশীলন করে রাজা অগ্নিবর্ণ লাভ করেছিলেন রাজযক্ষ্মা । সংস্কৃত কবিরা এ সত্যটি উপেক্ষা করেছিলেন যে, ভোগের ন্যায় ত্যাগও যৌবনেরি ধর্ম । বার্দ্ধক্য কিছু অর্জন করতে পারে না বলে, কিছু বর্জনও করতে পারে না । বার্দ্ধক্য কিছু কাড়তে পারে না বলে, কিছু ছাড়তেও পারে না ;—ছুটি কালো চোখের জ্ঞাতও নয়, বিশকোটি কালো লোকের জ্ঞাতও নয় ।

পাছে লোকে ভুল বোঝেন বলে, এখানে আমি একটি কথা বলে রাখতে চাই। কেউ মনে করবেন না যে, আমি কাউকে সংস্কৃত কাব্য ‘বয়কট’ করতে বলছি, কিম্বা নীতি এবং রুচির দোহাই দিয়ে সে কাব্যের সংশোধিত সংস্করণ প্রকাশ করবার পরামর্শ দিচ্ছি। আমার মতে, যা সত্য তা গোপন করা স্ত্রনীতি নয়, এবং তা প্রকাশ করাও দুর্নীতি নয়। সংস্কৃত কাব্যে যে-যৌবনধর্মের বর্ণনা আছে, তা যে সামান্য মানব-ধর্ম—এ হচ্ছে অতি স্পষ্ট সত্য; এবং মানবজীবনের উপর তার প্রভাব যে অতি প্রবল—তাও অস্বীকার করবার জো নেই।

তবে এই একদেশদর্শিতা ও অভ্যুক্তি—ভাষায় যাকে বলে এক-রোখামি ও বাড়াবাড়ি,—তাই হচ্ছে সংস্কৃত কাব্যের প্রধান দোষ। যৌবনের স্থূলশরীরকে অত আশ্রয়! দিলে তা উদ্ভ-রোদ্ভর স্থূল হতে স্থূলতর হয়ে ওঠে, এবং সেই সঙ্গে তার সূক্ষ্ম শরীরটি সূক্ষ্ম হতে এত সূক্ষ্মতম হয়ে উঠে যে, তা খুঁজে পাওয়াই ভার হয়। সংস্কৃত সাহিত্যের অবনতির সময়, কাব্যে রক্তমাংসের পরিমাণ এত বেড়ে গিয়েছিল যে, তার ভিতর আত্মার পরিচয় দিতে হলে, সেই রক্তমাংসের আধ্যাত্মিক ব্যাখ্যা করা ছাড়া আর আমাদের উপায় নেই। দেহকে অতটা প্রাধান্য দিলে, মন পদার্থটি বিগড়ে যায়; তার ফলে দেহ ও মন পৃথক হয়ে যায়, এবং উভয়ের মধ্যে আত্মীয়তার পরিবর্তে জ্ঞাতিশত্রুতা জন্মায়। সম্ভবতঃ বৌদ্ধ-ধর্মের নিরামিষের প্রতিবাদস্বরূপ হিন্দু কবিরা তাঁদের কাব্যে এতটা আমিষের আমদানী করেছিলেন। কিন্তু যে কারণেই হোক, প্রাচীন ভারতের চিন্তার রাজ্যে দেহমনের পরস্পরের যে বিচ্ছেদ ঘটেছিল, তার প্রমাণ—প্রাচীন সমাজের এক দিকে বিলাসী, অপর দিকে সন্ন্যাসী; এক দিকে

পদ্মন, অপর দিকে বন; এক দিকে রঞ্জালয়, অপর দিকে হিমালয়;—এক কথায় এক দিকে কামশাস্ত্র, অপর দিকে মোক্ষশাস্ত্র। মাঝামাঝি আর-কিছু, জীবনে থাকতে পারত, কিন্তু সাহিত্যে নেই। এবং এ দুই বিরুদ্ধ মনোভাবের পরস্পর মিলনের যে কোনও পন্থা ছিল না, সে কথা ভর্তৃহরি স্পষ্টাক্ষরে বলেছেন—

“একা ভার্যা সুন্দরী বা দরী বা !”

এই হচ্ছে প্রাচীনযুগের শেষ কথা। যাঁরা দরী-প্রাণ, তাঁদের পক্ষে যৌবনের নিন্দা করা যেমন স্বাভাবিক,—যাঁরা সুন্দরী-প্রাণ, তাঁদের পক্ষেও তেমনি স্বাভাবিক। যতির মুখের যৌবন-নিন্দা অপেক্ষা কবির মুখের যৌবন-নিন্দার, আমার বিশ্বাস, অধিক ঝাঁঝ আছে। তার কারণ, ত্যাগীর অপেক্ষা ভোগীর অভ্যাস-বশতঃ কথায় ও কাজে বেশী অসংযত।

যাঁরা স্ত্রীজাতিকে কেবলমাত্র ভোগের সামগ্রী মনে করেন, তাঁরাই যে স্ত্রী-নিন্দার ওস্তাদ—এর প্রমাণ জীবনে ও সাহিত্যে নিত্য পাওয়া যায়। স্ত্রী-নিन्दুকের রাজা হচ্ছেন, রাজকবি ভর্তৃহরি ও রাজকবি Solomon। চরম ভোগবিলাসে পরম চরিতার্থতা লাভ করতে না পেরে, এঁরা শেষবয়সে স্ত্রীজাতির উপর গায়ের ঝাল ঝেড়েছেন। যাঁরা বনিতাকে মাল্যচন্দন হিসাবে ব্যবহার করেন, তাঁরা, শুকিয়ে গেলে সেই বনিতাকে মাল্যচন্দনের মতই ভূতলে নিক্ষেপ করেন, এবং তাকে পদদলিত করতেও সঙ্কুচিত হন না। প্রথমবয়সে মধুর রস অতিমাত্রায় চর্চা করলে, শেষবয়সে জীবন তিতো হয়ে ওঠে। এ শ্রেণীর লোকের হাতে শৃঙ্গার-শতকের পরেই বৈরাগ্য-শতক রচিত হয়।

একই কারণে, যাঁরা যৌবনকে কেবলমাত্র ভোগের উপকরণ মনে করেন, তাঁদের মুখে যৌবন-নিন্দা লেগে থাকবারই কথা। যাঁরা যৌবন-জোয়ারে গা-ভাসিয়ে দেন, তাঁরা ভাঁটার সময় পাঁকে পড়ে’ গত-জোয়ারের প্রতি কটুকাটব্য প্রয়োগ করেন। যৌবনের উপর তাঁদের রাগ এই যে, তা পালিয়ে যায় এবং একবার চলে গেলে আর ফেরে না। যথাতি যদি পুরুষ কাছে ভিক্ষা করে যৌবন ফিরে না পেতেন, তাহলে তিনি যে কাব্য কিস্বা ধর্মশাস্ত্র রচনা করতেন, তাতে যে কি স্মৃতির যৌবন-নিন্দা থাকত—তা আমরা কল্পনাও করতে পারিনে। পুরুষে পিতৃভক্তির পরিচয় দিয়েছিলেন, তার ভিতর পিতার প্রতি কতটা ভক্তি ছিল এবং তাতে পিতারই যে উপকার করা হয়েছিল, তা বলতে পারিনে,—কিন্তু তাতে দেশের মহা অপকার হয়েছে ; কারণ নীতির একখানা বড় গ্রন্থ মারা গেছে।

যথাতি-কাঙ্ক্ষিত যৌবনের বিরুদ্ধে প্রধান অভিযোগ এই যে, তা অনিত্য। এ বিষয়ে ত্রাঙ্গণ ও শ্রমণ, নগ্নাঙ্গপণক ও নাগরিক, সকলেই এক-মত।

“যৌবন ক্ষণস্থায়ী”—এই আক্ষেপে এদেশের কাব্য ও সঙ্গীত পরিপূর্ণ।

“কাণ্ডন গয়ী হয়, বহরা ফিরি আয়ী হয়
গয়ে রে যৌবন. ফিরি আওত নাহি।”

এই গান আজও হিন্দুস্থানের পথে ঘাটে অতি করুণ সুরে গাওয়া হয়ে থাকে। যৌবন যে চিরদিন থাকে না, এ আপশোষ রাখবার স্থান ভারতবর্ষে নেই।

যা অতি প্রিয় এবং অতি ক্ষণস্থায়ী, তার স্থায়িত্ব বাড়াবার চেষ্টা মানুষের পক্ষে স্বাভাবিক। সম্ভবতঃ নিজের অধিকার

বিস্তার করবার উদ্দেশ্যেই, এদেশে যৌবন শৈশবের উপর আক্রমণ করেছিল। বাল্যবিবাহের মূলে হয় ত এই যৌবনের মেয়াদ বাড়াবার ইচ্ছাটাই বর্তমান। জীবনের গতিটি উণ্টো দিকে ফেরাবার ভিতরও একটা মহা আর্ট আছে। পৃথিবীর অপর সব দেশে, লোকে গাছকে কি করে বড় করতে হয় তারি সন্ধান জানে, কিন্তু গাছকে কি করে ছোট করতে হয়, সে কৌশল শুধু জাপানিরাই জানে। একটি বটগাছকে তারা চিরজীবন একটি টবের ভিতর পুরে রেখে দিতে পারে। শুনতে পাই, এই সব বামন-বট হচ্ছে অক্ষয় বট। জাপানিদের বিশ্বাস যে, গাছকে হ্রস্ব করলে তা আর বৃদ্ধ হয় না। সম্ভবতঃ আমাদেরও মনুষ্যত্বের চর্চ্চা সম্বন্ধে এই জাপানি আর্ট জানা আছে, এবং বাল্যবিবাহ হচ্ছে সেই আর্টের একটি প্রধান অঙ্গ। এবং উক্ত কারণেই, অপর সকল প্রাচীন সমাজ উৎসর্গে গেলেও আমাদের সমাজ আজও টিকে আছে। মনুষ্যত্ব খর্ব্ব করে, মানব-সমাজটাকে টবে জিইয়ে রাখায় যে বিশেষ কিছু অহঙ্কার করবার আছে, তা আমার মনে হয় না। সে যাই হোক, এ যুগে যখন কেউ যৌবনকে রাজটীকা দেবার প্রস্তাব করেন, তখন তিনি সমাজের কথা ভাবেন—ব্যক্তিবিশেষের কথা নয়।

ব্যক্তিগত হিসেবে জীবন ও যৌবন অনিত্য হলেও, মানব-সমাজের হিসেবে ও দুই পদার্থ নিত্য বললেও অত্যন্তিকি হয় না। সুতরাং সামাজিক জীবনে যৌবনের প্রতিষ্ঠা করা মানুষের ক্ষমতার বহির্ভূত না হলেও না হতে পারে।

কি উপায়ে যৌবনকে সমাজের যৌবরাজ্যে অভিষিক্ত করা যেতে পারে, তাই হচ্ছে বিবেচ্য ও বিচার্য।

এ বিচার করবার সময়, এ কথাটি মনে রাখা আবশ্যিক যে, মানবজীবনের পূর্ণ অভিব্যক্তি,—যৌবন ।

যৌবনে মানুষের বাহেন্দ্রিয়, কর্শেন্দ্রিয় ও অন্তরিন্দ্রিয় সব সজাগ ও সবল হয়ে ওঠে, এবং সৃষ্টির মূলে যে প্রেরণা আছে, মানুষে সেই প্রেরণা তার সকল আঙ্গে, সকল মনে অনুভব করে ।

দেহ ও মনের অবিচ্ছেদ্য সম্বন্ধের উপর মানবজীবন প্রতিষ্ঠিত হলেও, দেহমনের পার্থক্যের উপরেই আমাদের চিন্তারাজ্য প্রতিষ্ঠিত । দেহের যৌবনের সঙ্গে, মনের যৌবনের একটা যোগাযোগ থাকলেও, দৈহিক যৌবন ও মানসিক যৌবন স্তম্ভ । এই মানসিক যৌবন লাভ করতে পারলেই আমরা তা সমাজে প্রতিষ্ঠা করতে পারব । দেহ সফীর্ণ ও পরিচ্ছন্ন ; মন উদার ও বাপক । একের দেহের যৌবন, অপরের দেহে প্রবেশ করিয়ে দেবার যো নেই ;—কিন্তু একের মনের যৌবন, লক্ষ লোকের মনে সংক্রমণ করে দেওয়া যেতে পারে ।

পূর্বের বলেছি যে, দেহ ও মনের সম্বন্ধ অবিচ্ছেদ্য । একমাত্র প্রাণ-শক্তিই জড় ও চৈতন্যের যোগ সাধন করে । যেখানে প্রাণ নেই, সেখানে জড়ে ও চৈতন্যে মিলনও দেখা যায় না । প্রাণই আমাদের দেহ ও মনের মধ্যে মধ্যস্থতা করছে । প্রাণের পায়ের নীচে হচ্ছে জড়জগৎ, আর তার মাথার উপরে মনোজগৎ । প্রাণের ধর্ম্য যে, জীবন প্রবাহ রক্ষা করা, নব নব সৃষ্টির দ্বারা সৃষ্টি রক্ষা করা,—এটি সর্বলোকবিদিত । কিন্তু প্রাণের আর একটি বিশেষ ধর্ম্য আছে, যা সকলের কাছে সমান প্রত্যক্ষ নয় । সেটি হচ্ছে এই যে, প্রাণ প্রতিমূহুর্তে রূপান্তরিত হয় । হিন্দু-দর্শনেব মতে, জীবের প্রাণ ময় কোষ, অন্নময় কোষ ও মনোময় কোষের মধ্যে অবস্থিত । প্রাণের গতি উভয়মুখী । প্রাণের

পক্ষে মনোময় কোষে ওঠা এবং অন্নময় কোষে নামা—দুই সম্ভব। প্রাণ অধোগতি প্রাপ্ত হয়ে জড়জগতের অন্তর্ভুক্ত হয়ে যায়; আর উন্নত হয়ে মনোজগতের অন্তর্ভুক্ত হয়। মনকে প্রাণের পরিণতি এবং জড়কে প্রাণের বিকৃতি বললেও অত্যাশ্চর্য্য হয় না। প্রাণের স্বাভাবিক গতি হচ্ছে মনোজগতের দিকে; প্রাণের স্বাধীন সৃষ্টিতে বাধা দিলেই তা জড়তা প্রাপ্ত হয়। প্রাণ নিজের অভিব্যক্তির নিয়ম নিজে গড়ে নেয়;—বাইরের নিয়মে তাকে বদ্ধ করাতেই সে জড়জগতের অধীন হয়ে পড়ে। যেমন প্রাণী-জগতের রক্ষার জন্য নিত্য নূতন প্রাণের সৃষ্টি আবশ্যিক, এবং সে সৃষ্টির জন্য দেহের যৌবন চাই; তেমনি মনোজগতের এবং তদধীন কস্মজগতের রক্ষার জন্য সেখানেও নিত্য নব সৃষ্টির আবশ্যিক, এবং সে সৃষ্টির জন্য মনের যৌবন চাই। পুরাতনকে আঁকড়ে থাকাই বার্বাক্য অর্থাৎ জড়তা। মানসিক যৌবন লাভের জন্য প্রথম আবশ্যিক—প্রাণ-শক্তি যে দৈবী শক্তি—এই বিশ্বাস।

এই মানসিক যৌবনই সমাজে প্রতিষ্ঠা করা হচ্ছে আমাদের উদ্দেশ্য। এবং কি উপায়ে তা সাধিত হতে পারে, তাই হচ্ছে আলোচ্য।

আমরা সমগ্র সমাজকে একটি ব্যক্তিত্বসেবে দেখলেও, আসলে মানবসমাজ হচ্ছে বহুব্যক্তির সমষ্টি। যে সমাজে বহু ব্যক্তির মানসিক যৌবন আছে, সেই সমাজেরই যৌবন আছে। দেহের যৌবনের সঙ্গে সঙ্গেই মনের যৌবনের আবির্ভাব হয়। সেই মানসিক যৌবনকে স্থায়ী করতে হলে,—শৈশব নয়, বার্বাক্যের দেশ আক্রমণ এবং অধিকার করতে হয়। দেহের যৌবনের অন্তে, বার্বাক্যের রাজ্যে যৌবনের অধিকার বিস্তার

করবার শক্তি আমরা সমাজ হতেই সংগ্রহ করতে পারি । ব্যক্তিগত জীবনে ফাষ্টুন একবার চলে গেলে আবার ফিরে আসে না ; কিন্তু সমগ্র সমাজে ফাষ্টুন চিরদিন বিরাজ করছে । সমাজে নূতন প্রাণ, নূতন মন, নিত্য জন্মলাভ করছে । অর্থাৎ নূতন সুখদুঃখ, নূতন আশা, নূতন ভালবাসা, নূতন কর্তব্য ও নূতন চিন্তা, নিত্য উদয় হচ্ছে । সমগ্র সমাজের এই জীবন-প্রবাহ যিনি নিজের অন্তরে টেনে নিতে পারবেন, তাঁর মনের যৌবনের আর ক্ষয়ের আশঙ্কা নেই । এবং তিনিই আবার কথায় ও কাজে সেই যৌবন সমাজকে ফিরিয়ে দিতে পারবেন ।

এ যৌবনের রূপালে রাজটীকা দিতে আপত্তি করবেন,— এক জড়বাদী, আর এক মায়াবাদী ; কারণ এঁরা উভয়েই একমত । এঁরা উভয়েই বিশ্ব হতে তার অস্থির প্রাণটুকু বার করে দিয়ে, যে এক স্থিরতত্ত্ব লাভ করেন, তাকে জড়ই বল, আর চৈতন্যই বল, সে বস্তু হচ্ছে এক,— প্রভেদ না, তা নাগে ।

জ্যৈষ্ঠ, ১৩২১ ।

ইতিমধ্যে ।

সম্পাদক মহাশয়েরা মধো মধো লেখকদের—“ইতিমধ্যে” একটা কিছু লিখে দিতে আদেশ করেন । যদি জিজ্ঞাসা করা যায় যে, কি লিখিব ?—তার উত্তরে বলেন, যাহোক একটা কিছু লেখো, কি সে লেখো তাতে কিছু আসে যায় না—কিন্তু আসল কথা হচ্ছে লেখাটা “ইতিমধ্যে” হওয়া চাই । এতুলে ইতিমধ্যে অর্থ হচ্ছে—আগামী সংখ্যার কাগজ বেরবার পূর্বে । সম্পাদক মহাশয়েরা যখন আমাদের এই ভাবে সাহিত্যের মান্যতার তৈরি করতে আদেশ দেন, তখন তাঁরা ভুলে যান যে, সাহিত্যে যারা পাকা, অঙ্গে তারা স্বভাবতঃই কাঁচা ।

দিন গুণে কাজ করবার প্রবৃত্তিটি আমরা ইংরাজের কাছে শিখেছি ।—কোন দিনে কোন ক্ষণে কোন কার্য আরম্ভ করতে হবে, সে বিষয়ে এদেশে খুব দাঁপাবাপি নিয়ম ছিল—কিন্তু আরন্ধ কৰ্ম্ম কখন যে শেষ করতে হবে, সে সম্বন্ধে কোনই নিয়ম ছিল না । সেকালে কোনও জিনিস যে তামাদি তত, তার প্রমাণ সংস্কৃত ব্যবহার-শাস্ত্রে পাওয়া যায় না । সেই কারণেই বোধ হয়, বক্ত মনোভাব ও আচারব্যবহার, যা বক্তকাল পূর্বে তামাদি হওয়া উচিত ছিল, হিন্দু সমাজের উপর আজও তাদের দাবী পুরোমাবায় রয়েছে । সে যাউ হোক, কাজের ওজনের সঙ্গে সময়ের মাপের যে একটা সম্বন্ধ পাকা উচিত—এ জ্ঞান আমাদের ছিল না । “কালোহয়ং নিরবধি”—এ কথা সত্য হলেও—

সেই কালকে মানুষের কর্মজীবনের উপযোগী করে' নিতে হ'লে, তা'র যে ঘর কেটে নেওয়া আবশ্যক,—এই সহজ সত্যটি আমরা আবিষ্কার করতে পারিনি। একটি নির্দিষ্ট সময়ের ভিতর একটি বিশেষ কাজ শেষ করতে হ'লে, প্রথমে কোণায় দাঁড়ি টানতে হবে, সেটি জানা চাই; তারপরে কোণায় কমা ও কোণায় সেমিকোলন দিতে হবে, তারও হিসেব থাকা চাই। এক কথায়, সময় পদার্থটিকে punctuate করতে না শিখলে punctual হওয়া যায় না। সুতরাং আমরাও যে, ইংরেজদের মত, সময়কে টুকরো করে' নিতে শিখছি,—তা'তে কাজের বিশেষ সুবিধা হবে; কিন্তু সাহিত্যের সুবিধে হবে কি না, সে বিষয়ে আমার সন্দেহ আছে। কারণ সময়ের মূল্যের জ্ঞান বড় বেশী বেড়ে গেলে, সেই সময়ে যা' করা যায়, তার মূল্যের জ্ঞান চাই-কি আমাদের কমেও যেতে পারে। জন্মান কবি গেটে বলেছেন যে, মানুষের চরিত্র গঠিত হয় কন্সয়ের ভিতর, আর মন গঠিত হয় অবসরের ভিতর। অর্থাৎ পেশি সবল করতে হলে, মানুষের পক্ষে ছুটোছুটি করা দরকার,—কিন্তু মস্তিষ্ক সবল করতে হ'লে, মাথা ঠিক রাখা দরকার, স্থির থাকা দরকার। সাহিত্য রচনা করা হচ্ছে মস্তিষ্কের কাজ, সুতরাং “ইতিমধ্যে” বলতে যে অবসর বোঝায়, তার ভিতর সে রচনা করা সম্ভব কি না—তা আপনাবাই বিবেচনা করবেন। তবে যদি কেউ বলেন যে, লেখার সঙ্গে মস্তিষ্কের সম্বন্ধ থাকাই চাই, এমন কোনও নিয়ম নেই,—তাহলে অবশ্য গেটের মতের মূল্য অনেকটা কমে আসে।

হাজার তাড়াহুড়া করলেও লেখা জিনিসটে যে কিঞ্চিৎ সময় সাপেক্ষ, তার প্রমাণ উদাহরণের সাহায্যে দেওয়া যেতে পারে।

প্রথমে কবিতার কথা ধরা যাক। লোকের বিশ্বাস যে, কবিতার জন্মস্থান হচ্ছে কবির হৃৎপিণ্ড। তাহলেও হৃদয়ের সঙ্গে কলমের এমন কোনও টেলিফোনের যোগাযোগ নেই, যার দরুণ হৃদয়ের তারে কোনও কথা ধ্বনিত হবামাত্র কলমের মুখে তা প্রতিধ্বনিত হবে। আমার বিশ্বাস যে, যে ভাব হৃদয়ে ফোটে, তাকে মস্তিষ্কের বকষ্মে না চুঁইয়ে নিলে, কলমের মুখ দিয়ে তা ফোঁটা ফোঁটা হয়ে পড়ে না। কলমের মুখ দিয়ে অনায়াসে মুক্ত হয় শুধু কালি,—সাত রাজার ধন কালো মাণিক নয়। অতএব কবিতা রচনা করতেও সময় চাই।—তারপর ছোট গল্প। মাসিকপত্রের উপযোগী গল্প লিখতে হলে, প্রথমে কোনও না কোনও ইংরাজি বই কিনা মাসিকপত্র পড়া চাই। তারপর সেই পঠিত গল্পকে বাংলায় গঠিত করতে হলে, তা'কে রূপান্তরিত ও ভাবান্তরিত করা চাই। এর জগ্গে বোধ হয় মূলগল্প লেখবার চাইতেও বেশী সময়ের আবশ্যক।

কিছুদিন পূর্বের ভারতবর্ষের অতীত সম্বন্ধে যা'খুসি-তা'ই লেখবার একটা স্বেচ্ছা ছিল। “এ কালে এদেশে কিছুই নেই, অতএব সেকালে এদেশে সব ছিল” এই কথাটা নানারকম ভাষায় ফলিয়ে ফেলিয়ে লিখলে সমাজে তা' ইতিহাস বলে' গ্রাহ্য হত। কিন্তু সে স্বেচ্ছা আমরা ত্যজিয়েছি। একালে ইতিহাস কিনা প্রত্নতত্ত্ব সম্বন্ধে লিখতে হলে, তারজন্ম এক লাইব্রেরি বই পড়াও যথেষ্ট নয়। প্রত্নতত্ত্ব এখন মাটি খুঁড়ে বার করতে হয়, স্মৃতিরাং “ইতিমধ্যে” অর্থাৎ সম্পাদকীয় আদেশের তারিখ এবং সামনে মাসের পয়লার মধ্যে,—সে কাজ করা যায় না। অবশ্য ম্যালেরিয়ার বিষয় কিছুই না জেনে অনেক কথা লেখা যায়, কিন্তু সে লেখা সাহিত্য-পদবাচ্য কি না, সে বিষয়ে আমার

সন্দেহ আছে। যার এক পাশে ভ্রমর-গুঞ্জন আর অপর পাশে মধু,—তাই আমরা সাহিত্য বলে' স্বীকার করি। দুঃখের বিষয় ম্যালেরিয়ার এক পাশে মশক-গুঞ্জন—আর অপর পাশে কুইনীন। সুতরাং সাহিত্যেও ম্যালেরিয়া হতে দূরে থাকাই শ্রেয়। বিনা চিন্তায়, বিনা পরিশ্রমে, আজকাল শুধু দুটি বিষয়ের আলোচনা করা চলে। এক হচ্ছে উন্নতিশীল রাজনীতি, আর এক হচ্ছে স্থিতিশীল সমাজনীতি। কিন্তু এ দুটি বিষয়ের আলোচনা সচরাচর সভাসমিতিতেই হয়ে থাকে। অতএব ও দুই হচ্ছে বক্তাদের একচেটে। লেখকেরা যদি বক্তাদের অধিকারের উপর হস্তক্ষেপ করেন, তাহলে বক্তারাও লিখতে সুরু করবেন,—এবং সেটা উচিত কাজ হবে না।

লেখবার নানারূপ বিষয় এই ভাবে ক্রমে বাদ পড়ে' গেলে, শেষে একটিমাত্র জিনিসে গিয়ে ঠেকে, যার বিষয় নির্ভাবনায় অনর্গল লেখনী চালনা করা চলে,—এবং সে হচ্ছে নীতি। নীতির মোটা আদেশ ও উপদেশগুলি সংখ্যায় এত কম যে, তা আঙ্গুলে গোণা যায়,—এবং সেগুলি এতই সর্বলোকবিদিত ও সর্ববাদি-সম্মত যে, সুস্থশরীরে স্বচ্ছন্দচিত্তে সে বিষয়ে এক গঙ্গা লিখে যাওয়া যায়, কেননা কেউ যে তার প্রতিবাদ করবে, সে ভয় নেই।

মানুষ যে দেবতা নয়, এবং মানবের পক্ষে দেবত্ব লাভের চেষ্টা নিত্য ব্যর্থ হলেও যে নিয়ত কর্তব্য, সে বিষয়ে তিলমাত্র সন্দেহ নেই। তবুও অপরকে নীতির উপদেশ দিতে আমার তাদৃশ উৎসাহ হয় না। তার কারণ, মানুষ খারাপ বলে' আমি দুঃখ করিনে,—কিন্তু মানুষ দুঃখী বলে' মন খারাপ করি। অথচ মানুষের দুর্গতির চাইতে দুর্গীতিটি বেশী চোখে না পড়লে, নীতির গুরুগিরি করা চলে না।

তা ছাড়া পরের কাণে নীতির মন্ত্র দেওয়া সম্বন্ধে আমার মনে একটি সহজ অপ্রবৃত্তি আছে । যে কথা সকলে জানে, সে কথা যে আমি না বললে দেশের দৈন্য ঘুচবে না, এমন বিশ্বাস আমি মনে পোষণ করতে পারিনে । এমন কি আমার এ সন্দেহও আছে যে, যাঁরা দিন নেই রাত নেই অপরকে লক্ষ্মী-ছেলে হ'তে বলেন, তাঁরা নিজে চান শুধু লক্ষ্মীমন্ত হ'তে । যাঁরা পরকে বলেন “তোমরা ভাল হও, ভাল কর”, তাঁরা নিজেকে বলেন “ভাল খাও, ভাল পর ।” স্মৃতরাং আমার পরামর্শ যদি কেউ জিজ্ঞাসা করেন, তাহলে আমি তাঁকে বলব “ভাল খাও, ভাল পর ।” কারণ মানুষ পৃথিবীতে কেন আসে কেন যায়, সে রহস্য আমরা না জানলেও, এটি জানি যে “ইতিমধ্যে” তার পক্ষে খাওয়া পরাটা দরকার ।

“তোমরা ভাল খাও, ভাল পর”, এ পরামর্শ সমাজকে দিতে অনেকে কুণ্ঠিত হবেন, কেননা ও কথার ভিতর এই কথাটি উহা থেকে যায় যে, পরামর্শদাতাকে নিজে ভাল হ'তে হবে এবং ভাল করতে হবে । আপত্তি ত এখানেই ।

যিনি ভাল খান ও ভাল পরেন, সহজেই তাঁর মনে নিজের শ্রেষ্ঠত্বের উপর বিশ্বাস জন্মে যায়, এবং সেই সঙ্গে এই ধারণাও তাঁর মনে দৃঢ় হয়ে ওঠে যে, যেখানে দৈন্য সেইখানেই পাপ ।

দারিদ্র্যের মূল যে দরিদ্রের দুর্নীতি, এই ধারণা এক সময়ে ইউরোপের ধনী লোকের মনে এমনি বদ্ধমূল হয়ে উঠেছিল যে, এই ভুলের উপর “পোলিটিকাল ইকনমি” নামে একটি উপ-বিজ্ঞান বেজায় মাথা-ঝাড়া দিয়ে উঠেছিল । অর্থ যে ধর্মমূলক, এর প্রমাণ পৃথিবীতে এতই কম যে, আমাদের পূর্বপুরুষেরা

একটি পূর্বজন্ম কল্পনা করে', সেই পূর্বজন্মের পাপপুণ্যের ফলস্বরূপ সুখদুঃখ, সমাজকে মেনে নিতে শিখিয়েছিলেন ।

ব্যাখ্যার চাতুর্যে জিৎ অবশ্য আমাদের পূর্বপুরুষদেরই, কারণ বল লোকের দুঃখ কষ্ট যে তাদের ইহজন্মের কর্মফলে নয়, তা প্রমাণ করা যেতে পারে ; কিন্তু সে যে পূর্বজন্মের কর্মফলে নয়, তা এ জন্মে অপ্রমাণ করা যেতে পারে না । .

আসলে দুইজনের মুখে একই কথা । সে হচ্ছে এই যে, পরের দুঃখ যখন তাদের নিজের দোষে, তখন তাদের শুধু ভাল হতে শেখাও,—তাদের দুঃখ দূর করার চেষ্টা করা আমাদের কর্তব্য নয় । অতএব মানুষের দুর্গতির প্রতি করুণ হওয়া উচিত নয়, তাদের দুর্নীতির প্রতি কঠোর হওয়াই কর্তব্য ।

কিন্তু আজকাল কালের গুণে, শিক্ষার গুণে, আমরা পরের দুঃখ সম্বন্ধে অতটা উদাসীন হতে পারিনে, কর্মফলে আস্থা রেখে নিশ্চিন্ত থাকতে পারিনে । তাই দীনকে নীতিকথা শোনানো অনেকে হীনতার পরিচায়ক মনে করেন । ছোট ছেলে সম্বন্ধে “পড়লে শুনলে দুধু ভাতু”, এ সত্যের পরিবর্তে—“আগে দুধ ভাত, পরে পড়াশুনো”, এই সত্যের প্রচার করতে চাই । এ দেশের দুর্ভিক্ষ-প্রপীড়িত জনগণের জন্য আমরা শিক্ষার ব্যবস্থা করবার পূর্বে, অন্নের ব্যবস্থা করা শ্রেয় মনে করি । আগে অন্নপ্রাশন, পরে বিদ্যারস্তু,—সংস্কারেরও এই সনাতন ব্যবস্থা বজায় রাখা আমাদের মধ্যে সঙ্গত । অথচ আমরা যে কেন ঠিক উণ্টো পদ্ধতির পক্ষপাতী, তার অবশ্য কারণ আছে ।

লোক-শিক্ষার নামে যে আমরা উত্তেজিত হয়ে উঠি, তার প্রথম কারণ যে আমরা শিক্ষিত । স্কুলে লিখে এসে যে কালি আমরা হাত আর মুখে মেখেছি, তার ভাগ আমরা দেশভুক্ত

লোককে দিতে চাই। যেমনি একজনে লোকশিক্ষার স্মরণ করেন, অমনি আমরা যে তার ধুয়ো ধরি, তার আর একটি কারণ এই যে, এ কাজে আমাদের শুধু বাক্যব্যয় করতে হয়, অর্থব্যয় করতে হয় না। এ ব্যাপারে লাগে লাখ টাকা, দেবে গৌর-সরকার।

জনসাধারণের হাতেখড়ি দেবার পরিবর্তে মুখে ভাত দেবার প্রস্তাবে আমরা যে তেমন গা করিনে, তার কারণ সাংসারিক হিসাবে সকলের স্বার্থসাধন করতে গেলে, নিজের স্বার্থ কিঞ্চিৎ খর্ব করা চাই; ত্যাগস্বীকারের জন্ত নীতি নিজে শেখা দরকার, পরকে শেখানো দরকার নয়।

আমাদের প্রত্যেকের নিজের স্বার্থ যে সমগ্র জাতির স্বার্থের সহিত জড়িত, এ জ্ঞান যে আমাদের হয়েছে, তার প্রমাণ বাঙ্গলা-সাহিত্যের কতকগুলি নতুন কথায় পাওয়া যায়। ব্যক্তির সঙ্গে সমাজের অঙ্গাঙ্গী সম্বন্ধের কথা, জাতীয় আত্মজ্ঞানের কথা, আজ-কাল বক্তাদের ও লেখকদের প্রধান সম্বল। অথচ এ কথাও অস্বীকার করবার জো নেই যে, এত বলা কওয়া সত্ত্বেও, এই অঙ্গাঙ্গীভাব পরস্পরের গলাগলিভাবে পরিণত হয় নি; আর জাতীয় আত্মজ্ঞান শুধু জাতীয় অহঙ্কারে পরিণত হচ্ছে, যদিচ অহঙ্জ্ঞানই আত্মজ্ঞানের প্রধান শত্রু। জাতীয় কর্তব্যবুদ্ধি অনেকের মনে জাগ্রত হলেও, জাতীয় কর্তব্য যে সকলে করেন না, তার কারণ, পরের জন্ত কিছু করবার দিন আমরা নিত্যই পিছিয়ে দিই। আমাদের অনেকের চেষ্টা হচ্ছে প্রথমে নিজের জন্ত সব করা, পরে অপরের জন্ত কিছু করা। সুতরাং জাতীয় কর্তব্যটুকু আর “ইতিমধ্যে” করা হয় না। ফলে “আপনি বাঁচলে বাপের নাম”, এই পুরোনো কথার উপর আমরা নিজের

কৰ্মজীবন প্রতিষ্ঠা করি, আর “জাত বাঁচলে ছেলের নাম”, এইরকম একটা কোন বিশ্বাসের বলে, জাতীয় কর্তব্যের ভারটা— এখন যারা ছেলে এবং পরে যারা মানুষ হবে, তাদের ঘাড়ে চাপিয়ে দিই ।

কিন্তু আসল কথা হচ্ছে যে, যা কিছু করতে হবে, তা “ইতিমধ্যেই” করতে হবে । সম্পাদক মহাশয়েরা, লেখক নয় পাঠকদের যদি এই সত্যটি উপলব্ধি করাতে পারেন, তাহলে তাঁদের সকল আশ্রয় আমরা পালন করতে প্রস্তুত আছি ।

জ্যৈষ্ঠ, ১৩২১ ।

বর্ষার কথা ।

আমি যদি কবি হতুম, তাহলে আর যে বিষয়েই হোক, বর্ষার সম্বন্ধে কখনো কবিতা লিখতুম না। কেন?—তার কারণগুলি ক্রমান্বয়ে উল্লেখ করছি।

প্রথমতঃ কবিতা হচ্ছে আর্ট। পাশ্চাত্য পণ্ডিতদের মতে আর্ট জিনিসটি দেশকালের বহির্ভূত। এ মতের সার্থকতা তাঁরা উদাহরণের সাহায্যে প্রমাণ করতে চান। Hamlet, তাঁদের মতে, কালেতে ক্ষয় প্রাপ্ত হবে না, এবং তার জন্ম-স্থানেও তাকে আবদ্ধ করে রাখবার জো নেই। কিন্তু সঙ্গীতের উদাহরণ থেকে দেখানো যেতে পারে যে, এদেশে আর্ট কালের সম্পূর্ণ অধীন। প্রতি রাগ-রাগিণীর স্ফূর্তির ঋতু, মাস, দিন, ক্ষণ নির্দিষ্ট আছে। ঝাঁর সুরের দৌড় শুধু ঋষভ পর্যালম্ভ পৌঁছায়, তিনিও জানেন যে, ভৈরবীর সময় হচ্ছে সকাল, আর পূরবীর বিকাল। যেহেতু কবিতা গান থেকেই উৎপন্ন হয়েছে—সে কারণ সাহিত্যে সময়োচিত কবিতা লেখবারও বাবস্থা আছে। মাসিক-পত্রে পয়লা বৈশাখে নববর্ষের কবিতা, পয়লা আষাঢ়ে বর্ষার, পয়লা আশ্বিনে পূজার, আর পয়লা ফাল্গুনে প্রেমের কবিতা বেরোনো চাইই চাই। এই কারণে আমার পক্ষে বর্ষার কবিতা লেখা অসম্ভব। যে কবিতা আষাঢ়স্থ প্রথম দিবসে প্রকাশিত হবে, তা অন্ততঃ জ্যৈষ্ঠ মাসের মাঝামাঝি রচনা করতে হবে। আমার মনের কল্পনার এত বাষ্প নেই,

যা নিদাঘের মধ্যাহ্নকে মেঘাচ্ছন্ন করে তুলতে পারে। তা ছাড়া, যখন বাইরে অহরহ আগুন জ্বলছে, তখন মনে বিরহের আগুন জ্বালিয়ে রাখতে কালিদাসের যক্ষও সক্ষম হতেন কি না, সে বিষয়ে আমার সন্দেহ আছে। আর বিরহ বাদ দিয়ে বর্ষার কাব্য লেখাও যা, হ্যামলেটকে বাদ দিয়ে হ্যামলেট নাটক লেখাও তাই।

দ্বিতীয়তঃ, বর্ষার কবিতা লিখতে আমার ভরসা হয় না এই কারণে যে, এক ভরসা ছাড়া বরষা আর কোনও শব্দের সঙ্গে মেলে না। বাঙ্গলা-কবিতায় মিল চাই, এ ধারণা আমার আজও যে আছে, এ কথা আমি অস্বীকার করতে পারিনে। যখন ভাবের সঙ্গে ভাব না মিললে কবিতা হয় না, তখন কথার সঙ্গে কথা মিললে কেন যে তা কবিতা না হয়ে পড় হবে, তা আমি বুঝতে পারিনে। তা ছাড়া, বাস্তব জীবনে যখন আমাদের কোন কথাই মেলে না, তখন অন্ততঃ একটা জায়গা থাকা চাই যেখানে তা মিলবে,—এবং সে দেশ হচ্ছে কল্পনার রাজ্য, অর্থাৎ কবিতার জন্মভূমি। আর এক কথা, অমিত্রাক্ষরের কবিতা যদি শ্রাবণের নদীর মত দুকূল ছাপিয়ে না বয়ে যায়, তাহলে তা নিতান্ত অচল হয়ে পড়ে। মিল অর্থাৎ অন্তঃ-অনুপ্রাস বাদ দিয়ে, পড়কে হিল্লোলে ও কল্লোলে ভরপুর করে তুলতে হলে, মধ্য-অনুপ্রাসের ঘনঘটা আবশ্যিক। সে কবিতার সঙ্গে সতত সঞ্চারমান নব-জলধরপটলের সংযোগ করিয়ে দিতে হয়, এবং তার চলোশিঁধর গতি যাদঃপতিরোধ বাতীত অণু কোনরূপ রোধ মানে না। আমার সরস্বতী হচ্ছেন প্রাচীন সরস্বতী,—শুষ্কা না হলেও ক্ষীণা; দামোদর নন্ যে, শব্দের বণ্ণায় বাঙ্গলার সকল ছাঁদ-বাঁধ ভেঙ্গে বেরিয়ে যাবেন। অতএব মিলের অভাববশতঃই

আমাকে ক্লান্ত থাকতে হচ্ছে । অবশ্য দরশ, পরশ, সরস, হরষ প্রভৃতি শব্দকে আকার দিয়ে বর্ষার সঙ্গে মেলান যায় । কিন্তু সে কাজ রবীন্দ্রনাথ আগেই করে বসে আছেন । আমি যদি ঐ সকল শব্দকে সাকার করে ব্যবহার করি, তাহলে আমার চুরিবিচ্ছে ঐ আকারেই ধরা পড়ে যাবে ।

ঐরূপ শব্দসমূহ অত্নসাৎ করা চৌর্য্যবৃত্তি কি না—সে বিষয়ে অবশ্য প্রচণ্ড মতভেদ আছে । নব্য কবিদের মতে, মাতৃভাষা যখন কারও পৈতৃক-সম্পত্তি নয়, তখন তা নিজের কার্য্যোপযোগী করে ব্যবহার করবার সকলেরই সমান অধিকার আছে । ঈষৎ বদল-সদল করেছেন বলে’ রবীন্দ্রনাথ ও-সব কথা আর কিছু পেটেন্ট নেন নি যে, আমরা তা ব্যবহার করলে চোর-দায়ে ধরা পড়ব,—বিশেষতঃ যখন তাদের কোন বদলি পাওয়া যায় না । যে কথা একবার ছাপা হয়ে গেছে, তাকে আর চাপা দিয়ে রাখবার জো নেই ; সে যার-তার কবিতায় নিজেকে ব্যক্ত করবে । নব্য কবিদের আর একটি কথা বলবার আছে, যা বিশেষ প্রণিধানযোগ্য । সে হচ্ছে এই যে, রবীন্দ্রনাথ যদি অনেক কথা আগে না ব্যবহার করে ফেলতেন, তাহলে পরবর্ত্তী কবিরা তা ব্যবহার করতেন । পরে জন্মগ্রহণ করার দরুণ সে স্বেযোগ হারিয়েছি বলে, আমাদের যে চুপ করে থাকতে হবে, সাহিত্য-জগতের এমন কোনও নিয়ম নেই । এ মত গ্রাহ্য করলেও বর্ষার বিষয়ে কবিতা লেখার আর একটি বাধা আছে । কলম ধরলেই মনে হয়, মেঘের সন্মুখে লিখব আর কি ছাই ?

বর্ষার রূপগুণ সন্মুখে যা কিছু বক্তব্য ছিল, তা কালিদাস সবই বলে গেছেন,—বাকী যা ছিল তা রবীন্দ্রনাথ বলেছেন । এ বিষয়ে একটি নূতন উপমা কিনা নূতন অনুপ্রাস খুঁজে পাওয়া

ভার । যদি পরিচিত সকল বসন-ভূষণ বাদ দিয়ে বর্ষার নগ্ন-মূর্তির বর্ণনা করতে উত্তত হই, তাহলেও বড় স্তব্ধে করতে পারা যায় না । কারণ, বর্ষার রূপ কালো, রস জোলো, গন্ধ পঙ্কজের নয়—পঙ্কের, স্পর্শ ভিজ়ে, এবং শব্দ বেজায় । স্তব্ধতাং যে বর্ণা আমাদের ইন্দ্রিয়ের বিষয়ীভূত, তার যথাযথ বর্ণনাতে বস্তুতন্ত্রতা থাকতে পারে, কিন্তু কবিত্ব থাকবে কি না, তা বলা কঠিন ।

কবিতার যা দরকার, এবং যা নিয়ে কবিতার কারবার, সেই সব আনুষঙ্গিক উপকরণও এ ঋতুতে বড়-একটা পাওয়া যায় না । এ ঋতু পাখী-ছুট । বর্ষায় কোকিল মৌন, কেননা দর্দুর বন্তা,—চকোর আকাশ-দেশত্যাগী, আর চাতক ঢের হয়েছে বলে' ফটিকজল শব্দ আর মুখে আনে না । যে সকল চরণ ও চপ্পুসার পার্থী—যথা বক, হাঁস, সারস, হাড়গিলে ইত্যাদি—এ ঋতুতে স্বেচ্ছামত জলে স্থলে ও নভোমণ্ডলে স্বচ্ছন্দে বিচরণ করে, তাদের গঠন এতই অদ্ভুত এবং তাদের প্রকৃতি এতই তামসিক যে, তারা যে বিশ্বামিত্রের সৃষ্টি, সে বিষয়ে আর কোনও সন্দেহ নেই । বস্তুতন্ত্রতার খাতিরে আমরা অনেক দূর অগ্রসর হতে রাজি আছি, কিন্তু বিশ্বামিত্রের জগৎ পর্য্যন্ত নয় । তার পর কাব্যের উপযোগী ফুল, ফল, লতা, পাতা, গাছ, বর্ষায় এতই দুর্লভ যে, মহাকবি কালিদাসও ব্যাঙের ছাতার বর্ণনা করতে বাধ্য হয়েছেন । সংস্কৃত-ভাষার ঐশ্বর্য্যের মধ্যে এ দৈন্য ধরা পড়ে না—তাই কালিদাসের কবিতা বেঁচে গেছে । বর্ষার দুটি নিজস্ব ফুল হচ্ছে কদম আর কেয়া । অপূর্ব্বতায় পুষ্পজগতে এ দুটির আর তুলনা নেই । অপরাপর সকল ফুল অর্দ্ধবিকশিত ও অর্দ্ধনিমীলিত । রূপের যে অর্দ্ধপ্রকাশ ও অর্দ্ধগোপনই

তার মোহিনীশক্তি নিহিত, এ সত্য স্বর্গের অঙ্গরারা জান্তেন । মুনিঋষিদের তপোভঙ্গ করবার জন্ত তাঁরা উক্ত উপায়ই অবলম্বন কর্তেন । কারণ ব্যক্ত-দ্বারা ইন্দ্রিয় এবং অব্যক্ত-দ্বারা কল্পনাকে অভিভূত না করতে পারলে, দেহ ও মনের সমষ্টিকে সম্পূর্ণ মোহিত করা যায় না । কদম কিন্তু একেবারেই খোলা—আর কেয়া একেবারেই বোজা । একের ব্যক্তরূপ নেই—অপরের গুণগন্ধ নেই ; অথচ উভয়েই কণ্টকিত । এ ফুল দিয়ে কবিতা সাজানো যায় না । এ দুটি ফুল বর্ষার ভূষণ নয়,—অস্ত্র । গোলা এবং সঙ্গীনের সঙ্গে এদের সাদৃশ্য স্পষ্ট ।

পূর্বের যা দেখানো গেল, সে সব ত অঙ্গহীনতার পরিচয় । কিন্তু এ ঋতুর প্রধান দোষ হচ্ছে, আর পাঁচটি ঋতুর সঙ্গে এর কোনও মিল নেই । আর পাঁচটি ঋতুর সঙ্গে এ ঋতু খাপ খায় না । এ ঋতু বিজাতীয় এবং বিদেশী, অতএব অস্পৃশ্য । এই প্রক্ষিপ্ত ঋতু আকাশ থেকে পড়ে ;—দেশের মাটির ভিতর থেকে আবির্ভূত হয় না । বসন্তের নবীনতা, সজীবতা ও সরসতার মূল হচ্ছে ধরণী । বসন্তের ঐশ্বর্য্য হচ্ছে দেশের ফুলে, দেশের কিশলয়ে । বসন্তের দক্ষিণ-পবনের জন্মস্থান যে ভারতবর্ষের মলয়-পর্বত, তার পরিচয় তার স্পর্শেই পাওয়া যায় ;—সে পবন আমাদের দেহে চন্দনের প্রলেপ দিয়ে দেয় । বসন্তের আলো,—সূর্য্য ও চন্দ্রের আলো । ও দুটি দেবতা ত সম্পূর্ণ আমাদেরই আত্মীয় ; কেননা আমরা হয় সূর্য্যবংশীয়, নয় চন্দ্র-বংশীয়,—এবং ভবলীলাসম্বরণ করে আমরা হয় সূর্যালোকে, নয় চন্দ্রলোকে ফিরে যাই । অপর পক্ষে, মেঘ যে কোন্ দেশ থেকে আসে, তার কোনও ঠিকানা নেই । বর্ষা যে জল বর্ষণ করে, সে কালাপানির জল । বর্ষার হাওয়া এতই দুর্গন্ধ, এতই অশিষ্ট, এতই

প্রচণ্ড এবং এতই স্বাধীন যে, সে যে কোনও অসভ্য দেশ থেকে আসে, সে বিষয়ে কোনও সন্দেহ নেই। তারপর, বর্ষার নিজস্ব আলো হচ্ছে বিদ্যুৎ। বিদ্যুতের আলো এতই হাশ্চাঙ্গুল, এতই চঞ্চল, এতই বক্র এবং এতই তীক্ষ্ণ যে, এই প্রশান্ত মহাদেশের এই প্রশান্ত মহাকাশে সে কখনই জন্মলাভ করে নি। আর এক কথা—বসন্ত হচ্ছে কলকণ্ঠ কোকিলের পঞ্চম সুরে মুখরিত। আর বর্ষার নিনাদ ?—তা শুনে শুধু যে কানে হাত দিতে হয় তা নয়, চোখও বুজতে হয়।

বর্ষার প্রকৃতি যে আমাদের প্রকৃতির সম্পূর্ণ বিপরীত, তার বিশেষ পরিচয় পাওয়া যায় ও-ঋতুর ব্যবহারে। এ ঋতু শুধু বেখাপ্পা নয়,—অতি বেয়াড়া। বসন্ত যখন আসে, সে এত অলঙ্কিতভাবে আসে যে, পঙ্জিকার সাহায্য ব্যতীত কবে মাঘের শেষ হয়, আর কবে ফাল্গুনের আরম্ভ হয়, তা কেউ বলতে পারেন না। বসন্ত, বক্ষিমের রজনীর মত, ধীরে ধীরে অতি ধীরে, ফুলের ডালা হাতে করে, দেশের হৃদয়-মন্দিরে এসে প্রবেশ করে। তার চরণ-স্পর্শে ধরণীর মুখে, শব-সাধকের শবের ন্যায়, প্রথমে বর্ণ দেখা দেয়, তার পরে ক্রকম্পিত হয়, তারপরে চক্ষু উন্মীলিত হয়; তারপর তার নিশ্বাস পড়ে, তারপর তার সর্বদাঙ্গ শিহরিত হয়ে ওঠে। এ সকল জীবনের লক্ষণ শুধু পর্যায়ক্রমে নয়,—ধীরে ধীরে, অতি ধীরে প্রকটিত হয়। কিন্তু বর্ষা ভয়ঙ্কর মূর্ত্তি ধারণ করে, একেবারে ঝাঁপিয়ে এসে পড়ে। আকাশে তার চুল ওড়ে, চোখে তার বিদ্যুৎ খেলে, মুখে তার প্রচণ্ড হুঙ্কার;—সে যেন একেবারে প্রমত্ত, উন্মত্ত। ইংরাজেরা বলেন, কে কার সঙ্গে রাখে, তার থেকে তার চরিত্রের পরিচয় পাওয়া যায়। বসন্তের সখা মদন। আর বর্ষার সখা ?—পবননন্দন

নন, কিন্তু তাঁর বাবা ! ইনি এক লক্ষ্মে আমাদের অশোকবনে উদ্ভীর্ণ হয়ে ফুল ছেঁড়েন, ডাল ভাঙ্গেন, গাছ ওপুড়ান। আমাদের সোনার লক্ষা একদিনেই লগুভগু করে দেন, এবং যে সূর্য্য আমাদের ঘরে বাঁধা রয়েছে, তাকে বগলদাড়া করেন। আর চন্দের দেহ ভয়ে সঙ্কুচিত হয়ে তার কলঙ্কের ভিতর প্রবিষ্ট হয়ে যায়। এক কথায়, বর্ষার ধর্ম্ম হচ্ছে জল-স্থল-আকাশ সব বিপর্য্যস্ত করে ফেলা। এ ঋতু কেবল পৃথিবী নয়, দিবারাত্রেরও সাজানো তাস ভেস্তু দেয়। তা ছাড়া বয়্য কখন হাসেন, কখন কাঁদেন ;—ইনি ক্ষণে রুষ্ট, ক্ষণে তুষ্ট ! এমন অব্যাবস্থিতচিত্ত ঋতুকে ছন্দোবন্ধের ভিতর সুবাবস্থিত করা আমার সাধ্যাতীত।

এ স্থলে এই আপত্তি উঠতে পারে যে, বর্ষার চরিত্র যদি এতই উদ্ভট হয়, তাহলে কালিদাস প্রভৃতি মহাকবিরা কেন ও-ঋতুকে তাঁদের কাব্যে অতখানি স্থান দিয়েছেন ? তার উত্তর হচ্ছে যে, সেকালের বর্ষা আর একালের বর্ষা এক জিনিস নয় ;—নাম ছাড়া এ উভয়ের ভিতর আর কোনও মিল নেই। মেঘদূতের মেঘ,—শান্ত দান্ত। সে বন্ধুর কথা শোনে, এবং যে পথে যেতে বল, সেই পথে যায়। সে যে কতদূর রসজ্ঞ, তা তার উজ্জয়িনী-প্রয়াণ থেকেই জানা যায়। সে রমণীর হৃদয়জ্ঞ,—স্ট্রীজাতির নিকট কোন্ ক্ষেত্রে হৃৎকার করতে হয়, এবং কোন্ ক্ষেত্রে অল্পভাবে জল্পনা করতে হয়, তা তার বিলক্ষণ জানা আছে। সে করুণ,—সে কনকনিকর্ষান্নগ্ন বিজুলির বাতি ছেলে, সূচিতেজ্ঞ অন্ধকারের মধ্যে অভিসারিকাদের পথ দেখায়,—কিন্তু তাদের গায়ে জলবর্ষণ করে না। সে সঙ্গীতজ্ঞ,—তার সখা অনিল যখন কাঁচক-রাঙ্গো নুখ দিয়ে বংশী-বাদন করেন, তখন সে মৃদঙ্গের সঙ্গত করে। এক কথায়

ধীরোদাস্ত নায়কের সকল গুণই তাতে বর্তমান । সে মেঘ ত মেঘ নয়,—পুষ্পকরণে আরুঢ় স্বয়ং বরুণদেব । সে রথ অলংকার প্রাসাদের মত ইন্দ্রচাপে সচিত্র, ললিতবনিতাসনাগ, মুরজধ্বনিতে মুখরিত । সে মেঘ কখনো শীলারূপিণী করে না,—মধ্যে মধ্যে পুষ্পরূপিণী করে । এতেন মেঘ যদি কবিতার বিষয় না হয়, তাহলে সে বিষয় আর কি হতে পারে ?


কিন্তু যেহেতু আমাদের পরিচিত বর্ণা নিতান্ত উদভ্রান্ত, উচ্ছৃঙ্খল ; সেই কারণেই তার বিষয় কবিত্ব করা সম্ভব হলেও অনুচিত । পৃথিবীতে মানুষের সব কাজের ভিতর একটা উদ্দেশ্য আছে । আমার বিশ্বাস, প্রকৃতির রূপ-বর্ণনার উদ্দেশ্য হচ্ছে তার সৌন্দর্যের সাহায্যে মানব-মনকে শিক্ষাদান করা । যদি তাই হয়, তাহলে কবিরা কি বর্ণার চরিত্রকে মানুষের মনের কাছে আদর্শস্বরূপ ধরে দিতে চান ? আমাদের মত শান্ত, সমাহিত, সুসভ্য জাতির পক্ষে বর্ণা নয়—হেমন্ত হচ্ছে আদর্শ পাত্র । এ মত আমার নয়,—গানের ; নিম্নে উদ্ধৃত বাক্য-গুলির দ্বারাই তা প্রমাণিত হবে :—

“ঋতুগণের মধ্যে হেমন্তই স্বাহাকার, বেননা হেমন্ত এই প্রজাসমূহকে নিজের বশীভূত করিয়া রাখে, এবং সেইজন্য হেমন্তে ওষধিসমূহই গ্ৰাসিত হয়, বনস্পতিসমূহের পত্রনিচয় নিপতিত হয়, পক্ষীসমূহ যেন অধিকতরভাবে স্থির হইয়া থাকে ও অধিকতর নীচে উড়িয়া বেড়ায়, এবং নিকৃষ্ট ব্যক্তিদের লোমসমূহ যেন (শীতপ্রভাবে) নিপতিত হইয়া যায়, কেননা, হেমন্ত এই সমস্ত প্রজাকে নিজের বশীভূত করিয়া থাকে । যে ব্যক্তি ইহা এইরূপ জানেন, তিনি যে (ভূমি) ভাগে থাকেন তাহাকেই শ্রী ও শ্রেষ্ঠ অন্নের জন্য নিজের করিয়া তোলেন ।” (শতপথ ব্রাহ্মণ) ।

আমরা যে শ্রীভ্রষ্ট এবং শ্রেষ্ঠ-অন্নহীন, তার কারণ আমরা হেমন্তকে এইরূপে জানিনে ; এবং জানিনে যে, তার কারণ, কবিরা হেমন্তের স্বরূপের বর্ণনা করেন না, বর্ণনা করেন শুধু বর্ষার—যে বর্ষা ওষধিসমূহকে ম্লান না করে, সবুজ করে তোলে ।

আষাঢ়, ১৩২১ ।

পত্র ।



সম্পাদক-মহাশয় সমীপেষু—

আপনি যে নূতন কাগজ বার করেছেন, তার যদি কোন উদ্দেশ্য থাকে ত সে হচ্ছে, নূতন কথা নূতন ধরনে বলা । এ উদ্দেশ্য সফল করতে হলে, নূতন লেখক চাই,—নচেৎ সবুজপত্র কালক্রমে শ্বেতপত্রে পরিণত হবে ।

যদিচ আপনি মুখপত্রে “আমির” পরিবর্তে “আমরা” শব্দ ব্যবহার করেছেন, তথাপি ঐ বহুবচনের পিছনে যে বহু লেখক আছেন, তার কোনও প্রমাণ পাওয়া গেল না । বাঙ্গলায় দ্বিবচন নেই, সম্ভবতঃ সেই কারণেই আপনি প্রথমপুরুষের বহুবচন ব্যবহার করতে বাধ্য হয়েছেন । কারণ, অজ্ঞাবধি কেবলমাত্র দুটি লেখকেরই পরিচয় পাওয়া গেছে—এক সম্পাদক, আর এক শ্রীযুক্ত রবীন্দ্রনাথ ঠাকুর ।

শ্রীযুক্ত সত্যেন্দ্রনাথ দত্তকে গুণ্ঠিত্র মধ্যে ধরা গেল না, কেননা আপনারা লেখার যা নমুনা দেখিয়েছেন, তার থেকে স্পষ্টই বোঝা যায় যে, আপনার প্রধান ভরসাস্থল হচ্ছে গল্প । কারণ সোজা কথা বাঁকা করে এবং বাঁকা কথা সোজা করে বলা পণ্ডের রীতি নয় ।

আর ছিলুম আমি,—কিন্তু আর বেশীদিন যে থাকিব কিম্বা থাকতে পারব, এমন আমার ভরসা হয় না । হয় আপনি

আমাকে ছাড়বেন, নয় আমি আপনাকে ছাড়ব। আমার লেখায়, আর যাই হোক, সবুজ পত্রের যে গৌরব বৃদ্ধি হয়নি, একথা সর্ব-সমালোচক-সম্মত। এ অবস্থায় “বীরবল” অতঃপর “আবুল-ফজল” হওয়া ব্যতীত উপায়ান্তর দেখতে পাচ্ছেন না। ভবিষ্যতে আইন-ই-আঙ্গরেজি নামক যে নব-বিশ্বকোষ রচনা করব—“সবুজ পত্রে” তার স্থান হবে না। যদি “ফৈজি” হতে পারতুম, তাহলেও নাহয় আপনার কাগজের জন্ত একখানি দেশকালোপযোগী অর্থাৎ স্বয়ম্বরা-তিরস্কৃত একখানি “নলদমন” রচনা করতে পারতুম; কিন্তু সে হবার জো নেই। আমাকে আবুল-ফজল হতেই হবে। আশা করি, বাঙ্গলার নবীন আবুল-ফজলদের মধ্যে কেউ-না-কেউ আমার সঙ্গে পেশা বদলে নেবেন, কেননা সাহিত্য-রাজ্যে বীরবলেরও আবশ্যকতা আছে। ইংরাজেরা বলেন—এক কোকিলে বসন্ত হয় না—অর্থাৎ আর পাঁচরঙ্গের আর পাঁচটি পাখীও চাই। বাঙ্গলা-সাহিত্যের উদ্ধানে যদি বসন্তধাতু এসে থাকে, তাহলে সেখানে কোকিলও থাকবে, কাঠ-ঠোকরাও থাকবে, লক্ষ্মী-পেঁচাও থাকবে, লতুম-পেঁচাও থাকবে। মনোরাজ্যে যখন নানা পক্ষ আছে, তখন নানা পক্ষী থাকাই স্বাভাবিক। যেমন এক “বউ কথাকও” নিয়ে কবিতা হয় না, তেমনি এক “চোখ-গেল” নিয়ে দর্শনও হয় না।

উপরোক্ত ভাবে বাদসাদ দিয়ে শেষে দাঁড়াল এই যে, আপনার কাগজের যা প্রধান প্রয়োজন, সেইটিই হচ্ছে তার প্রধান অভাব—অর্থাৎ নূতন লেখক। মনে রাখবেন যে, এদেশে আজকাল পাঁচটি সাহিত্য চলবে না,—চলবে যা, তা হচ্ছে জাতীয় সাহিত্য;—যদিচ এ কথার সার্থকতা কি, সে সম্বন্ধে কারো স্পষ্ট ধারণা নেই। কোনও লেখা যদি সাহিত্য না হয়,

তবুও তার আর,মার নেই—যদি তা তথাকথিত জাতীয় হয় । এর কারণ, প্রথমতঃ আমরা বিশেষ্যের চাইতে বিশেষণের অধিক ভক্ত, দ্বিতীয়তঃ আমরা সাহিত্য বিচার করতে পারি আর না পারি, জাত-বিচার করতে জানি । বলা বাহুল্য যে, দুহাতে কখনো জাতীয় সাহিত্য গড়ে তোলা যায় না । দুহাতে অবশ্য তালি বাজে । আপনারা যদি স্বজাতিকে অহর্নিশি করতালি দিতে প্রস্তুত হতেন, তাহলে আপনাদের হাতে জাতীয় সাহিত্য রচিত হত ; কিন্তু সে বিষয়ে আপনাদের যখন তাদৃশ উৎসাহ দেখা যাচ্ছে না, তখন নূতন লেখক চাই ।

বাঙ্গলা লেখবার লোকের অভাব না থাকলেও, “সবুজ পত্রে” লেখবার লোকের অভাব যে কেন ঘটছে, তার কারণ নির্ণয় করতে হলে বঙ্গ-সাহিত্যের বর্তমান অবস্থার পর্যালোচনা করা আবশ্যক ।

বাঙ্গলা-সাহিত্যে যে আজ বসন্তকাল উপস্থিত, “সবুজ পত্রের” আবির্ভাব তার একমাত্র প্রমাণ নয় । ইতিপূর্বেই স্বদেশী জ্ঞানরঞ্জকের নানা ডালপালা বেরিয়েছে, এবং অন্ততঃ তার একটি শাখায়—অর্থাৎ ইতিহাসের অক্ষয় শাখায়—এমন ফুল ফুটেছে ও ফল ধরেছে,—যা সমালোচকদের নখদন্তের অধিকারবহির্ভূত ; কেননা সে ফুল তামার এবং সে ফল পাথরের ।

কিন্তু আপনি পাঠকদের এই ফলাহারে নিমন্ত্রণ করেন নি । আপনি সবুজ পত্রে যে ফল পরিবেষণ করতে চান, সে জ্ঞানরঞ্জকের ফল নয়, কিন্তু তার চাইতে ঢের বেশী মুখরোচক সংসারবিষ-রঞ্জকের সেই ফল, যা আমাদের পূর্বপুরুষেরা অমৃতোপম মনে করতেন । সেই জাতীয় লেখকেরা হচ্ছেন আপনার মনোমত,

যাঁরা কিছুই আবিষ্কার করেন না, কিন্তু সবই উদ্ভাবনা করেন,—
যাঁরা বস্তুজগৎকে বিজ্ঞানের হাতে সমর্পণ করে, মনোজগতের
উপাদান নিয়ে সাহিত্য গড়েন ।

আমাদের সাহিত্যসমাজে কবি দার্শনিকের ভিড়ের ভিতর
বৈজ্ঞানিকদেরই খুঁজে পাওয়া ভার, অতএব আপনার স্বজাতীয়
সাহিত্যিকের অভাব এদেশে মোটেই নেই । তাহলেও তাঁরা
যে উপযাচী হয়ে এসে আপনাদের দলে ভিড়বেন, তার সম্ভাবনা
কম,—কেননা, যাতে করে দল বাঁধে, সেরকম কোনও মতের
সন্ধান আপনাদের লেখায় পাওয়া যায় না ।

সকল দেশেই মনেরও একটা চলতি পথ আছে । অভ্যাস-
বশতঃ এবং সংস্কারবশতঃ দলে দলে লোক সেই পথ-ধরেই
চলতে ভালবাসে, কারণ মুখ্যতঃ সে পথ হচ্ছে জনসাধারণের
জীবনযাত্রার পথ । সে পথ মহাজনদের হাতে রচিত হয়নি,
কিন্তু লোকসমাজের পায়ে গঠিত হয়েছে । আপনারা বঙ্গ-
সরস্বতীকে সেই পরিচিত পথ ছেড়ে একটি নূতন এবং কাঁচা
রাস্তায় চালাতে চান । আপনারা বলেন—“সন্মুখে চল” ;
কিন্তু বুদ্ধিমানেরা বলেন—“নগণস্ত্রাগতোগচ্ছেৎ !” আপনাদের
মত এই যে, সামাজিক জীবনের পদানুসরণ করা কবি কিম্বা
দার্শনিকের মনের কাজ নয় । জীবনকে পথ দেখানই হচ্ছে সে
মনের ধর্ম, অতএব কর্তব্য । সুতরাং আপনাদের দ্বারা উদ্ভাবিত,
অপরিচিত এবং অপরীক্ষিত চিন্তামার্গে অগ্রসর হতে অনেকেই
অস্বীকৃত হবেন । বিশেষতঃ যখন সে পথের একটা নির্দিষ্ট
গন্তব্য স্থান নেই;—যদি বা থাকে ত, সে অলকা বর্তমানভারতের
পরপারে অবস্থিত । শুনতে পাই, ইউরোপের সকল স্থল-পথই
রোমে যায় । তেমনি এদেশের সকল হাঁটা-পথই কাশী যায় ।

কিন্তু আপনারা যখন বাঙ্গালীর মনকে কাশীযাত্রা না করিয়ে সমুদ্রযাত্রা করাতে চান, তখন যে নূতন লেখকেরা সবুজ পত্র নিয়ে আপনাদের সঙ্গে একপংক্তিতে বসে যাবেন, এরূপ আশা করা বৃথা। সুতরাং আপনাদের সেই শ্রেণীর লেখক সংগ্রহ করতে হবে, যাদের কাছে আপনাদের সাহিত্য অচল নয়। এ দলের বহু লোক আপনার হাতের গোড়াতেই আছে।

গত বৈশাখ মাসের “ভারতী” পত্রিকাতে আপনি বিলেত-ফেরত বলে নিজের পরিচয় দিয়েছেন। প্রাচীন ব্রাহ্মণ-সমাজে এ সম্প্রদায়ের স্থান নেই—সুতরাং নূতন ব্রাহ্মণ-সমাজ অর্থাৎ সাহিত্যসমাজে এঁদের তুলে নেওয়া হচ্ছে আপনার পক্ষে কর্তব্য। অতীতের উদ্ধারের পাল্টা-জবাব দিতে হলে, পতিতের উদ্ধার করা আবশ্যিক।

বিলেত-ফেরতদের লেখায় আর কিছু থাক্ আর না থাক্—নূতনত্ব থাক্বেই। ৩মাইকেল দত্ত, শ্রীযুক্ত রবীন্দ্রনাথ ঠাকুর এবং ৩দ্বিজেন্দ্রলাল রায়, এই তিনটি বিলেত-ফেরত কবির ভাষায় ও ভাবে এতটা অপূর্বতা ছিল যে, আদিতে তার জন্ম এঁদের দুজনকে পুরাতনের কাছে অনেক ঠাট্টাবিদ্ৰূপ সহ্য করতে হয়েছিল। ৩দ্বিজেন্দ্রলাল রায়কে যে কেউ ঠাট্টা করেন নি, তার কারণ,—তিনি সকলকে ঠাট্টা করেছেন। এই থেকেই প্রমাণ পাওয়া যায় যে, বিলেত-ফেরতের হাতে পড়লে বঙ্গ-সাহিত্যের চেহারা ফিরে যায়।

আসল কথা, এ যুগের বঙ্গ-সাহিত্য হচ্ছে বিলেতি ঢংয়ের সাহিত্য। যে হিসেবে দাশরথী রায়ের পাঁচালি ও গোবিন্দ অধিকারীর যাত্রা খাঁটি বাঙ্গলা-সাহিত্য—সে হিসেবে নব-সাহিত্য ; বঙ্গ-সাহিত্য নয়। এর জগ্গে কেউ কেউ দুঃখও করেন।

চোখের জল ফেলবার কোনও সুযোগ বাঙ্গালী ছাড়ে না । ব্যাস-বাল্মীকির জন্মও আমরা যেমন কাঁদি, পাঁচালিওয়ালাদের জন্মও আমরা তেমনি কাঁদি । কিন্তু সমালোচকেরা চক্ষের জলে বক্ষ ভাসিয়ে দিলেও, বঙ্গ-সরস্বতী আর গোবিন্দ অধিকারীর অধিকারভুক্ত হবেন না, এবং দাশরথীকেও সারথী করবেন না ।

আমাদের নব-সরস্বতী বিশ্ববিদ্যালয়ে প্রতিষ্ঠিতা, এবং কলেজে-শিক্ষিত লোকেরাই অছাবধি তাঁর সেবা করে আসছেন এবং ভবিষ্যতেও করবেন—কেউ ফোঁটা কেটে, কেউ ছাট পরে । এই প্রভেদের কারণ নির্দেশ করছি । পুরাকালে যখন ক্ষত্রিয়েরা একসঙ্গে সুরা এবং সোম পান করতেন, তখন ব্রাহ্মণেরা এই শান্তি-বচন পাঠ করতেন—

“অহে সুরা ও সোম, তোমাদের জন্ম দেবগণ পৃথক পৃথক রূপে স্থান কল্পনা করিয়াছেন । তুমি তেজস্বিনী সুরা, আর ইনি রাজা সোম, তোমরা আপন আপন স্থানে প্রবেশ কর ।”

আমরাও কলেজে যুগপৎ ইংরাজি সুরা এবং সংস্কৃত সোম পান করেছি । দুর্ভাগ্যক্রমে আমাদের দুটি পাকস্থলী না থাকায়, সেই সুরা আর সোম আমাদের উদরস্থ হয়ে পরস্পর লড়াই করছে । আমাদের সাহিত্য সেই কলহে মুখরিত হয়ে উঠেছে । আমাদের যে নেশা ধরেছে, সে মিশ্র-নেশা । তবে কোথাও বা তাতে সুরার তেজ বেশী, কোথাও বা সোমের । মনোজগতে যে আমরা সকলেই বিলেত-ফেরত, এই কথাটা মনে রাখলে, সাহিত্য-মন্দিরে আপনার সম্প্রদায়কে প্রবেশ করতে সাহিত্যের পাণ্ডারা আর বাধা দেবেন না, বরং উৎসাহই দেবেন ; কেননা

আমরা সকলেই ইংরাজি-সাহিত্যে শিক্ষিত, আপনারা উপরন্তু ইংরাজি-সভ্যতায় দীক্ষিত ।

সামাজিক হিসেবে বিলেত-ফেরতদের এই গুরুগৃহ-বাসের ফল যাই হোক, সাহিত্য-হিসেবে এর ফল ভাল হবারই সম্ভাবনা । কারণ ইংরাজি-জীবনের সঙ্গে ইংরাজি-সাহিত্যের সম্বন্ধ অতি ঘনিষ্ঠ । ইংরাজি-জীবনের সঙ্গে যাঁর সাক্ষাৎ পরিচয় আছে, তিনি জানেন যে, ইউরোপে সাহিত্য হচ্ছে জীবনের প্রকাশ ও প্রতিবাদ;—আর সে পরিচয় যাঁর নেই, তিনি ভাবেন যে, ও শুধু বাদানুবাদ । সাহিত্যের ভাষ্য ও টীকা জীবনসূত্র হতে বিচ্ছিন্ন হয়ে পড়লে, তা শুধু কথার কথা হয়ে ওঠে । সেই কারণে নব-শিক্ষিত-সম্প্রদায়ের জীবনে ইংরাজি-জীবনের প্রভাব যে পরিমাণে কম, তাঁদের রচিত সাহিত্যে ইংরাজি কথার প্রভাব তত বেশী । এর প্রকৃষ্ট প্রমাণ আমাদের স্বদেশী বক্তৃতায় ও লেখায় নিত্য পাওয়া যায় । সংস্কৃত ভাষার ছদ্মবেশ পরিয়েও বিলেতি মনোভাবকে আমরা গোপন করে রাখতে পারিনে । বিদেশী ভাবকে আমি অবশ্য মন থেকে বহিস্কৃত করে দেবার প্রস্তাব করছি নে,—কারণ যে সকল ভাব সাত সমুদ্র তেরো-নদীর পার থেকে উড়ে এসে আমাদের মনোজগতে জুড়ে বসেছে, তাদের বেবাক্ উপড়ে ফেলা সম্ভব নয়, এবং সম্ভব হলেও তাতে মন উজাড় হয়ে যাবে । তবে যা জালে ওঠে তাই যেমন মাছ নয়—তেমনি যা ভুঁই ফুঁড়ে ওঠে তাই গাছ নয় । বিলেতি-জীবনে বিলেতি-সাহিত্য যাচাই করে নিতে না পারলে, এই বিদেশী ভাবের জঙ্গলের মধ্যে থেকে সাহিত্যের উদ্ধান গড়ে তুলতে পারব না । এই পরখ করবার কাজটি সম্ভবতঃ বিলেত-ফেরতেরাই ভাল করতে পারবেন ।

তবে সাহিত্য-সমাজে প্রবেশ করতে এঁরা সহজে স্বীকৃত হবেন না। লিখতে অনুরোধ করবামাত্র এঁরা উত্তর করবেন যে, “আমরা বাঙ্গলা লিখতে জানিনে।” কিন্তু ও কথা শুনে পিছপাও হলে চলবে না। সেকেলে বিলেত-ফেরতেরা বলতেন যে, তাঁরা বাঙ্গলা বলতে পারেন না। অথচ সে বিনয় কিম্বা সে স্পর্দ্ধা যে সত্য নয়, তার প্রমাণ আজ বিলেত-ফেরতের মুখে মুখে পাওয়া যায়। হতে পারে যে, বাঙ্গলা লিখতে পারিনে—এ কথা বলায় প্রমাণ হয় যে, বক্তা ইংরাজি লিখতে পারেন। অথচ এ বিষয়ে কোনও সন্দেহ নেই যে, যে লেখা সাহিত্য বলে গণ্য হতে পারে, সে ইংরাজি কোন দেশী লোক লিখতে পারেন না। যাঁরা আদালতে এবং সভাসমিতিতে ইংরাজি ভাষায় ওকালতি এবং “কলাবতী” করেন, তাঁরা যে ও-ভাষায় শুধু পড়া-মুখস্থ দেন, তা শ্রোতামাত্রেরি বুঝতে পারে। আমরা আইনসম্বন্ধে এবং রাজনীতি সম্বন্ধে ইংরাজ-রাজপুরুষের কাছে নিত্য পরীক্ষা দিতে বাধ্য, সুতরাং ও দুই ক্ষেত্রে মুখস্থ-বিজ্ঞা যার যত বেশী, সে তত বড় বড় প্রাইজ পায়; কিন্তু তার থেকে এ প্রমাণ হয় না যে, ঐ প্রাইজের দৌলতে তাঁরা ইংরাজি সাহিত্য-সমাজে প্রোমোসন্ পান। সুতরাং সাহিত্য বস্তু যে কি, তা যিনি জানেন, তাঁকে ইংরেজি ত্যাগ করে বাঙ্গলা লেখাতে প্রবৃত্ত করতে কিঞ্চিৎ সাধ্য-সাধনার আবশ্যক হবে। বিলেতি বুট ত্যাগ করলে বঙ্গসম্মান যে স্বদেশের সাহিত্যক্ষেত্রে স্বচ্ছন্দে বিচরণ করতে পারেন, সে বিষয়ে আমার সন্দেহ নেই—তবে বুট ছেড়ে যদি পণ্ডিতি খড়ম পারে বেড়াতে হয়, তাহলে অবশ্য আরও বিপদের কথা হবে। কিন্তু বঙ্গ-সরস্বতীর মন্দিরে খোলা পায়ে প্রবেশ করাটাই যে কর্তব্য এবং শোভন,

সুশিক্ষিত ব্যক্তিমাত্রেরই সেটি বোঝা উচিত । অবশ্য পণ্ডিত-খড়মের প্রধান গুণ এই যে, তা যত বেশী খটখটায়মান হবে, লোকে তত “সাধু সাধু” বলবে । কিন্তু এটি মনে রাখা উচিত যে, আশৈশব ও-বস্তুর ব্যবহারে অভ্যস্ত না হলে, খড়মধারীদের পদে পদে হোঁচট খাওয়া অনিবার্য ।

বিলেত-ফেরতকে লেখক তৈরি করার প্রধান বাধা হচ্ছে যে, তাঁরা অধিকাংশই আইন-ব্যবসায়ী । উকিল ও কোকিল হচ্ছে বিভিন্ন শ্রেণীর জীব—যদিচ উভয়েই বাচাল । এর এককে দিয়ে অপরের কাজ করানো যায় না । তবে কথা হচ্ছে এই যে, যে লক্ষ্যায় যায় সেই যেমন রাক্ষস হয়ে ওঠে, তেমনি যে আদালতে যায় সেই যে রাসবিহারী হয়, তা নয় । সকলেই জানেন যে, এ দেশের কত বিজ্ঞাবুদ্ধি আদালতের মাঠে মারা যাচ্ছে । তার কারণ, ও শুষ্ক এবং কঠিন ক্ষেত্রের রস আত্মসাৎ করা দূরে থাকুক, অনেকের মন তাতে শিকড়ও গাড়তে পারে না । এ অবস্থায় যে অনেকে আদালতের মাটিকামুড়ে পড়ে থাকেন, তার কারণ—ও স্থান ত্যাগ করলে হাঁসপাতালে যাওয়া ছাড়া এদেশে স্বাধীন ব্যবসায়ীর আর গত্যন্তর নেই । তাই নিত্যই দেখতে পাওয়া যায়, বহু বিদ্বান ও বুদ্ধিমান লোক, এক ফোঁটা জল না খেয়ে, দিনের পর দিন, ন্যূনশিরে কুজপৃষ্ঠে অগাধ আইনের পুস্তকের ভার বহন করে আদালতে ঘুরে বেড়াচ্ছেন । সে গুরুভারে পৃষ্ঠ-ও ভঙ্গ হলেও যে তাঁরা পৃষ্ঠ-ভঙ্গ দেন না, তার আর একটি কারণ এই যে, এই মরুভূমিতে তাঁরা নিত্য রজতমায়ার মরীচিকা দেখেন । স্মতরাং এই আইনের দেশ একবারে ত্যাগ করতে কেউ রাজি হবেন না ; তবে মধ্যে মধ্যে সবুজ পত্রের ওয়েসিসে এসে বিশ্রামলাভ করতে

এঁদের আপত্তি নাও হতে পারে । আপনি শুধু এইটুকু সতর্ক থাকবেন যে, এমন লোক আপনার বেছে নেওয়া চাই যার, মন ইংরাজের আইনের নজিরবন্দী হয়নি ।

আমার শেষ কথা এই যে, যেন তেন প্রকারেণ আপনার নিজের দলের লোককে,—আর কোনও কারণে না হোক, আত্ম-রক্ষার জন্তও—আপনাকে লেখক তৈরি করে নিতে হবে—কারণ তাঁরা যদি লেখক না হন, তাহলে তাঁরা সব সমালোচক হয়ে উঠবেন । ইতি ।

শ্রাবণ, ১৩২১

কৈফিয়ৎ

সম্প্রতি বঙ্গ-সাহিত্যের ছোট বড় মাঝারি, সকলরকম সমালোচক আমার ভাষার বিরুদ্ধে তীব্র প্রতিবাদ করছেন। সে প্রতিবাদে নানা জাতীয় নানা পত্র মুখরিত হয়ে উঠেছে। সে মরমর্ ধ্বনি শুনে আমি ভীত হলেও চমকিত হইনি, কেননা আমি যখন বাঙ্গলা লেখায় দেশের পথ ধরে চলছি, তখন অবশ্য সাহিত্যের রাজপথ ত্যাগ করেছি। যুথভ্রষ্ট লেখককে সাহিত্যের দলপতিরা যে ভ্রষ্ট বলবেন, এতে আর আশ্চর্য্য কি ? বিশেষতঃ সে রাজপথ যখন শুধু পাকা নয়,—সংস্কৃতভাঙ্গা সুরকি, বিলাতি মাটি এবং বাঙ্গলা চুণ দিয়ে একেবারে সান-বাঁধানো রাস্তা। অনেকের বিশ্বাস যে, সাহিত্যের এই সদর রাস্তাই হচ্ছে একমাত্র সাধু পথ,—বাদবাকী সব গ্রাম্য। তবে জিজ্ঞাস্য-বিষয় এইটুকু যে, এই গ্রাম্যতার অপবাদ আমার ভাষার প্রতি সম্প্রতি দেওয়া হচ্ছে কেন ? আমি প্রবীন লেখক না হলেও, নবীন লেখক নই। আমি বহুকাল ধরে বাঙ্গলা কালিতেই লিখে আসছি। সে কালির ছাপ আমার লেখার গায়ে চিরদিনই রয়েছে। আমার রচনার যে ভঙ্গীটি সহৃদয় পাঠক এবং সমজদার সমালোচকেরা এতদিন হয় নেক্-নজরে দেখে এসেছেন, নয় তার উপর চোখ দেন নি,—আজ কেন সকলে তার উপর চোখ-লাল করছেন ? এর কারণ আমি প্রথমে বুঝে উঠতে পারি নি।

এখন শুনছি সে ভাষার নবাবিকৃত দোষ এই যে, তা “সবুজ পত্রের ভাষা” । সবুজের, তা দোষই বল আর গুণই বল—একটি বিশেষ ধর্ম আছে । ইংরাজেরা বলেন, যে চোখে সে রঙের আলো পড়ে, সে চোখের কাছে অপরের কোন দোষই ছাপা থাকে না । আমাদের দোষ যাই হোক, তা যে গুণী সমাজে মারাত্মক বলে বিবেচিত হয়েছে, তার প্রমাণ এই যে, পরিষৎ-মন্দিরে স্বয়ং বিপিনচন্দ্র পাল মহাশয় “সবুজ পত্রের ভাষার বিরুদ্ধে তীব্র প্রতিবাদ করতে বাধ্য হয়েছিলেন ।” এ সংবাদ শুনে উক্ত পত্রের সম্পাদকের নিশ্চয়ই হরিষে-বিষাদ উপস্থিত হয়েছে । পাল মহাশয়ের ন্যায় খ্যাতনামা ব্যক্তি যার লেখা আলোচনার যোগ্য মনে করেন, তার কলম ধরা সার্থক,—কেননা ওতেই প্রমাণ হয় যে, তার লেখায় প্রাণ আছে । যা মৃত, একমাত্র তাই নিন্দা প্রশংসার বহির্ভূত । অপরপক্ষে বিষন্ন হবার কারণ এই যে, “যেবাং পক্ষে জনার্দন” সেই পাণ্ডুপত্রদের জয় এবং সবুজ পত্রের পরাজয়ও অবশ্যস্বাবী ।—

পাল মহাশয় যে সবুজ পত্রের ভাষার উপর আক্রমণ করেছেন, এ রিপোর্ট নিশ্চয়ই ভুল ; কেননা ও পত্রের কোন বিশেষ ভাষা নেই । উক্ত পত্রের ভিন্ন ভিন্ন লেখকদের রচনার পদ্ধতি ও রীতি সবই পৃথক । পদের নির্বাচন ও তার বিস্তার, প্রতি লেখক নিজের রুচি অনুসারেই করে থাকেন । কাল যখন কলি, তখন লেখবার কলও নিশ্চয় রচিত হবে—কিন্তু ইতিমধ্যে সবুজ পত্রের সম্পাদক যে সে কালের সন্ধান লাভ করেছেন, এমন ত মনে হয় না । সকলের মনোভাব আর কিছু একই ভাষার ছাঁচে ঢালাই করা যেতে পারে না । মানুষের জীবনের ও মনের ছাঁচ তৈয়ারী করা যাঁদের ব্যবসা,

তঁারা অবশ্য এ কথা স্বীকার করবেন না ;—তাহলেও কথাটি সত্য।—“সংগচ্ছকঃ” এই বৈদিক বিধির কৰ্ম্মজীবনে যথেষ্ট সার্থকতা আছে। কিন্তু “সংবদকঃ” এই বিধির সাহিত্যে বিশেষ কোন সার্থকতা নেই। এই কারণেই সাহিত্যের প্রতিলেখককেই তাঁর নিজের মনোভাব নিজের মনোমত ভাষায় প্রকাশ করবার স্বাধীনতা দেওয়া আবশ্যিক। “সবুজ পত্রে” লেখকদের সে স্বাধীনতা যে আছে, তা উদাহরণের সাহায্যে দেখান যেতে পারে। অতএব ধরে নেওয়া যেতে পারে যে, সবুজ পত্রের নয়—আমার ভাষার উপরেই পাল মহাশয় আক্রমণ করেছেন। আমার ভাষার রোগ মারাত্মক হতে পারে, কিন্তু তা সংক্রামক নয়। এক সবুজ পত্রের সম্পাদক ব্যতীত আর কেউই আমার পথানুসরণ কিনা পদানুকরণ করেন না। পাল মহাশয় বঙ্গ-সাহিত্যের সর্বোচ্চ আদালতে আমার ভাষার বিরুদ্ধে যে নালিশ রুজু করেছেন, সম্ভবতঃ তার এক-তরফা ডিক্রী হয়ে গেছে, কেননা সে সময়ে আমি সে ক্ষেত্রে উপস্থিত ছিলাম না। উপস্থিত থাকলে যে, মামলা ডিসমিস্ করিয়ে নিতে পারতুম—তা নয়। পাল মহাশয় বাক্য-জগতে মহাবলী এবং মহা বলিয়ে। আমার এতাদৃশ বাক্যপটুতা নেই যে, আমি তাঁর সঙ্গে বাক্যযুদ্ধে প্রবৃত্ত হতে সাহসী হই। আরজি যদি লিখিত হয়, তাহলে হয় তার লিখিত জবাব, নয় কবুল জবাব দেওয়া যায়। কিন্তু বক্তৃতা হ’ল ধূম জ্যোতি সলিল ও মরুতের সন্নিপাত। উড়ো কথার সঙ্গে কোন্দল করতে হলে, হাওয়ায় ফাঁদ পাতা আবশ্যিক—সে বিত্তে আমার নেই।—তবে পাল মহাশয় যখন এদেশের এযুগের একজন অগ্রগণ্য গুণী, তখন তিনি আমাদের ন্যায় নগণ্য লেখকের বিরুদ্ধে কোন অভিযোগ

উপস্থিত করলে, আমরা তার কৈফিয়ৎ দিতে বাধ্য।

সংবাদপত্রের সংক্ষিপ্ত রিপোর্ট থেকে ঠিক বোঝা গেল না যে, আমার ভাষার বিরুদ্ধে পাল মহাশয়ের অভিযোগটি কি। আমি পূর্বেই স্বীকার করেছি যে, আমার ভাষা আর পাঁচজনের ভাষা হতে ঈষৎ পৃথক। কিন্তু এই স্বাতন্ত্র্য, দোষ বলে গণ্য হতে পারে না। “কিং স্বাতন্ত্র্যম্ অবলম্বসে”—এ ধমক সাহিত্য-সমাজে কোন গুরুজন কোন ক্ষুদ্রজনকে দিতে যে অধিকারী নন, পাল মহাশয়ের ন্যায় বিদ্বান ও বুদ্ধিমান ব্যক্তির নিকট তা কখনই অবিদিত নেই। তারপর কেউ কেউ বলেন যে, আমি খাঁটি বাঙ্গলার পক্ষপাতী। কোনরূপ খাঁটি জিনিসের পক্ষপাতী হওয়াই যে দোষ, এ কথাও বোধহয় কেউ মুখ ফুটে বলবেন না,—বিশেষতঃ যখন সে পদার্থ হচ্ছে মাতৃভাষা। মাতৃভাষার শক্তির উপর নিশ্চাস থাকাটাও যে একটা মহাপাতক এ কথা আর যেই বলুন না কেন, পাল মহাশয় কখনও বলতে পারেন না। তবে খাঁটিমাল বলে যদি ভেজাল চালাবার চেষ্টা করি, তাহলে অবশ্য তার জগ্য আমার জবাবদিহি আছে। যার সঙ্গে যা মেশান উচিত নয়, গোপনে তার সঙ্গে তাই মেশালে ভেজাল হয়। ভেজালের মহা দোষ এই যে, তা উদরস্থ করলে মন্দাগি হয়। কিন্তু আমার ভাষা যে কারও কারও পক্ষে অগ্নিবর্ধক, তার প্রমাণ এই যে, তা গলাধঃকরণ কর্বামাত্র তাঁরা অগ্নিশর্মা হয়ে ওঠেন। সে যাই হোক, মণি-কাঞ্চনের যোগ সাহিত্যে নিন্দনীয় নয়। সোণার বাঙ্গলায় সংস্কৃতের হীরামণিক আমি যদি বসাতে না পেলে থাকি, তাহলে সে আমার অক্ষমতার দরুণ; আমি কারিগর নই বলে যে সাহিত্যে জড়াও কাজ চলবে না—তা হতেই পারে না। খাঁটি

সংস্কৃত যে খাঁটি বাঙ্গলার সঙ্গে খাপ খায়, সে বিষয়ে আর কোন সন্দেহ নেই। বাঙ্গলার গায়ে আলুগা হয়ে বসে শুধু ইংরাজি-ভাঙ্গা হাল সংস্কৃত—ওরফে সাধুশব্দ। আমার ভাষা নাকি কল্-কান্তাই ভাষা? স্মৃতরাং উত্তর দক্ষিণ পূর্ব পশ্চিম থেকে তা আক্রমণ করা সহজ। অপরপক্ষে সাধুভাষার জন্মস্থান হচ্ছে ফোর্ট উইলিয়ামে, স্মৃতরাং তাকে আর আক্রমণ করা চলে না—সে যে কেল্লার ভিতরে বসে আছে।

শুনতে পাই যে, পাল মহাশয়ের মতে আমার ভাষার প্রধান দোষ এই যে, তা দুর্বোধ্য। লিখিত ভাষা যে পরিমাণে মৌখিক ভাষার অনুরূপ হয়, সেই পরিমাণে যে তা দুর্বোধ্য হয়ে ওঠে—এ সত্য আমার জানা ছিল না। শ্রীযুক্ত রমাপ্রসাদ চন্দ মহাশয় বলেন যে, সাধুভাষা লেখা সহজ। একথা সম্পূর্ণ সত্য। তবে যে আমি সাধুভাষার এই সহজ পথ ত্যাগ করে—“ভাষামার্গে ক্লেশ” করি,—তার কারণ আমার ধারণা যে, বাঙ্গালি পাঠকের কাছে চলিত ভাষা সহজবোধ্য। যে প্রসাদগুণের আরাধনা করার দরুণ আমি সমালোচকদের প্রসাদে বঞ্চিত হয়েছি, সেই গুণের অভাবই যে “অসাধুভাষার” প্রথম এবং প্রধান দোষ, এ কথা আমি স্বপ্নেও ভাবিনি। অতএব আমার ভাষার যে এ দোষ আছে, তা আমি বিনা আপত্তিতে মেনে নিতে পারি নি।—তবে যদি পাঠক পড়বার সময় সে ভাষা মনে মনে ইংরাজিতে তর্জমা করে নিতে পারেন না বলে তার অর্থগ্রহণ করা তাঁর পক্ষে কঠিন হয়,—তাহলে অবশ্য আমার রচনা দুর্বোধ্য।

লোকে বলে পাঁজি যখন হাতে আছে, তখন বারটি মঞ্জল কি শনি সে বিষয়ে তর্ক করার অর্থ শুধু সময় এবং বুদ্ধিবৃত্তির অপব্যয় করা। আমি তাই আমার এবং পাল মহাশয়ের লেখার

নমুনা পাশাপাশি ধরে দিচ্ছি, পাঠকেরা বিচার করবেন যে, কোন্ অংশে আমার ভাষা বাদীর ভাষা অপেক্ষা অধিক দুর্বোধ্য । আমাদের উভয়েরই বক্তব্য বিষয়ের মিল আছে, সুতরাং ভাষার তারতম্য সহজেই চোখে পড়বে ।

যৌবনে দাও রাজটীকা (বীরবল)

“এদেশে জ্ঞানী ব্যক্তিদের মতে মনের বসন্ত-ঋতু ও প্রকৃতির যৌবন-কাল—দুই আসায়েরস্তা অতএব শাদনযোগ্য ।

সেই কারণেই জ্ঞানীব্যক্তির আমাদের প্রকৃতির দৃষ্টান্ত অনুসরণ করতে বারণ করেন, এবং নিতাই আমাদের প্রকৃতির উন্টোটান টানতে পরামর্শ দেন ; এবং এই কারণেই মানুষের যৌবনকে বসন্তের প্রভাব হতে দূরে রাখা আবশ্যিক । আমাদের বিশ্বাস মানবজীবনে যৌবন একটা মস্ত কাঁড়!—কোন-রকমে সেটি কাটিতে উঠতে পারলেই বাঁচা যায় । এ অবস্থায়, কি জ্ঞানী কি অজ্ঞানী, সকলেই চান যে, এক লক্ষ্যে বাল্য হতে বার্কিকো উত্তীর্ণ হন ।

(২)

মানুষের খর্ব্ব করে, মানব সমাজকে টবে জিইয়ে রাখায় যে

যৌবনে কৃষ্ণকথা

(শ্রীযুক্ত বিপিনচন্দ্র পাল)

অক্ষয়বাবু বলিয়াছেন “যৌবন বিষম কাল”, কিন্তু চারুপাঠ পড়িয়াও আমরা যৌবনের বিষমত্বটা অনুভব করি নাই । আজিকালি-কার নব যুবকদিগকে দেখিয়া মনে হয় যেন এ দেশ হইতে বসন্তের মতন যৌবনও একরূপ চিরবিদায় লইয়াছে ।.....চক্ষে দেখি তিনটা ঋতু—গ্রীষ্ম বর্ষা আর শীত ! কিন্তু বসন্তের সাক্ষাৎকার পাওয়া একরূপ অসাধ্য । সেইরূপ এদেশে মানুষের জীবনেও বাল্য প্রৌঢ় ও বার্কিক্য, এই তিন কালই দেখা যায় । বাল্য ফুরাইতে না ফুরাইতে প্রৌঢ় প্রাপ্ত হইয়া থাকে ।

(২)

টবেতে বড় গাছ জন্মায় না ও বাড়ে না, সেইরূপ এক একটা ধর্ম্মের ও নীতির টব সাজাইয়া মানুষ-গুলোকে তাতে পুঁতিয়া রাখিলে

বিশেষ কিছু অহঙ্কার করবার অছে, এমন ত আমার মনে হয় না।

তাদের মনুষ্যত্বও ফুটিয়া উঠিবার অবসর পায় না।

(৩)

৩

দেহের যৌবনের আস্তে, বার্ক-কোর রাজ্যে যৌবনের অধিকার বিস্তার করবার শক্তি আমরা সমাজ হতেই সংগ্রহ করতে পারি। সগুণ সমাজের এই জীবন-প্রবাহ যিনি নিজের অন্তরে টেনে নিতে পারবেন, তাঁর মনের যৌবনের ক্ষয়ের সম্ভাবনা নেই।

যে সকল যুবক এই যৌবনের সঙ্কেত পাইয়াছিলেন, তাঁরা আজি পর্যন্ত তেমন বুড়া হইতে পারেন নাই। বিদ্যাসাগর প্রভৃতির যৌবন আমরণ পর্যন্ত বাঁচিয়াছিল। কন্স-বীর অশ্বিনীকুমার ও সুরাসিক মনোরঞ্জন, ইহাদের দেখিয়া বয়সের সঙ্গে যৌবনের কোনও অপরিহার্য সম্বন্ধ আছে, এমন মনে হয় না। এঁরা এখনও যৌবনের জের টানিতেছেন।

(সবুজপত্র—জ্যৈষ্ঠ ১৩২১)

(প্রবাহিনী, ৯ই শ্রাবণ ১৩২১)

এর কোন্ পাশে আলে আর কোন্ পাশে ছায়া, তার বিচার পাঠকসমাজই করবেন।

ধ্বনির অপেক্ষা প্রতিধ্বনি যদি বেশী স্পর্শ হয়, তাহলে অবশ্য পাল মহাশয়ের ভাষা আমার ভাষা অপেক্ষা বেশী স্পর্শ।

আসল কথা, ভাষার বিচার শুধু বাক্যবিতণ্ডায় পরিণত হয়, যদি না আমরা ধরতে পারি যে, তথাকথিত সাধু-ভাষার সঙ্গে তথাকথিত অসাধুভাষার পার্থক্যটি কোথায় এবং কতদূর।

শ্রীযুক্ত রমাপ্রসাদ চন্দ বলেছেন যে, আর পাঁচজনে যে ভাষায় লেখেন, আমিও সেই একই ভাষায় লিখি,—তফাৎ এইটুকু যে, ক্রিয়াপদ এবং সর্বনামের ব্যবহার আমি মৌখিক ভাষার অনুরূপই করে থাকি। চন্দ মহাশয়ের মত আমি শিরোধার্য্য করি, কেননা তাঁর এ কথা সম্পূর্ণ সত্য।

আমি “তাহার” পরিবর্তে “তার” লিখি, অর্থাৎ সাধু সর্ব-
নামের হৃদয়ের হা বাদ দিই। “হায়” “হায়” বাদ দিলে
বাক্সলায় যে পদ্য হয় না, তা জানি ; কিন্তু “হা হা” বাদ দিলে
যে গদ্য হয় না, এ ধারণা আমার ছিল না। এ বিষয়ে কিন্তু
পাল মহাশয় আমার সঙ্গে একমত, কেননা তাঁর লেখাতেও উক্ত
“হা” উহ্য থেকে যায়।

শেষটা দাঁড়াল এই যে, পাল মহাশয়ের ভাষার সঙ্গে আমার
ভাষার যা কিছু প্রভেদ, তা হচ্ছে ক্রিয়ার বিভক্তিগত। আমি
লিখি “করে”, তিনি লেখেন “করিয়া”। “করে”র বদলে “করিয়া”
লিখলেই যে ভাষা সুমার্জিত হয়ে ওঠে, এ বিশ্বাস আমার থাকলে
আমি সাহিত্যের সাধুপথ কখনই ত্যাগ করতুম না। আমার
বিশ্বাস অত সস্তা উপায়ে স্থলেখক হওয়া যায় না, কেননা
এক স্বরবর্ণের গুণে শব্দের ব্যঞ্জনশক্তি তাদৃশ বৃদ্ধিলাভ
করে না।

শ্রীযুক্ত অক্ষয়চন্দ্র সরকার তাঁর অভিভাষণে বলেছেন যে,
“এ এ” আর “ইয়ে ইয়ে” এ দুয়ের ভিতর ভাষার কোনও
প্রভেদ নেই,—প্রভেদ যা আছে, তা বানানের। এ কথা যদি সত্য
হয়,—এবং আমার বিশ্বাস তা সত্য,—তাহলে পাল মহাশয়ের
আমার ভাষার উপর যে আক্রমণ, তা আসলে বানানের উপরে
গিয়েই পড়েছে। বানান আমার কাছে চিরদিনই একটি মহা
সমস্যা, এবং সে সমস্যার উত্তর-মীমাংসা করা আমার সাধের
অতীত। অসাধু ভাষার বিপদ যেমন এই বানানের দিকে,
সাধুভাষারও বিপদ তেমনি বানানোর দিকে। ও ভাষায় লিখতে
বসলে যখন পাল মহাশয়ের চাঁচা কলমের মুখ ফস্কে “আমরণ
পর্যাপ্ত পাঁচিয়াছিল” এইরূপ বাক্য বেরিয়ে পড়ে—তখন আমা-

দের কাঁচা কলমের উপর ভরসা কি ? এহেন সাধুহস্ত হতে মুক্তিলাভ না করলে, বঙ্গ-সরস্বতী “আমরণ পর্য্যন্ত বাঁচিয়া” নয়—মরিয়াই থাকিবে ।

আশ্বিন, ১৩২১ ।

..

নারীর পত্র

-২০৫-

(বীরবলের মারফৎ প্রাপ্ত)

বান্ধালী স্ত্রীলোকের পক্ষে ইউরোপের যুদ্ধের বিষয় মতামত প্রকাশ করা যে নিতান্ত হাস্যকর জিনিস তা আমি বিলক্ষণ জানি, অথচ আমি যে সেই কাজ করতে উদ্বৃত্ত হয়েছি তার কারণ, যখন অনেক গণ্যমাণ্য লোক এই যুদ্ধ-উপলক্ষ্যে কথায় ও কাজে নিজেদের উপহাসাস্পদ করতে কুণ্ঠিত হচ্ছেন না, তখন নগণ্য আমরাই বা পিছুপাও হব কেন ?

এ কথা শুনে হয় ত তোমরা বলবে, পুরুষের পক্ষে যা করা স্বাভাবিক মেয়ের পক্ষে তা নয়, অতএব পুরুষের অনুকরণ করা স্ত্রীলোকের পক্ষে অনধিকার চর্চা। পুরুষালি-মেয়ে যে একটি অদ্ভুত জীব এ কথা আমরা মানি, কিন্তু মেয়েলি-পুরুষ যে তাঁর চাইতেও বেশী অদ্ভুত জীব এ কথা যে তোমরা মানো না তাঁর প্রমাণ তোমাদের কথায় ও কাজে নিত্য পাওয়া যায়।

সে যাই হোক, যুদ্ধসম্বন্ধে যে এদেশে স্ত্রীপুরুষের কোনও অধিকারভেদ নেই সে ত প্রত্যক্ষ সত্য। যুদ্ধ তোমরাও কর না, আমরাও করি নে। পল্টন তোমরাও দেখেছ, আমরাও দেখেছি কিন্তু যুদ্ধ তোমরাও দেখ নি, আমরাও দেখি নি। এ বিষয়ে যা-কিছু জ্ঞান তোমরাও যেখান থেকে সংগ্রহ করেছ, আমরাও সেইখান থেকেই করেছি—অর্থাৎ ইতিহাস-নামক কেতাব থেকে। তবে আমাদের ইতিহাস হচ্ছে রামায়ণ

মহাভারত আর তোমাদের ইংরাজি ও ফরাসি । ভাষা আলাদা হলেও দুইই শোনা কথা এবং সমান বিশ্বাস্ত । লড়াই অবশ্য তোমরা কর, কিন্তু সে ঘরের ভিতর ও আমাদের সঙ্গে, এবং তাতেও জিৎ বরাবর যে তোমাদেরই হয় তা নয় । বরং সত্যকথা বলতে হলে, বাল্যবিবাহের দৌলতে, বালিকা-বিছালয়ের কাছে বিশ্ববিছালয়ের মাথা হেঁট করেই থাকতে হয় । সুতরাং ইউরোপের এই চতুরঙ্গ খেলা সম্বন্ধে তোমরা যদি উপর-চাল দিতে পার, তবে আমরা যে কেন পারব না তা বোঝা শক্ত ।

কিন্তু ভয় নেই, আমি এ পত্রে কোনরূপ অধিকার-বহির্ভূত কাজ করতে যাচ্চিনে—অর্থাৎ তোমাদের মত কোন উপর-চাল দেব না, কেননা কেউ তা নেবে না ।

আমাদের মতের যে কোন মূল্য নেই তা আমরা অস্বীকার করিনে, অপরপক্ষে আমাদের অমত যে মহামূল্য, তাও তোমরা অস্বীকার করতে পার না । আমরা তোমাদের মতে চলি, তোমরা আমাদের অমতে চল না । আমাদের “না”র কাছে তোমাদের “হাঁ” নিত্য বাধা পায় । আসল কথা, এই অমতের বলে আমরা তোমাদের চালমাৎ করে রেখেছি ।

এক্ষেত্রেও তাই আমি এই যুদ্ধসম্বন্ধে আমার মত নয়, অমত প্রকাশ করতে সাহসী হচ্ছি—কেননা “যুদ্ধ কর”—এ কথা যদি পুরুষে জোর করে বলতে পারে তাহলে “যুদ্ধ কর না” এ কথা জোর করে বলতে স্ত্রীলোকে কেন না পারবে? আমরা কাপুরুষ না হলেও না-পুরুষ ত বটেই ।

যুদ্ধ যে কন্সিনকালে কোনও দেশে স্ত্রীলোকের অভিপ্রেত হতে পারে না এ বিষয়ে বেশী কথা বলা বৃথা । যুদ্ধ জিনিসটি চোখে না দেখলেও ব্যাপারখানা যে কি তা অনুমান করা কঠিন

নয় । বঙ্গ-ভাষার মহাকাব্যে যুদ্ধের যে বর্ণনা পড়া যায় আসল ঘটনা অবশ্য তার অনুরূপ নয় । ইউরোপে লক্ষ লক্ষ লোক মিলে আজ যে খেলা খেলছে সে আর যাই হোক ছেলেখেলা নয় । সূর্যাগ্রহণ ভূমিকম্প ঝড়জল অগ্ন্যুৎপাতের একত্র আবির্ভাবে পৃথিবীর যে রকম অবস্থা হয়—এই যুদ্ধে ইউরোপের তদ্রূপ অবস্থা হয়েছে । এই মহাপ্রলয়গ্রস্ত কোটি কোটি নর-নারীর মৃত্যুযন্ত্রনার ও প্রাণভয়ের আর্তনাদ আমাদের কানে অতি শীঘ্র ও অতি সহজে পৌঁছয় ;—সম্ভবতঃ তা তোমাদের শ্রুতিগোচরই হয় না । অপর কোন কারণ না থাকলেও এই এক কারণে মানুষের হাতে-গড়া এই মহামারী-ব্যাপার আমাদের কাছে চিরকালের জন্য হেয় হয়ে থাকত । মায়ের জাত এমন করে লোক-কাঁদাবার কখনই পক্ষপাতী হতে পারে না । আমরা নবজীবনের সৃষ্টি করি, সুতরাং সেই জীবন রক্ষা করাই আমাদের মতে মানবের সর্বপ্রধান ধর্ম এবং তার ধ্বংস করা মহাপাপ । তারপর, এই মহাপাপের সৃষ্টি করে পুরুষে, আর তার পুরো শাস্তি ভোগ করি আমরা । অতএব যুদ্ধব্যাপারটি আমাদের কি প্রকৃতি, কি স্বার্থ, উভয়েরই সম্পূর্ণ বিরোধী ।

তোমরা হয় ত বলবে যে, যুদ্ধের প্রতি স্ত্রীজাতির এই সহজ বিদ্বেষের মূলে-কোনওরূপ যুক্তিসঙ্গত কারণ নেই । সেই কারণে পুরুষে যুদ্ধসম্বন্ধে স্ত্রীলোকের মতামত সম্পূর্ণ উপেক্ষা করতে বাধ্য । পৃথিবীর বড় বড় জিনিসের ঐচ্ছানুচিত্য কেবলমাত্র হৃদয় দিয়ে যাচাই করে নেওয়া যায় না । এসব ঘটনার সার্থকতা বোঝবার জন্য বিছা চাই, বুদ্ধি চাই ।

বিছা যে আমাদের নেই—সে ত তোমাদের গুণে কিন্তু সেই জন্যে বুদ্ধি যে আমাদের মোটেই নেই এ কথা আমরা স্বীকার

করতে পারি নে। কারণ, ও-ধারণাটি তোমাদের প্রিয় হলেও সত্য নয়। সুতরাং যুদ্ধ করা সম্ভব কি অসম্ভব—তা আমরা আমাদের ক্ষুদ্র বুদ্ধির সাহায্যে বিচার করতে বাধ্য।

যুদ্ধের সকল সাজসজ্জা সকল রঙচঙে ছাড়িয়ে দেখলে দেখা যায় যে, ও-ব্যাপারটি হত্যা ও আত্মহত্যা ব্যতীত আর কিছুই নয়। অথচ এটি প্রত্যক্ষ সত্য যে, মানবজীবনের উদ্দেশ্য যাই হোক, পরকে মারা কিম্বা নিজে মরা সে উদ্দেশ্য নয়।

মানুষ পশু হলেও যে হিংস্রপশু নয় তার প্রমাণ তার দেহ। আমরা হাতে, পায়ে, মুখে, মাথায় অস্ত্রশস্ত্র ধারণ করে' ভূমিষ্ঠ হইনে, তোমরাও হও না। মানুষের অবশ্য নখদন্ত আছে কিন্তু সে নখ ভালুকের নয় এবং সে দাঁত সাপের নয়। অনেকের অবশ্য মস্তকে গোজাতির মগজ আছে এবং অনেকের দেহে গণ্ডারের চর্ম আছে কিন্তু তাই বলে এ অনুমান করা অসম্ভব হবে যে, আমাদের পূর্বপুরুষদের ললাটে শৃঙ্গ এবং নাসিকায় খড়গ ছিল। শুনতে পাই যে, আদিম মানবের রুহৎ লাজুল ছিল—বর্তমানে ও-অঙ্গটি অনাবশ্যক-বিধায় সেটি আমাদের দেহচ্যুত হয়েছে। কিন্তু যুদ্ধ করাই যদি যথার্থ মানবধর্ম হয় তাহলে পুরুষ-মানুষের অন্ততঃ বীর-পুরুষের মাথায় শিং এবং নাকের খাঁড়া খসে পড়বার কোনও কারণ ছিল না। মানুষের কেবল একটিমাত্র ভগবদন্ত মহাত্ম আছে—সেটি হচ্ছে রসনা। সুতরাং মানুষের যুদ্ধপ্রবৃত্তি ঐ অস্ত্রের সাহায্যেই করা তার পক্ষে স্বাভাবিক এবং কর্তব্য।

তারপর, মানুষ যে আত্মহত্যা করবার জন্য এ পৃথিবীতে আসেনি, তার প্রমাণ মানুষের সকল কাজ, সকল যত্ন, সকল পরিশ্রমের একমাত্র উদ্দেশ্য হচ্ছে জীবন ধারণ করা। ওই এক

মূল-প্রবৃত্তি হতে মানুষের শুধু সকল কর্মের নয়, সকল ধর্মেরও উৎপত্তি । ইহজীবনের পরিমিত সীমা অতিক্রম করবার অদম্য প্রবৃত্তি থেকেই মানুষে দেহাতিরিক্ত আত্মা এবং ইহলোকাতিরিক্ত পরলোকের অস্তিত্ব আবিষ্কার করেছে । এই কারণে, যে কর্মের দ্বারা জীবনরক্ষা সিদ্ধ হয় তাই মানবের নিকট যথার্থ কর্তব্য কর্ম এবং যে ধর্মের চর্চায় আত্মার অমরত্ব সিদ্ধ হয় তাই মানবের নিকটগ্রাহ্য ধর্ম । তোমাদের মস্তিষ্কপ্রসূত দর্শনবিজ্ঞান হাজার প্রমাণাভাব দেখালেও মানুষের মন থেকে যে ধর্মবিশ্বাস দূর হয় না তার কারণ মস্তিষ্ক মজ্জার বিকারমাত্র,—মজ্জা মস্তিষ্কের বিকার নয় । এবং বাঁচবার ইচ্ছা মানুষের মজ্জাগত । মানুষের কাছে সব জিনিসের চাইতে প্রাণের মূল্য অধিক বলেই প্রাণবধ করাটাই মানবসমাজে সব চাইতে বড় পাপ বলে গণ্য ।

এই কারণেই “অহিংসা পরম ধর্ম”—এই বাক্যাটিই ধর্মের প্রথম না হোক, শেষ কথা । এই কথাটি সত্য বলে’ গ্রাহ্য করে’ নিলে যুদ্ধের স্বপক্ষে বলবার আর কোনও কথাই থাকে না । একের পক্ষে অপরকে বধ করা যদি পাপ হয় তাহলে অনেকে মিলে অনেককে বধ করা যে কি করে’ ধর্ম হ’তে পারে তা আমাদের ক্ষুদ্র বুদ্ধির অগম্য । যে গণিতশাস্ত্রের সাহায্যে অসংখ্য অকর্তব্যকে যোগ দিয়ে একটি মহৎ কর্তব্যে পরিণত করা হয় সে শাস্ত্র আমাদের জানা নেই ।

যুদ্ধের মূল যে হিংসা, এবং বীরত্ব যে হিংস্রতার নামান্তরমাত্র সে বিষয়ে অন্ধ থাকা কঠিন ।

বীরপুরুষনামক জীবের সঙ্গে অবশ্য আমাদের সাক্ষাৎ পরিচয় নেই । যাত্রাদলের ভীম আর থিয়েটারের প্রতাপাদিত্য হচ্ছে আমাদের বীরদের আদর্শ । কিন্তু রঙ্গভূমির বীরত্ব এবং রণভূমির

বীরত্বের মধ্যে নিশ্চয়ই অনেকটা প্রভেদ আছে। কেননা, অভিনয়ের উদ্দেশ্য হচ্ছে লোককে আমোদ দেওয়া আর যুদ্ধের উদ্দেশ্য হচ্ছে লোককে পীড়ন করা। সুতরাং আসল বীররস যে পরিমাণে করুণ-রসাত্মক নকল বীররস সেই-পরিমাণে হাস্ত-রসাত্মক। এর এক থেকে অবশ্য অপরের পরিচয় পাওয়া যায় না। তবে যে-সকল গুণের সমবায়ে বীরচরিত্র গঠিত হয় তার একটি বাদ আর সব গুণই আমাদের শরীরে আছে বলে, বীরত্বের বিচার করবার পক্ষে আমরা বিশেষরূপে যোগ্য।

শুনতে পাই, ধৈর্য্য হচ্ছে বীর্য্যের একটি প্রধান অঙ্গ। এ গুণে তোমাদের অপেক্ষা আমরা শতগুণে শ্রেষ্ঠ। ব্রত নিয়ম উপবাস জাগরণে আমরা নিত্য অভ্যস্ত সুতরাং কষ্ট-সহিষ্ণুতা আমাদের অঙ্গের ভূষণ। বিনা-বিচারে, বিনা-ওজরে, পরের ছকুমে চলা নাকি যোদ্ধার একটি প্রধান ধর্ম্ম। এ ধর্ম্ম আমাদের মত কে পালন করতে পারে? আমাদের মত কলের পুঁতুল জর্য়্যাগীর রাজকারখানাতেও তৈরি হয় নি। তারপর, কারণে কিস্তি অকারণে, অকাতরে প্রাণ-দেওয়া যদি বীরত্বের পরাকাষ্ঠা হয়,—তাহলে আমরা বীরশ্রেষ্ঠ, কারণ তোমাদের পিতামহেরা যখন জ্বরে মরতেন সেই সঙ্গে আমরা পুড়ে মরতুম। এসব গুণসত্ত্বেও যে আমরা বীরজাতি বলে গণ্য হই নি তার কারণ আমরা পরের জন্ত মরতে জানি কিন্তু পরকে মারতে জানিনে। যে প্রবৃত্তির অভাববশতঃ স্ত্রীধর্ম্ম হয় আর সম্ভাববশতঃ ক্ষাত্রধর্ম্ম, শ্রেয়ঃ—সে হচ্ছে হিংসা। বীরপুরুষ কিছুই সাধ করে তাগ করতে চান না;—সবই গায়ের জোরে ভোগ করতে চান। শাস্ত্রে বলে—“বীরভোগা বস্তুন্ধরা”। বীরের ধর্ম্ম হচ্ছে, পৃথিবীর সুবর্ণ-পুষ্প চয়ন করা—অবশ্য আমারও তার অন্তর্ভূত।

তাই আমাদের সঙ্গে বীরপুরুষের চিরকাল ভক্ষ্য-ভক্ষক সম্বন্ধ । বীর প্রাণ দান করতে পারেন না—যদি যুদ্ধক্ষেত্রে দৈবাৎ তা হারান ত সে তাঁর কপাল আর তাঁর শত্রুর হাতযশ । বীরত্বের মান্য আজও যে পৃথিবীতে আছে তার কারণ বীরত্ব মানুষের মনে ভয়ের উদ্ভেক করে, শ্রদ্ধার নয় । সুতরাং যুদ্ধের মাহাত্ম্য মানুষের বল নয় দুর্বলতার উপরেই প্রতিষ্ঠিত । যে কাজ মানুষের পক্ষে স্বাভাবিক নয়, মানুষের ভীৰুতাই যার মূলভিত্তি, যে কর্মের ফলে সমাজের অশেষ ক্ষতি হয়—তা যে কি করে ধর্ম্য হতে পারে তা আমাদের ধর্ম্যজ্ঞানে আসে না ।

পুরাকালে পুরুষ-মানুষে যুদ্ধ করাটাই ধর্ম্য মনে করতেন এবং স্ত্রীলোকে চিরকালই তা অধর্ম্য মনে করত । কালক্রমে পুরুষের মনেও এ বিষয়ে ধর্ম্যাধর্ম্যের জ্ঞান জন্মেছে । এখন যুদ্ধ দুই শ্রেণীতে বিভক্ত,—এক ধর্ম্যযুদ্ধ আর এক অধর্ম্যযুদ্ধ । শুনতে পাই, এ কার্যের ধর্ম্যাধর্ম্য, তার কারণের উপর নির্ভর করে । সভ্যজাতির মতে আত্মরক্ষার জন্য যে যুদ্ধ একমাত্র তাই ধর্ম্য,—বাদ-বাকি সকল কারণেই তা অধর্ম্য । এ মতের প্রতিবাদ করা অসম্ভব হলেও পরীক্ষা করা আবশ্যিক । কেন না, কথাটা শুনতে যত সহজ আসলে তত নয় । * এই দেখ না, ইউরোপে কোনো জাতিই এই যুদ্ধের দায়িত্ব নিজের ঘাড়ে নিতে চান না এবং পরস্পর পরস্পরকে অধর্ম্যযুদ্ধ করবার দোষে দোষী করছেন—অথচ এঁরা সকলেই সভ্য, সকলেই বিদ্বান ও সকলেই বুদ্ধিমান । এই মতভেদের কারণ কি এই নয় যে, আত্মরক্ষা-শব্দের অর্থটি তেমন স্পর্শিত নয় । “আত্ম”-শব্দের অর্থ কে কি বোঝেন, আত্মজ্ঞানের পরিসরটি কার কত বিস্তৃত—তার দ্বারাই তাঁর আত্মরক্ষার্থ যুদ্ধক্ষেত্রের প্রসারও নির্ণীত হয় ।

পরদ্রব্যে যে মানুষের আত্মজ্ঞান জন্মাতে পারে তার প্রমাণ পৃথিবীতে বহু ব্যক্তি এবং বহু জাতি নিতাই দিয়ে থাকেন । সুতরাং কোন্ পক্ষ যে সুদ্ধ আত্মরক্ষার জন্ত যুদ্ধ করছেন আর কোন্ পক্ষ যে সুদ্ধ পরদ্রোহিতার জন্ত যুদ্ধ করছেন—নিরপেক্ষ দর্শকের পক্ষে তা বলা কঠিন ।

আত্মরক্ষা-শব্দের অবশ্য একটা জানা অর্থ আছে ; সে হচ্ছে আক্রমণকারীর হাত থেকে নিজের প্রাণ ও নিজের ধন রক্ষা করা ; এবং সে ধনও বর্তমান ধন,—ভূত কিস্মা ভবিষ্যৎ নয় । কেননা, গত ধন পুনরুদ্ধার কিস্মা অনাগত ধন আত্মসাৎ করবার জন্ত পরকে আক্রমণ করা দরকার ।

পৃথিবীর সকল জাতিই যদি উক্ত সহজ ও সঙ্কীর্ণ অর্থে আত্মরক্ষা ব্যতীত অপর কোনও কারণে যুদ্ধ করতে গররাজি হন তাহলে যুদ্ধ কালই বন্ধ হয়ে যাবে । কারণ, কেউ যদি আক্রমণ না করে ত আর কাউকেও আত্মরক্ষা করতে হবে না । যুদ্ধ থেকে নিরস্ত হওয়াই যদি পুরুষজাতির মনোগত অভিপ্রায় হয়, তাহলে নিরস্ত হওয়াই তার অতি সহজ উপায় । সুতরাং যতদিন দামামাকাড়া ঢালতুলোয়ার গুলিগোলা ইত্যাদি সভ্যতার সর্ব-প্রধান অঙ্গ হয়ে থাকবে, ততদিন আত্মরক্ষা করা যে যুদ্ধের একমাত্র কিস্মা প্রধান কর্তব্য এ কথা বলা চলবে, কিন্তু মানা চলবে না ।

আসল কথা, যুদ্ধের দ্বারা আত্মরক্ষা করা দুর্বল জাতির পক্ষে অসম্ভব এবং প্রবল জাতির পক্ষে অনাবশ্যক ।

দুর্বলের পক্ষে ও-উপায়ে আত্মরক্ষা করবার চেষ্টা করার অর্থ আত্মহত্যা করা । হাতে হাতে প্রমাণ—বেল্জিয়াম ।

যুদ্ধ আমাদের মতে একমাত্র সেই-ক্ষেত্রে ধর্ম যে-ক্ষেত্রে-

প্রবলের অত্যাচারের বিরুদ্ধে প্রতিবাদ-স্বরূপে, দুর্বল এই উপায়ে আত্মরক্ষা নয়, আত্মবিসর্জন করে । উদাহরণ—বেল্জিয়াম ।

সত্য কথা বলতে গেলে, মানুষে হয় অর্থের জন্ম নয় প্রভুত্বের জন্ম, হয় রাজ্যের জন্ম নয় গৌরবের জন্ম—পরের ঘাড়ে গিয়ে পড়ে । পরার্থ-নাশ এবং স্বার্থসাধনের জন্মই যুদ্ধ আরম্ভ করা হয় । যুদ্ধের মূলে আত্মজ্ঞান নেই, আছে শুধু অহংজ্ঞান । যুদ্ধের উৎপত্তি থেকেই তার চরিত্রের পরিচয় পাওয়া যায় ।

যুদ্ধ যে ধর্ম্মকার্য্য এ প্রমাণ করতে হলে, তৎপূর্ব্বে “হিংসা পরম ধর্ম্ম” এই সত্যের প্রতিষ্ঠা করা দরকার । তোমরা অবশ্য এ কর্তব্যকার্য্যে পরাঙ্গুখ হও নি । যুদ্ধের ধর্ম্ম যে বুদ্ধির ধর্ম্ম নয় এই প্রমাণ করবার জন্ম, শূন্যে পাই, বুদ্ধিমান পুরুষে নানা দর্শন ও বিজ্ঞান রচনা করেছেন ।

বাক্সলার মাসিকপত্রের প্রসাদে এসম্বন্ধে পণ্ডিতমণ্ডলীর বিধানগুলির কিঞ্চিৎ পরিচয় আমরাও লাভ করেছি । দেশের ও বিদেশের এই সকল ব্রাহ্মণ-পণ্ডিতদের মাথার না হোক, বুকের মাপ আমরা নিতে জানি । বড় বড় কথার আড়ালেও তোমাদের হৃদয়-বিকার আমাদের কাছে ধরা পড়ে । তাই তোমাদের দর্শনবিজ্ঞানে তোমাদের ঠকাতে পারে, আমাদের পারে না ।

শূন্যে পাই, অক্লান্ত গবেষণার ফলে বৈজ্ঞানিকরা আবিষ্কার করেছেন যে, মানুষ পুচ্ছ-বিবাণহীন হলেও পশু । এবং যেহেতু পশুর জীবন সংগ্রাম-সাপেক্ষ অতএব দুর্বলের উপর আক্রমণ এবং প্রবলের নিকট হতে পলায়ন করাই মানুষের স্বধর্ম্ম । ছল ও বল প্রয়োগের দ্বারাই মানুষ তার অন্তর্নিহিত মানসিক ও শারীরিক শক্তির পূর্ণ পরিণতি লাভ করতে পারে । সুতরাং

পশুত্বের চর্চা করাই হচ্ছে যথার্থ মনুষ্যত্বের চর্চা করা । যে-সত্যতা নিষ্ঠুরতার উপর প্রতিষ্ঠিত নয়, সে-সত্যতা শক্তিহীন ও প্রাণহীন, কেননা হিংসাই হচ্ছে জীবজগতের মূল সত্য । এবং সেই সত্যের উপর জীবন প্রতিষ্ঠিত করাই হচ্ছে ধর্ম । হিংসা ও প্রতিহিংসার ঘাত-প্রতিঘাতই মানবের উন্নতির একমাত্র কারণ । এবং নিজের নিজের উন্নতি সাধন করাই যে পরম পুরুষার্থ—সে বিষয়ে আর সন্দেহ নেই । আমরা অজ্ঞযুগের উত্তরাধিকারীসমূহে যে সকল নীতিজ্ঞান লাভ করেছি তার চর্চায় মানুষকে শুধু দুর্বল করে । স্মৃতরাং নবনীতির বিধান এই যে, নিঃসমভাবে যুদ্ধ কর, অবশ্য দুর্বলের সঙ্গে ।

এতটা নয় সত্য মানুষে সহজে বুকে তুলে নিতে পারে না ;—কেননা তা তার যুগসঞ্চিত সংস্কারের বিরুদ্ধে যায় । সাধারণ লোকের সে পরিমাণ বুদ্ধিবল নেই, যাতে করে’ জীব-জগতে অবরোহণ করাই যে আরোহণ করবার একমাত্র উপায়—এ সত্য সহজে আয়ত্ত্ব করতে পারে । তা ছাড়া, সকলের সে পরিমাণ তীক্ষ্ণ অন্তর্দৃষ্টি নেই যার সাহায্যে নিজের বুকের ভিতর হিংস্র পশুর সাক্ষাৎকার লাভ করতে পারে ।

স্মৃতরাং এই বৈজ্ঞানিক সত্যটিকে সাধারণের নিকট গ্রাহ্য করাতে হলে তাকে ধর্ম ও নীতির সাজে সজ্জিত করে বার করা দরকার । অতঃপর বৈজ্ঞানিকরা সেই উপায়ই অবলম্বন করেছেন ।

স্মনীতির ছদ্মবেশধারী বৈজ্ঞানিক মত এই । প্রতি লোক নিরীহ হলেও তাদের সমষ্টিতে সমাজ-নামক যে বিরাট-পুরুষের সৃষ্টি হয়, সে একটি ভীষণ জীব । এই বিরাট-পুরুষের প্রাণ আছে, আত্মা নেই—রতি আছে, বুদ্ধি নেই—গতি আছে, দৃষ্টি

নেই। সমাজ শুধু বাঁচতে চায় ও বাড়তে চায়, এই তার জীবনের ধর্ম;—অন্য কোনও ধর্মাদর্শ তাকে স্পর্শ করে না ! সমাজ হচ্ছে একমাত্র অঙ্গী এবং ব্যক্তিমাত্রেই তার অঙ্গ। সুতরাং ব্যক্তিমাত্রেই সমাজের অধীন কিন্তু সমাজ কোনও ব্যক্তিবিশেষের অধীন নয়। এবং যেহেতু সমাজের বাইরে আমাদের কোনও অস্তিত্ব নেই—সে কারণ সমাজকে রক্ষা করা এবং তার অভ্যুদয় সাধন করাই হচ্ছে মানুষের পক্ষে সর্বপ্রধান কর্তব্য। সহস্র সহস্র লোকের আত্মবলিদানের ফলে এই বিরাট-পুরুষের দেহ পুষ্ট হয়। লোকে বলে যে, যে মণ্ডপের আগ্নিনায় লক্ষ বলি হয়, সেখানে একটি কবন্ধ-ভূত জন্মায়;—যার নরবলি ব্যতীত আর-কোনও উপায়ে ক্ষুধাতৃষ্ণা নিবারণ করা যায় না; এবং সে বুদ্ধিস্কিত থাকলে গৃহস্থের ঘাড়-মটকে খায়। বৈজ্ঞানিকদের আবিষ্কৃত সমাজ-নামক বিরাট-পুরুষ এই জাতীয় একটি প্রেতযোনি বই আর কিছুই নয়। এই বিরাট-কবন্ধের শোণিত-পিপাসা নিবারণার্থ নরবলি দেওয়া ধর্ম-প্রাণ ব্যক্তিদের অবশ্য কর্তব্য। বলা বাহুল্য, পৃথিবীতে যতগুলি বিভিন্ন সমাজ আছে, ততগুলি পৃথক বিরাট-পুরুষও আছে। এবং এই সকল নরমাংস-লোলুপ দৈত্যদের মধ্যে চিরশত্রুতা বিद्यমান। সুতরাং মানুষের প্রথম এবং প্রধান কর্তব্য—নিজ-সমাজের নিকট পর-সমাজকে বলি দেওয়া—অর্থাৎ যুদ্ধ করা। এই ‘মতাবলম্বী বৈজ্ঞানিকরা মানবের নৈতিক বুদ্ধির অস্তিত্ব অস্বীকার করেন না, শুধু তার বিকার সাধন করে’ সেটিকে বিপথে চালাতে চান। এঁদের সাদা কথা এই যে—নিজের স্বার্থের জন্ত করলে যে কাজ মহাপাপ, জাতীয় স্বার্থের জন্ত করলে সেই একই কাজ মহাপুণ্য। সমাজনামক অপদেবতাকে

নিবেদন করে দিলে খুন, জখম, চুরি, ডাকাতি—ফুলের মত শুভ্র, দীপের ন্যায় উজ্জ্বল, ধূপের ন্যায় সুরভি হয়ে উঠে । বহু মানবকে একত্রে যোগ দিলে কি করে' একটি দানবের সৃষ্টি হয় তা আমাদের স্ত্রীবুদ্ধির অতীত । আর এই কথাটা জিজ্ঞাস্য থেকে যায় যে, লোকসমষ্টিতে সমাজ নাম দিয়ে তার উপরে ব্যক্তিত্ব আরোপ করার যদি কোনও বৈধ কারণ থাকে তাহলে এই ব্যক্তিটির অন্তরে একটা আত্মার আরোপ করা কি কারণে অবৈধ ? এই বিরাট-পুরুষকে মানবধর্মী কল্পনা করলে আমাদের সহজ ন্যায়বুদ্ধিকে ডিগবাজি-খাওয়াবার জগ্য তোমাদের আর এত গলদঘর্ম্য হতে হত না ।

বিজ্ঞান মানুষকে মার্ত্তে শেখালেও মর্ত্তে শেখাতে পারে না । এই জগ্গই দর্শনের আবশ্যিক । মানুষে সহজে দেহ-পিঞ্জর থেকে আত্মা-পাখীটিকে মুক্তি দিতে চায় না, কেননা ভবিষ্যতে তার গতি কি হবে সে বিষয়ে সকলেই অজ্ঞ । আত্মার সঙ্গে বর্ত্তমানে আমাদের সকলেরই পরিচয় আছে এবং তার ভবিষ্যৎ-অস্তিত্বের আশা আমরা সকলেই পোষণ করি । এর বেশী আমরা আর-কিছুই জানি নে । অপর-পক্ষে, দার্শনিকেরা আত্মার ভূত-ভবিষ্যতের সকল খবরই জানেন । সুতরাং অমরত্বের আশাকে বিশ্বাসে পরিত্যক্ত করবার ভার তাঁদের হাতে । এবং তাঁরাও তাঁদের কর্ত্তব্যপালন করতে কখনও পশ্চাৎপদ হন নি । যুদ্ধের মুখ্য উদ্দেশ্য অবশ্য মারা, মরা নয় ; তবে হত্যা কর্ত্তে গেলে হত হবার সম্ভাবনা আছে বলে' দার্শনিকেরা এই সত্য আবিষ্কার করেছেন যে, যুদ্ধক্ষেত্রে দেহত্যাগ করলে আত্মা একলক্ষ্যে স্বর্গারোহণ করে এবং সেদেশে উপস্থিত হবামাত্র এত ভোগবিলাসের অধিকারী হয় যে, তা এ পৃথিবীর রাজরাজে-

শরেরও কল্পনার অতীত । কিন্তু অধ্রুব ইন্দ্রের ইন্দ্রত্বের লোভে ধ্রুব ত্যাগ করা সকলের পক্ষে স্বাভাবিক নয় । সকাল-সকাল স্বর্গপ্রাপ্তির সম্বন্ধে যোদ্ধাদের তাদৃশ উৎসাহ না থাকায়, তাদের উৎসাহ-বর্দ্ধনের জন্ত সপ্তে সপ্তে নরকেরও ভয় দেখান হয় । কিন্তু তাতেও যদি ফল না হয় ত সেনাপতিরা যুদ্ধ-পরাস্থখ সৈনিকদের বধ করতে পারেন—এ বিষয়েও দার্শনিক বিধি আছে । অর্থাৎ মৃত্যুভয় দেখিয়ে মানুষকে মৃত্যুর জন্ত প্রস্তুত করতে হয় ।

দুর্ভাগ্যবশতঃ অত কাঁচা ওষুধ সকলের ধরে না । পৃথিবীতে এমন লোক দুর্লভ নয়, যারা মানুষকে মারতে প্রস্তুত নন,—স্বর্গের লোভেও নয়, নরকের ভয়েও নয় । এঁদের যুদ্ধে প্রবৃত্ত করাবার উপযোগী দর্শনও আছে । দাঁরা নিজের স্বার্থের জন্ত পরের ক্ষতি করতে প্রস্তুত নন—তাদের নিঃস্বার্থতার দিক দিয়ে বাগাতে হয় । যিনি মর্ত্যরাজ্য, কি স্বর্গরাজ্য—কোন রাজ্যই কামনা করেন না—তাকে নিষ্কাম হত্যা করবার উপদেশ দেওয়া হয় । হত্যা পাপ নয় ;—কারণ ও একটি কৰ্ম্ম । কৰ্ম্ম করাই ধৰ্ম্ম, তার ফল কামনা করাই অধৰ্ম্ম । হত্যা করা যে পাপ এ ভ্রান্তি শুধু তাদেরই হয় যারা আত্মার ভূতভবিষ্যতের বিষয় অজ্ঞ । আত্মা যখন অবিনশ্বর তখন কেউ কাউকে বধ করতে পারে না । দেহ আত্মার বসনমাত্র । স্তূতরাং প্রাণবধ করার অর্থ আত্মাকে পুরোনো কাপড় ছাড়িয়ে নূতন কাপড় পরানো । অপরকে নূতন বস্ত্র দান করা যে পুণ্যকার্য্য সে ত সর্ববদা সন্মত । মানুষ যদি তার ক্ষুদ্র হৃদয়-দৌর্বল্য অতিক্রম করে' নিজের অমরত্ব অর্থাৎ দেবত্ব অনুভব করে, তাহলে নিষ্ফল হত্যা করতে তার আর কোনও দ্বিধা হবে না । অপরকে বধ

করবার সুফলটি নিজে ভোগ না করলেও আর-দশজনকে যে তার কুফল ভোগ করতে হয় তা উপেক্ষা করা কর্তব্য । পর-দুঃখকারতা প্রভৃতি হৃদয়-দৌর্বল্য হতে আত্মজ্ঞানী পুরুষ চিরমুক্ত । অতএব নিশ্চিন্তভাবে যুদ্ধ কর ।

পূর্বোক্ত বৈজ্ঞানিক মত বিদেশের এবং দার্শনিক মত এদেশের । বলা বাহুল্য যে, দুই একই-মতের এ-পিঠ আর ও-পিঠ ।

এই সব দর্শনবিজ্ঞানের সাহায্যে প্রমাণ করা যায় যে, যুদ্ধ করাটা মানবধর্ম নয় । যদি তা হত ত মানবকে হয় দানব, নয় দেবতা, নয় পশু প্রমাণ করতে দর্শনবিজ্ঞানের সিংহ-ব্যাস্ত্রেরা এতটা গর্ভজন করতেন না ।

আসল কথা, বুদ্ধি-ব্যবসায়ীরা মানবসমাজকে মাথার উপর দাঁড় করাতে চান, কাজেই তা উল্টে পড়ে ।

এ সকল দর্শনবিজ্ঞান যে মনের বিকারের লক্ষণ তার স্পষ্ট প্রমাণ আছে । জ্বরে মাথায় খুন্ চড়ে গেলে মানুষে যে প্রলাপ বকে তার পরিচয় এই ম্যালেরিয়ার দেশে আমরা নিতাই পাই । দুঃখের বিষয় এই যুদ্ধ-জ্বর যেমন মারাত্মক তেমনি সংক্রামক । এ হচ্ছে মনের প্লেগ । এ যুগে শরীরের প্লেগ হয় এসিয়ায় আর মনের প্লেগ হয় ইউরোপে—এ দুয়ের ভিতর এই যা প্রভেদ । ইউরোপ বিজ্ঞানের বলে দেশ থেকে প্লেগ তাড়িয়েছে, মন থেকে কি তা তাড়াতে পারবে না ?

এ পাপ দূর করতে যে মনের বল, যে চরিত্রের বল চাই, এককথায় যে বীরত্ব চাই—সে বীরত্ব তোমাদের নরসিংহ ও নর-শার্দূলদের দেহে নেই । স্ত্রীলোকের পক্ষে পুরুষচরিত্র অনুকরণ করা যে হাস্যকর তার কারণ মানবজাতি যদি যথার্থ সভ্য হতে

চায় ত পুরুষের পক্ষে স্ত্রী-চরিত্রের অনুকরণ করা কর্তব্য । তোমাদের দেহের বলের সঙ্গে আমাদের মনের বলের, তোমাদের বুদ্ধিবলের সঙ্গে আমাদের চরিত্রবলের যদি রাসায়নিক যোগ হয় তাহলেই তোমরা যথার্থ বীর-পুরুষ হবে, নচেৎ নয় । কারণ খাঁটি বীরত্বের ধর্ম হচ্ছে পরকে মারা নয়, বাঁচানো—পরের জন্ত নিজে মরা নয়, বেঁচে থাকা । মানুষে ক্ষণিক নেশার ঝোঁকে পরের জন্ত দেহত্যাগ করতে পারে কিন্তু পরের জন্ত চিরজীবন আত্মোৎসর্গ করার জন্ত প্রতিষ্ঠিত প্রজ্ঞার আবশ্যক । সুতরাং যথার্থ নিষ্কাম ধর্ম হচ্ছে স্ত্রীধর্ম, ক্ষাত্রধর্ম নয় ।

এর উত্তরে ঐতিহাসিক বলবেন—আজ তিন হাজার বৎসরের মধ্যে পৃথিবীর ঢের বদল হয়েছে কিন্তু যুদ্ধ বরাবর সমানই চলে আসছে, সুতরাং তা চিরদিনই থাকবে । এর প্রত্যুত্তরে আমার বক্তব্য এই যে পুরুষজাতির ভিতর যদি এমন একটি আদিম পশুত্ব থাকে যার উচ্ছেদ অসম্ভব, তাহলে তাদের লালনপালন করবার মত তাদের শাসন করবার ভারও আমাদের হাতে আসা উচিত । আমরা শাসনকর্ত্রী হলে পৃথিবীর যুদ্ধক্ষেত্রকে শ্রীক্ষেত্রে পরিণত করব এবং তোমাদের পোষ মানিয়ে জগবন্ধুর রথ টানাব । ইতি

৫৭

জনৈক বঙ্গনারী ।

নারীর পত্রের উত্তর

আমরা স্ত্রীজাতিকে সমাজে স্বাধীনতা দিই নি, কিন্তু সাহিত্যে দিয়েছি। আজকাল বাঙ্গলা-ভাষায় লেখকের চাইতে লেখিকার সংখ্যাই বেশী। সম্ভবতঃ সেই কারণে মাসিকপত্রসকল ‘পত্রিকা’-সংজ্ঞা ধারণ করেছে। স্ত্রীজাতি এতদিন সে স্বাধীনতার অপব্যবহার করেন নি, কেননা মতামতে তাঁরা একালযাবৎ আমাদেরই অনুসরণ করে আসছেন। বাঙ্গলায় স্ত্রী-সাহিত্য জল-মেশানো পুং-সাহিত্য বই আর কিছুই নয়, সুতরাং সে সাহিত্য পরিমাণে বেশী হলেও আমাদের সাহিত্যের চাইতেও ওজনে ঢের কম ছিল।

কিন্তু লেখিকার! যদি স্ত্রী-মনোভাব প্রকাশ করতে শুরু করেন, তাহলে তাঁদের কথা আর উপেক্ষা করা চলবে না। এই কারণে, এই সঙ্গে যে “নারীর পত্র”খানি পাঠাচ্ছি, তার মতামত-সম্বন্ধে সসঙ্কোচে দুটি একটি কথা বলতে চাই।

লেখিকার মূল-কথার বিরুদ্ধে বিশেষ-কিছু বলবার নেই। সে কথা হচ্ছে এই যে, যুদ্ধ না-করা স্ত্রীজাতির পক্ষে স্বাভাবিক। এই স্বতঃসিদ্ধ সত্য প্রমাণ করবার জন্য অত বাগ্‌জাল রিস্তার করবার আবশ্যক ছিল না। অপর-পক্ষে, যুদ্ধ করা যে পুরুষের পক্ষে স্বাভাবিক, তা প্রমাণ করাও অনাবশ্যক। এই সত্যটি মেনে নিলে লেখিকা দর্শনবিজ্ঞানের প্রতি অত আক্রোশ প্রকাশ করতেন না। দর্শনবিজ্ঞান যুদ্ধের সৃষ্টি করে নি,—যুদ্ধই

তদনুরূপ দর্শনবিজ্ঞানের সৃষ্টি করেছে। ক্ষত্রিয়ের অস্ত্র হচ্ছে ব্রাহ্মণের পৃষ্ঠপোষক, তাই ব্রাহ্মণের শাস্ত্র ক্ষত্রিয়ের চিন্ততোষক হতে বাধ্য। এ দুই জাতির ভিতর স্পর্শ সাংসারিক বাধ্য-বাধকতার সম্বন্ধ আছে; কিন্তু যুদ্ধজীবীর সঙ্গে বুদ্ধিজীবীর যে একটি মানসিক বাধ্যবাধকতাও আছে, তা সকলের কাছে তেমন সুস্পর্শ নয়। একদল মানুষে যা করে, আর-এক দলে হয় তার ব্যাখ্যান, নয় ব্যাখ্যা করে। কর্মবীর জ্ঞানহীন হতে পারে, এবং জ্ঞানবীর কর্মহীন হতে পারে, কিন্তু পৃথিবীতে কর্ম না থাকলে জ্ঞানও থাকত না। কর্ম জ্ঞানবৃক্ষের ফল নয়, জ্ঞান কর্মবৃক্ষের ফুল। সুতরাং যুদ্ধের দায়িত্ব দর্শনবিজ্ঞানের ঘাড়ে চাপানো হচ্ছে উধোর বোঝা বুধোর ঘাড়ে চাপানো। মানুষ যতদিন যুদ্ধ করবে, মানুষে ততদিন হয় তার সমর্থন, নয় তার প্রতিবাদ করবে। মানুষকে ঝগড়া-লড়াই করতে উস্কে দেওয়াই যে জ্ঞানের একমাত্র কাজ, তা অবশ্য নয়। জ্ঞানীমাত্রেই যে নারদ নন, তার প্রমাণ স্বয়ং বুদ্ধদেব।

লেখিকা ধর্মযুদ্ধ এবং অধর্মযুদ্ধের পার্থক্য স্বচ্ছন্দচিন্তে মানতে চান না। তাঁর মতে এই “অভেদ পার্থক্যের” আবিষ্কারে পুরুষজাতি বুদ্ধির পরিচয় দিয়েছেন, হৃদয়ের নয়। হৃদয় ও বুদ্ধির পার্থক্যও যে কাল্পনিক, এ সত্যটি মনে রাখলে—যা আসলে অবিচ্ছেদ্য, তার বিচ্ছেদ ঘটিয়ে, তার এক অংশ আমাদের দিয়ে, অপর অংশ স্ত্রীজাতি অধিকার করে বসতেন না। বুদ্ধিও আমাদের একচেটে নয়, হৃদয়ও তাঁদের একচেটে নয়; এবং যেমন হৃদয়ের অভাবের নাম বুদ্ধি নয়, তেমনি বুদ্ধির অভাবের নামও হৃদয় নয়। সুতরাং এ কথা নির্ভয়ে বলা যেতে পারে যে, যুদ্ধের ধর্মান্বয়ের বিচারে পুরুষজাতি বুদ্ধি ও হৃদয় দুয়েরই

সমান পরিচয় দিয়েছেন । কৰ্মক্ষেত্রে প্রয়োগ করা কঠিন হলেও, ধৰ্মক্ষেত্রে যুদ্ধসম্বন্ধে বিধিনিষেধ মাণ্ড ।

“অহিংসা পরম ধৰ্ম্ম”—এই বাক্য বৌদ্ধধৰ্ম্মের মূলকথা হলেও, বৌদ্ধ শাস্ত্রেই স্বীকৃত হয়েছে যে, মানুষ পেটের-দায়ে যুদ্ধ করে । উদরকে মস্তিষ্ক যে পুরোপুরি নিজেৰ শাসনাধীন করতে পারে না, তার জন্ম দায়ী মানুষের প্রকৃতি নয়, তার আকৃতি । দেহ ও মনে, কৰ্ম্মে ও জ্ঞানে যখন যুদ্ধ আরম্ভ হয়—তখন শান্তির জন্ম একেও কিছু ছেড়ে দিতে হয়, ওকেও কিছু ছেড়ে দিতে হয় । হিংসা এবং অহিংসার সন্ধি থেকেই বৈধ হিংসার সৃষ্টি হয় । আর, সন্ধ্যা জিনিসটি,—তা সে প্রাতঃই হোক আর সায়াংই হোক,—পুরো আলোও নয়, পুরো অন্ধকারও নয় । সূতরাং যুদ্ধ জিনিসটি একদম সাদাও নয়, একদম কালও নয় ;—ওই দুয়ে মিলে যা হয় তাই, অর্থাৎ ছাই ।

লেখিকা আমাদের প্রতি—অর্থাৎ বাঙ্গালী পুরুষের প্রতি,—যে কটাক্ষ করেছেন, সে অবশ্য সে-জাতীয় বক্তৃদৃষ্টি নয়, যার সম্বন্ধে কবিতা লিখে লিখে আমরা এলি নে । এ সম্বন্ধে আমি কোন-রূপ উচ্চবাচ্য করব না, কেননা লেখিকা স্বীকার করেছেন যে, রসনা হচ্ছে মহাস্ত্র । দুর্বল আমরা অস্ত্রশস্ত্র ব্যবহার করতে জানিনে ; কিন্তু অবলা ওঁরা যে ও-মহাস্ত্র ব্যবহার করতে জানেন—সে বিষয়ে কেউ আর সন্দেহ করেন না, কেননা সকলেই ভুক্তভোগী ।

সে যাই হোক, সাধারণ পুরুষজাতিসম্বন্ধে তাঁর মতের প্রতিবাদ করা যেতে পারে । তিনি পুরুষের স্বভাব অতি অবজ্ঞার চক্ষে দেখেন, কেননা তা স্ত্রীস্বভাব নয় । মানুষের স্বভাব যে কি, লেখিকা যদি তা জানেন, তাহলে তিনি এমনি-

একটি জিনিসের সন্ধান পেয়েছেন, যা আমরা যুগযুগান্তের অনুসন্ধানও পাই নি। আমরা যেমন কোনও অস্ত্রশস্ত্র ধারণ করে জন্মগ্রহণ করিনি, তেমনি কোনও প্রাক্তন সংস্কার নিয়ে জন্মাই নি। আমরা দেহ ও মনের নগ্ন অবস্থাতেই পৃথিবীতে আসি। তাই আমরা মনুষ্যত্বের তত্ত্বের জন্য কখন পশুর কাছে, কখন দেবতার কাছে যাই; কারণ এসব জাতীয় জীবের একটা বাঁধাবাঁধি বিধি-নির্দিষ্ট প্রকৃতি আছে;—শুধু আমাদের নেই। আমরা শুধু স্বাধীন, বাদবাকী সৃষ্টি নিয়মের অধীন; সুতরাং আমরা মানবজীবনের যখনই একটি বাঁধাবাঁধি নিয়মের আশ্রয় পেতে চাই, তখনই আমাদের মনুষ্যত্বের জীবের দ্বারস্থ হতে হয়। নৃসিংহও আমাদের আদর্শ, নরহরিও আমাদের আদর্শ,—শুধু আমরা আমাদের আদর্শ নই। মনুষ্যত্ব পড়ে’ পাওয়া যায় না, কিন্তু গড়ে’ নিতে হয়,—এই সত্য মানুষে যতদিন না গ্রাহ্য করবে, ততদিন ভিক্ষুকের মত তাকে পরের দ্বারে দ্বারে ঘুরতে হবে। যদি বল যে, প্রত্যক্ষ পশু কিম্বা অপ্ৰত্যক্ষ দেবতা মানুষের আদর্শ হতে পারে না, তাহলে মানুষে উদ্ভিদকে তার আদর্শ করে তুলবে। এ-কাজ মানুষে পূর্বের করেছে, এবং বাধ্য হলে পরেও করবে। মানুষ যদি মানুষ না হতে শেখে, তাহলে উদ্ভিদ হওয়ার চাইতে তার পক্ষে পশু হওয়া ভাল,—কেমনা পশু জঙ্গম, আর উদ্ভিদ স্থাবর। মনুষ্যত্বকে স্থাবর করতে হলে মানুষকে জড় মুক অন্ধ ও বধির হতে হবে। আর তা ছাড়া উদ্ভিদ হলে আমরা ভক্ষক না হই, ভক্ষ্য হব।

লেখিকা যদি এখানে প্রশ্ন করেন যে, কোনও একটা আদর্শ না পেলে কার সাহায্যে মানুষ একটি স্থায়ী মনুষ্যত্ব গড়ে তুলবে, তার উত্তরে আমি বলব, মানুষের মানুষকে নিয়ে experiment

করতে হবে । যেমন, আমরা একটা লেখা গড়ে'-তুলতে হলে, যতক্ষণ আমাদের ক্ষমতার সীমায় না পৌঁছই ততক্ষণ ক্রমান্বয়ে কাটি আর লিখি, তেমনি সভ্যতা পদার্থটিও ততক্ষণ বারবার ভেঙ্গে গড়তে হবে, যতক্ষণ মানুষ তার ক্ষমতার সীমায় না পৌঁছয় । সে দিন যে কবে আসবে কেউ বলতে পারে না ; সম্ভবতঃ কখনই আসবে না । রাজনীতি, সমাজনীতি, অর্থনীতি, ধর্মনীতি, দর্শন, বিজ্ঞান যে পরিমাণে এই experiment-এর কাজ করে, সে পরিমাণে তা সার্থক ;—এবং যে পরিমাণে তা নূতন experiment-কে বাধা দেয়, সে পরিমাণে তা অনর্থক । মানুষ-সম্বন্ধে শেষ কথা এই যে, তার সম্বন্ধে কোনও শেষ কথা নেই ।

সাধারণতঃ যুদ্ধব্যাপারটি উচিত কি অনুচিত, সে আলোচনার সার্থকতা যাই হোক,—কোনও-একটি বিশেষ-যুদ্ধের ফলাফল কি হবে, সে বিচারের মূল্য মানুষের কাছে ঢের বেশী ।

এই বর্তমান যুদ্ধই ধরনা কেন । পৃথিবীস্থল লোক এই ভেবে উদ্বেজিত উদ্বেজিত এবং উদ্বেলিত হয়ে উঠেছে যে, ইউরোপের হাতেগড়া সভ্যতা এইবার ইউরোপ বুঝি নিজের হাতে ভাঙ্গে ! যদি ইউরোপের সভ্যতা এই ধাক্কায় কাৎ হয়ে পড়ে ত বুঝতে হবে যে, সে সভ্যতার ভিত অতি কাঁচা ছিল । তাই যদি প্রমাণ হয়, তাহলে ইউরোপকে এই ধ্বংসাবশেষ নিয়ে ভবিষ্যতে এর চাইতে পাকা সভ্যতা গড়তে হবে । ঠেকো-দিয়ে রাখার চাইতে কাঁকিয়ে দেখা ভাল যে, যে ঘরের নীচে আমরা মাথা রাখি, সে ঘরটি ঘুণে-খাওয়া কি টেকসই । কিন্তু এই ভূমিকম্পে যে, ইউরোপের অট্টালিকা একেবারে ধরাশায়ী হবে,—সে আশঙ্কা করবার কোনও কারণ নেই । ধূলিসাৎ হবে শুধু তার দর্পের চূড়া আর তার

ঠেকো-দিয়ে-রাখা প্রাচীন অংশ, আর তার গৌজা-মিলন দিয়ে তৈরি নতুন অংশ। এতে মানবজাতির লাভ বই লোকসান নেই। তা ছাড়া, এই যুদ্ধের ফলে ইউরোপের একটি মহা লাভ হবে—তার এই চৈতন্য হবে যে, সে এখনও পুরোপুরি সভ্য হয়নি। বিজ্ঞানের বলে বলীয়ান হয়ে ইউরোপ আত্মজ্ঞান হারাতে বসেছিল; এই যুদ্ধের ফলে সে আবার আত্মপরিচয় লাভ করবে। কথাটা একটু বুঝিয়ে বলা দরকার। লেখিকা বলেছেন যে, যুদ্ধরূপ মানসিক প্লেগ ইউরোপে আছে, এসিয়ায় নেই। এসিয়ার লোকের যে মনে পাপ নেই সে কথা বলা চলে না; কেননা লেখিকাই দেখিয়েছেন যে, কি প্রাচ্য, কি পাশ্চাত্য,—উভয় শাস্ত্রই যুদ্ধসম্বন্ধে একই মন্ত্র পুরুষজাতির কানে দিয়েছেন। তবে এসিয়া যে শান্ত, আর ইউরোপ যে দুর্দান্ত—তার কারণ মন ছাড়া অন্যত্র খুঁজতে হবে। প্রাচ্য-দর্শন শুধু মন্ত্র দিতে পারে—কিন্তু পাশ্চাত্য-বিজ্ঞান শুধু মন্ত্র নয়, সেই মন্ত্রের সাধনোপযোগী যন্ত্রও মানুষের হাতে দিয়েছে। বিজ্ঞান মানুষের জ্ঞান শুধু শাস্ত্র নয়, অস্ত্রশস্ত্রও গড়ে দিয়েছে। সে অস্ত্রের সাহায্যে মানুষে পঞ্চভূতকে নিজের বশীভূত করেছে—কিন্তু নিজেকে বশ করতে পারে নি। সুতরাং অনেকে মনে করতেন যে, বিজ্ঞান হয় ত অমানুষের হাতে খন্ড দিয়েছে। যদি এ যুদ্ধে প্রমাণ হয়ে যায় যে ঘটনাও তাই, তাহলে ইউরোপীয়েরা মানুষ হতে চেষ্টা করবে। কারণ ও খন্ড কেউ ত্যাগ করতে পারবে না;—শুধু সেটিকে ভবিষ্যতে ভাইয়ের বিরুদ্ধে অস্ত্রহিসেবে ব্যবহার না করে, জড়প্রকৃতির শাসনের যন্ত্রহিসেবে ব্যবহার করবে;—অর্থাৎ প্রলয় নয়, স্থিতির কাজে তা নিয়োজিত হবে। এ ক্ষেত্রে বিশেষ করে ইউরোপের নাম

উল্লেখ করবার অর্থ এই যে, এসিয়াবাসীদের কতদূর মনুষ্যত্ব আছে, না আছে—এ বৈজ্ঞানিক যুগে তার পরীক্ষা হয় নি। ও খন্ডা হাতে পড়লে বোঝা যেত যে আমরা বাঁদর কি মানুষ।

এই যুদ্ধের বেদনা থেকে ইউরোপের ন্যায়-বুদ্ধি যে জাগ্রত হয়ে উঠবে, তার আর সন্দেহ নেই;—কেননা ইতিমধ্যেই সে দেশে মানুষে ত্রাহি মধুসূদন বলে চীৎকার করছে—প্রহারেণ ধনঞ্জয় বলে নয়।

কিন্তু পুরুষমানুষ যে কখনও মানুষ হবে—এ বিশ্বাস লেখিকার নেই। তিনি পুরুষকে ইতিহাসের অতিবিস্তৃত ক্ষেত্রে দাঁড় করিয়ে দেখিয়েছেন যে, সে কত ক্ষুদ্র। এবং ঐরূপে তার ক্ষুদ্রত্ব প্রমাণ করে, প্রস্তাব করেছেন যে, হয় সে খ্রীধর্ম্য অবলম্বন করুক, নয় তার শাসনের ভার খ্রীজাতির হাতে দেওয়া হোক। এ স্থলে জিজ্ঞাস্য এই যে, যদি খ্রীধর্ম্য হওয়াই পুরুষের পক্ষে মনুষ্যত্ব-লাভের একমাত্র উপায় হয়, তাহলে আমাদের মেয়েলি বলে' কেন উপহাস করা হয়েছে?—সম্ভবতঃ লেখিকার মতে আমরা খ্রীজাতির গুণগুলি শিক্ষা করতে পারিনি, শুধু তাদের দোষগুলিই আত্মসাৎ করেছি। আমাদের ত্রুটিগুলির অনুকরণ অপরকে করতে দেখলে আমরা সকলেই বিরক্ত হই;—কেননা শ্রদ্ধাপূর্বক ও-কার্য্য করলেও তা ভেংচানির মতই দেখায়। কিন্তু এ কথাও সমান সত্য যে, মানুষে অপরের গুণের অনুসরণ করতে পারলেও, অনুকরণ শুধু পূরের দোষেরই করতে পারে। এর পরিচয় জীবনে ও সাহিত্যে নিত্য পাওয়া যায়। কিন্তু অবস্থার গুণে আমরা কিছু করতে হলেই অনুকরণ করতে বাধ্য। আমরা experiment-এর সাহায্যে নিজের জীবন গঠন করতে সাহস পাই নে বলে', আমাদের

স্বমুখে একটা তৈরি আদর্শ থাকা আবশ্যক, যার অনুকরণে আমরা নিজেদের গড়ে' নিতে পারি। আমরা এরকম দুটি আদর্শের সন্ধান পেয়েছি ;—একটি হচ্ছে বর্তমান ইউরোপীয়, অপরটি প্রাচীন হিন্দু। তার উপর যদি আবার স্ত্রীজাতিকেও আদর্শ করতে হয়, তাহলে এই তিন জাতির দোষ একাধারে মিলিত হয়ে যে চীজ দাঁড়াবে, জগতে আর তার তুলনা থাকবে না। সৃষ্টি হচ্ছে ত্রিগুণাত্মক, আমরা ত্রিদোষাত্মক হলে যে সৃষ্টিছাড়া হব, তার আর কোনও সন্দেহ নেই। সুতরাং এখন বিবেচ্য তোমাদের হাতে শাসনকর্তৃদ্ব দেওয়া কর্তব্য কি না। এতে পৃথিবীর অপর-দেশের পুরুষজাতির ক্ষতিবৃদ্ধি কি হবে তা বলতে পারি নে—কিন্তু আমাদের কোনও লোকসান নেই। কারণ আমরা ত চিরদিনই তোমাদের শাসনাধীন রয়েছি। আমাদের দুর্গতির একটি প্রধান কারণও ওই। লেখিকা ত নিজেই স্বীকার করেছেন—স্ত্রীলোকে অশিক্ষার গুণে এদেশের পুরুষ-সমাজকে চালমাৎ করে রেখেছে। আসল কথা, স্ত্রী-লোকেরও পুরুষের অধীন থাকা ভাল নয়, পুরুষেরও স্ত্রীলোকের অধীন থাকা ভাল নয়। দাসত্বও মনুষ্যত্বকে যেমন বিকৃত করে, প্রভুত্বও তেমনি করে। স্ত্রীপুরুষে যে অহর্নিশি লড়াই করে—তার কারণ, একজন আর-একজনের অধীন। এর থেকেই প্রমাণ হয় যে, যুদ্ধ ততদিন থাকবে, যতদিন এ পৃথিবীতে এক-দিকে প্রভুত্ব আর অপরদিকে দাসত্ব থাকবে।

কিন্তু ও ব্যাপার যে পৃথিবীতে আর বেশী দিন থাকবে না, এই যুদ্ধেই তা প্রমাণ হয়ে যাবে। যুদ্ধ আসলে একটি ভীষণ তর্ক বই আর কিছুই নয়। যে বিয়ের শুধু কাগজে-কলমে মীমাংসা হয় না, তার সময়ে সময়ে হাতে-কলমে মীমাংসা করতে

হয় । ইউরোপে কামান-বন্দুকে যে তর্ক চলছে, তার বিষয় হচ্ছে —“যুদ্ধ করা উচিত কি অনুচিত ।” এক্ষেত্রে পূর্বপক্ষ হচ্ছে জার্মানী, আর উত্তরপক্ষ হচ্ছে ইংলণ্ড, ফ্রান্স, বেলজিয়াম ইত্যাদি । এক্ষেত্রে যদি উত্তরপক্ষ জয়ী হয় (এবং জয় যে আয়ের অনুসরণ করবে, সে সম্বন্ধে কোনও সন্দেহ নেই), তাহলে মানবজাতি এই চূড়ান্ত মীমাংসায় উপনীত হবে যে, যুদ্ধ অকর্তব্য । আর-একটি কথা,—পুরুষমানুষে যুদ্ধরূপ প্রচণ্ড বিবাদ কখন কখন করে, কিন্তু লেখিকার স্বজাতিই হচ্ছে সকল নিত্য-নৈমিত্তিক বিবাদের মূল । এর জন্ত আমাদের বুদ্ধি কিম্বা তাঁদের হৃদয় দায়ী,—তার বিচার আমি করতে চাই নে । আমরা মনসা হতে পারি, কিন্তু ধূনোর গন্ধ ওঁরাই যোগান্ । ওঁরা উস্কে দিয়ে পুরুষকে যে পরিমাণে “বীরপুরুষ” করে তুলতে পারেন, তা কোনও দর্শন-বিজ্ঞানে পারে না । তবে যে লেখিকা শমদম প্রভৃতি সদৃশ্যে নিজেদের বিভূষিত মনে করেন, সে ভুল ধারণার জন্তও দায়ী আমরা । আমি পূর্বে বলেছি যে, স্ত্রীজাতিকে আমরা সমাজে স্বাধীনতা দিই নি, কিন্তু সাহিত্যে দিয়েছি । এ কাজটি হ্যায় হলেও, সেই সঙ্গে একটি অন্যায় কাজও আমরা করেছি । আমাদের সমাজে স্ত্রীজাতির কোনরূপ মর্যাদা নেই, কিন্তু সাহিত্যে যথেষ্টর চাইতেও বেশী আছে । এর কারণ, সকল সমাজের উপর হিন্দুসমাজের শ্রেষ্ঠত্ব প্রমাণ করতে হলে—তোমাদের গুণকীর্তন করা ছাড়া আর আমাদের উপাধিকার নেই । আমাদের নিজের বিষয় মুখ ফুটে অহঙ্কার করা চলে না ; কেননা, আমাদের দেহমনের দৈন্য বিশ্বমানবের কাছে প্রত্যক্ষ ; সুতরাং আমরা বলতে বাধ্য যে, আমাদের সমাজের সকল ঐশ্বর্য্য অন্তঃপুরের ভিতর চাবি দেওয়া আছে । এ সব কথার উদ্দেশ্য

আমাদের নিজের মন যোগানো এবং পরের মন ভোলানো ।
ও হচ্ছে তোমাদের নামে বেনামী করে আমাদের আত্মপ্রশংসা
করা । সুতরাং, যদি মনে কর ওই সব প্রশংসিত গুণে
তোমাদের কোন স্বত্ব জন্মেছে, তাহলে তোমরা যে তিমিরে আছ,
সেই তিমিরেই থাকবে ।

কার্তিক, ১৩২১ ।

চুটকি

সমালোচকেরা আমার রচনার এই একটি দোষ ধরেন যে, আমি কথায়-কথায় বলি “হচ্ছে”। এটি যে একটি মহাদোষ সে বিষয়ে আর সন্দেহ নেই, কেননা ওকথা বলায় সত্যের অপলাপ করা হয়। সত্য কথা বলতে গেলে বলতে হয়, বাঙ্গলায় কিছু “হচ্ছে না”। এ দেশের কস্মজগতে যে কিছু হচ্ছে না, সে ত প্রত্যক্ষ—কিন্তু মনোজগতেও যে কিছু হচ্ছে না, তার প্রমাণ বর্দ্ধমানের গত সাহিত্য-সম্মিলন।

উক্ত মহাসভার পঞ্চ সভাপতি সম্মুখে বলেছেন যে, বাঙ্গলায় কিছু হচ্ছে না,—না দর্শন, না বিজ্ঞান, না সাহিত্য, না ইতিহাস।

শ্রীযুক্ত হীরেন্দ্র নাথ দত্ত মহাশয়ের প্রধান বক্তব্য এই যে, আমরা না পাই সত্যের সাক্ষাৎ, না করি সত্যাসত্যের বিচার। আমরা সত্যের স্রষ্টাও নই, দ্রষ্টাও নই; কাজেই আমাদের দর্শন-চর্চা realও নয়, criticalও নয়।

অধ্যাপক শ্রীযুক্ত যোগেশচন্দ্র রায়ের মতে, কি “মূর্ত্ত-বিজ্ঞান”, কি “অমূর্ত্ত-বিজ্ঞান”,—এ দুয়ের কোনটিই বাঙ্গালী অধ্যাবধি আত্মসাৎ করতে পারে নি। অর্থাৎ বিজ্ঞানের, যন্ত্র-ভাগও আমাদের হাতে পড়ে নি, তার তত্ত্বভাগও আমাদের মনে ধরে নি। আমরা শুধু বিজ্ঞানের স্থূলসূত্রগুলি কণ্ঠস্থ করেছি, এবং তার পরিভাষার নামতা মুখস্থ করেছি। যে বিজ্ঞান প্রয়োগ-প্রধান, কেবলমাত্র তার মন্ত্রের শ্রবণে এবং উচ্চারণে বাঙ্গালী

জাতির মোক্ষলাভ হবে না । এক কথায় আমাদের বিজ্ঞান-চর্চা real নয় ।

শ্রীযুক্ত যতুনাথ সরকার মহাশয়ের মতে ইতিহাস-চর্চার উদ্দেশ্য সত্যের আবিষ্কার এবং উদ্ধার,—এ সত্য নিত্য এবং গুপ্ত সত্য নয়, অনিত্য এবং লুপ্ত সত্য,—অতএব এ সত্যের দর্শন লাভের জন্য বিজ্ঞানের সাহায্য আবশ্যক । অতীতের জ্ঞান লাভ করবার জন্য হীরেন্দ্রবাবুর বর্ণিত বোধীর (Intuition) প্রয়োজন নেই—প্রয়োজন আছে শুধু শিক্ষিত বুদ্ধির । অতীতের অন্ধকারের উপর বুদ্ধির আলো ফেলাই হচ্ছে ঐতিহাসিকের একমাত্র কর্তব্য,—সে অন্ধকারে ঢিল ছোঁড়া নয় । অথচ আমরা সে অন্ধকারে শুধু ঢিল নয়, পাথর ছুঁড়ছি,—ফলে পূর্ব পশ্চিম উত্তর দক্ষিণের ঐতিহাসিকদের দেহ পরস্পরের শিলাঘাতে ক্ষতবিক্ষত হয়ে পড়ছে । এক-কথায় আমাদের ইতিহাস-চর্চা critical নয় ।

অতএব দেখা গেল যে, সন্মিলনের সকল শাখাপতি এ বিষয়ে একমত যে, কিছু হচ্ছে না । কিন্তু কি যে হচ্ছে, সে কথা বলেছেন স্বয়ং সভাপতি । তিনি বলেন ‘বঙ্গলা-সাহিত্যে যা হচ্ছে, তার নাম চুট্‌কি । এ কথা লাখ কথার এক-কথা । সকলেই জানেন যে, যখন আমরা ঠিক কথাটি ধরতে না পারি, তখনই আমরা লাখ কথা বলি । এই “চুট্‌কি” নামক বিশেষণটি খুঁজে না পাওয়ায়, আমরা বঙ্গ-সরসতীর গায়ে “বিজাতীয়” “অভিজাতীয়” “অবাস্তব” “অবাস্তব” প্রভৃতি নানা নামের ছাপ মেরেছি—অথচ তার প্রকৃত পরিচয় দিতে পারি নি ।

তার কারণ—এ সকল ছোট ছোট বিশেষণের অর্থ কি, তার ব্যাখ্যা করতে বড় বড় প্রবন্ধ লিখতে হয়, কিন্তু চুট্‌কি যে কি

পদার্থ, তা যে আমরা সকলেই জানি, তার প্রমাণ হাতে-হাতেই দেওয়া যায়।

শ্রীযুক্ত যোগেশচন্দ্র রায় মহাশয়ের অভিভাষণ যে চুটকি নয়, এ কথা স্বয়ং শাস্ত্রীমহাশয়ও স্বীকার করতে বাধ্য,— কেননা এ কথা নির্ভয়ে বলা যেতে পারে যে, ভাবে ও ভাষায় এর চাইতে তারি অঙ্গের গজবন্ধ জার্মানীর বাইরে পাওয়া দুষ্কর।

হীরেন্দ্রবাবুর অভিভাষণও চুটকি নয়। তবে শাস্ত্রীমহাশয় এ মতে সায় দেবেন কি না জানিনে, কেননা হীরেন্দ্রবাবুর প্রবন্ধ একে সংক্ষিপ্ত, তার উপর আবার সহজবোধ্য, অর্থাৎ সকল দেশের সকল যুগের সকল দার্শনিক তত্ত্ব যে পরিমাণে বোঝা যায়, হীরেন্দ্রবাবুর দার্শনিক তত্ত্বও ঠিক সেই পরিমাণে বোঝা যায়—তার কমও নয়, বেশীও নয়। শাস্ত্রীমহাশয়ের মতে, যে কাব্য মহাকাব্য, তাই হচ্ছে মহাকাব্য। গজমাপে যদি সাহিত্যের মর্যাদা নির্ণয় করতে হয়, তাহলে হীরেন্দ্রবাবুর রচনা অবশ্য চুটকি—কেননা, তার ওজন যতই হোক না কেন, তার আকার ছোট।

অপরপক্ষে শাস্ত্রীমহাশয়ের অভিভাষণযুগল যে চুটকি-অঙ্গের, সে বিষয়ে কোন সন্দেহ নেই।

শাস্ত্রীমহাশয়ের নিজের কথা এই :—“একখানি বই পড়ি লাম, অমনি আমার মনের ভাব আমূল পরিবর্তন হইয়া গেল, যতদিন বাঁচিব ততদিন সেই বইয়ের কথাই মনে পড়িবে, এবং সেই আনন্দেই বিভোর হইয়া থাকিব”—এ রকম যাতে হয় না, তারি নাম চুটকি। এ কথা যদি সত্য হয়, তাহলে জিজ্ঞাসা করি বাঙ্গলায় এরকম কজন পাঠক আছেন, যাঁরা বুকে হাত

দিয়ে বলতে পারেন যে, শাস্ত্রীমহাশয়ের প্রবন্ধ পড়ে তাঁদের ভিতরটা সব ওলটপালট হয়ে গেছে ?

শাস্ত্রীমহাশয় বাঙ্গলা-সাহিত্যে চুটকির চেয়ে কিছু বড় জিনিস চান। বড় বইয়ের যদি ধর্ম্মই এই হয় যে, তা পড়বা-মাত্র আমাদের মনের ভাবের আমূল পরিবর্তন হয়ে যাবে,— তাহলে সেরকম বই যত কম লেখা হয় ততই ভাল, কারণ দিনে একবার করে যদি পাঠকের অন্তরাত্মার আমূল পরিবর্তন ঘটে— তাহলে বড় বই লেখবার লোক যেমন বাড়বে, পড়বার লোকও তেমনি কমে আসবে। তিনি চুটকির সম্বন্ধে যে দুটি ভাল কথা বলেন নি তা নয়—কিন্তু সে অতি মুরুবিবয়ানা করে। ইংরাজেরা বলেন, স্বল্পস্তুতির অর্থ অতিনিন্দা। সুতরাং আত্মরক্ষার্থ চুটকি সম্বন্ধে তাঁর মতামত আমাদের পক্ষে একটু যাচিয়ে দেখা দরকার। তিনি বলেন—চুটকির একটি দোষ আছে, “যখনকার তখনই, বেশী দিন থাকে না।” এ কথা যে ঠিক নয়—তা তাঁর উক্তি থেকেই প্রমাণ করা যায়। সংস্কৃত অভিধানে চুটকি শব্দ নেই,—কিন্তু ও বস্তু যে সংস্কৃত-সাহিত্যে আছে, সে কথা শাস্ত্রীমহাশয়ই আমাদের বলে দিয়েছেন। তাঁর মতে “কালিদাস ও ভবভূতির পর চুটকি আরম্ভ হইয়াছিল, কেননা শতক, দশক, অষ্টক, সপ্তশতী, এই সব ত চুটকি সংগ্রহ ছাড়া আর কিছুই নয়।” তথাস্তু। শাস্ত্রীমহাশয়ের বর্ণিত সংস্কৃত চুটকির দুটি একটি নমুনার সাহায্যেই দেখানো যেতে পারে যে, আর্যযুগেও চুটকি কাব্যচার্য্যাদিগের নিকট অতি উপাদেয় ও মহার্হ বস্তু বলেই প্রতিপন্ন হত। ভট্টহরির শতক তিনটি সকলের নিকটই সুপরিচিত, এবং “গাথা সপ্তশতী”ও বাঙ্গলাদেশে একেবারে অপরিচিত নয়। ভট্টহরি ভবভূতির পূর্ববর্তী কবি,

কেননা জনরব এই যে তিনি কালিদাসের ভ্রাতা, এবং ইতিহাসের অভাবে কিম্বদন্তিই প্রামাণ্য। সে যাই হোক, “গাথা সপ্তশতী” যে কালিদাসের জন্মের অন্ততঃ দু তিন শ’ বছর পূর্বের সংগৃহীত হয়েছিল, তার ঐতিহাসিক প্রমাণ আছে। তাহলে দাঁড়ালো এই যে, আগে আসে চুটকি, তারপর আসে মহাকাব্য এবং মহানাটক। অভিব্যক্তির নৈসর্গিক নিয়মই এই যে, এ জগতে সব জিনিসই ছোট থেকে ক্রমে বড় হয়। সাহিত্যও ঐ একই নিয়মের অধীন। তার পর পূর্বোক্ত শতকত্রয় এবং পূর্বোক্ত সপ্তশতী যখনকার তখনকারই নয়,—চিরদিনকারই। এ মত আমার নয়—বাণভট্টের। গাথা সপ্তশতী শুধু চুটকি নয়—একেবারে প্রাকৃত-চুটকি,—তথাপি শ্রীহর্ষকারের মতে—

“অবিনাশিনমগ্রাম্যমকরোৎসাতবাহনঃ।

বিশুদ্ধ জাতিভিঃ কোশং রত্নৈরিব স্তুভাষিতৈঃ ॥”

তারপর ভর্তৃহরি যে এক-ন’র পান্না, এক-ন’র চুণি এবং এক-ন’র নীলা—এই তিন-ন’র রত্নমালা সরস্বতীর কণ্ঠে পরিয়ে গেছেন,—তার প্রতি রত্নটি যে বিশুদ্ধজাতীয় এবং অবিনাশী, তার আর সন্দেহ নেই। যাবচ্ছন্দ্র দিবাকর এই তিন শত বর্ণোজ্জ্বল শ্লোক সরস্বতীর মন্দির অহর্নিশি আলোকিত করে রাখবে।

আসল কথা, চুটকি যদি হেয় হয়, তাহলে কাব্যের চুটকিত্ব তার আকারের উপর নয়, তার প্রকারের অথবা বিকারের উপর নির্ভর করে—নচেৎ সমগ্র সংস্কৃত-কাব্যকে চুটকি বলতে হয়। কেননা সংস্কৃত-ভাষায় চার ছত্রের বেশী কবিতা নেই—কাব্যোও নয়, নাটকেও নয়। শুধু কাব্য কেন, হাতে-বহরে বেদও চুটকির অন্তর্ভূত হয়ে পড়ে। শাস্ত্রীমহাশয় বলেন যে, বাঙ্গালী

ব্রাহ্মণ বুদ্ধিমান ব'লে বেদাভ্যাস করেন না । কর্ণবেধের জগ্ন যতটুকু বেদ দরকার, ততটুকুই এদেশে ব্রাহ্মণসন্তানের করায়ত্ত । অথচ বাঙ্গালী বেদপাঠ না করেও এ কথা জানে যে, ঋক্ হচ্ছে ছোট কবিতা, এবং সাম গান । সুতরাং আমরা যখন ছোট কবিতা ও গান রচনা করি, তখন আমরা ভারতবর্ষের কাব্যরচনার সনাতন রীতিই অনুসরণ করি ।

শাস্ত্রীমহাশয় মুখে যাই বলুন—কাজে তিনি চুটকিরই পক্ষপাতী । তিনি আজীবন চুটকিতেই গলা সেধেছেন, চুটকিতেই হাত তৈরি করেছেন,—সুতরাং কি লেখায়, কি বক্তৃতায়, আমরা তাঁর এই অভ্যস্ত বিছারই পরিচয় পাই । তিনি বাঙ্গালীর যে বিংশপর্ব মহাগৌরব রচনা করেছেন, তা ঐতিহাসিক চুটকি বই আর কিছুই নয়,—অন্ততঃ সে রচনাকে শ্রীযুক্ত যদুনাথ সরকার মহাশয় অণু কোনও নামে অভিহিত করবেন না ।

একথা নিশ্চিত যে, তিনি সরকারমহাশয়ের প্রদর্শিত পথ অনুসরণ করেন নি, সম্ভবতঃ এই বিশ্বাসে যে, বৈজ্ঞানিকপদ্ধতি অনুসারে আবিষ্কৃত সত্য বাঙ্গালীর পক্ষে পৃথিবীর হতে পারে, কিন্তু রুচিকর হবে না । সরকারমহাশয় বলেন যে, এদেশের ইতিহাসের সত্য যতই অপ্রিয় হোক—বাঙ্গালীকে তা বলতেও হবে, শুনতেও হবে । অপরপক্ষে শাস্ত্রীমহাশয়ের উদ্দেশ্য তাঁর রচনা লোকের মুখরোচক করা, এবং সেই উদ্দেশ্য সাধন করবার জগ্ন তিনি নানারকম সত্য ও কল্পনা এক-সঙ্গে মিলিয়ে ঐতিহাসিক সাড়ে-বত্রিশ-ভাজার সৃষ্টি করেছেন । ফলে এ রচনায় যে মাল আছে, তাও মশলা থেকে পৃথক করে নেওয়া যায় না । শাস্ত্রীমহাশয়ের কথিত বাঙ্গলার পুরাবৃত্তের কোনও ভিত্তি আছে কি না বলা কঠিন । তবে এ ইতিহাসের যে গোড়াপত্তন করা

হয় নি—সে বিষয়ে আর দ্বিমত নেই। ইতিহাসের ছবি আঁকতে হলে প্রথমে ভূগোলের জমি করতে হয়। কোনও একটি দেশের সীমার মধ্যে কালকে আবদ্ধ না করতে পারলে, সে কালের পরিচয় দেওয়া যায় না। অসীম আকাশের জিওগ্রাফি নেই—অনন্ত কালেরও হিষ্টির নেই। কিন্তু শাস্ত্রীমহাশয় সেকালের বাঙ্গালীর পরিচয় দিতে গিয়ে সেকালের বাঙ্গলার পরিচয় দেন নি,—কলে গোরবটা উত্তরাধিকারী-স্বত্বে আমাদের কি অপরের প্রাপ্য—এ বিষয়েও সন্দেহ থেকে যায়। শাস্ত্রী-মহাশয়ের শব্দ হাতে পড়ে দেখতে পাচ্ছি অঙ্গ ভয়ে বঙ্গের ভিতর সঁধিয়েছে—কেননা যে “হস্তায়ুর্বেদ” আমাদের সর্বপ্রথম গোরব, সে শাস্ত্র অঙ্গরাজ্যে রচিত হয়েছিল। বাঙ্গলার লম্বা-চৌড়া অতীতের গুণবর্ণনা করতে হলে, বাঙ্গলা-দেশটাকেও একটু লম্বাচৌড়া করে নিতে হয়, সম্ভবতঃ সেইজন্য শাস্ত্রীমহাশয় আমাদের পূর্বপুরুষদের হয়ে অঙ্গকেও বে-দখল করে বসেছেন। তাই যদি হয়, তাহলে বরেন্দ্রভূমিকে ছেঁটে দেওয়া হ’ল কেন? শূন্যে পাই বাঙ্গলার অসংখ্য প্রত্নরাশি বরেন্দ্রভূমি নিজের বুকের ভিতর লুকিয়ে রেখেছে। বাঙ্গলার পূর্বগোরবের পরিচয় দিতে গিয়ে বাঙ্গলার যে ভূমি সব চেয়ে প্রত্নগর্ভা, সে প্রদেশের নাম পর্যন্ত উল্লেখ না করবার কারণ কি? যদি এই হয় যে, পূর্বের উত্তরবঙ্গের আদৌ কোন অস্তিত্ব ছিল না, এবং থাকলেও সে দেশ বঙ্গের বহির্ভূত ছিল—তাহলে সে কথাটাও বলে দেওয়া উচিত। নচেৎ বরেন্দ্র অনুসন্ধান-সমিতি আমাদের মনে একটা ভুল ধারণা এমনি বদ্ধমূল করে দেবে যে, তার “আমূল পরিবর্তন” কোনও চুটকি ইতিহাসের দ্বারা সাধিত হবে না।

শাস্ত্রীমহাশয় যে ভাষ্যশাসনে শাসিত নন, তার প্রমাণ,—তিনি

পাতায় পাতায় বলেন “আমি বলি”, “আমার মতে” এই সত্য । এর থেকেই প্রমাণ পাওয়া যায় যে, শাস্ত্রীমহাশয়ের ইতিহাস বস্তুতন্ত্রতার ধার ধারে না, অর্থাৎ এক কথায় তা কাব্য ;—এবং যখন তা কাব্য, তখন তা যে চুট্‌কি হবে, তাতে আর আশ্চর্য্য কি ?

শাস্ত্রীমহাশয়ের দেখতে পাই আর একটি এই অভ্যাস আছে যে, তিনি নামের সাদৃশ্য থেকে পৃথক পৃথক বস্তু এবং ব্যক্তির ঐক্য প্রমাণ করেন । একীকরণের এ পদ্ধতি অবশ্য বৈজ্ঞানিক নয় । কৃষ্ণ এবং খৃষ্ণ, এ দুটি নামের যথেষ্ট সাদৃশ্য থাকলেও, ও দুটি অবতারের প্রভেদ শুধু বর্ণগত নয়, বর্ণগতও বটে । কিন্তু শাস্ত্রীমহাশয়ের অবলম্বিত পদ্ধতির এই একটি মহাগুণ যে, ঐ উপায়ে অনেক পূর্ববর্গেরব আগাদের হাতে আসে, বা বৈজ্ঞানিক হিসাবে ন্যায়তঃ অপরের প্রাপ্য । কিন্তু উক্ত উপায়ে অতীতকে হস্তান্তর করার ভিতর বিপদও আছে । একদিকে যেমন গৌরব আসে—অপরদিকে তেমনি অগৌরবও আসতে পারে । অগৌরব শুধু যে আসতে পারে তাই নয়, বস্তুতঃ এসে গেছে ।

স্বয়ং শাস্ত্রীমহাশয় ঐতরেয় আরণ্যক হতে এই সত্য উদ্ধার করেছেন যে, প্রাচীন আর্যেরা বাঙ্গালী-জাতিকে পার্থী বলে গালি দিতেন । সে বচনটি এই :—

“বয়াংসি বঙ্গাবগধাশ্চেরপাদা”

“প্রথম পরিচয়ে আর্যেরা যে বাঙ্গালী-জাতির সম্বন্ধে অনেক অকথা কুকথা বলেন, তার পরিচয় আমরা এ যুগেও পেয়েছি । Vide Macaulay. সুতরাং প্রাচীন আর্যেরাও যে প্রথম পরিচয়ে বাঙ্গালীদের প্রতি নানারূপ কটুকাটব্য প্রয়োগ করেছিলেন, এ কথা সহজেই বিশ্বাস হয় । তবে এ ক্ষেত্রে এই

সন্দেহ উপস্থিত হয় যে, যদি গালি দেওয়াই তাঁদের অভিপ্রায় ছিল, তাহলে আর্গেরা আমাদের পাখী বললেন কেন?—পাখী বলে গাল দেবার প্রথা ত কোনও সভ্যসমাজে প্রচলিত দেখা যায় না। বরং “বুলবুল” “ময়না” প্রভৃতি এদেশে আদরের ডাক বলেই গণ্য। এবং ব্যক্তি-বিশেষের বুদ্ধির প্রশংসা করতে হলে আমরা তাকে “বুঁফু” উপাধি দানে সম্মানিত করি। অপমান করবার উদ্দেশ্যে মানুষকে যে সব প্রাণীর সঙ্গে তুলনা করা হয়ে থাকে, তারা প্রায়শঃই ভূচর এবং চতুষ্পদ,—দ্বিপদ এবং খেচর নয়। পাখী বলে নিন্দা করবার একটিমাত্র শাস্ত্রীয় উদাহরণ আমার জানা আছে। বাণভট্ট তাঁর সমসাময়িক কুকবিদের কোকিল বলে ভৎসনা করেছেন—কেননা তারা বাচাল, কামকারী, এবং তাদের “দৃষ্টি রাগাধিষ্ঠিত”—অর্থাৎ তাদের চক্ষু রক্তবর্ণ। গাল হিসেবে এ যে যথেষ্ট হ’ল না—সে কথা বাণভট্টও বুঝেছিলেন, কেননা পরবর্তী শ্লোকেই তিনি বলেছেন যে, কুকুরের মত কবি ঘরে ঘরে অসংখ্য মেলে, কিন্তু শরভের মত কবি মেলাই দুইটি। এস্থলে কবিকে প্রশংসাচ্ছলে কেন শরভ বলা হল—একথা যদি কেউ জিজ্ঞাসা করেন,—তার উত্তর, শরভ জানোয়ার হলেও চতুষ্পদ নয়, অষ্টপদ,—এবং তার অতিরিক্ত চারখানি পা ভূচর নয়, খেচর।

এই সব কারণে, কেবলমাত্র শব্দের সাদৃশ্য থেকে এ অনুমান করা সম্ভবত হবে না যে, আৰ্য্য ঋষিরা অপর এত কড়াকড়া গাল থাকতে আমাদের পূর্বপুরুষদের কেবলমাত্র পাখী বলে গাল দিয়েছেন। শাস্ত্রীমহাশয়ের মতে আমাদের সঙ্গে মাগধ এবং চের জাতিও এ গালির ভাগ পেয়েছে। কেননা তাঁর মতে বঙ্গা হচ্ছে বাঙ্গালী, বগধা হচ্ছে মগধা, এবং চেরপাদা হচ্ছে চের

নামক অসভ্য জাতি। “চেরপাদা” যে কি করে “চের”তে দাঁড়াল, তা বোঝা কঠিন। বাক্যের পদচ্ছেদের অর্থ পা কেটে ফেলা নয়। অথচ শাস্ত্রীমহাশয় “চেরপাদা”র পাছুখানি কেটে ফেলেই “চের” খাড়া করেছেন।

“বঙ্গাবগধাশ্চেরপাদা”—এই যুক্তপদের শুনতে পাই সেকালে পণ্ডিতেরা এইরূপ পদচ্ছেদ করেন—

বঙ্গা + অবগধাঃ + চ + ইরপাদা।

ইরপাদা অর্থে সাপ। তাহলে দাঁড়াল এই যে, বাঙ্গালী ও বেহারীকে প্রথমে পাখী এবং পরে সাপ বলা হয়েছে। উক্ত বৈদিক নিন্দার ভাগ আমি বেহারীদের দিতে পারিনে। অবগধা মানে যে মাগধ, এর কোনও প্রমাণ নেই। অতএব শাস্ত্রী-মহাশয় যেমন “চেরপাদা”র শেষ দুই বর্ণ ছেঁটে দিয়ে “চের” লাভ করেছেন, আমিও তেমনি “অবগধা” শব্দের প্রথম দুটি বর্ণ বাদ দিয়ে পাই “গধা”। এইরূপ বর্ণ-বিচ্ছেদের ফলে উক্ত বচনের অর্থ এই দাঁড়ায় যে, আবার ঋষিদের মতে বাঙ্গালী আদিতে পক্ষী, অন্তে সর্প, এবং ইতিমধ্যে গর্দভ।

“অবগধা”কে “গধা”র রূপান্তরিত করা সম্বন্ধে কেউ কেউ এই আপত্তি উত্থাপন করতে পারেন যে, সেকালে যে গাধা ছিল, তার কোনও প্রমাণ নেই। শাস্ত্রীমহাশয় বাঙ্গালীর প্রথম গৌরবের কারণ দেখিয়েছেন যে, পুরাকালে বাঙ্গলায় হাতি ছিল—কিন্তু বাঙ্গালীর দ্বিতীয় গৌরবের এ কারণ দেখান নি যে, সেকালে এদেশে গাধাও ছিল। কিন্তু গাধা যে ছিল, এ অনুমান করা অসঙ্গত হবে না। কেননা যদি সেকালে গাধা না থাকত ত একালে এদেশে এত গাধা এল কোথা থেকে? ঘোড়া যে বিদেশ থেকে এসেছে, তার পরিচয় ঘোড়ার নামেই পাওয়া যায়,

যথা —পগেয়া, ভুটিয়া, তাজি, আরবী ইত্যাদি । কিন্তু গর্দভদের এরূপ কোনও নামরূপের প্রভেদ দেখা যায় না । এবং ও জাতি যে, যে-কোনও অর্ধদ্বীপীয় যুগে বঙ্গদেশে এসে উপনিবেশ স্থাপন করেছে, তারও কোনও ঐতিহাসিক প্রমাণ নেই ।—অতএব ধরে নেওয়া যেতে পারে—রাসভকুল অপর সকল দেশের ন্যায় এদেশে এখনও আছে, পূর্বেও ছিল । তবে একমাত্র নামের সাদৃশ্য থেকে এরূপ অনুমান করা অসঙ্গত হবে যে, আর্য্য ঋষিরা পুরাকালের বাঙ্গালীদের এরূপ তিরস্কারে পুরস্কৃত করেছেন ! সংস্কৃত-ভাষায় “ঈ” শব্দের অর্থ বৃক্ষ । স্মৃতির ঋষি ধরে নেওয়া যেতে পারে যে, আরণ্যক শাস্ত্রে বৃক্ষ পক্ষী সর্প প্রভৃতি আরণ্য জীবজন্তুরই উল্লেখ করা হয়েছে—বাঙ্গালীর নামও করা হয় নি । অতএব আমাদের অতীত অতি গৌরবেরও বস্তু নয়—অতি অগৌরবেরও বস্তু নয় ।

আর একটি কথা । হীরেন্দ্রবাবু দর্শন-শব্দের, এবং যোগেশ বাবু বিজ্ঞান-শব্দের নিরুক্তির আলোচনা করেছেন, কিন্তু ষড়্‌বাবু ইতিহাসের নিরুক্তি সম্বন্ধে নীরব । ইতিহাস-শব্দ সম্ভবতঃ হস ধাতু হতে উৎপন্ন—অন্ততঃ শাস্ত্রীমহাশয়ের ইতিহাস যে হস্ত-রসের উদ্রেক করে, সে বিষয়ে আর কোনও সন্দেহ নেই । এমন কি, আমার সময়ে সময়ে মনে হয় যে, শাস্ত্রীমহাশয় পুরাতত্ত্বের ছলে আত্মশ্লাঘাপরায়ণ বাঙ্গালী জাতির সঙ্গে একটি মস্ত রসিকতা করেছেন ।

জ্যৈষ্ঠ, ১৩২২ ।

সাহিত্যে খেলা ।

জগৎ-বিখ্যাত ফরাসী ভাস্কর রোড্যাঁ—যিনি নিতান্ত জড় প্রস্তরের দেহ থেকে অসংখ্য জীবিত-প্রায় দেব দানব কেটে বার করেছেন, তিনিও শুনতে পাই, যখন-তখন হাতে কাদা নিয়ে, আঙ্গুলের টিপে মাটির পুতুল তৈরি করে থাকেন । এই পুতুল-গড়া হচ্ছে তাঁর খেলা । শুধু রোড্যাঁ কেন, পৃথিবীর শিল্পীমাত্রেই এই শিল্পের খেলা খেলে থাকেন । যিনি গড়তে জানেন, তিনি শিবও গড়তে পারেন, বাঁদরও গড়তে পারেন । আমাদের সঙ্গে বড় বড় শিল্পীদের তফাৎ এইটুকু যে, তাঁদের হাতে এক করতে আর হয় না । সম্ভবতঃ এই কারণে কলারাজ্যের মহাপুরুষদের যা-খুসি-তাই করবার যে অধিকার আছে, ইতর-শিল্পীদের সে অধিকার নেই । স্বর্গ হতে দেবতারা মধ্যে মধ্যে ভূতলে অবতীর্ণ হওয়াতে কেউ আপত্তি করেন না, কিন্তু মর্ত্যবাসীদের পক্ষে রসাতলে গমন করাটা বিশেষ নিন্দনীয় । অথচ এ কথা অস্বীকার করবার জো নেই যে, যখন এ জগতে দশটা দিক আছে, তখন এই সব-দিকেই গতায়াত্র করবার প্রবৃত্তিটি মানুষের পক্ষে স্বাভাবিক । মন উঁচুতেও উঠতে চায়, নীচুতেও নামতে চায় ; বরং সত্য কথা বলতে গেলে, সাধারণ লোকের মন স্বভাবতই যেখানে আছে তারি চারপাশে ঘুরে বেড়াতে চায়—উড়তেও চায় না, ডুবতেও চায় না । কিন্তু সাধারণ লোকে, সাধারণ লোককে, কি ধর্ম, কি নীতি, কি

কাব্য,—সকল রাজ্যেই অহরহ ডানায় ভর দিয়ে থাকতেই পরামর্শ দেয় । একটু উঁচুতে না চড়লে আমরা দর্শক এবং শ্রোতৃ-মণ্ডলীর নয়ন-মন আকর্ষণ করতে পারিনে । বেদীতে না বসলে, আমাদের উপদেশ কেউ মানে না ; রঙ্গক্ষেত্রে না চড়লে, আমাদের অভিনয় কেউ দেখে না ; আর কাষ্ঠক্ষেত্রে না দাঁড়ালে, আমাদের বক্তৃতা কেউ শোনে না । সুতরাং জনসাধারণের চোখের সম্মুখে থাকবার লোভে আমরাও অগত্যা চব্বিশ ঘণ্টা টংয়ে চড়ে থাকতে চাই,—কিন্তু পারিনে । অনেকের পক্ষে নিজের আয়ত্তের বহির্ভূত উচ্চস্থানে ওঠবার চেষ্টাটাই মহাপতনের কারণ হয় । এ সব কথা বলবার অর্থ এই যে, কষ্টকর হলেও, আমাদের পক্ষে অবশ্য মহাজনদের পথ অনুসরণ করাই কর্তব্য ; কিন্তু ডাইনে বাঁয়ে ছোটখাট গলিঘুঁজিতে খেলাচ্ছলে প্রবেশ করবার যে অধিকার তাঁদের আছে, সে অধিকারে আমরা কেন বঞ্চিত হব ? গান করতে গেলেই যে সুর তারায় চড়িয়ে রাখতে হবে, কবিতা লিখতে হলেই যে মনের শুধু গভীর ও প্রখর ভাব প্রকাশ করতে হবে, এমন কোন নিয়ম থাকা উচিত নয় । শিল্পরাজ্যে খেলা করবার প্রবৃত্তির ন্যায় অধিকারও বড়-ছোট সকলেরই সমান আছে । এমন কি, একথা বললেও অত্যাুক্তি হয় না যে, এ পৃথিবীতে একমাত্র খেলার ময়দানে ব্রাহ্মণ-শূত্রের প্রভেদ নাই । রাজার ছেলের সঙ্গে দরিদ্রের ছেলেরও খেলায় যোগ দেবার অধিকার আছে । আমরা যদি একবার সাহস করে কেবলমাত্র খেলা করবার জগৎ সাহিত্য-জগতে প্রবেশ করি, তাহ'লে নির্বিবাদে সে জগতের রাজা-রাজড়ার দলে মিশে যাব । কোনরূপ উচ্চ আশা নিয়ে সে ক্ষেত্রে উপস্থিত হলেই নিম্ন শ্রেণীতে পড়ে যেতে হবে ।

(২)

লেখকেরাও অবশ্য দশের কাছে হাততালির প্রত্যাশা রাখেন, বাহবা না পেলে মনঃক্ষুণ্ণ হন—কেননা, তাঁরাই হচ্ছেন যথার্থ সামাজিক জীব,—বাদবাকী সকলে কেবলমাত্র পারিবারিক। বিশ্বমানবের মনের সঙ্গে নিত্যনূতন সম্বন্ধ পাতানোই হচ্ছে কবি-মনের নিত্যনৈমিত্তিক কর্ম্ম। এমন কি, কবির আপন মনের গোপন কথাটিও গীতি-কবিতাতে রঙ্গভূমির স্বগতোক্তি স্বরূপেই উচ্চারিত হয়, যাতে করে সেই মর্ম্মকথা, হাজার লোকের কানের ভিতর দিয়ে মরমে প্রবেশ করতে পারে। কিন্তু উচ্চমঞ্চে আরোহণ করে উচ্চৈঃস্বরে উচ্চবাচ্য না করলে যে জনসাধারণের নয়নমন আকর্ষণ করা যায় না, এমন কোন কথা নেই। সাহিত্য-জগতে ঘাঁদের খেলা করবার প্রবৃত্তি আছে, সাহস আছে ও ক্ষমতা আছে—মানুষের নয়নমন আকর্ষণ করবার স্বেচ্ছা বিশেষ করে তাঁদের কপালেই ঘটে। মানুষে যে খেলা দেখতে ভালবাসে, তার পরিচয় ত আমরা এই জড় সমাজেও নিত্যই পাই। টাউনহলে বক্তৃতা শুন্তেই বা ক'জন যায়—আর গড়ের মাঠে ফুটবল খেলা দেখতেই বা ক'জন যায়? অগত্যা এ কথাও সত্য যে, টাউনহলের বক্তৃতার উদ্দেশ্য অতি মহৎ—ভারত-উদ্ধার—আর গড়ের মাঠের খেলোয়াড়দের ছুটোছুটি দৌড়াদৌড়ি আগাগোড়া অর্পশূন্য এবং উদ্দেশ্যবিহীন। আসল কথা এই যে, মানুষের দেহমনের সকলপ্রকার ক্রিয়ার মধ্যে ক্রীড়া শ্রেষ্ঠ—কেননা তা উদ্দেশ্যহীন। মানুষে যখন খেলা করে, তখন সে এক আনন্দ বাতীত অপর কোনও ফলের আকাঙ্ক্ষা রাখে না। যে খেলার ভিতর আনন্দ নেই, কিন্তু উপরি-পাওনার আশা আছে, তার নাম খেলা নয়, জুয়াখেলা ;—ও ব্যাপার

সাহিত্যে চলে না, কেননা ধর্ম্যতঃ জুয়াখেলা লক্ষ্মীপূজার অঙ্গ, সরস্বতীপূজার নয় । এবং যেহেতু খেলার আনন্দ নিরর্থক অর্থাৎ অর্থগত নয়, সে কারণ তা কারও নিজস্ব হতে পারে না । এ আনন্দে সকলেরি অধিকার সমান ।

সুতরাং সাহিত্যে খেলা-করবার অধিকার* যে আমাদের আছে, শুধু তাই নয়—স্বার্থ এবং পরার্থ এ দুয়ের যুগপৎ সাধনের জন্ত মনোজগতে খেলা করাই হচ্ছে আমাদের পক্ষে সর্বপ্রধান কর্তব্য । যে লেখক সাহিত্য-ক্ষেত্রে ফলের চাষ করতে ব্রতী হন, যিনি কোনরূপ কার্ণা-উদ্ধারের অভিপ্রায়ে লেখনী ধারণ করেন,—তিনি গীতের মর্ম্মও বোঝেন না, গীতার ধর্ম্মও বোঝেন না ; কেননা খেলা হচ্ছে জীবজগতে একমাত্র শিক্ষাম কর্ম্ম, অতএব মোক্ষলাভের একমাত্র উপায় । স্বয়ং ভগবান বলেছেন, যদিচ তাঁর কোনই অভাব নেই, তবুও তিনি এই বিশ্ব সৃজন করেছেন ; অর্থাৎ সৃষ্টি তাঁর লীলামাত্র । কবির সৃষ্টিও এই বিশ্বসৃষ্টির অনুরূপ—সে সৃজনের মূলে কোনও অভাব দূর করবার অভিপ্রায় নেই—সে সৃষ্টির মূল অন্তরাত্মার স্ফূর্তি, এবং তাঁর ফুল আনন্দ । এক কথায় সাহিত্যসৃষ্টি জীবাত্মার লীলামাত্র, এবং সে লীলা বিশ্বলীলার অন্তর্ভূত—কেননা জীবাত্মা পরমাত্মার অঙ্গ এবং অংশ ।

(৩)

সাহিত্যের উদ্দেশ্য সকলকে আনন্দ দেওয়া,—কারো মনো-রঞ্জন করা নয় । এ দুয়ের ভিতর যে আকাশ-পাতাল প্রভেদ আছে, সেইটি ভুলে গেলেই লেখকেরা নিজে খেলা না করে, পরের জন্তে খেলনা তৈরি করতে বসেন । সমাজের মনোরঞ্জন

করতে গেলে সাহিত্য যে স্বধর্মচ্যুত হয়ে পড়ে, তার প্রমাণ বাঙ্গলা-দেশে আজ দুর্লভ নয় । কাব্যের ঝুমঝুমি, বিজ্ঞানের চুষিকাঠি, দর্শনের বেলুন, রাজনীতির রাঙালাঠি, ইতিহাসের ঝাকড়ার পুতুল, নীতির টিনের ভেঁপু এবং ধর্মের জয়ঢাক,—এই সব জিনিসে সাহিত্যের বাজার চেয়ে গেছে । সাহিত্য-রাজ্যে খেলনা পেয়ে পাঠকের মনস্তৃষ্টি হতে পারে, কিন্তু তা গড়ে লেখকের মনস্তৃষ্টি হতে পারে না । কারণ পাঠকসমাজ যে খেলনা আজ আদর করে, কাল সেটিকে ভেঙ্গে ফেলে ;—সে প্রাচ্যই হোক আর পাশ্চাত্যই হোক, কাশীরই হোক আর জন্মাণীরই হোক, দুদিন ধরে তা কারও মনোরঞ্জন করতে পারে না । আমি জানি যে পাঠকসমাজকে আনন্দ দিতে গেলে তাঁরা প্রায়শই বেদনা বোধ করে থাকেন । কিন্তু এতে ভয় পাবার কিছুই নেই—কেননা কাব্য-জগতে যার নাম আনন্দ, তারি নাম বেদনা ; সে ঝড়ই হোক, পরের মনোরঞ্জন করতে গেলে সরস্বতীর বর-পুল্লও যে নটবিটের দলভুক্ত হয়ে পড়েন—তার জাজ্জল্যমান প্রমাণ স্বয়ং ভারতচন্দ্র । কৃষ্ণচন্দ্রের মনোরঞ্জন করতে বাধ্য না হলে তিনি বিদ্যাসুন্দর রচনা করতেন না, কিন্তু তাঁর হাতে বিদ্যা ও সুন্দরের অপূর্ব মিলন সজ্জাটিত হ'ত ; কেননা Knowledge এবং Art উভয়ই তাঁর সম্পূর্ণ করায়ত্ত ছিল । “বিদ্যাসুন্দর” খেলনা হলেও রাজার বিলাসভবনের পাঞ্চালিকা—সুবর্ণে গঠিত, সুগঠিত এবং মণিমুক্তায় অলঙ্কৃত ; তাই আজও তার যথেষ্ট মূল্য আছে,—অন্ততঃ জহুরীর কাছে । অপরপক্ষে এ যুগে পাঠক হচ্ছে জনসাধারণ—সুতরাং তাঁদের মনোরঞ্জন করতে হলে, আমাদের অতি সস্তা খেলনা গড়তে হবে—নইলে তা বাজারে কাটবে না । এবং সস্তা করার অর্থ খেলো করা । বৈশ্য লেখকের পক্ষেই

শুভ্র পাঠকের মনোরঞ্জন করা সঙ্গত । অতএব সাহিত্যে আর যাই করনা কেন, পাঠকসমাজের মনোরঞ্জন করবার চেষ্টা কোরোনা ।

(৪)

তবে কি সাহিত্যের উদ্দেশ্য লোককে শিক্ষা দেওয়া ?—অবশ্য নয় । কেননা কবির মতিগতি শিক্ষকের মতিগতির সম্পূর্ণ বিপরীত । স্কুল না বন্ধ হলে যে খেলার সময় আসে না, এ ত সকলেরি জানা কথা । কিন্তু সাহিত্য রচনা যে আত্মার লীলা, এ কথা শিক্ষকেরা স্বীকার করতে প্রস্তুত নন । সুতরাং, শিক্ষা ও সাহিত্যের ধর্ম্যকর্ম্য যে এক নয়—এ সত্যটি একটু স্পষ্ট করে দেখিয়ে দেওয়া আবশ্যিক । প্রথমতঃ, শিক্ষা হচ্ছে সেই বস্তু, যা লোকে নিতান্ত অনিচ্ছাসত্ত্বেও গলাধঃকরণ করতে বাধ্য হয়, অপরপক্ষে কাবারস লোকে শুধু স্বেচ্ছায় নয়, সানন্দে পান করে,—কেননা শাস্ত্রমতে সে রস অমৃত । দ্বিতীয়তঃ, শিক্ষার উদ্দেশ্য হচ্ছে মানুষের মনকে বিশ্বের খবর জানানো ; সাহিত্যের উদ্দেশ্য মানুষের মনকে জাগানো । কাব্য যে সংবাদপত্র নয়—এ কথা সকলেই জানেন । তৃতীয়তঃ, অপরের মনের অভাব পূর্ণ করবার উদ্দেশ্যেই শিক্ষকের হস্তে শিক্ষা জন্মলাভ করেছে—কিন্তু কবির নিজের মনের পরিপূর্ণতা হতেই সাহিত্যের উৎপত্তি । সাহিত্যের উদ্দেশ্য যে আনন্দ দান করা—শিক্ষা দান করা নয়—একটি উদাহরণের সাহায্যে তার অকাটা প্রমাণ দেওয়া যেতে পারে । বাঙ্গালীকি আদিত মুনিঋষিদের জন্ম রামায়ণ রচনা করেছিলেন,—জনগণের জন্ম নয় । এ কথা বলা বাহুল্য যে, বড় বড় মুনিঋষিদের কিঞ্চিৎ শিক্ষা দেওয়া তাঁর উদ্দেশ্য ছিল

না । কিন্তু রামায়ণ শ্রবণ করে মহর্ষিরাও যে কতদূর আনন্দে আত্মহারা হয়েছিলেন, তার প্রমাণ—তঁারা কুশী-লবকে তাঁদের যথাসর্বস্ব, এমন কি কোপীন পর্য্যন্ত, পেলা দিয়েছিলেন । রামায়ণ কাব্যহিসাবে যে অমর, এবং জনসাধারণ আজও যে তার শ্রবণে পঠনে আনন্দ উপভোগ করে, তার একমাত্র কারণ, আনন্দের ধর্ম্মই এই যে তা সংক্রামক । অপরপক্ষে লাখে একজনও যে যোগ-বাশিষ্ঠ রামায়ণের ছায়া মাড়ান না, তার কারণ সে বস্তু লোককে শিক্ষা দেবার উদ্দেশ্যে রচিত হয়েছিল, আনন্দ দেবার জন্মে নয় । আসল কথা এই যে, সাহিত্য কস্মিনকালেও স্কুলমাস্টারির ভার নেয়নি । এতে দৃষ্ট করবার কোনও কারণ নেই । দৃষ্টের বিষয় এই যে, স্কুলমাস্টারেরা একালে সাহিত্যের ভার নিয়েছেন ।

কাব্যরস নামক অমৃতে যে আমাদের অরুচি জন্মেছে, তার জন্ম দায়ী—এ যুগের স্কুল এবং তার মাস্টার । কাব্য—পড়বার ও বোঝবার জিনিস ; কিন্তু স্কুলমাস্টারের কাজ হচ্ছে বই পড়ানো ও বোঝানো । লেখক এবং পাঠকের মধ্যে এখন স্কুলমাস্টার দণ্ডায়মান । এই মধ্যস্থদের রূপায় আমাদের সঙ্গে কবির মনের মিলন দূরে থাক, চার চক্ষুর মিলনও ঘটে না । স্কুলঘরে আমরা কাব্যের রূপ দেখতে পাইনে,—শুধু তার গুণ শুনি । টীকা ভাষ্যের প্রসাদে আমরা কাব্যসম্বন্ধে সকল নিগূঢ়ত্ব জানি, কিন্তু সে যে কি বস্তু, তা চিনি নে । আমাদের শিক্ষকদের প্রসাদে আমাদের এ জ্ঞান লাভ হয়েছে যে, পাথুরে কয়লা হীরার সর্বণ না হলেও সগোত্র—অপরপক্ষে হীরক ও কাচ যমজ হলেও সহোদর নয় । এর একের জন্ম পৃথিবীর গর্ভে, অপরটির মানুষের হাতে ; এবং এ উভয়ের ভিতর এক দা-কুমড়ার সম্পর্ক

বাতীত অপর কোনও সম্বন্ধ নেই। অথচ এত জ্ঞান সত্ত্বেও আমরা সাহিত্যে কাচকে হীরা এবং হীরাকে কাচ বলে নিত্য ভুল করি, এবং হীরাও কয়লাকে এক-শ্রেণীভুক্ত করতে তিলমাত্র দ্বিধা করি নে;—কেননা ওরূপ করা যে সম্ভব, তার বৈজ্ঞানিক প্রমাণ আমাদের মুখস্থ আছে। সাহিত্য—শিক্ষার ভার নেয় না, কেননা মনোজগতে শিক্ষকের কাজ হচ্ছে কবির কাজের ঠিক উল্টো। কবির কাজ হচ্ছে কাব্য সৃষ্টি করা, আর শিক্ষকের কাজ হচ্ছে প্রথমে তা বধ করা, তারপরে তার শব্দচ্ছেদ করা—এবং ঐ উপায়ে তার তত্ত্ব আবিষ্কার করা ও প্রচার করা। এই সব কারণে নির্ভয়ে বলা যেতে পারে যে, কারও মনোরঞ্জন করাও সাহিত্যের কাজ নয়,—কাউকে শিক্ষা দেওয়াও নয়। সাহিত্য ছেলের হাতের খেলনাও নয়, গুরুর হাতের বেতও নয়। বিচারের সাহায্যে এই মাত্রই প্রমাণ করা যায়। তবে বস্তু যে কি, তার জ্ঞান অনুভূতি-সাপেক্ষ, তর্ক সাপেক্ষ নয়। সাহিত্যে মানবাত্মা খেলা করে এবং সেই খেলার আনন্দ উপভোগ করে—এ কথার অর্থ যদি স্পষ্ট না হয়, তাহলে কোন সুদীর্ঘ ব্যাখ্যার দ্বারা তা স্পষ্টতর করা আমার অসাধ্য।

এই সব কথা শুনে আমার জনৈক শিক্ষাভক্ত বন্ধু এই সিদ্ধান্তে উপনীত হয়েছেন যে, সাহিত্য খেলাচ্ছলে শিক্ষা দেয়। এ কথার উত্তরে আমার বক্তব্য এই যে, সরস্বতীকে কিণ্ডার-গাটেনের শিক্ষয়িত্রীতে পরিণত করবার জন্য যতদূর শিক্ষা বাতিকগ্রস্ত হওয়া দরকার, আমি আজও ততদূর হতে পারিনি।

শিক্ষার নব আদর্শ ।

—:—

শ্রীযুক্ত রবীন্দ্রনাথ ঠাকুর মহাশয় যে এ দেশের চলতি শিক্ষার দর যাচাই করতে উদ্বৃত্ত হয়েছেন, এ অতি সুখের কথা । কেননা বাঙ্গালী যদি কোনও বস্তু লাভ করবার জগ্য মাথার ঘাম পায়ে ফেলে ত সে হচ্ছে শিক্ষা । সুতরাং আমরা দেশস্বত্ব ভদ্রসম্মান প্রাপ্যতা করে যা পাই, জলরির কাছে তার মূল্য যে কি, তা জানায় ক্ষতি নেই ।

আমরা যে কত শিক্ষালোভী, তার প্রমাণ আমাদের পাঁচ বৎসর বয়েসে হাতে-খড়ি হয় । আর কম্‌সে-কম্‌ একুশ বৎসর বয়েসে হাতে-কালি মুখে-কালি আমরা সেনেট-হাউস থেকে লিখে আসি । কিন্তু এতেও আমাদের শিক্ষার সাধ মেটে না । এর পরে আমরা সারাজীবন যখন যা-কিছু পড়ি—তা কবিতাই হোক আর গল্পই হোক—আমাদের মনে স্বতঃই এই প্রশ্নের উদয় হয় যে, আমরা এ পড়ে কি শিক্ষা লাভ করলুম ?—এ প্রশ্নের উত্তর মুখে-মুখে দেওয়া অসম্ভব, কেননা সাহিত্যের যা শিক্ষা, তা হাতে-হাতে পাওয়া যায় না । সাহিত্য যা দেয়, তা আনন্দ ; কিন্তু ও-বস্তু আমরা জানিনে বলে মানিনে । আমাদের শিক্ষার ভিতর আনন্দ নেই বলে, আনন্দের ভিতর যে শিক্ষা থাকতে পারে, তা আমাদের বুদ্ধির অগম্য ।

ফলে পাঠকমাত্রই যখন শিক্ষার্থী, তখন লেখকমাত্রকেই দায়ে-পড়ে শিক্ষক হতে হয় । পাঠক-সমাজ যখন আমাদের

কাছে শিক্ষা নিতে প্রস্তুত, তখন অবশ্য শিক্ষা দিতে আমাদের নারাজ হওয়া উচিত নয়;—কেননা লেকচার জিনিসটে দেওয়া সহজ, শোনাই কঠিন। তবে যে আমরা পাঠকদের সকল-সময় শিক্ষা না দিয়ে সময়-সময় আনন্দ দেবার রুখা চেষ্টা করে তাঁদের বিরাগভাজন হই, তার একটি বিশেষ কারণ আছে।

বাঙ্গলা-সাহিত্যের যে শুধু পাঠক আছেন তা নয়, পাঠিকাও আছেন। দলে বোধ হয় উভয়েই সমান পুরু হবেন—অথচ এ উভয়ের ভিতর বিছার প্রভেদ বিস্তর। পাঠকেরা-সব বিশ্ববিদ্যালয়ের পরীক্ষোত্তীর্ণ; পাঠিকারা বালিকা-বিদ্যালয়ের পরীক্ষোত্তীর্ণাও নন। সুতরাং পাঠকদের জ্ঞাত লেখকদের post-graduate লেকচার দেওয়া কঠব্য, এবং পাঠিকাদের জ্ঞাত নিম্ন প্রাইমারির। অথচ শ্রোতাদের শিক্ষা দিতে হলে আমাদের পক্ষে সেইরূপ বক্তৃতা করা আবশ্যিক—যা সকলের পক্ষে সমান উপযোগী হয়। অসাধ্য সাধন করবার দুঃসাহস সকলের নেই, সম্ভবতঃ সেই কারণে বাঙ্গলার কাব্য-সাহিত্য শিক্ষাদানের ভার হাতে নেয়নি।

কিন্তু এদেশের আবালবৃদ্ধবনিতা সকলের পক্ষে সমান শিক্ষাপ্রদ সাহিত্য যে রচনা করা যায় না—এ ধারণা অমূলক। উপর উপর দেখলেই এ দেশের শিক্ষিত লোক এবং অশিক্ষিত প্রজীলোকের বিছাবুদ্ধির প্রভেদ মস্ত দেখায়;—কিন্তু একটু তলিয়ে দেখলেই দেখা যায় যে, আমরা মনে সকলেই এক। মনোমাজ্যে যে আমাদের লিঙ্গভেদ নেই, বর্ণভেদ নেই, বয়োভেদ নেই, তার প্রমাণ হাতে-কলমে দেখানো যেতে পারে। “ঘরে-বাইরে” লেখবার কৈফিয়ৎ তলব করে একটি ভদ্রমহিলা রবীন্দ্রনাথকে যে পত্র লিখেছিলেন, তা যে-কোনও এম্-এ-পাস-করা প্রোফেসর

লিখতে পারতেন—এবং উক্ত গল্প পাঠ করে একটি এম্-এ-পাস-করা প্রোফেসরের মনে যে সমস্তার উদয় হয়েছে, তা যে-কোনও ভদ্রমহিলার মনে উদয় হতে পারত;—অতএব যে-কোনও শিকারী সাহিত্যিক একটি বাক্যবাণে এ দুটি পাখীকেই বিদ্ধ করতে পারেন। বস্তুগত্যা আমাদের মন হচ্ছে হরীতকী-জাতীয়; শিক্ষার গুণে সে মন পাকে না,—শুধু শুকিয়ে যায়। স্তত্রাং বাঙ্গলার অশিক্ষিত স্ত্রীলোক ও শিক্ষিত পুরুষ,—এ দুয়ের মনের ভিতর প্রভেদ এই যে, এর একটি কাঁচা আর অপরটি শুকনো। দেশশুদ্ধ লোক সেই শিক্ষা চান, যে-শিক্ষার গুণে স্ত্রীপুরুষ সকলের মন সমান শুকিয়ে ওঠে। কেননা হরীতকী যত বেশী শুকায়, যত বেশী তিতে হয়, তত বেশী উপকারী হয়। অপর পক্ষে রবীন্দ্রনাথ সেই শিক্ষার সন্ধানে ফিরছেন, যে শিক্ষার প্রভাবে আমাদের মন-হরীতকী পেকে উঠবে, এবং যার আশ্রয় গ্রহণ করে স্বজাতি অমর হ লাভ করবে। এ ক্ষেত্রে দেশের শিক্ষিত সম্প্রদায়ের সঙ্গে রবীন্দ্রনাথের মতের মিল হবার কোনও সম্ভাবনা নেই—কেননা উভয়ের আদর্শ সম্পূর্ণ বিভিন্ন।

আমাদের পক্ষে কি শিক্ষা ভাল, তা নির্ণয় করবার পূর্বে—আমরা কি হতে চাই, সে বিষয়ে মনঃস্থির করা আবশ্যিক। কেননা একটা স্পষ্ট জাতীয় আদর্শ না থাকলে, জাতীয় শিক্ষার ব্যবস্থা করা যেতে পারে না। ধরুন যদি অশুদ্ধ-লাভ-করা গর্দভদের জাতীয় আদর্শ করে তোলা যায়, তাহলে অবশ্য সে জাতির শিক্ষকেরাও তাদের জঘ পেটনের ব্যবস্থা করবেন;—অপর পক্ষে গর্দভ লাভ করা যদি অশুদ্ধদের জাতীয় আদর্শ করে তোলা যায়, তাহলে সে জাতির শিক্ষকেরাও তাদের জঘ ঐ পেটনেরই ব্যবস্থা করবেন। হয় গাধা-পিটে-ঘোড়া, নয়

ঘোড়া-পিটে-গাধা করাই যে শিক্ষার একমাত্র উদ্দেশ্য, সাধারণতঃ এইটাই হচ্ছে লোকের ধারণা। এবং আমরা এই উভয়ের মধ্যে যে কোন্ জাতীয়, সে বিষয়ে দেশে-বিদেশে বিষম মতভেদ থাকলেও—পেটন দেওয়াটাই যে শিক্ষা দেবার একমাত্র পদ্ধতি, সে-বিষয়ে বিশেষ কোন মতভেদ নেই। কাজেই আমাদের শিক্ষকেরা একহাতে সংস্কৃত, আর-একহাতে ইংরেজি ধরে, আমাদের উপর দুহাতে চাবুক চালাচ্ছেন। এর ফলে কত গাধা ঘোড়া এবং কত ঘোড়া গাধা হচ্ছে—তা বলা কঠিন; কেননা এ বিষয়ের কোনও Statistics অত্যাধিক সংগ্রহ করা হয়নি।

সে যাই হোক, যে জাতীয় আদর্শের উপর জাতীয় শিক্ষা নির্ভর করে, তা যুগপৎ মনের এবং জীবনের আদর্শ হওয়া দরকার। যে দেশে জাতীয় শিক্ষা আছে, সে দেশের প্রতি ঈষৎ দৃষ্টিপাত করলেই এ সত্য সকলের কাছেই স্পষ্ট প্রতীয়মান হবে। ইউরোপে আমরা দেখতে পাই যে, জাতিগত চেয়েছিল—“যা নই তাই হব”, ইংলণ্ড—“যা আছি তাই থাকব”, আর ফ্রান্স—“যা আছি তাও থাকব না, যা নই তাও হব না” এবং এই তিন দেশের গত পঞ্চাশ বৎসরের কাজ ও কথার ভিতর নিজ নিজ জাতীয় আদর্শের স্পষ্ট পরিচয় পাওয়া যাবে।

কিন্তু আমাদের বিশেষত্ব এই যে, আমরা জীবনে এক পথে চলতে চাই—মনে আর-এক পথে।

আমাদের ব্যক্তিগত মনের আদর্শ হচ্ছে—“যা ছিলুম তাই হওয়া”, আর আমাদের জাতিগত জীবনের আদর্শ হচ্ছে—“যা ছিলুমনা তাই হওয়া”। ফলে আমাদের সামাজিক বুদ্ধির মুখ প্রাচীন ভারতবর্ষের দিকে আর আমাদের রাষ্ট্রীয় বুদ্ধির মুখ

নবীন ইউরোপের দিকে। এই আদর্শের উভয়-সঙ্কটে পড়ে, আমরা শিক্ষার একটা সুপথ ধরতে পারছিনে,—স্কুলেও নয়, সাহিত্যেও নয়।

একজন ইংরেজ দার্শনিক বলেছেন যে, সমস্তাটা যে কি এবং কোথায়, সেইটে ধরাই কঠিন; তার মীমাংসা করা সহজ। এ কথা সত্য। শ্রীযুক্ত রবীন্দ্রনাথ তাই “ঘরে-বাইরে”য় আমাদের জাতীয় সমস্তার ছবি এঁকেছেন, কেননা ও-উপন্যাসখানি একটি রূপক-কাব্য ছাড়া আর কিছুই নয়। নিখিলেশ হচ্ছেন প্রাচীন ভারতবর্ষ, সন্দীপ নবীন ইউরোপ, আর বিমলা বর্তমান ভারত। এই দোটানার ভিতর পড়েই বিমলা বেচারী নাস্তানাবুদ হচ্ছে, মুক্তির পথ যে কোন্‌দিকে, তা সে খুঁজে পাচ্ছে না। এরূপ অবস্থায় এক সংশিক্ষা ব্যতীত তার উদ্ধারের উপায়ান্তর নেই। অতএব এ ক্ষেত্রে আমাদের পক্ষে শিক্ষার একটি আদর্শ খুঁজে-পেতে বার করা দরকার।

আমি বহু গবেষণার ফলেও সে আদর্শ আজও আবিষ্কার করতে পারিনি, সুতরাং সে আদর্শ নিজেই গড়তে বাধ্য হয়েছি। আমি স্বজাতিকে অনুরোধ করি যে, আমার এই গড়া আদর্শ যেন বিনা পরীক্ষায় পরিহার না করেন।

শ্রীমতী লীলা মিত্র নামক জনৈক ভদ্রমহিলা “সবুজ পত্রে” এই মত প্রকাশ করেন যে, এদেশে স্ত্রীশিক্ষার আদর্শ ভুল। সুতরাং তার পদ্ধতিও নিরর্থক। তাঁর মতে আমরা স্ত্রীজাতিকে সেই শিক্ষা দিতে চাই, যাতে তারা পুরুষজাতির কাজে লাগে; সুতরাং সে শিক্ষা নিষ্ফল। এ কথা সম্ভবতঃ সত্য। তিনি চান যে স্ত্রীজাতি নিজের শিক্ষার ভার নিজ-হস্তে গ্রহণ করেন;—এ হলে তো আমরা বাঁচি। আমাদের মেয়েরা যদি নিজের

বিবাহের ভার নিজের হাতে নেন, তাহ'লে দেশস্থ লোক যেমন কঠাদায় হতে অগ্নি নিক্ষেপিত লাভ করে ; তেমনি মা-লক্ষ্মীরা যদি নিজগুণে মা-সরস্বতী হয়ে ওঠেন, তাহলে স্ত্রীশিক্ষার সমস্তা আমাদের আর মীমাংসা করতে হয় না ।

সে যাই হোক, আমি বলি পুরুষজাতিকে সেই শিক্ষা দেওয়া হোক, যাতে তারা স্ত্রীজাতির কাজে লাগে । শিক্ষার এ আদর্শ কোনকালে কোনদেশে ছিল না বলেই আমাদের পক্ষে তা গ্রাহ্য করা উচিত । পুরুষজাতি যদি এই আদর্শে শিক্ষিত হয়, তাহলে আর-কিছু না হোক, পৃথিবীর মারামারি কাটাকাটি সব থেমে যাবে । নিখিলেশ ও সন্দীপ যদি বিমলাকে নিজের নিজের কাজে লাগাতে চেষ্টা না কোরে, নিজেদের বিমলার কাজে লাগাতে চেষ্টা করতেন—তাহলে গোল ত সব মিটেই যেত । অতএব আমরা যাতে বিমলার কাজে লাগি, সেইরকম আমাদের শিক্ষা হওয়া কর্তব্য ।

মাঘ, ১৩২২ ।

কন্‌গ্রেসের আইডিয়াল্ ।



১৮৮৫ খৃষ্টাব্দে বোম্বাই বন্দরে কন্‌গ্রেসের জন্ম হয়
১৯০৬ খৃষ্টাব্দে কলিকাতা সহরে তা সাবালক হয় । তার পর-
বৎসর সুরাট নগরীতে তার মৃত্যু হয় । '১৯১৬' এ বৎসর আবার তার
জন্মস্থানে তার পুনর্জন্ম হয়েছে

এবার কিন্তু কন্‌গ্রেসের ধড়ে প্রাণ আসে নি, তার প্রাণে
ধড় এসেছে । সকলেই জানেন, সুরাটে কন্‌গ্রেসের মৃত্যু হয়নি,
তার অপমৃত্যু ঘটেছিল ; আর সে যেমন-তেমন অপমৃত্যু নয়—
একসঙ্গে খুন এবং আত্মহত্যা । এদেশে কারও অপমৃত্যু ঘটলে
তার আত্মার ততদিন সদগতি হয় না, যতদিন-না তা আবার
একটি নূতন দেহে প্রবেশ লাভ করতে পারে । কন্‌গ্রেসের
সূক্ষ্মশরীর তাই এ-কয়-বৎসর একটি স্থূল শরীরের তল্লাসে
এদেশে ওদেশে ঘুরে বেড়াচ্ছিল । অতঃপর বোম্বাই-ধামে তা
লাভ করেছে । গত কন্‌গ্রেসে বিশ-হাজার লোক জমায়েৎ
হয়েছিল ।

•



কন্‌গ্রেসওয়ালাদের মতে কিন্তু কন্‌গ্রেসের কস্মিনকালেও
মৃত্যু হয়নি । সুরাটে শুধু সুরাট পাগল হয়ে কন্‌গ্রেসকে জখম
করে, নিজে করেছিলেন আত্মহত্যা । তারপর, যেহেতু সে
সুরাট কন্‌গ্রেসেই জন্মলাভ করেছিল, সেই জগৎ তার ভৃত্য তার

জন্মদাতার স্ফন্দে ভর করবার চেষ্টায় ফিরছিল । সেই ভূতের ভয়ে কনগ্রেস এতদিন ঘরের দুয়ার বন্ধ করে বসেছিল । এই বন্ধ ঘরের দূষিত বায়ুতেই তার শরীর কাহিল হয়ে গিয়েছিল । অথচ কনগ্রেস এই ভূতের উপদ্রব থেকে নিষ্কৃতি পাবার কোনও উপায় বার করতে পারে নি । এবার নব মন্ত্রের বলে স্বরাটের ভূত—ভবিষ্যৎ হয়ে গেছে । তাই কনগ্রেসের দেহটি আবার নাহুস্নুহুস্ন হয়ে উঠেছে । এককথায় কনগ্রেস এবার বেঁচে ওঠে নি—বেঁচে গিয়েছে ।

সে যাই হোক । কনগ্রেসের এবার ভোল ফিরেছে এবং সেই সঙ্গে তার বোল ফিরেছে । এতদিন কনগ্রেস ছিল বড়দিনের দুর্গোৎসব । তিনদিন ধরে “ধনং দেহি মানং দেহি” বলে দু’সন্ধ্যা ইংরাজিতে মন্ত্র আওড়ান, এবং সেই উপলক্ষ্যে খানাপিনা নাচ-তামাসা আমোদ-আহ্লাদ, এবং তার পরে বিসর্জন, এবং তার পরে কনগ্রেসওয়ালাদের পরস্পর কোলাকুলি করে গৃহাভিমুখে যাত্রা, — এই ছিল কনগ্রেসের হাল ও চাল ।

ভবিষ্যতে শুন্দি কনগ্রেসের সপ্তমী অষ্টমী নবমী থাকবে, কিন্তু দশমীতেই সব শেষ হবে না । তার পর বারোমাস ধরে কনগ্রেস তার স্বধর্ম প্রচার করবে । অর্থাৎ কনগ্রেস এবার জাতীয়-রাজনৈতিক-শিক্ষা-পরিষদে পরিণত হল । কনগ্রেসের এ সংকল্প অতি সাধু-সংকল্প সন্দেহ নেই—কিন্তু যে বিষয়ে সন্দেহ আছে তা হচ্ছে এই যে, এ সংকল্প কার্যো পরিণত হবে কি না !

প্রথমতঃ রাজনীতি বলতে যা বোঝায়, তা দেশস্বত্ব লোককে বোঝানো কঠিন । ও-পদার্থ আমরা ইউরোপ থেকে আমদানী করেছি । সে দেশে একালে ও-বস্তু হচ্ছে তাই, যার ভিতর একদিক দিয়ে দেখতে গেলে রাজাও নেই, নীতিও নেই ; আবার আর-একদিক দি়য়ে দেখতে গেলে, ও-দুইই আছে । এই দুটো দিক যাতে একসঙ্গে চোখে পড়ে, এমন-করে দেশের চোখ-ফোটানোর জন্ত যে জ্ঞানাজ্ঞান-শলাকার আবশ্যক, তা দেশী-ভাষা নয় । ব্রহ্ম যে একাধারে সগুণ এবং নিগুণ, এ সত্য বোঝাতে হলে যেমন সংস্কৃত-ভাষার সাহায্য চাই,—তেমনি রাজনীতি যে একসঙ্গে রাজমন্ত্র এবং প্রজাতন্ত্র হতে পারে, এ সত্য বোঝাতে হলে ইংরাজির সাহায্য চাই ।

কংগ্রেস অবশ্য এতে পিছপাও হবে না । কেননা কংগ্রেসের পাণ্ডুরা ঐ এক ইংরাজি-ভাষাই জানেন, এবং ঐ এক ইংরাজি-ভাষাই মানেন । তবে তাঁদের কথা বোঝে, এমন লোক দেশে ক’টি ? অতএব তাঁরা যদি দেশকে রাজনৈতিক-শিক্ষা দিতে বসেন ত ফলে দাঁড়াবে এই যে, কংগ্রেসওয়ালারাই পালা করে পরস্পর পরস্পরের গুরুশিষ্য হবেন । সুতরাং যতদিন না ভারতবর্ষের ত্রিশকোটি লোক ইংরাজি-শিক্ষিত হয়ে ওঠে, ততদিন এই রাজনৈতিক-শিক্ষার কার্য্যটা মূলতঃ রাখাই কর্তব্য । সে শিক্ষা যে শুধু নিফল হবে তাই নয়, তার কুফলও হতে পারে । শিক্ষা দিতে গিয়ে হয় ত কংগ্রেসকে দুদিন পরে দেশের লোককে বলতে হবে—“উন্টা বুঝিলি রাম !” এ বিপদ যে আছে, তার প্রমাণও আছে । আর একরূপ উন্টা বোঝাটা রামের

পক্ষে আরামের নয় । এবং সে অবস্থায় কনগ্রেসের পক্ষে তাকে ভাবাগঙ্গারাম বলাটাও সম্ভব নয় ।

দ্বিতীয়তঃ, জাতীয় রাজনৈতিক-শিক্ষার জন্য একটা জাতীয় রাজনৈতিক-আদর্শ থাকা আবশ্যক । একটা আইডিয়াল্ যে থাকা চাইই চাই, এ কথা কনগ্রেসও মুক্তকণ্ঠে স্বীকার করে । এস্থলে যদি কেউ প্রশ্ন করেন যে, কনগ্রেস কি আজও তেমন কোন রাজনৈতিক আদর্শের সম্মান পেয়েছেন ? তাহলে কনগ্রেসওয়ালারা উচ্চকণ্ঠে উত্তর দিবেন—অবশ্য পেয়েছি । এবং সে আদর্শের নাম হচ্ছে—“সাম্রাজ্যের ভিতর স্বরাজ্য ।”

নিত্য দেখতে পাই যে, একদলের মতে ভারতবর্ষে স্বরাজ-কতার অর্থ হচ্ছে অরাজকতা, আর-একদলের মতে অরাজকতার অর্থই হচ্ছে স্বরাজকতা । এই দুটি হচ্ছে আমাদের রাজনৈতিক গগনের শুক্ল আর কৃষ্ণপক্ষ । কনগ্রেস অবশ্য এই দুই মতই সমান অগ্রাহ্য করেন ; কেননা এই দুয়ের মধ্যস্থ দল হচ্ছে কনগ্রেস । এ মতে শুদ্ধ-স্বরাজ্য সম্বন্ধে এইরূপ মতভেদ হতে পারে, কিন্তু “সাম্রাজ্যের ভিতর স্বরাজ্য” সম্বন্ধে হতে পারে না । কেননা সাম্রাজ্যের ভিতর স্বরাজ্য যে খাপ খাওয়ানো যেতে পারে, তার উদাহরণ ক্যানাডা, অষ্ট্রেলিয়া, সাউথ-আফ্রিকা প্রভৃতি । সুতরাং যার এত নজির আছে, সেই আদর্শের পক্ষে ওকালতি করায় বাধা নেই ; অতএব এ আদর্শ বিচ্ছিন্নসত্তাও বটে, বুদ্ধিসঙ্গতও বটে ; কেননা যদি বর্তমানের উপাদান নিয়ে ভবিষ্যতের মূর্তি গড়তে হয়, তাহলে এ-ছাড়া অণু কোনো আদর্শ হতে পারে না । তবে এই আদর্শকে বিপক্ষ-পক্ষ হেসে এই প্রশ্ন করেন যে—

“তুমি কোন গগনের ফুল ?

তুমি কোন বামনের চাঁদ ?”

এর উত্তরে স্বয়ং প্রশ্নকর্তাই বলেন যে, এ আদর্শ ইংরাজি-শিক্ষিত ভারতবর্ষের চিদ-আকাশের ফুল, এবং ইংরাজি-শিক্ষিত ভারতবর্ষের অমাবস্তার চাঁদ ।

এ কথা শুনে কনগ্রেস বলেন, এ ভবিষ্যতের আদর্শ ;—এবং সে ভবিষ্যৎও এত দূর-ভবিষ্যৎ যে, বর্তমানের ধূলো ঘাঁদের চোখে ঢুকেছে, সেই সকল অন্ধলোকেই এর সাক্ষাৎ পান না বলে এর অস্তিত্বেও বিশ্বাস করেন না । এ আদর্শ ভারতবর্ষের কল্পনার ধন । এ ত হাতে নাগাল পাবার জিনিস নয়—মনশ্চক্ষে দূরবীন্ কশে এ আদর্শ দেখতে হয় । কনগ্রেসের সকল বাণীই সে ভবিষ্যৎবাণী, এ জ্ঞান থাকলে বিপক্ষ-পক্ষ কনগ্রেসের কথা শুনে আর হাস্ত না ।



ভবিষ্যতে কি হতে পারে আর না হতে পারে, সে বিষয়ে ত্রিকালজ্ঞ স্বয়ং ভগবান ছাড়া আর কেউ কিছু বলতে পারেন না । সুতরাং দূর-ভবিষ্যতে যে ঐ আদর্শ চাঁদ ভারতবাসীর হাতে আসবে না, এবং তাদের মাথায় ঐ আকাশকুসুমের পুষ্প-বৃষ্টি হুবে না—একথা জোর করে কে বলতে পারে ! তবে এখন ঐ চাঁদকে ডেকে “আয় আয় আমাদের মাথায় টী দিয়ে যা”—আর ঐ আকাশকুসুমকে ডেকে—“যেখানে আছ সেখানেই থাকো, দেখো যেন ঝরে আমাদের গায়ে পড়ে না”—এ কথা বলা ছাড়া আমাদের উপায়ান্তর নেই । কেননা বেশী আলোয়

আমাদের চোখ বাগ্‌সে যায়, আর আমরা ফুলের ঘায়ে মুচ্ছা
যাই ।

তবে কথা হচ্ছে এই যে, বর্তমানকে আমরা একেবারেই
উপেক্ষা করতে পারি নে, কেননা এ পৃথিবীর সঙ্গে আমাদের
মা সম্বন্ধ, তা বর্তমানেরই সম্বন্ধ । “চোখ বুঁজলেই অন্ধকার”—
এ প্রবাদ ত সকলেই জানেন । স্মৃতরাং আমাদের খোলাচোখের
জগৎও একটা আদর্শ থাকা দরকার । আমরা চাই সেই ফুল,
যার দ্বারা মা’র নিত্যপূজা চলবে, আর সেই চাঁদ, যার আলোতে
আমরা রাত্ভিরে পথ দেখতে পাব । বলা বাহুল্য যে, এদেশে
এখন রাত্ভির, আর আমরা জাতকে-জাত রাত-কানা ।

অতএব কনগ্রেসের পক্ষে জাতীয়-রাজনৈতিক-শিক্ষা-পরিষৎ
হবার পূর্বে, জাতীয়-রাজনৈতিক-আদর্শ-অনুসন্ধান-সমিতি হওয়া
কর্তব্য ।

ইতিমধ্যে আমি একটি আটপৌরে আদর্শ দেশের হাতে
ধরে দিতে চাই । আমার কথা এই—এস আমরা ঘরে বসে
নিজের নিজের চরকায় বিলোতি তেল দিই, তাহলেই সকলে
মিলে ভারতমাতার চরকায় স্বদেশী তেল দেওয়া হবে, এবং তাতে
মা আমাদের যে কাটনা কাটবেন, তার সূতো মাকড়ষার সূতোর
চাইতেও সূক্ষ্ম হবে—এবং সেই সূতোর জাল বুনে সেই ফাঁদে
আমরা আকাশের চাঁদ ধরব ।

ফাল্গুন, ১৩২২ ।

পত্র ।

—ঃঃ—

শ্রীযুক্ত “সবুজপত্র” সম্পাদক মহাশয় সমীপেষু ।

সম্প্রতি শ্রীযুক্ত রামেন্দ্রশুন্দর ত্রিবেদী মহাশয় আবিষ্কার করেছেন যে, এ দেশে মাসিক পত্রের পরমায়ু গড়ে চার বৎসর।

ত্রিবেদী মহাশয় বাঙ্গলার একজন অগ্রগণ্য আয়ুর্বেদী, ইংরাজিতে যাকে বলে Biologist—অতএব আয়ু সম্বন্ধে তাঁর গণনা যে নিভুল, এ কথা আমরা মেনে নিতে বাধ্য ।

এই হিসেবে “সবুজপত্রের” জীবনের মেয়াদ আরও দু’বৎসর আছে। এ স্থলে বিধির নিয়ম লঙ্ঘন করা অকর্তব্য মনে করে’ই সম্ভবতঃ আপনারা “সবুজপত্রের” পূর্বনির্দিষ্ট মেয়াদ বাড়িয়ে দেবার জন্ত কৃতসংকল্প হয়েছেন। এ পত্র যে, দু’বৎসরের কড়ারে বার করা হয়, সে বিষয়ে আমি সাক্ষী দিতে পারি। কেননা যে ক্ষেত্রে সবুজপত্র প্রকাশ করবার ষড়যন্ত্র করা হয়—মনে রাখবেন হাল আইনে দুজনেও ষড়যন্ত্র হয়—সে ক্ষেত্রে আমি সশরীরে উপস্থিত ছিলাম।

সবুজপত্র আর এক বৎসর সবুজ থাকবে, এ সংবাদে পাঠক সমাজ খুসি হবেন কি না জানিনে, কিন্তু সমালোচক সম্প্রদায় যে হবেন না, সে বিষয়ে আর সন্দেহ নেই;—কেন না এঁরা ও-পত্রের রঙ কিম্বা রস, দুয়ের কোনটিই পছন্দ করেন না। এঁদের মতে “সবুজপত্র” সাহিত্যের তেজপত্র,—যতক্ষণ না তার রঙ ও রস দুইই লোপ পায়, অর্থাৎ যতক্ষণ না তা শুকিয়ে যায়,—ততক্ষণ তা’ বাঙ্গালী পুরুষের মুখরোচকও হবে না, বঙ্গরমণীর গৃহস্থালির

কাজেও লাগবে না। সবুজপত্র তেজপত্র কি না জানিনে—
কিন্তু তা' যে নিস্তেজ পত্র নয়, তার প্রমাণ উদ্ভেজিত সমা-
লোচনায় নিতাই পাওয়া যায়।

এ ক্ষেত্রে যদি কেউ জিজ্ঞাসা করেন যে, সবুজপত্রের বেঁচে থাকবার, কিস্বা ও-পত্রকে বাঁচিয়ে রাখবার আবশ্যকতাই বা কি, আর সার্থকতাই বা কোথায়—তাহলে তার কোনও উত্তর দেবেন না। কেননা ও প্রশ্নের কোনও উত্তর নেই।

এ পৃথিবীতে বাঁচবার এবং বাঁচিয়ে রাখবার পক্ষে কোনরূপ যুক্তি নেই; অপরপক্ষে মরবার এবং মারবার পক্ষে এত বৈজ্ঞানিক ও দার্শনিক যুক্তি আছে যে, তার ইয়ত্তা করা যায় না। পৃথিবীর সকল দেশের সকল শাস্ত্রই মানুষকে মরবার জগ্য প্রস্তুত হতে শিক্ষা দেয়;—যে চিন্তার উপর মৃত্যুর ছায়া পড়ে নি, তাকে আমরা গভীরও বলিনে, উচ্চও বলিনে। এ জড়বিশ্বের অন্তরে প্রাণ জিনিসটি প্রাক্ষিপ্ত। দর্শন বিজ্ঞানের পাকা খাতায় প্রাণের অঙ্কটা একেবারেই ফাজিল, সুতরাং এ অঙ্কটা বেড়ে গেলে দুনিয়ার জ্ঞানের হিসেবটা আগাগোড়া গরমিল হয়ে যাবে। অতএব যতদিন প্রাণের বিলয় না হয়, ততদিন একটা প্রলয়ের সম্ভাবনা থেকে যাবে। বিশ্বের সম্বন্ধে যা' সত্য, সমাজের সম্বন্ধেও তাই সত্য—কেননা যাকে আমরা মানবসমাজ বলি, সে ত জীবজগতের একটি অংশমাত্র, এবং জীবজগৎ এই জড়-জগতের একটি ক্ষুদ্রাদপিক্ষুদ্র অঙ্গমাত্র। সুতরাং একাগ্রমনে মৃত্যুর চর্চা করাতেই মানুষে তার সামাজিক বুদ্ধির পরিচয় দেয়। হত্যা করবার স্বপক্ষে কত হিতকর এবং অখণ্ডীয় যুক্তি আছে, তার পরিচয় বর্তমান জর্মানীর সামরিক সাহিত্যে পাওয়া যায়। সে দেশে যদি কেউ বলেন যে, অহিংসা পরম ধর্ম,

তাহলে তাঁর কথা সভ্যতার বিরুদ্ধে বিদ্রোহ স্বরূপে গণ্য হবে ।
অপরপক্ষে, এ দেশে যদি কেউ বলেন “স্বহিংসা পরম অধর্ম”
তাহলে তাঁর কথাও সমাজের বিরুদ্ধে বিদ্রোহ স্বরূপে গণ্য হবে ।

বলা বাহুল্য যে, আমাদের দেহের মত আমাদের মনের
মধ্যেও প্রাণ আছে । কারণ দেহমন একই সত্তার এ-পিঠ আর
ও-পিঠ । সৃষ্টিকে যদি কেউ উন্টে ফেলতে পারেন, তাহলে
দেখতে পাবেন যে,—তখন মন হবে বহির্জগৎ, আর দেহ হবে
অন্তর্জগৎ । বিশ্বটাকে উন্টো করে পড়বার চেষ্টা যে অতি-
বুদ্ধিমান লোকে নিত্যই করে’ থাকে, তার প্রমাণ দেশী ও
বিদেশী দর্শনে নিত্যই পাওয়া যায় । সে যাই হোক, প্রাণ যে
মানুষের অন্তরে আছে শুধু তাই নয়,—ও বস্তু অণু কোথায়ও
নেই ; বাহিরে যা আছে, সে শুধু প্রাণের লক্ষণা এবং ব্যঞ্জনা ।
যে বস্তুর প্রাণ আছে, তা মৃত্যুর অধীন । স্তবরাং মনোজগতেও
আমরা হত্যা এবং আত্মহত্যা দুইই করতে পারি, এবং করে’ও
থাকি । মনোজগতে মারবার যন্ত্রও কথা, আর বাঁচাবার মন্ত্রও
কথা । দেশকালপাত্রভেদে কেউ বা কথার রূপের কাঠি,
কেউ বা তার সোনার কাঠি ব্যবহারের পক্ষপাতি । এ রাজ্যেও
জীবনের স্বপক্ষে কিছু বলবার নেই, কারণ এখানেও যত সৃষ্টি
সব মরণকে বরণ করেছে । সত্য কথা বলতে গেলে, প্রাণের
বিরুদ্ধে মানুষের ঢের নালিশ আছে । প্রথমতঃ, প্রাণের ধর্মই
হচ্ছে জগতের শান্তি ভঙ্গ করা । পঞ্চপ্রাণ পঞ্চভূতের সঙ্গে
অবিশ্রান্ত লড়াই করে’ এ পৃথিবীতে গাছপালা ফুলফল জীবজন্তু
প্রভৃতি যা’ কিছু সৃষ্টি করেছে, সে সবই পরিবর্তনশীল ; প্রতি
মুহূর্ত্তেই সে সকলের ভিতর-বার দুয়েরি কিছু-না-কিছু বদল
হচ্ছে । যার ভিতর স্থিতি নেই, তার ভিতর উন্নতি থাকতে

পারে, কিন্তু শাস্তি নেই । দ্বিতীয়তঃ, এ পৃথিবীতে প্রাণ যে শুধু প্রক্ষিপ্ত তাই নয়, তা' ঈষৎ ক্ষিপ্তও বটে । জড়বস্তু যে-ভাবে জড়জগতের নিয়ম মেনে চলে, প্রাণ প্রাণীর হাতে-গড়া বাগ সে-ভাবে মানে না । প্রাণ নিত্য নূতন আকারে দেখা দেয়, প্রাণের প্রতি মূর্তির ভিতর কিছু-না-কিছু বিশেষত্ব আছে—পৃথিবীতে এমন ছুটি পাতা নেই, যা' এক ছাঁচে ঢালা । ব্যক্তিত্বেই প্রাণী-জগতের পরিচয় । তারপর, প্রাণ যত পরিপুষ্ট হয়, তত তার ব্যক্তিত্ব পরিস্ফুট হয়ে ওঠে । এই ব্যক্তিত্ব নষ্ট করবার একমাত্র উপায় হচ্ছে প্রাণকে নষ্ট করা । প্রাণ এতই অবাধ্য ও বেয়াড়া যে, মানুষকে ও-বস্তু নিয়ে দিবারাত্র জ্বালাতন হতে হয় । আসলে ও-বস্তু হচ্ছে জড়জগতের বুকের জ্বালা, যেমন আলো তার গায়ের জ্বালা । একরূপ হবারও কারণ আছে । জগদ্বিখ্যাত বৈজ্ঞানিক Lord Kelvin আবিষ্কার করেছেন যে, আদিতে পৃথিবীতে প্রাণ ছিল না, কোন অজানা অতীতের কোন এক অশুভ মুহূর্তে কোন অজানা অতি-পৃথিবী থেকে প্রাণ শূন্যপথে, উল্কাযোগে, মন্ডাভূমিতে অবতীর্ণ হয় । প্রাণের সেই অগ্নিস্ফুলিঙ্গ এই জড়পৃথিবীর অন্তরে যে আগুন ধরিয়ে দিয়েছে, সে আগুন দেশে বিদেশে ছড়িয়ে পড়েছে, এবং নানা বস্তুর ভিতর দিয়ে নানা আকারে নানা বর্ণে নানা ভঙ্গীতে জ্বলে উঠেছে । জড়জগৎ এ-আগুন নেবাবার যথাসাধ্য চেষ্টা করে'ও সম্পূর্ণ রূতকার্য্য হতে পারছে না ।

আমাদের মনোজগতে প্রাণ যে কোথা থেকে এল, সে সন্ধান আজ পর্য্যন্ত পাওয়া যায় নি । অনেকের ধারণা, এদেশে ও-বস্তু বিলেত থেকে এসেছে । কিন্তু ইতিপূর্বেও এদেশে যে প্রাণ ছিল—তার প্রমাণ আছে । আমার বিশ্বাস কোনও অতি-মনোজগৎ

থেকে কোনও মানসী উদ্ধার স্বন্ধে ভর করে, প্রাণ মানুষের মনের মধ্যে প্রবেশ করেছে। বাঁর মনের ভিতর কখনও নূতন প্রাণের আবির্ভাব হয়েছে, তিনিই জানেন যে, সে প্রাণ উদ্ধার মত আসে; অর্থাৎ হঠাৎ এসে পড়ে, আর তার দীপ্ত আলোকে সমস্ত মনটাকে উদ্দীপ্ত উত্তপ্ত করে' তোলে। গোটে বলেছেন যে, মানুষের মনে নূতন ভালবাসার সঙ্গে সঙ্গেই নূতন জীবন জন্মলাভ করে। আর ভালবাসা যে উদ্ধার মত আমাদের মনের উপর এসে পড়ে, এ সত্য সকলেই জানেন। সুতরাং একটা আকস্মিক উপদ্রবের মত প্রাণের আবির্ভাব হয়। এ বিষয়ে হৃদয় ও মস্তিষ্ক সমধর্মী। এ জগতে আমরা যাকে সত্য বলি, তাও কোনও অজানা দেশ থেকে অকস্মাৎ এসে সমগ্র অন্তর্লোককে আলোকিত করে' আবির্ভূত হয়। খড়ি পেতে গণনা করে' অছাবধি কোনও দার্শনিক কিম্বা বৈজ্ঞানিক কোন সত্যই আবিষ্কার করতে পারেন নি। এবং যে সত্যের ভিতর প্রাণের আগুন আছে, তা' মিথ্যাকে জ্বালিয়ে পুড়িয়ে খায়। সুতরাং একের আবিষ্কৃত সত্যের জ্বালা বললোককে সহ্য করতে হয়। এবং মানবমনের যে অংশ জড়, সে অংশ মনের এই প্রক্ষিপ্ত ক্ষিপ্ত ও দীপ্ত আগুনকে নেবাবার যথাসাধ্য চেষ্টা করে'ও সম্পূর্ণ কৃতকার্য হতে পারে নি।

মানুষের ভিতরে বাইরে জড়ের ও প্রাণের অহনিশি যে দ্বন্দ্ব চলছে, সে দ্বন্দ্বের তিলমাত্র বিরাম নেই, ক্ষণমাত্র বিচ্ছেদ নেই। এ যুদ্ধের শেষ ফল কি দাঁড়াবে, বিশ্বের শেষ কথা মৃত্যু কি অমৃতত্ব, সে কথা বাঁর বিশ্ব তিনিই জানেন,—তুমিও জান না, আমিও জানিনে। তবে প্রাণের কথা হচ্ছে এই যে, যতক্ষণ শ্বাস ততক্ষণ আশ। আর তার হতাশ হয়ে মানাপথে শুয়ে

পড়বার আজও কোন কারণ ঘটে নি। কেননা ক্ষীণ নবীন তৃণাকুর আজও পৃথিবীর প্রাচীন কঠিন বুক ফুঁড়ে সবুজ হয়ে উঠছে। প্রাণের শক্তি এতই অদম্য যে, এক দেশে তাকে মাটি চাপা দিলে আর এক দেশে তা' ঠেলে ওঠে, এক যুগে তাকে নিবিয়ে দিলে আর এক যুগে তা জ্বলে ওঠে।

মনোজগতের এই জীবন-মরণের লড়াইয়ের লিপিবদ্ধ ইতিহাসের নামই সাহিত্য। এ ক্ষেত্রে কে কোনদিক নেবেন, তা তাঁর কোন পক্ষের উপর আস্থা বেশী—তার উপর নির্ভর করে।

আমি পূর্বেই বলেছি যে, বাঁচবার আবশ্যকতা কি, এবং বাঁচবার সার্থকতা কোথায়, তা কেউ বলতে পারেন না। তবে যার প্রাণ আছে, তার পক্ষে সেই প্রাণ রক্ষা করবার প্রবৃত্তি এতই স্বাভাবিক যে, হাজারে নশ'নিরনব্বইটি প্রাণী, বিনা কারণে প্রাণপণে প্রাণধারণ করতে চায়। প্রাণীমাত্রেরই প্রাণের প্রতি এই অহেতুকী প্রীতিই তার স্থায়িত্বের কারণ। যার এককালে প্রাণ ছিল, তা যে এককালে মরে'ও মরে না,—তার পরিচয় লাভ করবার জন্ম আমাদের দেশান্তরে যেতে হয় না।

সুতরাং সবুজপত্র যে জীবনের মেয়াদ বাড়িয়ে নিতে স্থির-সংকল্প হয়েছে, তার জন্ম কোনও প্রাণীর নিকট আপনার কোন-রূপ জবাবদিহি নেই।

বেঁচে থাকবার স্বপক্ষে কোনরূপ যুক্তি না থাকলেও, তার পিছনে প্রকৃতি আছে। কিন্তু বাঁচাবার পক্ষে যুক্তিও নেই, প্রকৃতিও নেই।

আমরা যাকে বলি প্রাণধারণ করা, বৈজ্ঞানিকরা তাকে বলেন জীবন-সংগ্রাম। তাঁদের মতে প্রাণের প্রধান শত্রু প্রাণী। একের পক্ষে বাঁচতে হলে অপরকে মারা দরকার।

সুতরাং অপরকে বাঁচিয়ে নিজে বাঁচবার চেফটাটি পাগলামি মাত্র । আপনি যদি এ মতে বিশ্বাস করেন, তাহলে আপনি কোনও জিনিসকে বাঁচিয়ে তোলবার কথা মুখে আনবেন না, নইলে সবুজপত্রের কপালে অকালমৃত্যু এবং অপমৃত্যু একই সঙ্গে দুইই ঘটতে পারে ।

ইহলোক যে একটা যুদ্ধক্ষেত্র, এ কথা আমিও মানি ; কিন্তু আমার মতে প্রাণের সঙ্গে প্রাণের কোনও বাগড়া নেই । সংগ্রামটা হচ্ছে আসলে জীবনের সঙ্গে মরণের । সুতরাং নির্বিবাদে বেঁচে থাকবার একমাত্র উপায় হচ্ছে ও-দুয়ের মধ্যে একটা আপোষে মীমাংসা করে নেওয়া । অতএব সবুজপত্রকে যদি জীবন্মৃত করতে পারেন, তাহলে তার পরমায়ু অখণ্ড হবে । আধমরা সরস্বতীই যে লক্ষ্মী, এ কথা ত এ দেশে সর্ববাদী-সম্মত । ও পত্রকে নিজীব করবার জন্ত কোনরূপ আয়াস করতে হবেনা,—সে আপনিই হবে । কেননা যাঁর স্পর্শে সবুজ পত্র সরস ও সজীব হয়ে উঠেছিল, সেই রবীন্দ্রনাথ জাপান-প্রস্থ অবলম্বন করেছেন !

বৈশাখ, ১৩২৩ ।

প্রত্ন তত্ত্বের পারস্ব-উপস্থাস ।

ভারতবর্ষের যে কোনও ভবিষ্যৎ নেই, সে বিষয়ে বিদেশীর দল ও স্বদেশীর দল উভয়েই একমত । আমাদের মধ্যে দুই শ্রেণীর লোক আছেন, যাঁরা ভবিষ্যৎ নিয়ে কারবার করেন ; এক যাঁরা রাজ্যের সংস্কার চান, আর এক যাঁরা সমাজের সংস্কার চান । বর্তমানকে ভবিষ্যতে পরিণত করতে হলে, তার সংস্কার অর্থাৎ পরিবর্তন করা আবশ্যিক । এই নিয়েই ত যত গোল ! যা আছে তার বদল করা যে রাজ্য-শাসনের পক্ষে ক্ষতিকর, এই হচ্ছে রাজ্য-শাসকদের মত ; আর যা আছে তার বদল করা যে সমাজ-শাসনের পক্ষে ক্ষতিকর, এই হচ্ছে সমাজ-শাসিতদের মত । অতএব দেখা গেল যে, ভারতবর্ষের যে ভবিষ্যৎ নেই এবং থাকা উচিত নয়,—এ সত্য ইংরাজী ও সংস্কৃত উভয় শাস্ত্র-মতেই প্রতিপন্ন হচ্ছে ।

‘ভবিষ্যৎ না থাক্, গতকলা পর্যন্ত ভারতবর্ষের অতীত বলে’ একটা পদার্থ ছিল ; শুধু ছিল বলে ছিল না,—আমাদের দেহের উপর, আমাদের মনের উপর তা একদম চেপে বসেছিল । কিন্তু আজ শুন্ছি সে অতীত ভারতবর্ষের নয়,—অপর দেশের । এ কথা শুনে আমরা সাহিত্যিকের দল বিশেষ ভীত হয়ে পড়েছি । কেননা এতদিন আমরা এই অতীতের কালিতে কলম ডুবিয়ে

বর্তমান সাহিত্য রচনা করছিলুম । এই অতীত নিয়ে, আমাদের ভিতর যাঁর অন্তরে বীররস আছে তিনি বাহ্বাস্ফোটন করতেন, যাঁর অন্তরে করুণরস আছে তিনি ক্রন্দন করতেন, যাঁর অন্তরে হাস্যরস আছে তিনি পরিহাস করতেন, যাঁর অন্তরে শান্তরস আছে তিনি বৈরাগ্য প্রচার করতেন, আর যাঁর অন্তরে বীভৎস-রস আছে তিনি কেলেক্ষারী করতেন । কিন্তু অতঃপর এই যদি প্রমাণ হয়ে যায় যে, ভারতবর্ষের অতীত আমাদের পৈতৃক ধন নয়, কিন্তু তা পরের,—তাহলে সে ধন নিয়ে সাহিত্যের বাজারে আমাদের আর পোদ্দারি করা চলবে না । এক কথায় ইতিহাসের পক্ষে যা পোষ মাস, সাহিত্যের পক্ষে তা সর্বনাশ ।

(৩)

আমাদের এতকালের অতীত যে রাতারাতি হস্তান্তরিত হয়ে গেল, সেও আমাদের অতিবুদ্ধির দোষে । এ অতীত যতদিন সাহিত্যের অধিকারে ছিল, ততদিন কেউ তা আমাদের হাত ছাড়িয়ে নিতে পারে নি । কিন্তু সাহিত্যকে উচ্ছেদ করে, বিজ্ঞান অতীতকে দখল করতে যাওয়াতেই, আমরা ঐ অমূল্য বস্তু হারাতে বসেছি । সকলেই জানেন যে, ভারতবর্ষের অতীত থাকলেও, তার ইতিহাস ছিল না । কাজেই এই অতীতের সাদাঁ কাগজের উপর আমরা এতদিন, স্বেচ্ছায় এবং সচ্ছন্দচিত্তে, আমাদের মনোমত ইতিহাস লিখে যাচ্ছিলুম । ইতিমধ্যে বাঙ্গলায় একদল কৈল্পিক জন্মগ্রহণ করে, সে ইতিহাসকে উপন্যাস বলে' হেসে উড়িয়ে দিয়ে, এমন ইতিহাস রচনা করতে কৃতসংকল্প হলেন, যার ভিতর রসের লেশমাত্র থাকবে না—

থাকবে শুধু বস্তুতন্ত্রতা । এঁরা আহেলা বিলাতি শিক্ষার মোহে এ কথা ভুলে গেলেন যে, অতীতে হিন্দুর প্রতিভা, ইতিহাসে নয়—পুরাণে, বিজ্ঞানে নয়—দর্শনে, ফুটে উঠেছিল । অতীতের মর্শ্মগ্রহণ না করে’ তার চর্শ্মগ্রহণ করতে যাওয়াতেই সে দেশ-ত্যাগী হতে বাধ্য হল । এতে তাঁদের কোনও ক্ষতি নেই, মধ্যে থেকে সাহিত্য শুধু দেউলে হয়ে গেল । বিজ্ঞানের প্রদীপ যে সাহিত্যের লালবাতি—এ কথা কে না জানে ?

(৪)

আমরা সাহিত্যিকের দল অতীতকে আকাশ হিসেবে দেখতুম—অর্থাৎ আমাদের কাছে ও-বস্তু ছিল একটি অখণ্ড মহাশূন্য । সুতরাং সেই আকাশে আমরা কল্পনার সাহায্যে এমন সব গিরি-পুরী নিৰ্ম্মাণ করে’ চলেছিলুম, যার ত্রিসীমানার ভিতর বিজ্ঞানের গোলাগুলি পৌছয় না । বাঙ্গালার নবীন প্রভুতাত্ত্বিকদের মতে এ কার্য্যাটী অকায্য বলেই স্থির হল, কেননা বৈজ্ঞানিক মতে ইতিহাস গড়বার জিনিসও নয়, পড়বার জিনিসও নয়—শুধু টোড়বার জিনিস । সুতরাং ও-জিনিসের অন্বেষণ পায়ের নীচে করতে হবে,—মাথার উপরে নয় । যাঁরা আবিষ্কার করতে চান, তাঁদের কৰ্ম্মক্ষেত্র ভুলোক,—দ্যালোক নয় ; কেননা আকাশদেশ ত স্বতঃআবিষ্কৃত ।

এই কারণে, সফ্রেটিস যেমন দর্শনকে আকাশ থেকে নামিয়ে মাটির উপরে এনে ফেলেছিলেন, আমাদের বৈজ্ঞানিক ঐতিহাসিকেরাও তেমনি ভারতবর্ষের ইতিহাসকে আকাশ থেকে পেড়ে মাটির নীচে পুঁতে ফেলেছেন ।

(৫)

এ দলের মতে, ভারতবর্ষের অতীত পঞ্চত্ব প্রাপ্ত হলেও, পঞ্চভূতে মিশিয়ে যায় নি,—কেননা কাল, অতীতের অগিসৎকার করে না, শুধু তার গোর দেয় । এক কথায়, অতীতের আত্মা স্বর্গে গমন করলেও, তার দেহ পাতালে প্রবেশ করে । তাই ভারতবর্ষ, ইতিহাসের মহাশ্মশান নয়,—মহাগোরস্থান । অতএব ভারতবর্ষের কবর খুঁড়ে তার ইতিহাস বার করতে হবে । এই জ্ঞান হবামাত্র আমাদের দেশের বত বিদ্বান ও বুদ্ধিমান লোকে কোদাল পাড়তে শুরু করলেন,—এই আশায় যে, এ দেশের উত্তরে দক্ষিণে পূর্বে পশ্চিমে, যেখানেই কোদাল মারা যাবে, সেখানেই লুপ্ত সভ্যতার গুপ্তধন বেরিয়ে পড়বে । আর সে ধনে আমরা এমনি ধনী হয়ে উঠব যে, মনোজগতে খোরপোষের জন্য আমাদের আর চাষ আবাদ করতে হবে না ।

এই খোঁড়াখুঁড়ির ফলে, সোনা না হোক—তামা বেরিয়েছে, হীরে না হোক—পাথর বেরিয়েছে । কিন্তু এ যে-সে তামা, যে-সে পাথর নয়,—সব হরফ-কাটা । এই সব মুদ্রাঙ্কিত তাম্র-ফলকের বিশেষ কিছু মূল্য নেই,—তা পরসারই মত সস্তা । এ কালেও আমরা শিল কুটি, কিন্তু সেই কোটা-শিল পড়া যায় না, কেননা তার অক্ষর সব রেখাঙ্কর । কিন্তু অতীতের এই ক্ষোদিত পাষাণের কথা সত্য ।—বিছা বলেছিলেন :—

• “শিলা জলে ভেসে যায়, বানরে সঙ্গীত গায়,

দেখিলেও না হয় প্রত্যয়” ।—

কিন্তু আজ কাল যদি কেউ বলেন যে—

“কপি জলে ভেসে যায়, পাষাণে সঙ্গীত গায়,

দেখিলেও না হয় প্রত্যয়”—

তাহলে তিনি অবিচারই পরিচয় দেবেন । কেননা আজ-কাল পাষণ্ডের সঙ্গীতে দেশ মাতিয়ে তুলেছে । অতীত আজ তার পাষণ্ড বদনে, তারস্বরে আত্মপরিচয় দিচ্ছে । কাগজের কথায় আমরা আর কান দিই নে । রামায়ণ মহাভারত এখন উপন্যাস হয়ে পড়েছে, এবং ইতিহাস এখন বুদ্ধের শরণ গ্রহণ করেছে । তার কারণ, আমরা মাটি খুঁড়ে আবিষ্কার করেছি যে, যাকে আমরা হিন্দু সভ্যতা বলি, সেটা একটি অর্বাচীন পদার্থ,—বৌদ্ধ সভ্যতার পাকা বুনিয়াদের উপরেই তা প্রতিষ্ঠিত । ভারত-বর্ষের ইতিহাসের সর্ববিন্মস্তুরে যা পাওয়া যায়, সে হচ্ছে বৌদ্ধধর্ম । ফলে, আমরা হিন্দু হলেও বৌদ্ধধর্ম নিয়েই গৌরব করছিলাম । তাই প্রত্নতাত্ত্বিকদের মতে, পাটলীপুত্রই হচ্ছে আমাদের ইতিহাসের কেন্দ্রস্থল,—একাধারে জন্মভূমি এবং পীঠস্থান ।

(৬)

কথা-সরিৎ-সাগরের প্রসাদে পাটলীপুত্রের জন্মকথা আমরা সকলেই জানতুম । এবং আমরা,—কাব্যরসের রসিকেরা,—সেই জন্ম-বৃত্তান্তই সাদরে গ্রাহ্য করে নিয়েছিলাম ; কেননা, সে কথায় বস্তুতন্ত্রতা না থাকলেও রস আছে,—তাও আরার একটি নয়, তিন তিনটি,—মধুর, বীর এবং অদ্ভুত রস । পুত্র কুর্ভক পাটলী-হরণের বৃত্তান্ত—কৃষ্ণ কুর্ভক রুক্মিণী-হরণ, এবং অর্জুন কুর্ভক সুভদ্রা-হরণের চাইতেও অত্যাশ্চর্য্য ব্যাপার । কৃষ্ণ প্রভৃতি রথে চড়ে স্থলপথে পলায়ন করেছিলেন, কিন্তু পুত্র পাটলীকে ফ্রোড়স্থ করে, মায়া-পাছুকায় ভর দিয়ে, নভোমার্গে

উড্ডীন হয়েছিলেন । কৃষ্ণার্জুন স্ব স্ব নগরীতে প্রস্থান করেছিলেন ;—পুত্র কিন্তু তাঁর মায়া-যষ্ঠির সাহায্যে যে-পুরী আকাশে নিষ্কাশন করেছিলেন, সেই পুরী ভূমিষ্ঠ হয়ে পাটলীপুত্র নাম ধারণ করে । বৈজ্ঞানিকেরা কিন্তু যাত্নতে বিশ্বাস করেন না । সুতরাং বৈজ্ঞানিক মতে পাটলীপুত্রকে খনন করা অবশ্যকর্তব্য হয়ে পড়েছিল, এবং সে কর্তব্যও সম্প্রতি কার্য্যে পরিণত করা হয়েছে । গোঁড়া জিনিসটের ভিতর একটা বিপদ আছে, কেননা কোনও কোনও স্থলে কেঁচো খুঁড়তে সাপ বেরোয় । এ ক্ষেত্রে হয়েছে ও তাই ।

Dr. Spooner নামক জনৈক প্রত্নতত্ত্বের কর্তব্যাক্তি এই ভূমধ্য রাজধানী খনন করে' আবিষ্কার করেছেন যে, এ দেশের মাটি খুঁড়লে দেখা যায় যে, তার নীচে ভারতবর্ষ নেই,—আছে শুধু পারস্ব । Palimpsest নামক এক প্রকার প্রাচীন পুঁথি পাওয়া যায়, যার উপরে এক ভাষায় লেখা থাকে, আর নীচে আর এক ভাষায় । বলা বাহুল্য, উপরে যা লেখা থাকে তা জাল,—আর নীচে যা লেখা থাকে তাই আসল । Dr. Spooner-এর দিব্যদৃষ্টিতে এতকাল পরে ধরা পড়েছে যে, আমরা যাকে ভারত-বর্ষের ইতিহাস বলি, সে হচ্ছে একটি বিরাট Palimpsest ;—তার উপরে পালি কিম্বা সংস্কৃত ভাষায় যা লেখা আছে তা জাল, আর তার নীচে যা লেখা আছে তাই আসল । সে লেখা অবশ্য ফার্সি,—কেননা, আমরা কেউ তা পড়তে পারি নে ! Dr. Spooner-এর কথা বৈজ্ঞানিকেরা মেনে না নিন্, মান্য করতে বাধ্য,—কেননা সেকালের কাব্যের যাদুঘর হেসে উড়িয়ে দেওয়া যায়, কিন্তু একালের যাদুঘরের কাব্যকে তা করা চলে না ।

Dr. Spooner তাঁর নবমত প্রতিষ্ঠা করবার জন্য নানা প্রমাণ, নানা অনুমান, নানা দর্শন, নানা নিদর্শন সংগ্রহ করেছেন। এ সকলের মূল্য যে কি, তা নির্ণয় করা আমার সাধ্যের অতীত। এই পর্য্যন্ত বলতে পারি যে, তিনি এমন একটি যুক্তি বাদ দিয়েছেন, যার আর কোমও খণ্ডন নেই। Spooner সাহেবের মতে, যার নাম অস্তুর তারই নাম দানব,—এবং যার নাম দানব, তারই নাম শক্,—এবং যার নাম শক্, তারই নাম পার্শ্ব। এ কথা যদি সত্য হয়, তাহলে স্বীকার করতেই হবে যে, এ দেশের মাটি খুঁড়লে পার্শ্ব সহর বেরিয়ে পড়তে বাধ্য। দানবপুরী যে পাতালে অর্থাৎ মাটির নীচে অবস্থিত, এ কথা ত হিন্দুর সর্বশাস্ত্রসম্মত।

(৭)

অতএব দাঁড়াল এই যে, আমাদের ভবিষ্যৎও নেই, অতীতও নেই। এক বাকী থাকল—বর্তমান। সুতরাং বঙ্গসাহিত্যকে এখন থেকে এই বর্তমান নিয়েই কারবার করতে হবে। এ অবশ্য মহা মুশ্কিলের কথা। বই পড়ে বই লেখা এক, আর নিজে বিশ্বসংসার দেখে শুনে লেখা আর। এ কাজ করতে হলে চোখকাণ খুলে রাখতে হবে, মনকে খাটাতে হবে,—এক কথায় সচেতন হতে হবে। তারপর এত কষ্ট স্বীকার করে যে সাহিত্য গড়তে হবে, সে সাহিত্য সকলে সহজে গ্রাহ্য করবেন না। মানুষের বর্তমানকেই সব চাইতে অগ্রাহ্য করে। যাঁদের চোখকাণ বোজা আর মন পঙ্গু, তাঁরা এই নব

সাহিত্যকে নবীন বলে' নিন্দা করবেন। তবে এর মধ্যে আরামের কথা এই যে, বর্তমানের কোনও ইতিহাস নেই,—
সুতরাং এখন হতে বঙ্গ-সরস্বতীর ঘাড় থেকে ভূত নেমে যাবে।

আষাঢ়, ১৩২৩ ।

টীকা ও টিপ্পনি

শ্রীযুক্ত রামেন্দ্রসুন্দর ত্রিবেদী মহাশয় সম্প্রতি দুঃখ করে বলেছেন যে, সেকালে সবে তিনচারখানি মাসিক পত্র ছিল, এবং তার একখানিও মাসে মাসে বেরোত না ; থেকে থেকেই তার একটি না একটি বিনা নোটসে বন্ধ হয়ে যেত ।

এ দুঃখ আমাদের নেই । একালে অন্ততঃ এমন ত্রিশ চল্লিশখানি মাসিক পত্র আছে যা মাসে মাসে বেরোয়, আর তার একখানিও বন্ধ হয়ে যায় না ।

শাস্ত্রে বলে “অধিকন্তু ন দোষায়,” ইংরাজিতে বলে “The more the merrier” । সুতরাং পূর্ব-পশ্চিম যেদিক থেকেই দেখ, মাসিক পত্রের এই আধিক্যে আমাদের খুসি হবারই কথা ।

তবে মাসিকপত্রের অতিবাড় বাড়াটা সাহিত্যের পক্ষে কল্যাণকর কি অকল্যাণকর, সে বিষয়ে সকলে একমত নন । স্ননামধন্য ইংরাজ লেখক Oscar Wilde-এর মতে সাহিত্য এবং সাময়িক-সাহিত্য, এ দুয়ের ভিতর একটা স্পষ্ট প্রভেদ আছে । তিনি বলেন Literature is not read এবং Journalism is unreadable.

পূর্বোক্ত রচনের প্রথমাংশ যে অনেক পরিমাণে সত্য, সে কথা আমরা সকলেই স্বীকার করতে বাধ্য। চণ্ডীদাস থেকে শুরু করে রবীন্দ্রনাথ পর্য্যন্ত, যে-সকল লেখক নিয়ে আমরা মহা গৌরব করি, তাঁদের রচিত কাব্যের সঙ্গে সাক্ষাৎ সম্বন্ধে যঁার পরিচয় আছে—এমন সাহিত্যিক শতকে জনেক মেলে কি না, সে বিষয়ে আমার বিশেষ সন্দেহ আছে।

“লাখে না মিলল এক,”—এ দুঃখের কথা, আমার বিশ্বাস বিছাপতি ঠাকুর ভবিষ্যৎ পাঠক-সমাজের প্রতি লক্ষ্য করেই বলেছেন! তারপর রবীন্দ্রনাথের লেখার সঙ্গে সকল সমালোচকের যে পরিচয় নেই, এর প্রমাণ আমি সম্প্রতি পেয়েছি। বঙ্গ-সরস্বতীর জনৈক ধনাঢ্য পৃষ্ঠপোষক সম্প্রতি কলিকাতার সাহিত্য-সভায় এই মত ব্যক্ত করেছেন যে, রবীন্দ্রনাথ তাঁর ভাষার দৈন্ত এবং ভাবের দৈন্ত গোপন করবার জন্যই মৌখিক ভাষার আশ্রয় অবলম্বন করেছেন। এ কথা বলাও যা, আর দুয়ে দুয়ে পাঁচ করবার অক্ষমতা বশতঃই শ্রীযুক্ত পরাজ্ঞপে দুয়ে দুয়ে চার করেন,—এ কথা বলাও তাই!

সরস্বতীর পৃষ্ঠপোষক হবার জন্য অবশ্য কারও তাঁর মুখ-দর্শন করবার কোনও দরকার নেই। তবে উক্ত সভাস্থ সমবেত বিজ্ঞানগুণী যে পূর্বোক্ত অতুষ্টির কোনও প্রতিবাদ করেন নি, তার থেকে অনুমান করা অসঙ্গত হবে না যে, রবীন্দ্রনাথের কাব্যের সঙ্গে সাহিত্যিক সভ্যদের কারও বিশেষ পরিচয় নেই। না পড়ে পণ্ডিত হওয়ায় বাঙ্গালী ত তার অসাধারণ বুদ্ধিরই পরিচয় দেয়।

না পড়ে পণ্ডিত হওয়া সম্ভব হলেও, না লিখে লেখক হওয়া যায় কিনা, সে বিষয়ে আমার সন্দেহ আছে ;—এবং সেই জন্মই মাসিকপত্রের বংশবৃদ্ধিটি স্থখের কিস্মা দুঃখের বিষয়, সে বিষয়ে আমি মনস্ত্বির করে উঠতে পারি নি।

সাময়িক সাহিত্য যে অপাঠ্য, Oscar Wilde-এর এ মত আমাদের গ্রাহ্য করবার দরকার নেই। মাসিক, সাপ্তাহিক এবং দৈনিক পত্র সম্বন্ধে Oscar Wilde যে মত প্রকাশ করেছেন, তাঁর চাইতে ঢের বড় লেখক Charles Lamb সাহিত্য সম্বন্ধে সেই একই মত প্রকারান্তরে প্রকাশ করেছেন। তিনি বলেন—“একখানি নতুন বই প্রকাশিত হলে, একখানি পুরোণা বই পড়ে।” এর থেকে বোঝা যায় যে, সেকালের মায়ায় আমরা স্বকালের মর্যাদা বুঝতে পারি নে। কারও কারও মতে নব-সাহিত্য রচনা করা আর সরস্বতীর শ্রাদ্ধ করা একই কথা,—তা মাসিকই হোক, আর সাংবৎসরিকই হোক।

তবে বইয়ের সঙ্গে মাসিকপত্রের যে একটা প্রভেদ আছে, তা আমরা সকলেই মানতে বাধ্য। বই লেখে একজনে, আর মাসিকপত্র অনেকে মিলে ; এক কথায়, মাসিকপত্রের উদ্দেশ্য হচ্ছে সরস্বতীর বারোয়ারি পূজা করা। কাজেই ব্যাপারটা অনেক সময়ে গোলে হরিবোলে পরিণত হয়। তারপর, যেখানে চাঁদা করে কার্য্য উদ্ধার করতে হয়, সেখানে জাতবিচার করা চলে না—ব্রাহ্মণ শূদ্র সকলের পক্ষে সে উৎসবে যোগদান করবার সমান অধিকার আছে। গোল ত এই নিয়েই।

সকলে কথা কইতে পারলেও যে গান গাইতে পারে না, হাঁটতে পারলেও যে নাচতে পারে না, এ কথা সকলেই জানেন এবং সকলেই মানেন; কিন্তু অনেকে লিখতে পারলেও যে “লিখতে” পারে না—এ জ্ঞান আমরা হারিয়ে বসে আছি ।

“হারিয়ে বসে আছি” বলবার কারণ এই যে, সঙ্গীতের মত লেখা জিনিসটেও যে একটি আর্ট—এ জ্ঞান আমাদের পূর্ব-পুরুষদের ছিল । সকল আলঙ্কারিক একবাক্যে বলে গেছেন যে, কাব্য রচনা করবার জন্য দুটি জিনিস চাই—প্রথমতঃ প্রাক্তন সংস্কার, দ্বিতীয়তঃ শিক্ষা ।

এ কালের অনেক লেখকের বিশ্বাস যে, সাহিত্যিক হবার জন্য একমাত্র প্রাক্তন সংস্কারই যথেষ্ট, শিক্ষা দীক্ষার কোনরূপ আবশ্যক নেই; কেননা তাঁদের লেখা পড়ে বোঝা যায় না, তাঁরা তাঁদের নৈসর্গিকী প্রতিভা বাতীত অপর কিসের উপর নির্ভর করেন । মহর্ষি চরকের শিষ্য অগ্নিবেশ বলেছেন যে, যে-সকল চিকিৎসকের গুরুর নাম কেউ জানে না, যাঁদের কোনও সতীর্থ নেই, তাঁরা “দ্বিজিহ্ব বায়ু-ভক্ষকাঃ” । এই শ্রেণীর সাহিত্য-চিকিৎসকের দল যে ক্রমে বৃদ্ধিপ্রাপ্ত হচ্ছে, সে বিষয়ে আর কোনও সন্দেহ নেই—এবং মাসিকপত্র-সকল এই শ্রেণীর সাহিত্যিকদের প্রশ্রয় দিতে বাধ্য ।

বাঙ্গলাদেশে আজকাল যদিও বা লেখক থাকে ত লেখবার বিষয় বড় একটা নেই । লেখবার সামগ্রীর যে অনটন ঘটেছে তার প্রমাণ,—আজকাল কি লেখা উচিত, কি ভাষায় লেখা উচিত,

কি ধরণে লেখা উচিত, এই সব নিয়ে সকলে মহা গগুগোল বাধিয়েছেন। কি সল্লরে, কি পাড়াগোঁয়ে, এমন মাসিকপত্র নেই, যা এই পণ্ডিতের বিচারে যোগদান করে নি।

এ সকল তর্কবিতর্কের যে কোনও সার্থকতা নেই—এ কথা আমার মুখে শোভা পায় না। তবে এই সব আলঙ্কারিক-তত্ত্ব নিয়ে এতটা দেশজোড়া আন্দোলন হওয়াটাই আক্ষেপের বিষয়। কেননা, এ সব সমস্তার বিচার করতে হলে,—প্রথমতঃ, সে বিচার করবার শিক্ষা এবং শক্তি থাকা আবশ্যক। দ্বিতীয়তঃ, যুক্তিযুক্ত তর্ক করবার অভ্যাস থাকা আবশ্যক।

কিন্তু ঘটনা হয়েছে অন্তরূপ। নিত্যই দেখতে পাই যে, যারা দু'ছত্র সোজা করে লিখতে পারেন না, তাঁরাও রচনারীতি নিয়ে মস্ত মস্ত আঁকাবাঁকা প্রবন্ধ লেখেন। তাঁরপর দেখতে পাই, এই সব লেখকদের ধৈর্য্যের অপেক্ষা বীর্য্য ঢের বেশী। এঁরা যুক্তিতর্কের ধার ধারেন না—উপদেশ দেন, আদেশ করেন। সম্ভবতঃ এঁদের বিশ্বাস যে, রাগের মাথায় যে কথা বলা যায়, তা সত্য হতে বাধ্য! এঁরা ভুলে যান যে, ক্রোধান্বিত হ'লে মানুষের দিগ্বিদিক্জ্ঞান থাকে না।

ফলে, এঁরা সাহিত্যের যে-সব ইটপাটকেল কুড়িয়ে পান, তা মাতৃভাষার উপর নিক্ষেপ করতে শুরু করেছেন। আমার শ্রুত্রে তিনখানি মাসিকপত্র খোলা রয়েছে—তার একখানিতে মাতৃভাষাকে “কিঙ্কিঙ্কার ভাষা” (সাহিত্য-সংহিতা), আর একখানিতে “পেত্টিভাষা” (ভারতী) আর একখানিতে “চণ্ডালী-ভাষা”

(উপাসনা) বলা হয়েছে। এরকম কথা যাঁরা মুখে আনতে পারেন, তাঁদের কথার প্রতিবাদ করা অসম্ভব ও নিষ্প্রয়োজন, কেননা তাঁরা যে বঙ্গ-সরস্বতীর কতদূর সুসন্তান, তার পরিচয় নিজমুখেই দেন। কিন্তু আমাদের মাসিকপত্রসকল যে এই সব অকথা কুকথা প্রচারের মহায়ত্ন করেন—তার থেকে বোঝা যায় যে, বাংলার বন্দেমাতরং-যুগ চলে গিয়েছে।

আমাদের লেখবার বিষয় যে বড় একটা নেই, তার অপর প্রমাণ,—বাংলা মাসিকে প্রভুতত্ত্বের প্রাধান্য। প্রভুতত্ত্ব আর যাই হোক—সাহিত্য নয়। ও বস্তু মূল্যবান, এই হিসেবেই যদি প্রভুতত্ত্বকে মাসিকপত্রে স্থান দেওয়া হয়, তাহলে রত্নতত্ত্বই বা বাদ যায় কেন?—তবে যদি সম্পাদক মহাশয়েরা বলেন, বাংলার সাহিত্যওয়ালাদের মধ্যে কোনও জলুরি নেই, তাহলে অবশ্য আমাদের নিরুত্তর থাকতে হবে।

মাসিক সাহিত্যের প্রধান সম্বল হচ্ছে ছোট গল্প। এই ছোট গল্প কি ভাবে লেখা উচিত, সে বিষয়েও আজকাল আলোচনা শুরু হয়েছে। এও আর একটি প্রমাণ যে, লেখবার বিষয়ের অভাববশতঃই লেখবার পদ্ধতির বিচারই আমাদের দায়ে পড়ে করতে হয়।

এ সম্বন্ধে আমার দুটি কথা বলবার আছে। আমার মতে ছোট-গল্প প্রথমে গল্প হওয়া চাই, তার পরে ছোট হওয়া চাই,—এ ছাড়া আর কিছুই হওয়া চাই নে।

যদি কেউ জিজ্ঞাসা করেন যে “গল্প” কাকে বলে—তার উত্তর “লোকে যা শুন্তে ভালবাসে।” আর যদি কেউ জিজ্ঞাসা করেন “ছোট” কাকে বলে—তার উত্তর “যা বড় নয়”।

এর উত্তরে পাঠক আপত্তি করতে পারেন যে definitionটি তেমন পরিষ্কার হ’ল না। এস্থলে আমি ছোট গল্পের তত্ত্ব নির্ণয় করবার চেষ্টা করছি। এবং আশা করি সকলে মনে রাখবেন যে তত্ত্বকথা এর চাইতে আর পরিষ্কার হয় না। এর জন্য দুঃখ করবারও কোনও কারণ নেই, কেননা সাহিত্যের তত্ত্বজ্ঞানের সাহায্যে সাহিত্য রচনা করা যায় না। আগে আসে বস্তু, তারপরে তার তত্ত্ব। শেষটি না থাকলেও চলে, কিন্তু প্রথমটি না থাকলে সাহিত্য-জগৎ শূন্য হয়ে যায়। এ বিপদ যে স্মৃতিতে নেই, তাও ভরসা করে বলা চলে না। কেননা মাসিকপত্রে লেখবার লোক অনেক থাকলেও, তাঁদের লেখবার বিষয় অনেক নেই,—আর লেখবার বিষয় অনেক থাকলেও, তা লেখবার অনেক লোক নেই। ফলকথা সাহিত্যের প্রবৃদ্ধি হয় যোগে, আর তার শ্রীবৃদ্ধি হয় গুণে।

শ্রাবণ, ১৩২৩।

শিশু-সাহিত্য ।

যে-কোনও ভাষাতেই হোক না কেন, সমাস ব্যবহারের ভিতর যে বিপদ আছে, সে বিষয়ে শ্রীযুক্ত সতীশচন্দ্র ঘটক আমাদের সতর্ক করে দিয়েছেন। আমরা যদি কথার গায়ে কথা জড়িয়ে লিখি, তাহলে পাঠকদের পক্ষে তা ছাড়িয়ে নিয়ে পড়া কঠিন। স্বর্গ পুত্র বৃত্তকে আশীর্বাদ করেছিলেন “ইন্দ্রশত্রু হও”। কিন্তু সমাসের কৃপায় সে বর যে কি মারাত্মক শাপে পরিণত হয়েছিল, তার আমূল বিবরণ শতপথ ব্রাহ্মণে দেখতে পাবেন। স্ততরাং পাঠক যাতে উল্টো না বোঝেন, সে-কারণ এ প্রবন্ধের সমস্ত-নামটির অর্থ প্রথমেই বলে রাখা আবশ্যিক। এ প্রবন্ধে ব্যবহৃত শিশু-সাহিত্যের অর্থ বঙ্গ-সাহিত্য নয়। শিশুদের জন্ম বাঙ্গলাভাষায় যে সাহিত্যে আজকাল নিত্য-নব সৃষ্টি করা হচ্ছে, সেই সাহিত্যই আমার বিচার্য।

শিশু-সাহিত্য বলে কোনও জিনিস আছে কি না? যা বিশেষ করে শিশুদের জন্মই লেখা হয়, তাকে সাহিত্য বলা চলে কি না?—এ বিষয়ে অনেকের মনে বিশেষ সন্দেহ আছে; আমার মনে কিন্তু নেই। আমার দৃঢ় বিশ্বাস যে, শিশু-সাহিত্য বলে কোনও পদার্থের অস্তিত্ব নেই, এবং থাকতে পারে না। কেননা শিশু-পছন্দ সাহিত্য শিশু ব্যতীত অপর কেউ রচনা করতে পারে না, আর শিশুরা সমাজের উপর আর যে অত্যাচারই করুক না কেন,—সাহিত্য রচনা করে না।

বিলেতে Children-এর সাহিত্য থাকতে পারে, এ দেশে নেই; কেননা সে দেশের Child-এর সঙ্গে এদেশের শিশুর ঢের তফাৎ—বয়সে । এদেশে আর কিছু বাড়ুক আর না বাড়ুক, বয়েস বাড়ি,—আর সে এত তেড়ে যে, আমাদের ছেলেমেয়েরা যত সত্ত্বর শৈশব অতিক্রম করে, পৃথিবীর অপরাধ কোনও দেশে তত শীঘ্র করে না; অন্ততঃ এই হচ্ছে আমাদের ধারণা । ফলে, যে বয়েসে ইউরোপের মেয়েরা ছেলেখেলা করে, সেই বয়েসে আমাদের মেয়েরা ছেলে মানুষ করে । এবং সেই ছেলে যাতে শীঘ্র মানুষ হয়, সেই উদ্দেশ্যে আমরা শৈশবের মেয়াদ পাঁচ বৎসরের বেশী দিই নে । আজকাল আবার দেখতে পাই, অনেকে তার মধ্যেও দু'বছর কেটে নেবার পক্ষপাতী । শৈশবটা হচ্ছে মানব-জীবনের পতিত জমি; এবং আমাদের বিশ্বাস, সেই পতিত জমি যত শীঘ্র আবাদ করা যাবে, তাতে তত বেশী সোণা ফলবে ।

বাপমার এই সুবর্ণের লোভবশতঃ, এ দেশের ছেলেদের বর্ণপরিচয়টা অতি শৈশবেই হয়ে থাকে । একালের শিক্ষিত লোকেরা, ছেলে হাঁটতে শিখলেই তাকে পড়তে বসান । শিশুদের উপর এরূপ অত্যাচার করাটা যে ভবিষ্যৎ বাঙ্গালী জাতির পক্ষে কল্যাণকর নয়, সে বিষয়ে কোনও সন্দেহ নেই; কেননা, যে শৈশবে শিশু ছিল না, সে যৌবনে যুবক হতে পারবে না । আর এ কথা বলা বাহুল্য, শিশুশিক্ষার উদ্দেশ্যই হচ্ছে শিশুর শিশুত্ব নষ্ট করা ! অর্থাৎ যার আনন্দ উপভোগ করবার শক্তি অপরিমিত, তাকে জ্ঞানের ভোগ ভোগানো । সে ভোগ যে কি কর্তব্যভোগ, তা চেষ্টা করলে আমরাও কল্পনা করতে পারি । ধরুন যদি আমরা স্বর্গে যাবামাত্র স্বর্গীয় মাষ্টার-

মহাশয়দের দল এসে আমাদের স্বর্গরাজ্যের হিফরি জিওগ্রাফি শেখাতে, এবং দেবভাষার শিশুবোধ-ব্যাकरण মুখস্থ করাতে বসান, তাহলে আমাদের মধ্যে ক'জন নির্বাণ-মুক্তির জন্ম লালায়িত না হবেন ? আর এ কথাও সত্য যে, শিশুর কাছে এ পৃথিবী স্বর্গ । তার কাছে সবই আশ্চর্য্য, সবই চমৎকার, সবই আনন্দময় ।

এ সব কথা অবশ্য বলা বুঝা, কেননা আমরা শিশুকে শিক্ষা দেবই দেব । মেয়েরা কথায় বলে, “পড়লে শুনলে দুধু ভাতু, না পড়লে ঠেঙ্গার গুঁতো” । কথাটা অবশ্য ষোল-আনা সত্য নয় । সংসারে প্রায়ই দেখা যায়, সরস্বতীর বরপুত্রেরাই লক্ষ্মীর ত্যজ্যপুত্র । আমাদের কিন্তু মেয়েলি-শাস্ত্রে ভক্তি এত অগাধ যে, আমরা ছেলেদের ভবিষ্যতের “দুধু-ভাতুর” ব্যবস্থা করবার জন্ম বর্তমানে দু'বেলা “ঠেঙ্গার গুঁতোর” ব্যবস্থা করি । ছেলেদের দেহমনের উপর মারপিট, বছর সাতকের জন্ম মূলতবি রাখলে যে কিছু ক্ষতি হয়—অবশ্য তা নয় । যে ছেলে সাত বৎসর বয়সে “সিক্কিরস্ত” লিখবে, তিন সান্তা একুশ বৎসর বয়সে তার মনস্কামনা নিশ্চয়ই সিদ্ধ হবে ; অর্থাৎ সে সাবালক হবার সঙ্গে সঙ্গেই উপাধিগ্রস্ত হয়ে বিশ্ববিদ্যালয় হতে নিক্কতি লাভ করবে । তবে যদি কারও চৌদ্দ বৎসরেও স্কুলবাস অন্ত না হয়, তাহলে বুঝতে হবে ভগবান তার কপালে উপবাস লিখেছেন । তাকে যতদিন ধরে যতই লেখাও, সে ঐ এক কপালের লেখাই লিখবে ।

শিশু-শিক্ষা জিনিসটে আমরা কেউ বন্ধ করতে পারব না—কিন্তু তাই বলে কি আমাদের ও-ব্যাপারের যোগাড় দেওয়া উচিত ? সাহিত্যের কাজ ত আর সমাজকে এলম দেওয়া নয়,—

আকেল দেওয়া। সুতরাং আমরা যদি পাঁচ বছর বয়সের ছেলের যোগ্য এবং উপভোগ্য সাহিত্য লিখতেও পারি, তাহলেও আশা করি কোনও পাঁচবছরের ছেলে তা পড়তে পারবে না। আর ও-বয়সের কোনও ছেলে যদি পঠনপাঠনে অভ্যস্ত হয়—তাহলে তার হাতে শিশু-সাহিত্য নয়, বেদান্ত দেওয়া কর্তব্য! কেননা সে যত শীঘ্র “বালাযোগী” হয়, তত তার এবং সমাজের উভয়েরই পক্ষে মঙ্গল। প্রথমতঃ ওরকম ছেলের বাঁচা কঠিন, আর যদি সে বাঁচে—তাহলে সমাজের বাঁচা কঠিন! কেননা অমন সুপুত্র বাঁচলে—হয় একটি বিগ্রহ, নয় গ্রহ হতে বাধ্য। অকাল-পকতার প্রশয় দেওয়াটা একেবারেই অগ্ৰায়; কেননা কাঁচা একদিন পাকতে পারে, কিন্তু অকালপক আর ইহজীবনে কাঁচতে পারে না। ইতিহাসে এর প্রমাণ আছে। শিক্ষাবাতিকগ্রস্ত বাপের তাড়নায় বারো বৎসর বয়সে সর্ববিশ্বস্তের পারগামী হওয়ার দরুণ, জন ফ্যুয়ার্ট মিলের হৃদয়মন যে কতদূর ইঁচড়ে পেকে গিয়েছিল—তার পরিচয় তিনি নিজমুখেই দিয়েছেন। ফলে, তিনি বৃদ্ধ বয়সে কাঁচতে গিয়ে বিবাহ করেন।

অতএব দাঁড়াল এই যে, শিশু-সাহিত্য বলে কোনও জিনিস নেই, এবং থাকা উচিত নয়। তবে শিশুপাঠ্য না হোক, বাল-পাঠ্য সাহিত্য আছে, এবং থাকা উচিত। এ সাহিত্য সৃষ্টি করবার সংকল্প অতি সাধু। কেননা, শিশুশিক্ষার পুস্তকে যে বস্তু বাদ পড়ে যায়,—অর্থাৎ আনন্দ—সেই বস্তু যুগিয়ে দেবার উদ্দেশ্যেই এ সাহিত্যের সৃষ্টি। পৃথিবীতে অবশ্য সাধুসংকল্প মাত্রেরই আমরা কার্যে পরিণত করতে পারিনে। সুতরাং এ স্থলে জিজ্ঞাস্য,—আমরা পণ করে বসলেই কি সে সাহিত্য রচনা করতে পারব? আমি বলি,—না। এর প্রমাণ, ছেলেরা যে সাহিত্য

পড়ে আর পড়তে ভালবাসে, তা মুখ্যতঃ কি গোঁণতঃ ছেলেদের জন্ম নয়,—বড়দের জন্মই লেখা হয়েছিল । রূপকথা, রামায়ণ, মহাভারত, আরব্য উপন্যাস, Don Quixote, Gulliver's Travels, Robinson Crusoe,—এ সবের কোনটিই আদিতে শিশুদের জন্ম রচিত হয় নি । এর থেকেই প্রমাণ হয় যে, উচ্চ অঙ্গের সাহিত্যেরই একটি বিশেষ অঙ্গ ছেলেরা আত্মসাৎ করে নেয় ।

আসলে ছেলেরা ভালবাসে শুধু রূপকথা,—স্বরূপ কথাও নয়, অরূপ কথাও নয় ; অর্থাৎ জ্ঞানের কথাও নয়, নীতির কথাও নয় । উপরে যে সব বইয়ের নাম করা গেল, তার প্রতিটিতেই রূপকথার রূপ আছে । আমরা যে শিশু-সাহিত্য রচনা করতে পারিনে, তার কারণ আমরা চেষ্টা করলেও রূপকথা তৈরি করতে পারি নে । যে যুগে রূপকথার সৃষ্টি হয়, সে যুগ হচ্ছে মানব-সভ্যতার শৈশব । সেকালে লোক মনে শিশু ছিল, সে যুগে সম্ভব-অসম্ভবের ভেদজ্ঞান মানুষের মনে তেমন স্পষ্ট হয়ে ওঠে নি । একালের আমরা মনে জানি সবই অসম্ভব,—আর ছেলেরা মনে করে সবই সম্ভব । তা ছাড়া, আমাদের কাছে পৃথিবীর সব জিনিসই আবশ্যক, কোন জিনিসই চমৎকার নয় ; আর ছেলেদের কাছে সব জিনিসই চমৎকার, কোন জিনিসই আবশ্যক নয়—সুতরাং আমাদের পক্ষে তাদের মনোমত সাহিত্য রচনা করা অসম্ভব । আমরা রূপকথা লিখতে বসলে, হয় তা কিছুই হবে না, নয় রূপক হবে ; কেননা রূপকথার জন্ম সত্যযুগে, আর রূপকের জন্ম সভ্যযুগে ।

এই রূপকের মধ্যেই হাজারে একখানা ছেলেদের কাছে নবরূপকথা হয়ে দাঁড়ায়,—যথা Don Quixote, Gulliver's

Travels ইত্যাদি । বলা বাহুল্য, এ জাতের রূপকথা রচনা করবার জন্য অসামান্য প্রতিভার আবশ্যক । অসম্ভবকে সম্ভব, কল্পনাকে বাস্তব করে তোলা,—এক কথায় বস্তুজগতের নিয়ম অতিক্রম করে একটি নববস্তুজগৎ গড়ে তোলা,—তোমার আমার কৰ্ম নয় । আর যাঁর অসামান্য প্রতিভা আছে, তাঁর বই লেখার উদ্দেশ্য ছেলেদের এ বোঝানো নয় যে, তারা মনে পাকা,—কিন্তু বুড়োদের এই বোঝানো যে, তারা মনে কাঁচা । বয়সে বৃদ্ধ কিন্তু মনে বালক, এমন সাহিত্যিক যে নেই, একথা আমি বলতে চাই নে । কিন্তু সে সাহিত্যিকের দ্বারাও শিশু-সাহিত্য রচিত হতে পারে না, তার কারণ—ছোট ছেলে ও বুড়োখোকা, এ দুই একজাতীয় জীব নয় । বয়স্কলোকের বালিশতার মূল হচ্ছে সত্য ধরবার অক্ষমতা, আর বালকের বালকত্বের মূল হচ্ছে কল্পনা করবার সক্ষমতা । সুতরাং আমার মতে, বিশেষ করে শিশু-সাহিত্য রচনা হতে আমাদের নিরস্ত থাকাই শ্রেয় । আমরা যদি ঠিক আমাদের-উপযোগী বই লিখি, খুব সম্ভবতঃ তা শিশু-সাহিত্যই হবে ।

অগ্রহায়ণ, ১৩২৩ ।

সুরের কথা ।

আপনারা দেশী বিলেতি সঙ্গীত নিয়ে যে বাদানুবাদের সৃষ্টি করেছেন, সে গোলযোগে আমি গলাযোগ করতে চাই ।

এ বিষয়ে বক্তৃতা করতে পারেন এক তিনি, যিনি সঙ্গীত-বিজ্ঞার পারদর্শী,—আর এক তিনি, যিনি সঙ্গীতশাস্ত্রের সারদর্শী ; অর্থাৎ যিনি সঙ্গীত সম্বন্ধে হয় সর্বদত্ত, নয় সর্বদাত্ত । আমি শেষোক্ত শ্রেণীর লোক, অতএব এ বিষয়ে আমার কথা বলবার অধিকার আছে ।

আপনাদের সুরের আলোচনা থেকে আমি যা সারসংগ্রহ করেছি, সংক্ষেপে তাই বিবৃত করতে চাই । বলা বাহুল্য সঙ্গীতের সুর ও সার, পরস্পর পরস্পরের বিরোধী । এর প্রথমটি হচ্ছে কাণের বিষয়, আর দ্বিতীয়টি জ্ঞানের । আমরা কথায় বলি সুরসার,—কিন্তু সে দ্বন্দ্বসমাস হিসেবে ।

সব বিষয়েরই শেষ কথা তার প্রথম কথার উপরেই নির্ভর করে ; যে বস্তুর আমরা আদি জানিনে, তার অন্ত পাওয়া ভার । অতএব কোনও সমস্তার চূড়ান্ত মীমাংসা করতে হলে, তার আলোচনা ক, খ, থেকে শুরু করাই সনাতন পদ্ধতি ; এবং এ ক্ষেত্রে আমি সেই সনাতন পদ্ধতিই অনুসরণ করব ।

অবশ্য এ কথা অস্বীকার করা যায় না যে, এমন লোক ঢের আছে, যারা দিব্যি বাংলা বলতে পারে, অথচ ক, খ, জানে না—আমাদের দেশের বেশীর ভাগ স্ত্রী পুরুষই ত ঐ দলের । অপরপক্ষে এমন প্রাণীরও অভাব নেই, যারা ক, খ, জানে, অথচ বাংলা ভাল বলতে পারে না—যথা আমাদের ভদ্রশিশুর দল ।

অতএব এরূপ হওয়াও আশ্চর্য্য নয় যে—এমন গুণী ঢের আছে, যারা দিব্যি গাইতে বাজাতে পারে, অথচ সঙ্গীতশাস্ত্রের ক, খ, জানে না ; অপরপক্ষে এমন জ্ঞানীও ঢের থাকতে পারে, যারা সঙ্গীতের শুধু ক, খ, নয়, অনুস্বর বিসর্গ পর্য্যন্ত জানে—কিন্তু গানবাজনা জানে না ।

তবে যারা গানবাজনা জানে, তারা গায় ও বাজায় ; যারা জানে না, তারা ও-বস্তু নিয়ে তর্ক করে । কলধ্বনি না করতে পারি, কলরব করবার অধিকার আমাদের সকলেরি আছে । স্তবরাং এই তর্কে যোগ দেওয়াটা আমার পক্ষে অনধিকারচর্চা হবে না । অতএব আমাকে ক, খ, থেকেই স্তব্বকরতে হবে,—অ, আ, থেকে নয় । কেননা আমি যা লিখতে বসেছি, সে হচ্ছে সঙ্গীতের ব্যঞ্জনলিপি—স্বরলিপি নয় । আমার উদ্দেশ্য সঙ্গীতের তত্ত্ব ব্যক্ত করা, তার স্বর সাবাস্ত করা নয় । আমি সঙ্গীতের সারদর্শী—স্বরস্পর্শী নই ।

(২)

হিন্দুসঙ্গীতের ক, খ, জিনিসটে কি ?—বলছি ।

আমাদের সকল শাস্ত্রের মূল যা, আমাদের সঙ্গীতেরও মূল তাই—অর্থাৎ শ্রুতি ।

শুনতে পাই এই শ্রুতি নিয়ে সঙ্গীতচার্য্যের দল বহুকাল ধরে বহু বিচার করে আসছেন, কিন্তু আজতক্ এমন কোনও মীমাংসা করতে পারেন নি, যাকে “উত্তর” বলা যেতে পারে—অর্থাৎ যার আর উত্তর নেই ।

কিন্তু যেহেতু আমি পণ্ডিত নই, সে কারণ আমি ও-বিষয়ের একটি সহজ মীমাংসা করেছি, যা সহজ মানুষের কাছে সহজে গ্রাহ্য হতে পারে ।

আমার মতে শ্রুতির অর্থ হচ্ছে সেই স্বর, যা কাণে শোনা যায় না ; যেমন দর্শনের অর্থ হচ্ছে সেই সত্য, যা চোখে দেখা যায় না। যেমন দর্শন দেখবার জন্য দিব্য-চক্ষু চাই, তেমনি শ্রুতি শোনবার জন্য দিব্য-কর্ণ চাই। বলা বাহুল্য তোমার আমার মত সহর্জ মানুষদের দিব্য-চক্ষুও নেই, দিব্য-কর্ণও নেই ; তবে আমাদের মধ্যে কারও কারও দিব্যি চোখও আছে, দিব্যি কাণও আছে। ওতেই ত হয়েছে মুক্তি। চোখ ও কাণ সম্বন্ধে দিব্য এবং দিব্যি—এ দুটি বিশেষণ, কাণে অনেকটা এক শোনা-লেও, মানেতে ঠিক উল্টো।

সঙ্গীতে যে সাতটি সাদা আর পাঁচটি কালো সুর আছে, এ সত্য পিয়ানো কিম্বা হারমোনিয়ামের প্রতি দৃষ্টিপাত করলে সকলেই দেখতে পাবেন। এই পাঁচটি কালো সুরের মধ্যে যে, চারটি কোমল আর একটি তীব্র—তা আমরা সকলেই জানি, এবং কেউ কেউ তাদের চিনিও। কিন্তু চেনাশুনো জিনিসে পণ্ডিতের মনস্তৃষ্টি হয় না। তাঁরা বলেন যে, এ দেশে ঐ পাঁচটি ছাড়া আরও কালো এবং এমন কালো সুর আছে, যেমন কালো বিলেতে নেই। শাস্ত্রমতে সে সব হচ্ছে অতিকোমল ও অতিতীব্র। ঐ নামই প্রমাণ যে, সে সব অতীন্দ্রিয় সুর, এবং তা শোনবার জন্যে দিব্য-কর্ণ চাই,—যা তোমার আমার ত নেই, শাস্ত্রীমহাশয়দেরও আছে কি না সন্দেহ। আমার বিশ্বাস তাঁদেরও নেই। শ্রুতি সেকালে থাকলেও, একালে তা স্মৃতিতে পরিণত হয়েছে। স্মৃতিই যে শ্রুতিধরদের একমাত্র শক্তি, এ সত্য ত জগদ্বিখ্যাত। সূতরাং এ কথা নির্ভয়ে বলা যেতে পারে যে, সঙ্গীত সম্বন্ধে পরের মুখে বাল খাওয়া, অর্থাৎ পরের কাণে মিষ্টি শোনা যাঁদের অভ্যাস—শুধু তাঁদের কাছেই শ্রুতি

শ্রুতিমধুর । আমি স্থির করেছি যে, আমাদের পক্ষে ঐ বারোই ভাল । অবশ্য সাতপাঁচ ভেবেচিন্তে । ও দ্বাদশকে ছাড়াতে গেলে, অর্থাৎ ছাড়লে, আমাদের কাণ্ডকে একাদশী করতে হবে ।

আর ধরুন যদি ঐ দ্বাদশ সুরের ফাঁকে ফাঁকে সত্য সত্যই শ্রুতি থাকে, তাহলে সে সব স্বর হচ্ছে অনুস্বর । 'সা' এবং 'নি'র অন্তর্ভূত দশটি সুরের গায়ে যদি কোনও অসাধারণ পণ্ডিত দশটি অনুস্বর জুড়ে দিতে পারেন, তাহলে সঙ্গীত এমনি সংস্কৃত হয়ে উঠবে যে, আমাদের মত প্রাকৃতজনেরা তার এক বর্ণও বুঝতে পারবে না ।

(৩)

এ সব ত গেল সঙ্গীতের বর্ণ-পরিচয়ের কথা,—শব্দবিজ্ঞানের নয় । শব্দেরও যে একটা বিজ্ঞান আছে, এ জ্ঞান সকলের নেই । সুতরাং সুরের সৃষ্টিস্থিতিতলয়ের বৈজ্ঞানিক তত্ত্ব গ্রাহ্য না হলেও আলোচ্য ।

শব্দজ্ঞানের মতে শ্রুতি অপৌরুষেয় । অর্থাৎ স্বরগ্রাম কোনও পুরুষ কর্তৃক রচিত হয় নি—প্রকৃতির বক্ষ থেকে উৎপিত হয়েছে । একটি একটানা তারের গায়ে ঘা মারলে প্রকৃতি অমনি সাতসুরে কেঁদে ওঠেন । এর থেকে বৈজ্ঞানিকেরা ধরে নিয়েছেন যে, প্রকৃতি তাঁর একতারায়ে যে সকাতর সাগর্ম আলাপ করেন, মানুষে শুধু তার নকল করে । কিন্তু সে নকলও মাছিমায়া হয় না । মানুষের গলগ্রহ কিম্বা যন্ত্রস্থ হয়ে প্রকৃতিদত্ত স্বরগ্রামের কোনও সুর একটু চড়ে, কোনও সুর একটু ঝুলে যায় । তা'ত হবারই কথা । প্রকৃতির হৃদয়তন্ত্রী থেকে এক ঘায়ে যা বেয়োয়,

তা যে একঘেয়ে হবে—এ ত স্বতঃসিদ্ধ । সূতরাং মানুষে এই সব প্রাকৃত সুরকে সংস্কৃত করে নিতে বাধ্য ।

এ মত লোকে সহজে গ্রাহ্য করে ; কেননা প্রকৃতি যে একজন মহা ওস্তাদ,—এ সত্য লৌকিক ন্যায়ও সিদ্ধ হয় । প্রকৃতি অন্ধ, এবং অন্ধের সঙ্গীতে ব্যুৎপত্তি যে সহজ, এ সত্য ত লোকবিশ্রুত

প্রকৃতির ভিতর যে শব্দ আছে,—শুধু শব্দ নয়, গোলযোগ আছে—এ কথা সকলেই জানেন ; কিন্তু তাঁর গলায় যে সুর আছে, এ কথা সকলে মানেন না । এই নিয়েই ত আর্ট ও বিজ্ঞানে বিরোধ ।

আর্টিষ্টরা বলেন—প্রকৃতি শুধু অন্ধ নন, উপরন্তু বধির । বাঁর কাণ নেই, তাঁর কাছে গানও নেই । সাংখ্যদর্শনের মতে পুরুষ দ্রষ্টা, এবং প্রকৃতি নর্তকী ; কিন্তু প্রকৃতি যে গায়িকা, এবং পুরুষ শ্রোতা,—এ কথা কোন দর্শনেই বলে না । আর্টিষ্টদের মতে তৌর্য্যত্রিকের একটিমাত্র অঙ্গ—নৃত্যই প্রকৃতির অধিকার-ভুক্ত, অপর দুটি—গীতবাছ—তা নয় ।

এর উত্তরে বিজ্ঞান বলেন, এ বিশ্বের সকল রূপরসগন্ধস্পর্শ শব্দের উপাদান এবং নিমিত্তকারণ হচ্ছে ঐ প্রকৃতির নৃত্য । কথাটা উড়িয়ে দেওয়া চলে না, অতএব পুড়িয়ে দেখা যাক ওর ভিতর কতটুকু খাঁটি মাল আছে ।—

শাস্ত্রে বলে, শব্দ আকাশের ধর্ম্য ; বিজ্ঞান বলে, শব্দ আকাশের নয়—বাতাসের ধর্ম্য । আকাশের নৃত্য অর্থাৎ সর্ব্বাঙ্গের স্বচ্ছন্দ কম্পন থেকে যে আলোকের, এবং বাতাসের উত্তরুপ কম্পন থেকে যে ধ্বনির উৎপত্তি হয়েছে,—তা বৈজ্ঞানিকেরা হাত্রে কলমে প্রমাণ করে দিতে পারেন । কিন্তু আর্ট বলে,

আত্মার কম্পন থেকে সুরের উৎপত্তি, সুররাং জড়প্রকৃতির গর্ভে তা জন্মলাভ করে নি। আত্মা কাঁপে আনন্দে, সৃষ্টির চরম আনন্দে; আর আকাশ বাতাস কাঁপে বেদনায়, সৃষ্টির প্রসব-বেদনায়। সুররাং আর্টিফিটদের মতে, সুর শব্দের অনুবাদ নয়—প্রতিবাদ।

যেখানে আর্টে ও বিজ্ঞানে মতভেদ হয়, সেখানে আপোষ-মীমাংসার জঘ্ন দর্শনকে সালিশ মানা ছাড়া আর উপায় নেই। দার্শনিকেরা বলেন, শব্দ হতে সুরের, কিন্তু সুর হতে শব্দের উৎপত্তি—সে বিচার করা সময়ের অপব্যয় করা। এ স্থলে আসল জিজ্ঞাস্য হচ্ছে, রাগ ভেঙ্গে সুরের, না সুর জুড়ে রাগের সৃষ্টি হয়েছে—এক কথায়, সুর আগে, না রাগ আগে?—অবশ্য রাগের বাইরে সার্গমের কোনও অস্তিত্ব নেই, এবং সার্গমের বাইরে রাগের কোনও অস্তিত্ব নেই। সুররাং সুর পূর্বরাগী কি অনুরাগী—এই হচ্ছে আসল সমস্যা। দার্শনিকেরা বলেন যে, এ প্রশ্নের উত্তর তাঁরাই দিতে পারেন, যাঁরা বলতে পারেন বীজ আগে কি বৃক্ষ আগে—অর্থাৎ কেউ পারেন না।

আমার নিজের বিশ্বাস এই যে, উক্ত দার্শনিক সিদ্ধান্তের আর কোনও খণ্ডন নেই। তবে বৃক্ষায়ুর্বেদীরা নিশ্চয়ই বলবেন যে, বৃক্ষ আগে কি বীজ আগে, সে রহস্যের ভেদ তাঁরা বাংলাতে পারেন। কিন্তু তাতে কিছু আসে যায় না। কেননা ও কথা শোনবামাত্র আর এক দলের বৈজ্ঞানিক, অর্থাৎ পরমাণু-বাদীরা, জবাব দেবেন যে, সঙ্গীত আয়ুর্বেদের নয়—বায়ুর্বেদের অন্তর্ভুক্ত। অর্থাৎ বিজ্ঞানের বিষে বিষক্ষয় হয়ে যাবে।

আসল কথা এই যে, আমি কণ্ঠা তুমি ভোক্তা—এ জ্ঞান যার নেই, তিনি আর্টিফিট নন। সুররাং সঙ্গীত সম্বন্ধে প্রকৃতিকে

সম্বোধন করে—তুমি কর্তা আমি ভোক্তা—এ কথা কোনও আর্টিফি কখনও বলতে পারবেন না, এবং ও কথা মুখে আনবার কোন দরকারও নেই । প্রকৃতির হাতে-গড়া এই বিশ্বসংসার যে আগাগোড়া বেস্বরো, তার অকাটা প্রমাণ—আমরা পৃথিবীস্থ লোক পৃথিবী ছেড়ে স্বরলোকে যাবার জন্ম লালায়িত ।

অতএব দাঁড়াল এই যে, সঙ্গীতের উৎপত্তির আলোচনায় তার লয়ের সম্ভাবনাই বেড়ে যায় । তাই সহজমানুষে চায় তার স্থিতি,—ভিত্তি নয় ।

(৪)

অতঃপর দেশী বিলাতি সঙ্গীতের ভেদাভেদ নির্ণয় করবার চেষ্টা করা যাক ।—

এ দুয়ের মধ্যে আর যা প্রভেদই থাক, তা অবশ্য ক, খ-গত নয় । যে বারো স্বর এ দেশের সঙ্গীতের মূলধন, সেই বারো স্বরই যে সে দেশের সঙ্গীতেরও মূলধন,—এ কথা সর্ববাদীসম্মত । তবে আমরা বলি যে, সে মূলধন আমাদের হাতে স্বদে বেড়ে গিয়েছে । আমাদের হাতে কোনও ধন যে স্বদে বাড়ে, তার বড় একটা প্রমাণ পাওয়া যায় না । তা ছাড়া আমি পূর্বের দেখিয়েছি যে, স্বরের এই অতিস্বদের লোভে, আমরা সঙ্গীতের মূলধন হারাতে বসেছি । সুতরাং এ বিষয়ে অর বেশী কিছু বলা নিস্প্রয়োজন ।

দেশীর সঙ্গে বিলাতি সঙ্গীতের আসল প্রভেদটা ক, খ, নিয়ে নয়—কর, খল নিয়ে । B, L, A = রে ; C, L, A = কের সঙ্গে কর খলের,—কাণের দিক থেকেই হোক আর মানের দিক থেকেই হোক,—একটা যে প্রকাণ্ড প্রভেদ আছে, এ হচ্ছে

একটি “প্রকাণ্ড সত্য” । এ প্রভেদ উপাদানের নয়—গড়নের । অতএব রাগ ও মেলডির ভিতর পার্থক্য হচ্ছে ব্যাকরণের, এবং একমাত্র ব্যাকরণেরই ।

সুতরাং আমরা যদি বিলাতি ব্যাকরণ অনুসারে সুর সংযোগ করি, তাহলে তা রাগ না হয়ে মেলডি হবে, এবং তাতে অবশ্য রাগের কোনও ক্ষতিবৃদ্ধি হবে না । আমরা ইংরেজি ব্যাকরণ অনুসারে ইংরাজি ভাষা লিখলে সে লেখা ইংরাজিই হয়, এবং তাতে বাংলা-সাহিত্যের কোনও ক্ষতিবৃদ্ধি হয় না—যদিচ এ ক্ষেত্রে শুধু ব্যাকরণ নয়, শব্দও বিদেশী । কিন্তু যেমন কতকটা ইংরেজি এবং কতকটা বাংলা ব্যাকরণ মিলিয়ে, এবং সেই সঙ্গে বাংলা শব্দের অনুবাদের গৌজামিলন দিলে, তা Babu English হয়, এবং উক্ত পদ্ধতি অনুসারে বাংলা লিখলে তা সাধু-ভাষা হয়—তেমনি ঐ দুই ব্যাকরণ মেলাতে বসলে সঙ্গীতেও আমরা রাগ মেলডির একটি খিচুড়ি পাকাব । সাহিত্যের খিচুড়িভোগে যখন আমার রুচি নেই, তখন সঙ্গীতের ও-ভোগ যে আমি ভোগ করতে চাইনে, সে কথা বলাই বাহুল্য ।

(৫)

দেশী বিলাতি সঙ্গীতের মধ্যে আর একটা স্পষ্ট প্রভেদ আছে । বিলাতি সঙ্গীতে Harmony আছে—আমাদের নেই ।

এই হারমনি জিনিসটে স্বরের যুক্তাক্ষর বই আর কিছুই নয়—অর্থাৎ ও বস্তু হচ্ছে সঙ্গীতের বর্ণপরিচয়ের দ্বিতীয় ভাগের অধিকারে । আমাদের সঙ্গীত এখনও প্রথম ভাগের দখলেই আছে । আমাদের পক্ষে সঙ্গীতের দ্বিতীয় ভাগের চর্চা করা উচিত কি না—সে বিষয়ে কেউ মনস্থির করতে পারেন নি ।

অনেকে ভয় পান যে, দ্বিতীয় ভাগ ধরলে তাঁরা প্রথম ভাগ ভুলে যাবেন । তা ভুলুন আর না ভুলুন, তাঁরা যে প্রথম ভাগকে আর আমল দেবেন না—সে বিষয়ে আমার মনে কোনও সন্দেহ নেই । আমাদের সাহিত্য থেকেই প্রমাণ পাওয়া যায় যে, একবার যুক্তাক্ষর শিখলে আমরা অযুক্তাক্ষরের ব্যবহার যুক্তি-যুক্ত মনে করিনে, এবং অপর কেউ করতে গেলে অমনি বলে উঠি—সাহিত্যের সর্বনাশ হ'ল, ভাষাটা একদম অসাধু এবং অশুদ্ধ হয়ে গেল । তবে সঙ্গীতে এ বিপদ ঘটবার বিশেষ সম্ভাবনা নেই । সেদিন একজন ইংরাজ বলছিলেন যে, যে সঙ্গীতে ছয়টি রাগ এবং প্রতি রাগের ছয়টি করে স্ত্রী আছে, সেখানে harmony কি করে থাকতে পারে ? আমি বলি ওত ঠিকই কথা, বিশেষতঃ স্বামী যখন মূর্তিমান রাগ, আর স্ত্রীরা প্রত্যেকেই এক একটি মূর্তিমতী রাগিণী ! অবশ্য এরূপ হবার কারণ আমাদের সঙ্গীতের কোলিগু । আমাদের রাগসকল যদি কুলীন না হত, তাহলেও আমরা harmonyর চর্চা করতে পারতুম না—কেননা ও-বস্তু আমাদের ধাতে নেই । আমাদের সমাজের মত আমাদের সঙ্গীতেও জাতিভেদ আছে, আর তার কেউ আর কারও সঙ্গে মিশ্রিত হতে পারে না । মিশ্রিত হওয়া দূরে থাক, আমরা পরস্পর পরস্পরকে স্পর্শ করতে ভয় পাই, কেননা জাতির ধর্ম্মই হচ্ছে জাত বাঁচিয়ে মরা । *আর মিলে মিশে এক হয়ে যাবার নামই হচ্ছে harmony.

পৌষ, ১৩২৩ ।

রপের কথা ।

এ দেশে সচরাচর লোকে যা লেখে ও ছাপায়, তাই যদি তাদের মনের কথা হয়,—তাহলে স্বীকার করতেই হবে যে, আমরা মানব-সভ্যতার চরম পদ লাভ করেছি। কিন্তু দুঃখের বিষয় এই যে, এই প্রকাণ্ড সত্যটা বিদেশীরা মোটেই দেখতে পায় না। এটা সত্যিই দুঃখের বিষয়—কেননা সভ্যতারও একটা চেহারা আছে; এবং যে সমাজের স্বেচ্ছাচারা নেই, তাকে স্বেচ্ছা বলে মানা কঠিন। বিদেশী বলতে দুঃশ্রেণীর লোক বোঝায়—এক পরদেশী, আর এক বিলেতি। আমরা যে বড় একটা কারও চোখে পড়ি নে, সে বিষয়ে এই দুই দলের বিদেশীই একমত।

যাঁরা কালাপাণি পার হয়ে আসেন, তাঁরা বলেন যে, আমাদের দেশ দেখে তাঁদের চোখ জুড়ায়—কিন্তু আমাদের বেশ দেখে সে চোখ ক্ষুণ্ণ হয়; এর কারণ—আমাদের দেশের মোড়কে রঙ আছে, আমাদের দেহের মোড়কে নেই। প্রকৃতি বাংলা-দেশকে যে কাপড় পরিয়েছেন, তার রঙ সবুজ; আর বাঙ্গালী নিজে যে কাপড় পরেছে, তার রঙ আর যেখানেই পাওয়া যাক—ইন্দ্রধনুর মধ্যে খুঁজে পাওয়া যাবে না। আমরা আপাদমস্তক রঙছুট বলেই অপর কারো নয়নাভিরাম নই। সুতরাং যারা আমাদের দেশ দেখতে আসে, তারা আমাদের দেখে খুসি হয় না। যাঁর বোম্বাই সহরের সঙ্গে চাক্ষুষ পরিচয় আছে, তিনিই জানেন কলিকাতার সঙ্গে সে সহরের প্রভেদটা

কোথায় এবং কত জাজ্জল্যমান । সে দেশে জনসাধারণ পথে-ঘাটে সকালসন্ধ্যা রঙের ঢেউ খেলিয়ে যায়, এবং সে রঙের বৈচিত্র্যের ও সৌন্দর্য্যের আর অন্ত নেই । কিন্তু আমাদের গায়ে জড়িয়ে আছে চির-গোধূলি,—তাই শুধু বিলেতি নয়, পরদেশী ভারতবাসীর চোখেও আমরা এতটা দৃষ্টিকটু । বাকী ভারতবর্ষ সাজসজ্জায় স্বদেশী,—আমরা আধ-স্বদেশী হাফ-বিলেতি । আর বিলেতি মতে, হয় কালো নয় সাদা নইলে সভ্যতার লজ্জা নিবারণ হয় না ; রঙ চাই শুধু সঙ সাজবার জন্যে । আমাদের নব-সভ্যতাও কার্য্যতঃ এই মতে সায দিয়েছে ।

(২)

আপনারা বলতে পারেন যে, এ কথা যদি সত্যও হয়, তাতে আমাদের কি যায় আসে ? বিদেশীর মনোরঞ্জন করবার জন্য আমরা ত আর জাতকে জাত আমাদের পরণ-পরিচ্ছদ, আমাদের হাল-চাল সব বদলে ফেলতে পারি নে ? জীবনযাত্রা ব্যাপারটা ত আর অভিনয় নয়, যে দর্শকের মুখ চেয়ে সে জীবন গড়তে হবে, এবং তার উপর আবার রং ফলাতে হবে ?—এ কথা খুব ঠিক । জীবন আমরা কিসের জন্ত ধারণ করি, তা না জানলেও, এটা জানি যে পরের জন্ত আমরা তা ধারণ করি নে,—অপর দেশের অপর লোকের জন্ত ত নয়ই । তবে বিদেশীর কথা উত্থাপন করবার সার্থকতা এই যে, জাতীয় জীবনের ক্রটি বিদেশীর চোখে যেমন এক নজরে ধরা পড়ে,

স্বদেশীর চোখে তা পড়ে না । কেননা আজন্ম দেখে দেখে লোকের চোখে যা সয়ে গেছে, যারা প্রথম দেখে তাদের চোখে তা সয় না ।

এই বিদেশীরাই আমাদের সজ্ঞান করে দিয়েছে যে, রূপ সম্বন্ধে আমরা চোখ থাকতেও কাণা । আমাদের রূপজ্ঞান যে নেই—কিন্তু যদি থাকে ত অতি কম—সে বিষয়ে বোধহয় কোনও মতভেদ নেই । কেননা এ জ্ঞানের অভাবটা আমরা জাতীয় মনের দৈন্ত্য বলে মনে করি নে । বরং সত্য কথা বলতে গেলে—আমাদের বিশ্বাস যে, এই রূপাঙ্কতাটাই আমাদের জাতীয় চরিত্রের মহত্বের পরিচয় দেয় । রূপ ত একটা বাইরের জিনিস—শুধু তাই নয়, বাহ্যবস্তুরও বাইরের জিনিস ; ও জিনিসকে যারা উপেক্ষা, এমন কি অবজ্ঞা করতে না শিখেছে, তারা আধ্যাত্মিকতার সন্ধান জানে না । আর আমরা আর কিছু হই আর না হই—বালবৃদ্ধবনিতা সকলেই যে আধ্যাত্মিক,—সেকথা যে অস্বীকার করবে, সে নিশ্চয়ই স্বদেশ এবং স্বজাতিদ্রোহী ।

(৩)

রূপ জিনিসটাকে যারা একটা পাপ মনে করেন, তাঁদের মতে অবশ্য রূপের প্রশ্রয় দেওয়ার অর্থ পাপের প্রশ্রয় দেওয়া । কিন্তু দণ্ডে পাতলা হলেও, পৃথিবীতে এমন সব লোক আছে, যারা রূপকে মান্য করে, শ্রদ্ধা করে, এমন কি পূজা করতেও প্রস্তুত—অথচ নিজেদের মহাপাপী মনে করে না । এই রূপ-ভক্তের দল অবশ্য স্বদেশীর কাছে কৈফিয়ৎ দিতে বাধ্য,—অর্থাৎ

প্রমাণ প্রয়োগসহকারে রূপের স্বত্বসাব্যস্ত করিতে বাধ্য । আপশোষের কথা এই যে, যে সত্য সকলের প্রত্যক্ষ হওয়া উচিত, সেই সত্য এদেশে প্রমাণ করিতে হয় ;—অর্থাৎ একটা সহজ কথা বলতে গেলে, আমাদের জ্ঞান-অজ্ঞানের তর্কশ্রোতের উজান ঠেলে যেতে হয় ।

যা সকলে জানে আছে,—তা নেই বলাতে অতিবুদ্ধির পরিচয় দেওয়া হতে পারে, কিন্তু বুদ্ধির পরিচয় দেওয়া হয় না । কিন্তু দুর্ভাগ্যবশতঃ আমরা এই “অতির” অতিভক্ত হওয়াতে, আমাদের ইতির জ্ঞান নষ্ট হয়েছে ।

বস্তুর রূপ বলে যে একটি ধর্ম আছে, এ হচ্ছে শোনা কথা নয়,—দেখা জিনিস । যাঁর চোখ নামক ইন্দ্রিয় আছে, তিনিই কখন-না-কখনও তার সাক্ষাৎ লাভ করেছেন । এবং আমাদের সকলেরি চোখ আছে,—সম্ভবতঃ শুধু তাঁদের ছাড়া, যাঁরা সৌন্দর্য্যের নাম করলেই অতীন্দ্রিয়তার ব্যাখ্যান অর্থাৎ উপাখ্যান শুরু করেন । কিন্তু আমি এই রূপ জিনিসটিকে অতি-বর্জিত ইন্দ্রিয়ের কোঠাতেই টাঁকিয়ে রাখতে চাই— কেননা অতীন্দ্রিয় জগতে রূপ নিশ্চয়ই অরূপ হয়ে যায় ।

(৪)

রূপের বিষয় দার্শনিকেরা কি বলেন আর না বলেন, তাতে কিছু যায় আসে না ; কেননা যা দৃষ্টির অগোচর, তাই দর্শনের বিষয় । অতএব এ কথা নির্ভয়ে বলা যেতে পারে যে, বস্তুর রূপ বলে যে একটি গুণ আছে, তা মানুষমাত্রই জানে এবং মানে । তবে সেই গুণের পক্ষপাতী হওয়াটা গুণের কি দোষের—এই নিয়েই যা মতভেদ ।

রূপকে আমরা ভক্তি করি নে; সম্ভবতঃ ভালওবাসিনে । আপনারা সকলেই জানেন যে, হালে একটা মতের বহুল প্রচার হয়েছে, যার ভিতরকার কথা এই যে, জাতীয় আত্মমর্যাদা হচ্ছে পরশ্রীকাতরতারই সদর পিঠ । সম্ভবতঃ এ কথা সত্য, কিন্তু তাই বলে শ্রীকাতরতাও যে ঐ জাতীয় আত্মমর্যাদার লক্ষণ—এ কথা স্বীকার করা যায় না; কেননা, বিশ্বমানবের সভ্যতার ইতিহাস এর বিরুদ্ধে চিরদিন সাক্ষী দিয়ে আসছে ।

স্বদেশের ভিতর থেকে বেরিয়ে গেলেই, অপর সভ্যজাতির কাছে রূপের মর্যাদা যে কত বেশী, তার প্রমাণ হাতে হাতে পাওয়া যাবে । বর্তমান ইউরোপ সুন্দরকে সত্যের চাইতে নীচে আসন দেয় না,—সে দেশে জ্ঞানীর চাইতে আর্টিফের মান্য কম নয় । তারা সভ্যসমাজের দেহটাকে—অর্থাৎ দেশের রাস্তাঘাট, বাড়ী ঘরদোর, মন্দির প্রাসাদ, মানুষের আসন বসন সাজসরঞ্জাম ইত্যাদি—নিত্য নূতন করে, সুন্দর করে গড়ে তোলবার চেষ্টা করছে । সে চেষ্টার ফল সু কি কু হচ্ছে—সে স্বতন্ত্র কথা । ইউরোপীয় সভ্যতার ভিতর অবশ্য একটা কুৎসিত দিক আছে—যার নাম Commercialism—কিন্তু এই দিকটে কদর্যা বলেই তার সর্ববনাশের দিক ।—Commercialism-এর মূলে আছে লোভ । আর লোভে পাপ, পাপে মৃত্যু । আপনারা সকলেই জানেন যে, রূপের সঙ্গে মোহের সম্পর্ক থাকতে পারে, কিন্তু লোভের নেই ।

ইউরোপ ছেড়ে এশিয়াতে এলে দেখতে পাই যে, চীন ও জাপান রূপের এতই ভক্ত যে, রূপের আরাধনাই সে দেশের প্রকৃত ধর্ম বলেও অত্যাক্তি হয় না । রূপের প্রতি এই পরা-প্রীতিবশতঃ, চীনজাপানের লোকের হাতে-গড়া এমন জিনিস

নেই যার রূপ নেই—তা সে ঘটিই হোক আর বাটিই হোক ।
যাঁরা তাদের হাতের কাজ দেখেছেন, তাঁরাই তাদের রূপ-স্বষ্টির
কৌশল দেখে মুগ্ধ হয়ে গিয়েছেন । মোঙ্গল জাতিকে ভগবান
রূপ দেন নি,—সম্ভবতঃ সেই কারণে সুন্দরকে তাদের নিজের
হাতে গড়ে নিতে হয়েছে ! এই ত গেল বিদেশের কথা ।

(৫)

আবার শুধু স্বদেশের নয়, স্বকালের ভিতর থেকে বেরিয়ে
গেলে, আমরা ঐ একই সত্যের পরিচয় পাই । প্রাচীন গ্রীকো-
ইতালীয় সভ্যতার ঐকান্তিক রূপচর্চার ইতিহাস ত জগৎ-
বিখ্যাত । প্রাচীন ভারতবর্ষও রূপ সম্বন্ধে অন্ধ ছিল না ;
কেননা আমরা যাই বলি নে কেন, সে সভ্যতাও মানব-সভ্যতা,
—একটা সৃষ্টিছাড়া পদার্থ নয় । সে সভ্যতারও শুধু আত্মা নয়,
দেহ ছিল,—এবং সে দেহকে আমাদের পূর্বপুরুষেরা স্তম্ভিত ও
সুন্দর করেই গড়ে তৈরি করেছিলেন । সে দেহ আমাদের
চোখের সন্মুখে নেই বলেই আমরা মনে করি যে, সেকালে যা
ছিল, তা হচ্ছে শুধু অশরীরী আত্মা । কিন্তু সংস্কৃত-সাহিত্য
থেকেই প্রমাণ পাওয়া যায় যে, তাঁদের কতটা সৌন্দর্যজ্ঞান
ছিল ! আমরা যাকে সংস্কৃত-কাব্য বলি, তাতে রূপবর্ণনা ছাড়া
আর বড় কিছু নেই ; আর সে রূপবর্ণনাও আসলে দেহের—
বিশেষতঃ রমণীর দেহের বর্ণনা—কেননা সে কাব্য-সাহিত্যে যে
প্রকৃতিবর্ণনা আছে, তাও বস্তুতঃ রমণীর রূপবর্ণনা । প্রকৃতিকে
তাঁরা সুন্দরী রমণী হিসেবেই দেখেছিলেন । তার যে অংশ
নারী-স্বপ্নের উপমেয় কি উপমান নয়, তার স্বরূপ হয় তাঁদের

চোখে পড়ে নি, নয় তা তাঁরা রূপ বলে গ্রাহ্য করেন নি । সংস্কৃত-সাহিত্যে হরেক রকমের ছবি আছে, কিন্তু Landscape নেই বল্লেই হয়,—অর্থাৎ, মানুষের সঙ্গে নিঃসম্পর্ক প্রকৃতির অস্তিত্বের বিষয় তাঁরা সম্পূর্ণ উদাসীন ছিলেন ।, Landscape প্রাচীন গ্রীস কিম্বা রোমের হাত থেকেও বেরয় নি ।—তার কারণ, সে কালে মানুষে, মানুষ বাদ দিয়ে বিশ্বসংসার দেখতে শেখে নি । এর প্রমাণ শুধু আর্টে নয়, দর্শনে বিজ্ঞানেও পাওয়া যায় । আমরা আমাদের নব-বিজ্ঞানের প্রসাদে মানুষকে এ বিশ্বের পরমাণুতে পরিণত করেছি, সম্ভবতঃ সেই কারণে আমরা মানবদেহের সৌন্দর্য্য অবজ্ঞা করতে শিখেছি । আমাদের পূর্বপুরুষেরা কিন্তু সে সৌন্দর্য্যকে একটি অমূল্য বস্তু বলে মনে করতেন ; শুধু স্বীলোকের নয়—পুরুষের রূপের উপরও তাঁদের ভক্তি ছিল । যাঁর অলোকসামান্য রূপ নেই, তাঁকে এদেশে পুরাকালে মহাপুরুষ বলে কেউ মেনে নেয় নি । শ্রীরামচন্দ্র, বুদ্ধদেব, শ্রীকৃষ্ণ প্রভৃতি অবতারেরা সকলেই সৌন্দর্য্যের অবতার ছিলেন । রূপগুণের সন্ধিবিচ্ছেদ করা সেকালের শিক্ষার একটা প্রধান অঙ্গ ছিল না । শুধু তাই নয়,—আমাদের পূর্বপুরুষদের কদাকারের উপর এতটাই ঘৃণা ছিল যে, পুরাকালের শূদ্রেরা যে দাসত্ব হতে মুক্তি পায় নি, তার একটি প্রধান কারণ,—তারা ছিল কৃষ্ণবর্ণ এবং কুৎসিত—অন্ততঃ আর্গাদের চোখে । সেকালের দর্শনের ভিতর অরূপের জ্ঞানের কথা থাকলেও, সেকালের ধর্ম্ম রূপজ্ঞানের উপরেই প্রতিষ্ঠিত । পরব্রহ্ম নিরাকার হলেও, ভগবান মন্দিরে মন্দিরে মূর্ত্তিমান । প্রাচীন মতে নিগুণ ব্রহ্ম অরূপ, এবং সগুণ ব্রহ্ম সরূপ ।

(৬)

সভ্যতার সঙ্গে সৌন্দর্য্যের এই ঘনিষ্ঠ যোগাযোগ থাকবার কারণ—সভ্য সমাজ বলতে বোঝায় গঠিত সমাজ । যে সমাজের গড়ন নেই, তাকে আমরা সভ্য সমাজ বলিনে । এ কালের ভাষায় বলতে হ'লে, সমাজ হচ্ছে একটি organism ; আর আপনারা সকলেই জানেন যে, সকল organism এক-জাতীয় নয়—ও বস্তুর ভিতর উঁচুনিচুর প্রভেদ বিস্তর । Organic জগতে protoplasm হচ্ছে সব চাইতে নীচে, এবং মানুষ সব চাইতে উপরে । এবং মানুষের সঙ্গে protoplasm-এর প্রত্যক্ষ পার্থক্য হচ্ছে রূপে ;—অপর কোনও প্রভেদ আছে কি না, সে হচ্ছে তর্কের বিষয় । মানুষে যে protoplasm-এর চাইতে রূপবান,—এ বিষয়ে আশা করি কোনও মতভেদ নেই । এই থেকে প্রমাণ হয় যে, যে সমাজের চেহারা যত সুন্দর, সে সমাজ তত সভ্য । এরূপ হবার একটি স্পষ্ট কারণও আছে । এ জগতে রূপ হচ্ছে শক্তির চরম বিকাশ ; সমাজ গড়বার জন্য মানুষের শক্তি চাই—এবং সুন্দর করে গড়বার জন্য তার চাইতেও বেশী শক্তি চাই । সুতরাং মানুষ যেমন বাড়বার মুখে ক্রমে অধিক সুশ্রী হয়ে ওঠে, এবং মরবার মুখে ক্রমে অধিক কুশ্রী হয়—জাতের পক্ষেও সেই একই নিয়ম খাটে । কদর্য্যতা দুর্বলতার বাহ্য লক্ষণ,—সৌন্দর্য্য শক্তির । এই ভারতবর্ষের অতীতের দিকে দৃষ্টিপাত করলেই দেখা যায় যে, যখনই দেশে নবশক্তির আবির্ভাব হয়েছে, তখনই মঠে মন্দিরে, বেশে ভূষায়, মানুষের আশায় ভাষায় নব সৌন্দর্য্য ফুটে উঠেছে । ভারতবর্ষের আটের বৌদ্ধযুগ ও বৈষ্ণবযুগ এই সত্যেরই জাজ্জ্বল্যমান প্রমাণ ।

আমাদের এই কোণঠাসা দেশে যেদিন চৈতন্যদেবের আবির্ভাব

হয়—সেই দিনই বাঙ্গালী সৌন্দর্য্যের আবিষ্কার করে। এর পরিচয় বৈষ্ণব-সাহিত্যে পাওয়া যায়। কিন্তু সে সৌন্দর্য্যবুদ্ধি যে টিঁকল না, বাঙ্গলার ঘরে-বাইরে যে তা নানারূপে নানা আকারে ফুটল না, তার কারণ চৈতন্যদেব যা দান করতে এসেছিলেন, তা যোল-আনা গ্রহণ করবার শক্তি আমাদের ছিল না। যে কারণে বাঙ্গলার বৈষ্ণবধর্ম্ম বাঙ্গালী সমাজকে একাকার করবার চেষ্টায় বিফল হয়েছে, হয়ত সেই একই কারণে তা বাঙ্গালী সভ্যতাকে সাকার করে তুলতে পারে নি। ভক্তির রস আমাদের বুকে ও মুখে গড়িয়েছে—আমাদের মনে ও হাতে তা' জমে নি। ফলে, এক গান ছাড়া আর কিছুকেই আমরা নবরূপ দিতে পারি নি।

(৭)

এ সব কথা যদি সত্য হয়, তাহলে স্বীকার করতেই হবে যে, আমাদের রূপজ্ঞানের অভাবটা আমাদের শ্রেষ্ঠত্বের পরিচয় দেয় না। কিন্তু এ কথা মুখ ফুটে বললেই আমাদের দেশের অন্ধের দল লগুড় ধারণ করবেন। এর কারণ কি, তা বলছি।

সত্য ও সৌন্দর্য্য, এ দুটি জিনিসকে কেউ উপেক্ষা করতে পারেন না। হয় এদের ভক্তি করতে হবে—নয় অভক্তি করতে হবে। অর্থাৎ সত্যকে উপেক্ষা করলে মিথ্যার আশ্রয় নিতে হবে; আর সুন্দরকে অবজ্ঞা করলে কুৎসিতের প্রশ্রয় দিতেই হবে। এ পৃথিবীতে যা কিছু আছে, তা দুই শ্রেণীতে বিভক্ত—এক সু আর এক কু। 'সু'কে অর্জ্জন না করলে 'কু'কে বর্জ্জন করা কঠিন। আমাদের দশাও হয়েছে তাই। আমাদের সুন্দরের প্রতি যে অনুরাগ নেই, শুধু তাই নয়—ঘোরতর বিরাগ আছে।

আমরা দিনে দুপুরে চীৎকার করে বলি যে, সাহিত্যে যে ফুলের কথা জ্যোৎস্নার কথা লেখে সে লেখক নিতান্তই অপদার্থ ।

এঁদের কথা শুনলে মনে হয় যে, সব ফলই যদি ডুমুর হয়ে ওঠে, আর অমৃবস্তা যদি বারোমেসে হয়, তাহলেই এ পৃথিবী ভূস্বর্গ হয়ে উঠবে—এবং সে স্বর্গে অবশ্য কোনও কবির স্থান হবে না । চন্দ্র যে সৌরমণ্ডলের মধ্যে একটি প্রক্ষিপ্ত গোলক, সে বিষয়ে কোনও সন্দেহ নেই । কিন্তু ও reflector ভগবান আকাশে ঝুলিয়ে দিয়েছেন—সুতরাং জ্যোৎস্না যে আছে, তার জন্য কবি দায়ী নন, দায়ী স্বয়ং ভগবান । কিন্তু এই জ্যোৎস্না-বিদেষ থেকেই এঁদের প্রকৃত মনোভাব বোঝা যায় । এ রাগটা আসলে আলোর উপর রাগ । জ্ঞানের আলোক যখন আমাদের চোখে পুরোপুরি সয় না—তখন রূপের আলোক যে মোটেই সহ্য হবে না, তাতে আর বিচিত্র কি ? জ্ঞানের আলো বস্তুজগৎকে প্রকাশ করে, সুতরাং এমন অনেক বস্তু প্রকাশ করে, যা আমাদের পেটের ও প্রাণের খোরাক যোগাতে পারে ; কিন্তু রূপের আলো শুধু নিজেকেই প্রকাশ করে, সুতরাং তা হচ্ছে শুধু আমাদের চোখের ও মনের খোরাক । বলা বাহুল্য উদর ও প্রাণ protoplasm-এরও আছে,—কিন্তু চোখ ও মন শুধু মানুষেরই আছে । সুতরাং যাঁরা জীবনের অর্থ বোঝেন একমাত্র বেঁচে থাকা, এবং তজ্জন্ম উদরপূর্তি করা,—তাদের কাছে জ্ঞানের আলো গ্রাহ্য হলেও, রূপের আলো অবজ্ঞাত । এ দুয়ের ভিতর প্রভেদও বিস্তর । জ্ঞানের আলো সাদা ও একঘেয়ে, অর্থাৎ ও হচ্ছে আলোর মূল ;—অপরপক্ষে রূপের আলো রঙীন ও বিচিত্র, অর্থাৎ আলোর ফুল । আদিম মানবের কাছে ফুলের কোনও আদর নেই—কেননা ও বস্তু আমাদের কোনও আদিম

ক্ষুধার নিবৃত্তি করে না ;—ফুল আর যাই হোক, চর্ব্ব্য চোষ্য
কিন্মা লেহ্য পেয় নয় ।

(৮)

এ সব কথা শুনে, আমার বৈজ্ঞানিক বন্ধুরা নিশ্চয়ই বলবেন
যে, আমি যা বলছি সে সব জ্ঞানবিজ্ঞানের কথা নয়—সেরেফ
কবিদ্ব । বিজ্ঞানের কথা এই যে, যে আলোকে আমি সাদা
বলছি, সেই হচ্ছে এ বিশ্বের একমাত্র অখণ্ড আলো ; সেই সমস্ত
আলো refracted অর্থাৎ বাস্তব হয়েই আমাদের চোখে বহুরূপী
হয়ে দাঁড়ায় ।—তথাস্তু । এই refraction-এর একাধারে
নিমিত্ত এবং উপাদান কারণ হচ্ছে, পঞ্চভূতের বহির্ভূত ইথার
নামক রূপরসগন্ধস্পর্শশব্দের অতিরিক্ত একটি পদার্থ । এবং
এই হিল্লোলিত পদার্থের ধর্ম্ম হচ্ছে—এই জড়জগৎটাকে উৎফুল্ল
করা, রূপান্বিত করা । রূপ যে আমাদের স্থূল-শরীরের কাজে
লাগে না, তার কারণ বিশ্বের স্থূল-শরীর থেকে তার উৎপত্তি
হয় নি । আমাদের ভিতর যে সূক্ষ্ম-শরীর অর্থাৎ ইথার আছে,
বাইরের রূপের স্পর্শে সেই সূক্ষ্ম-শরীর স্পন্দিত হয়, আনন্দিত
হয়, পুলকিত হয়, প্রস্ফুটিত হয় । রূপ-জ্ঞানেই মানুষের
জীবন্মুক্তি, অর্থাৎ স্থূল-শরীরের বন্ধন হতে মুক্তি । রূপজ্ঞান
হারালে মানুষ আজীবন পঞ্চভূতেরই দাসত্ব করবে । রূপবিদ্বেষ্টা
হচ্ছে আত্মার প্রতি দেহের বিদ্বেষ,—আলোর বিরুদ্ধে অন্ধ-
কারের বিদ্রোহ । রূপের গুণে অবিশ্বাস করাটা নাস্তিকতার
প্রথম সূত্র ।

(৯)

ইন্দ্রিয়জ বলে বাইরের রূপের দিকে পিঠ ফেরালে, ভিতরের রূপের সাক্ষাৎ পাওয়া কঠিন,—কেননা ইন্দ্রিয়ই হচ্ছে জড় ও চৈতন্যের একমাত্র বন্ধনসূত্র । এবং ঐ সূত্রেই রূপের জন্ম । অন্তরের রূপও যে আমাদের সকলের মনশ্চক্ষে ধরা পড়ে না, তার প্রমাণস্বরূপ একটা চল্টি উদাহরণ নেওয়া যাক ।

রবীন্দ্রনাথের লেখার প্রতি অনেকের বিরক্তির কারণ এই যে, সে লেখার রূপ আছে । রবীন্দ্রনাথের অন্তরে ইথার আছে, তাই সে মনের ভিতর দিয়ে যে ভাবের আলো refracted হয়ে আসে, তা ইন্দ্রধনুর বর্ণে রঞ্জিত ও ছন্দে মূর্ত্ত হয়ে আস্তে বাধা । স্থূলদর্শীর স্থূলদৃষ্টিতে তা হয় অসত্য নয় অশিব বলে ঠেকা কিছু আশ্চর্য্য নয় ।

মানুষে তিনটি কথাকে বড় বলে স্বীকার করে, তার অর্থ তারা বুঝুক আর না বুঝুক । সে তিনটি হচ্ছে—সত্য শিব আর সুন্দর । যার রূপের প্রতি বিদ্রোহ আছে, সে সুন্দরকে তাড়না করতে হলে, হয় সত্যের নয় শিবের দোহাই দেয় ;—যদিচ সম্ভবতঃ সে ব্যক্তি সত্য কিস্বা শিবের কখনও একমানে সেবা করে নি । যদি কেউ বলেন যে, সুন্দরের সাধনা করো—অমনি দশজনে বলে ওঠেন, কি দুর্নীতির কথা ! বিষয়বুদ্ধির মতে সৌন্দর্য্যপ্রিয়তা বিলাসিতা, এবং রূপের চর্চ্চা চরিত্রহীনতার পরিচয় দেয় । সুন্দরের উপর এদেশে সত্যের অত্যাচার কম, কেননা এদেশে সত্যের আরাধনা করবার লোকও কম । শিবই হচ্ছে এখন আমাদের একমাত্র, কেননা অমনি-পাওয়া ধন । এ তিনটির প্রতিটি যে প্রতি অপরটির শত্রু, তার কোনও প্রমাণ নেই । সুতরাং এদের একের প্রতি অভক্তি অপরের প্রতি

ভক্তির পরিচায়ক নয় । সে যাই হোক, শিবের দোহাই দিয়ে কেউ কখনও সত্যকে চেপে রাখতে পারে নি,—আমার বিশ্বাস সুন্দরকেও পারবে না । যে জানে পৃথিবী সূর্য্যের চারিদিকে ঘুরছে, সে সে-সত্য স্বীকার করতে বাধ্য, এবং সামাজিক জীবনের উপর তার কি ফলাফল হবে সে কথা উপেক্ষা করে, সে-সত্য প্রচার করতেও বাধ্য । কেননা সত্যসেবকদের একটা বিশ্বাস আছে যে, সত্যজ্ঞানের শেষ ফল ভাল বই মন্দ নয় । তেমনি যার রূপজ্ঞান আছে, সে সৌন্দর্য্যের চর্চ্চা এবং সুন্দর বস্তুর সৃষ্টি করতে বাধ্য—তার আশু সামাজিক ফলাফল উপেক্ষা করে,—কেননা রূপের পূজারীদেরও বিশ্বাস যে, রূপজ্ঞানের শেষ ফল ভাল বই মন্দ নয় । তবে মানুষের এ জ্ঞানলাভ করতে দেরী লাগে ।

শিবজ্ঞান আসে সব চাইতে আগে—কেননা মোটামুটি ও জ্ঞান না থাকলে সমাজের সৃষ্টিই হয় না, রক্ষা হওয়া ত দূরের কথা । ও জ্ঞান বিষয়বুদ্ধির উত্তমাত্র হলেও, একটা অঙ্গমাত্র ।

তারপর আসে সত্যের জ্ঞান । এ জ্ঞান শিব-জ্ঞানের চাইতে ঢের সূক্ষ্মজ্ঞান, এবং এ জ্ঞান আংশিকভাবে বৈষয়িক, অতএব জীবনের সহায়—এবং আংশিকভাবে তার বহির্ভূত, অতএব মনের সম্পদ ।

সব শেষে আসে রূপজ্ঞান, কেননা এ জ্ঞান অতিসূক্ষ্ম এবং সাংসারিক হিসেবে অকেজো । রূপজ্ঞানের প্রসাদে মানুষের মনের পরমায়ু বেড়ে যায়, দেহের নয় । সুনীতি সভ্য সমাজের গোড়ার কথা হলেও, স্মৃতি তার শেষ কথা । শিব সমাজের ভিত্তি, আর সুন্দর তার অভ্রভেদী চূড়া ।

অবশ্য হাবার্ট স্পেনসর বলেছেন যে, মানুষের রূপজ্ঞান

আসে আগে, এবং সত্যজ্ঞান তার পরে । তার কারণ, যে জ্ঞান তাঁর জন্মায় নি, তিনি মনে করতেন সে জ্ঞান বাতিল হয়ে গিয়েছে । সত্য কথা এই যে, মানব-সমাজের পক্ষে রূপজ্ঞান লাভ করাই সাধনাসাপেক্ষ,—খোয়ানো সহজ । আমাদের পূর্ব-পুরুষদের সাধনার সেই সঞ্চিত ধন আমরা অবহেলাক্রমে হারিয়ে বসেছি । বিলেতি সভ্যতার কেজো অংশের সংস্পর্শে আমাদের মনের ভিত টলুক আর না টলুক, তার চূড়া ভেঙ্গে পড়েছে ।

এ বিষয়ে বৌদ্ধদর্শনের মত প্রণিধানযোগ্য । বৌদ্ধ-দার্শনিকেরা কল্পনা করেন যে, এ জগতে নানা লোক আছে । সব নীচে কামলোক, তার উপরে রূপলোক, তার উপরে ধ্যান-লোক ইত্যাদি ।

আমার ধারণা, আমরা সব জন্মতঃ কামলোকের অধিবাসী ; সুতরাং রূপলোকে যাওয়ার অর্থ আত্মার পক্ষে ওঠা, নামা নয় ।

আর এক কথা, রূপের চর্চার বিরুদ্ধে প্রধান আপত্তি এই যে, আমরা দরিদ্র জাতি—অতএব ও আমাদের সাধনার ধন নয় । এ ধারণার কারণ, ইউরোপের Commercialism আমাদের মনের উপর এ যুগে রাজার মত প্রভুত্ব করছে । সত্যকথা এই যে, জাতীয় শ্রীহীনতার কারণ অর্থের অভাব নয়,—মনের দারিদ্র্য । তার প্রমাণ, আমাদের হালফ্যাসানের বেশ-ভূষা সাজ-সজ্জা আচার অনুষ্ঠানের শ্রীহীনতা, সোনার-জলে ছাপানো বিয়ের কবিতার মত, আমাদের ধর্ম-সমাজেই বিশেষ করে ফুটে উঠেছে । আসল কথা, আমাদের নবশিক্ষার বৈজ্ঞানিক আলোক আমাদের জ্ঞাননেত্র উন্মীলিত করুক আর নাই করুক—আমাদের রূপকাণা করেছে । “গুণ হয়ে দোষ হল বিচার বিচার”—ভারতচন্দ্রের এ কথা স্তম্ভের দিক থেকে

দেখলে দেখা যাবে, আমাদের সকলের পক্ষেই সমান খাটে ।
 আর যদি এই কথাই সত্য হয় যে, আমরা সুন্দরভাবে বাঁচতে
 পারি নে—তাহলে আমাদের সুন্দরভাবে মরারই শ্রেয়ঃ । তাতে
 পৃথিবীর কারও কোন ক্ষতি হবে না,—এমন কি আমাদেরও
 নয় ।

ফাল্গুন, ১৩২৩ ।

ফাস্তুন ।

৭.

আমাদের দেশে কিছুই হঠাৎ বদল হয় না, ঋতুরও নয়। বর্ষা কেবল কখন কখন বিনা নোটিসে একেবারে ছড়দুম করে এসে গ্রীষ্মের রাজ্য জবরদখল করে নেয়। ও ঋতুর চরিত্র কিন্তু আমাদের দেশের ধাতের সঙ্গে মেলে না। প্রাচীন কবিরা বলে গেছেন, বর্ষা আসে দিগ্বিজয়ী যোদ্ধার মত,—আকাশে জয়ঢাক বাজিয়ে, বিদ্রোহের নিশান উড়িয়ে, অজস্র বরুণাস্ত্র বর্ষণ করে’; এবং দেখতে না দেখতে আসমুদ্র হিমালয় সমগ্র দেশটার উপর একছত্র আধিপত্য বিস্তার করে। এক বর্ষাকে বাদ দিলে, বাকী পাঁচটা ঋতু যে ঠিক কবে আসে আর কবে যায়, তা এক জ্যোতিষী ছাড়া আর কেউ বলতে পারেন না। আমাদের ছয় রাগের মধ্যে এক মেঘ ছাড়া আর পাঁচটা যেমন ‘এক সুর থেকে আর একটিতে বেমালাম ভাবে গড়িয়ে যায়, আমাদের স্বদেশী পঞ্চঋতুও তেমনি ভূমিষ্ঠ হয় গোপনে, ক্রম-বিকশিত হয় অলক্ষিতে, ক্রমবিলীন হয় পরঋতুতে।

ইউরোপ কিন্তু ক্রমবিকাশের জগৎ নয়। সে দেশের প্রকৃতি লাফিয়ে চলে, এক ঋতু থেকে আর এক ঋতুতে ঝাঁপিয়ে পড়ে, বছরে চারবার নব-কলেবর ধারণ করে, নবমুর্ত্তিতে দেখা দেয়। তাদের প্রতিটির রূপ যেমন স্বতন্ত্র তেমনি স্পষ্ট। ঋণের চোখ আছে তিনিই দেখতে পান যে, বিলেতের চারটি ঋতু চতুর্বর্ণ। মৃত্যুর স্পর্শে বহু যে এক হয়, আর প্রাণের স্পর্শে

এক যে বহু হয়, এ সত্য সে দেশে প্রত্যক্ষ করা যায় । সেখানে শীতের রং তুষার-গৌর, সকল বর্ণের সমষ্টি ; আর বসন্তের রং ইন্দ্রধনুর, সকল বর্ণের ব্যষ্টি । তারপর নিদাঘের রং ঘন-সবুজ, আর শরতের গাঢ়-বেগনি । বিলেতি ঋতুর চেহারা শুধু আলাদা নয়, তাদের আসাযাওয়ার ভঙ্গীও বিভিন্ন ।

সে দেশে বসন্ত শীতের শব-শীতল কোল থেকে রাতারাতি গা-ঝাড়া দিয়ে ওঠে, মহাদেবের যোগভঙ্গ করবার জন্ত মদন-সখা বসন্ত যে-ভাবে একদিন অকস্মাৎ হিমাচলে আবিভূত হয়েছিলেন । কোন এক সুপ্রভাতে, ঘুমভেঙ্গে চোখ মেলে হঠাৎ দেখা যায় যে, রাজ্যের গাছ মাথায় একরাশ ফুল পরে দাঁড়িয়ে হাসছে—অথচ তাদের পরণে একটিও পাতা নেই । সে রাজ্যে বসন্তরাজ তাঁর আগমনবার্তা আকাশের নীল পত্রে সাতরঙা ফুলের হরফে এমন স্পর্ক, এমন উজ্জ্বল করে ছাপিয়ে দেন যে, সে বিজ্ঞাপন—মানুষের কথা ছেড়ে দিন,—পশু-পক্ষীরও চোখ এড়িয়ে যেতে পারে না ।

ইউরোপের প্রকৃতির যেমন ক্রমবিকাশ নেই, তেমনি ক্রম-বিলয়ও নেই ; শরৎও সে দেশে কালক্রমে জরাজীর্ণ হয়ে, অলঙ্কিতে শিশিরের কোলে দেহত্যাগ করে না । সে দেশে শরৎ তার শেষ উইল, পাণ্ডুলিপিতে নয়—রক্তাক্ষরে লিখে রেখে যায়, কেননা মৃত্যুর স্পর্শে তার পিত্ত নয়,—রক্ত প্রকুপিত হয়ে ওঠে । প্রদীপ যেমন নেভবার আগে জ্বলে ওঠে, শরতের তাম্রপত্রও তেমনি ঝরবার আগে অগ্নিবর্ণ হয়ে ওঠে । তখন দেখতে মনে হয়, অস্পৃশ্য শত্রুর নিষ্পন্ন আলিঙ্গন হতে আত্মরক্ষা করবার জন্ত, প্রকৃতিসুন্দরী যেন রাজপুত্র রমণীর মত স্বহস্তে চিতা রচনা করে সোল্লাসে অগ্নি-প্রবেশ করছেন ।

(২)

এদেশে ঋতুর গমনাগমনটি অলঙ্কিত হলেও, তার পূর্ণা-
বতারটি ইতিপূর্বে আমাদের নয়নগোচর হত। কিন্তু আজ যে
ফাগুন মাসের পোনেরো তারিখ, এ সুখবর পাঁজি না দেখলে
জানতে পেতুম না। চোখের স্রুমুখে যা দেখছি, তা বসন্তের
চেহারা নয়, একটা মিশ্রঋতুর,—শীত ও বর্ষার যুগলমূর্তি।
আর এদের পরস্পরের মধ্যে পালায় পালায় চলছে সন্ধি ও
বিগ্রহ। আমাদের এই গ্রীষ্মপ্রধান দেশেও শীত ও বর্ষার
দাম্পত্যবন্ধন এভাবে চিরস্থায়ী হওয়াটা আমার মতে মোটেই
ইচ্ছনীয় নয়। কেননা এহেন অসবর্ণ বিবাহের ফলে শুধু
সঙ্কীর্ণবর্ণ দিবানিশার জন্ম হবে।

এই ব্যাপার দেখে আমার মনে ভয় হয় যে, হয়ত বসন্ত
ঋতুর খাতা থেকে নাম কাটিয়ে চিরদিনের মত এদেশ থেকে
সরে পড়ল। এ পৃথিবীটি অতিশয় প্রাচীন হয়ে পড়েছে ;
হয়ত সেই কারণে বসন্ত এটিকে ত্যাগ করে, এই বিশ্বের এমন
কোনও নবীন পৃথিবীতে গিয়ে আশ্রয় নিয়েছেন, যেখানে ফুলের
গন্ধে, পত্রের বর্ণে, পাখীর গানে, বায়ুর স্পর্শে আজও নরনারীর
হৃদয় আনন্দে আকুল হয়ে ওঠে।

আমরা আমাদের জীবনটা এমন দৈনিক করে তুলেছি যে,
ঋতুর কথা দূরে থাক—মাস পক্ষের বিভাগটারও আমাদের
কাছে কোনও প্রভেদ নেই। আমাদের কাছে শীতের দিনও
কাজের দিন, বসন্তের দিনও তাই ; এবং অমাবস্যাও ঘুমবার
রাত, পূর্ণিমাও তাই। যে জাত মনের আপিস কামাই করতে
জানেনা, তার কাছে বসন্তের অস্তিত্বের কোনও অর্থ নেই,
কোনও সার্থকতা নেই,—বরং ও একটা অনর্থেরই মধ্যে ;

কেননা ও ঋতুর ধর্মই হচ্ছে মানুষের মনভোলানো, তার কাজ ভোলানো। আর আমরা সব ভুলতে, সব ছাড়তে রাজি আছি—এক কাজ ছাড়া ; কেননা অর্থ যদি কোথায়ও থাকে ত ঐ কাজেই আছে ! বসন্তে প্রকৃতিসুন্দরী নেপথ্যবিধান করেন ; সে সাজগোজ দেখবার যদি কোনও চোখ না থাকে, তাহলে কার জন্মই বা নবীন পাতার রঙীন শাড়ী পরা, কার জন্মই বা ফুলের অলঙ্কার ধারণ, আর কার জন্মই বা তরুণ আলোর অরুণ হাসি হাসা ?—তার চাইতে চোখের জল ফেলা ভাল। অর্থাৎ এ অবস্থায় শীতের পাশে বর্ষাই মানায় ভাল। শুনতে পাই কোনও ইউরোপীয় দার্শনিক আবিষ্কার করেছেন যে, মানব-সভ্যতার তিনটি স্তর আছে। প্রথম আসে শ্রুতির যুগ, তারপর দর্শনের, তারপর বিজ্ঞানের। এ কথা যদি সত্য হয় ত, আমরা বাঙ্গালীরা আর যেখানেই থাকি—মধ্যযুগে নেই ; আমাদের বর্তমান অবস্থা হয় সভ্যতার প্রথম অবস্থা, নয় শেষ অবস্থা। আমাদের এ যুগ যে দর্শনের যুগ নয়, তার প্রমাণ,—আমরা চোখে কিছুই দেখি নে, কিন্তু হয় সবই জানি, নয় সবই শুনি। এ অবস্থায় প্রকৃতি যে আমাদের প্রতি অভিমান করে তাঁর বাসন্তী-মূর্ত্তি লুকিয়ে ফেলবেন, তাতে আর আশ্চর্য্য কি ?

(৩)

আমি এইমাত্র বলেছি যে, এ যুগে আমরা হয় সব জানি, নয় সব শুনি। কিন্তু সত্য-কথা এই যে, আমরা একালে যাকিছু জানি সে সব শুনেই জানি,—অর্থাৎ দেখে কিম্বা ঠেকে নয় ; তার কারণ, আমাদের কোন-কিছু দেখবার আকাঙ্ক্ষা নেই—আর সব-তাতেই ঠেকবার আশঙ্কা আছে।

এই বসন্তের কথাটাও আমাদের শোনা কথা, ও একটা গুজবমাত্র। বসন্তের সাক্ষাৎ আমরা কাব্যের পাকা খাতার ভিতর পাই, গাছের কচি পাতার ভিতর নয়। আর বইয়ে যে বসন্তের বর্ণনা দেখতে পাওয়া যায়—তা কস্মিনকালেও এ ভূ-ভারতে ছিল কি না, সে বিষয়ে সন্দেহ করবার বৈধ কারণ আছে।

গীতগোবিন্দে জয়দেব বসন্তের যে রূপবর্ণনা করেছেন, সে রূপ বাঙ্গলার কেউ কখনো দেখে নি। প্রথমতঃ, মলয়সমীরণ যদি সোজাপথে সিধে বয়, তাহলে বাঙ্গলাদেশের পায়ের নীচে দিয়ে চলে যাবে, তার গায়ে লাগবে না। আর যদি তর্কের খাতিরে ধরেই নেওয়া যায় যে, সে বাতাস উদ্ভাস্ত হয়ে, অর্থাৎ পথভুলে, বঙ্গভূমির গায়েই এসে ঢলে পড়ে,— তাহলেও লবঙ্গ-লতাকে তা' কখনই পরিশীলিত করতে পারে না। তার কারণ, লবঙ্গ গাছে ফলে, কি লতায় ঝোলে, তা আমাদের কারও জানা নেই। আর হোক না সে লতা, তার এদেশে দোতুল্যমান হবার কোনই সম্ভাবনা নেই এবং ছিল না। সংস্কৃত আলঙ্কারিকেরা “কাবেরীতীরে কালাগুরুতরুর” উল্লেখ ঘোরতর আপত্তি করেছেন, কেননা ও বাক্যটি যতই শ্রুতিমধুর হোক না কেন—প্রকৃত নয়। কাবেরীতীরে যে কালাগুরুতরু কালে-ভদ্রেও জন্মাতে পারে না—এ কথা জোর করে আমরা বলতে পারি না; অপরপক্ষে অজয়ের তীরে লবঙ্গলতার আবির্ভাব এবং প্রাদুর্ভাব যে একেবারেই অসম্ভব—সে কথা বঙ্গভূমির বীরভূমির সঙ্গে যাঁচ চাক্ষুষ পরিচয় আছে, তিনিই জানেন। ঐ এক উদাহরণ থেকেই অনুমান, এমন কি প্রমাণ পর্য্যন্ত করা যায় যে, জয়দেবের বসন্তবর্ণনা কাল্পনিক—অর্থাৎ সাদা ভাষায় যাকে বলে অলীক। যার প্রথম কথাই মিথ্যে, তার

কোন কথায় বিশ্বাস করা যায় না ;—অতএব ধরে নেওয়া যেতে পারে যে, এই কবিবর্ণিত বস্তু আগাগোড়া মনগড়া ।

জয়দেব যখন নিজের চোখে দেখে বর্ণনা করেন নি, তখন তিনি অবশ্য তাঁর পূর্ববর্তী কবিদের বই থেকে বসন্তের উপাদান সংগ্রহ করেছিলেন ; এবং কবিপরম্পরায় আমরাও তাই করে আসছি । সুতরাং এ সন্দেহ স্বতঃই মনে উদয় হয় যে, বসন্ত-ঋতু একটা কবিপ্রসিদ্ধিমাত্র ;—ও বস্তুর বাস্তবিক কোনও অস্তিত্ব নেই । রমণীর পদতাড়নার অপেক্ষা না রেখে, অশোক যে-ফুল ফোটায়, তার গায়ে যে আলতার রঙ দেখা দেয়, এবং ললনাদের মুখমণ্ডলসিক্ত না হলেও বকুলফুলের মুখে যে মদের গন্ধ পাওয়া যায়,—এ কথা আমরা সকলেই জানি । এ দুটি কবিপ্রসিদ্ধির মূলে আছে, মানুষের ওঁচিতি-জ্ঞান । প্রকৃতির যথার্থ কার্যাকারণের সম্মান পেলেই বৈজ্ঞানিক কৃতার্থ হন—কিন্তু কবি কল্পনা করেন তাই, যা হওয়া উচিত ছিল । কবির উক্তি হচ্ছে প্রকৃতির যুক্তির প্রতিবাদ । কবি চান সুন্দর, প্রকৃতি দেন তার বদলে সত্য । একজন ইংরাজ কবি বলেছেন যে, সত্য ও সুন্দর একই বস্তু—কিন্তু সে শুধু বৈজ্ঞানিকদের মুখ বন্ধ করবার জন্য । তাঁর মনের কথা এই যে, যা সত্য তা অবশ্য সুন্দর নয়, কিন্তু যা সুন্দর তা অবশ্যই সত্য ; অর্থাৎ তার সত্য হওয়া উচিত ছিল । তাই আমার মনে হয় যে, পৃথিবীতে বসন্তঋতু থাকা উচিত—এই ধারণাবশতঃ সেকালের কবিরা কল্পনাবলে উক্ত ঋতুর সৃষ্টি করেছেন । বসন্তের সকল উপাদানই তাঁরা মন-অঙ্কে সংগ্রহ করে, প্রকৃতির গায়ে তা বসিয়ে দিয়েছেন ।

(৪)

আমার এ অনুমানের স্পষ্ট প্রমাণ সংস্কৃত-কাব্যে পাওয়া যায়, কেননা পুরাকালে কবিরা সকলেই স্পষ্টবাদী ছিলেন । সেকালে তাঁদের বিশ্বাস ছিল যে, সকল সত্যই বক্তব্য,—সে সত্য মনেরই হোক, আর দেহেরই হোক । অবশ্য একালের রুচির সঙ্গে সেকালের রুচির কোনও মিল নেই ; সেকালে সুরুচির পরিচয় ছিল, কথা ভাল করে বলায়,—একালে ও গুণের পরিচয়, চুপ করে থাকায় । নীরবতা যে কবির ধর্ম, এ জ্ঞান সেকালে জন্মে নি । সুতরাং দেখা যাক—তাঁদের কাব্য থেকে বসন্তের জন্ম-কথা উদ্ধার করা যায় কি না ?

সংস্কৃত মতে বসন্ত মদন-সখা । মনসিজের দর্শনলাভের জন্ম মানুষকে প্রকৃতির দ্বারস্থ হতে হয় না । কেননা, মন যার জন্মস্থান, তার সাক্ষাৎ মনেই মেলে ।

ও-বস্তুর আবির্ভাবের সঙ্গে সঙ্গেই মনের দেশের অপূর্ব রূপান্তর ঘটে,—তখন সে রাজ্যে ফুল ফোটে, পাখী ডাকে, আকাশ বাতাস বর্ণে গন্ধে ভরপুর হয়ে ওঠে ।—মানুষের স্বভাবই এই যে, সে বাইরের বস্তুকে অন্তরে, আর অন্তরের বস্তুকে বাইরে প্রতিষ্ঠিত করতে চায় । এই ভিতর-বাইরের সমন্বয় করাটাই হচ্ছে আত্মার ধর্ম । সুতরাং মনসিজের প্রভাবে মানুষের মনে যে রূপরাজ্যের সৃষ্টি হয়, তারই প্রতি-মূর্তিস্বরূপে বসন্তঋতু কল্পিত হয়েছে,—আসলে ও ঋতুর কোনও অস্তিত্ব নেই । এর একটি অকাট্য প্রমাণ আছে । যে শক্তির বলে, মনোরাজ্যের এমন রূপান্তর ঘটে—সে হচ্ছে যৌবনের শক্তি । তাই আমরা বসন্তকে প্রকৃতির যৌবনকাল বলি, অথচ এ কথা আমরা কেউ ভাবি নে যে, জন্মাবামাত্র যৌবন কারও

দেহ আশ্রয় করে না ; অথচ পয়লা ফাল্গুন যে বসন্তের জন্মতিথি,
—এ কথা আমরা সকলেই জানি । অতএব দাঁড়াল এই যে,
বসন্ত প্রকৃতির রাজ্যে একটা আরোপিত ঋতু ।

আমার এ সব যুক্তি যদিও সূক্ষ্ম নহে—তাহলেও আমা-
দের মনে নিতে হবে যে বসন্ত মানুষের মনোকল্পিত ; নচেৎ
আমাদের স্বীকার করতে হয় যে, বসন্ত ও মনোজ, উভয়ে সম-
ধর্ম্য হলেও উভয়েরই স্বতন্ত্র অস্তিত্ব আছে । বলা বাহুল্য, এ
কথা মানার অর্থ সংস্কৃতে যাকে বলে দ্বৈতবাদ, এবং ইংরাজিতে
Parallelism—সুই বাতিল দর্শনকে গ্রাহ্য করা । সে ত
অসম্ভব । অবশ্য অনেকে বলতে পারেন যে, বসন্তের অস্তিত্বই
প্রকৃত, এবং তার প্রভাবেই মানুষের মনের যে বিকার উপস্থিত
হয়, তারই নাম মনসিজ । এ ত পাকা জড়বাদ, অতএব বিনা
বিচারে অগ্রাহ্য ।

আমার শেষ কথা এই যে, এ পৃথিবীতে বসন্তের যখন
কোনকালে অস্তিত্ব ছিল না, তখন সে অস্তিত্বের কোনকালে
লোপ হতে পারে না । আমরা ও-বস্তু যদি হারাই, তবে—
আমাদের অমনোযোগের দরুণ । যে জিনিস মানুষের মনগড়া,
তা মানুষের মন দিয়েই খাড়া রাখতে হয় । পূর্ব-কবিরা কায়-
মনোবাক্যে যে রূপের-ঋতু গড়ে তুলেছেন—সেটিকে হেলায়
হারানো বুদ্ধির কাজ নয় । সুতরাং বৈজ্ঞানিকেরা যখন
বস্তুগত প্রকৃতিকে মানুষের দাসী করেছেন, তখন কবিদের
কর্তব্য হচ্ছে কল্পনার সাহায্যে তাঁর দেবীত্ব রক্ষা করা । এবং
এ উদ্দেশ্য সাধন করতে হলে তাঁর মূর্তির পূজা করতে হবে,—
কেননা পূজা না পেলে দেবদেবীরা যে অন্তর্ধান হন,—এ সত্য
ত ভূবনবিখ্যাত । দেবতা যে মন্ত্রাত্মক । আর এ পূজা যে

অবশ্যক হইয়া তার কারণ, বসন্ত যদি অতঃপর আমাদের অন্তরে
লাট খেয়ে যায়—তাহলে সরস্বতীর সেবকেরা নিশ্চয়ই ক্ষীণ হই
উঠবে, তাতে করে বঙ্গ-সাহিত্যের জীবনসংশয় ঘটতে পারে
এ স্থলে সাহিত্য-মাজকে স্মরণ করিয়ে দিতে চাই যে, একাদে
আমরা যাকে সরস্বতীপূজা বলি, আদিতে তা ছিল বসন্তোৎসব।

চৈত্র, ১৩২৩।



ঐপ্রমথ চৌধুরী

